



can

610



Manca la prima parte, cioè Rhetorica  
rum ad Herennium, De Inventione,  
Topica, Partitiones.

Cospicua dall' edizione del 1546  
con lo stesso spazio al sop-  
ra foglio 134. Renouard

I, 353. Per questa edizione

del 1550 non ha la Rhetorica  
ad Herennium, De Inventione,

in Topica, De Partitionibus Oratorum,

Il presente esemplare ha:

due soltanto il Secundum il

Primum, il Primum, e il Primum

Primum


[A. Nicol. To I. p. 353 m. 5]

DE ORATORE,  
CICERONIS AD Q. FRATREM  
LIBRI III.



CORRIGENTE PAVLO MANV-  
TIO, ALDI FILIO.

VENETIIS, M. D. L.





68.5.H.1

LIBRARY OF THE  
MUSEUM OF NATURAL HISTORY  
LONDON



CORRIGENDA  
TIO, ALDI HIO.

VENETIS, M. D. L.



AD IOANNEM MONLUCIVM,

Christianissimi Regis consiliarium, eiusdēq;

apud Venetā Rempublīcā oratorem,

Pauli Manutij, Aldi filij, in

Ciceronis oratorios li-

bros prefatio.



Q VOD te non fugit Monluci sapien-  
tissime, præstare omnes cæteris ho-  
minibus, sed alius alia re vult. non  
enim uniusmodi sunt nostræ volun-  
tates, sed quoniam ex animo, qui uar-  
rie afficitur, tanquam ex typo effinguntur, ipsæ quo-  
que uariæ sint, & multiformes, necesse est. ergo non  
eadem omnibus prima sunt. Quoniam uero ex ijs,  
quæ appetuntur, necesse est aliquid excellat, ut de mul-  
tis optabilibus unum optabile maxime sit: quid sit id,  
quod ego cæteris præstare putem, si de me quærat; dicam, id, quod qui assequuntur, eorum in potestate sen-  
sus omnium animiq; sunt. id autem sine dubio elo-  
quentia est: quæ tantum possidet dignitatis, ut infra  
uel eorum fortuna, quorum imperium provincie nu-  
tumq; sequuntur, me quidem iudice constituentur: cū  
ita accidat, ut ab hac quamcunque in partem uolentes  
ducamur, illis inuiti sæpe pareamus. Sed quoniam  
quo loco posita laus est, eum locum maximis difficulta-  
tibus Natura circumsepsit, ut perueniendi facultatem  
paucissimis relinqueret: non est, quare nobis in mentem  
ueniat mirari, cur neque diuturna, neq; in multis per-  
fecta fuerit species eloquentiæ. illud uideo, cum in hanc

cogitationem mentis aciem intendi, bene dicendi gloriā  
duabus rebus ali maxime, otio & libertate. itaque in  
urbe Roma, quæ bonorum oratorum quasi fecunda ge-  
nitrix partus edidit uberrimos, neq; ante secundum Pu-  
nicum bellum, neque post Cæsaris dominationem ma-  
gnopere fuit, quod in hoc genere probares. Annibale ui-  
cto, hostis Italiæ terribilis nemo fuit. tum in Vrbe securi-  
tas, tum summa tranquillitas orta: tum seditioforū ho-  
minum ingenia popularibus concionibus acuit ambitio.  
conciones inquam eloquentiam pepererunt: nisi quid  
me fallit ratiocinantem: ratiocinor autem sic, & per  
hos quasi gradus interrogatōis ascendo: Eloquentiæ  
quod summum fuit propositum præmiū? Consulā-  
tus: qui summus honor fuit, Consulatum quis manda-  
uit? populus. populum quis tenuit? concionator opti-  
mus. ergo à concionibus exitit orator. idemq; sublati  
concionibus nullus fuit. cū enim ciuilibus armis oppressa  
Respublica iaceret; uetus consuetudo periisse; à populo,  
cuius potestas uniuersi translata ad unum esset, nō iam  
magistratus, non præfecturæ petērentur: eloquentiæ,  
quæ populi gratiam honorum spe quæsierat, inanis o-  
mnis & superuacua fuit exercitatio. sic oratoria facul-  
tas, summorum hominum studijs exercitationibusq; cul-  
ta, cum à duobus Gracchis ad C. Cæsaris ætatem, hoc  
est per annos centum ferè ita uigisset, ut nihil unquā  
fuerit illustrius: non effugit rerum humanarum com-  
mune fatum: quas ubi ad summum siue industria, si-  
ue natura perduxit, retro ferè præcipiti lapsu reuoluun-  
tur. Imperatores deinde multi rem Romanum excepe-  
runt: quorū ætatibus uestigium ueteris eloquentiæ nul-

lum agnosceres. quid post? multo minus. nam impe-  
rii sede in Graciam translata, crebrae uastationes Italiae  
consecutae, cum influentis barbararum nationum copias  
reprimeret nemo. tum non eloquentia modo, sed ipsa  
penè literarum memoria funditus deleta, nec suus est bo-  
nis disciplinis honor nisi multis post seculis restitutus. pa-  
trum denique, aut auorum nostrorum memoria, cum ex-  
teros mores Italici caeli temperies aliquando ad humani-  
tatem deduxisset, paululum oculos literae sustulerunt. do-  
ctrina primū, serius enituit eloquentia: nec mirum: do-  
ctrinā enim sine eloquentia laudamus; eloquentem sine  
doctrina recte intelligens nemo duxit. nūc in oratorum  
nomine, quod eximium semper fuit, nihilo minor, atque  
haud scio an etiam maior, quā priscis illis temporibus,  
dignitas & amplitudo est. mittuntur à Regibus ad Re-  
ges, aut ad liberas ciuitates, qui non de stillicidijs agant,  
non de iure fundi; quarum rerum controuersias qui  
perite, & copiose disceptarunt, scimus olim habitos esse  
eloquentes; sed ea tractent, quae prudenter disputata,  
otium gentibus constituere, dignitatē imperij conserva-  
re, terminos proferre possunt. hoc qui praestat, eū ego ue-  
teribus oratoribus non comparo solum, sed etiam ante-  
pono. illi causas agebant primū apud iudices sorte du-  
ctos, deinde apud eos iudices, quibus de aliena re, non de  
sua iudicantibus persuadere orator siue hoc, siue illud  
non magno negotio posset. nūc agitur in consilio lectis-  
simorum uirorum: agitur ijs de rebus, unde ad eos ipsos,  
qui iudicant, maximum potest siue emolumentum, si-  
ue damnum redundare; cum & de publica re iudi-  
cent, & in publica, extra quam nihil est, priuata

cuiusque contineatur. his probare quæ uelis, eo maioris ingenij uidetur esse, quo difficilius ab artificio capitur prudentia. itaque cum hoc multi uoluerint, magnum decus, atq; ornamentum est eorum, quibus contingit, ut possent; qui sanè pauci sunt: maximum uero, si cui tantum aut natura dedit, aut exercitatio doctrinæ, ut inter hos ipsos emineret. qualem si quis te iudicet Mon-  
luci clarissime, hunc ego recte iudicare non dubitem. nam si consideremus, primum à quo missus orator sis, deinde ad quos, tum quibus de rebus missus: ita reperiemus, missum ab eo Rege, qui omnes Reges sapientia uicerit, quoniam quidem omnium unus, quid contra Fortunam uirtus posset, maxime declarauit: ad eam Rempublicam, quæ nisi sapientissimorum ciuium copia floureret, semperq; florisset, profecto neque tanta nunc esset, cum olim minima fuerit; neque tam diu staret, cum ceteræ Respublicæ suorum ciuium temeritate cōciderint: ijs autem de rebus esse missum, quarum quæ magnitudo sit, ex eorum, ad quos pertinent, opibus apparet; quæ tantæ sunt, ut paucorum imperijs distribu-  
tus terrarum orbis teneatur. Et cum hæc legatio tibi perhonorifica fuit, tum illud ad tui nominis celebritatē longe maximum accessit, quòd cum à Principe Turcæ-  
rum Solymano pacem defessa bellis Europa peroptaret, eaq; sine Christianissimi Regis intercessione desperaretur; unus electus qui tantum muneris obires, acceptis à Rege mādatis, æstate media, summis caloribus in Græciam nauigasti. pacem ut componeres, optabatur: composuisti. hieme summa, difficillimis itineribus, per dispositos equos in Galliam recurristi. exceptus alia cura,

cum de sedandis inter Regem tuum, Regemq; Britanū  
magni momenti controuersijs ageretur, præfuisisti te cō=  
sulente, agente, ultro citroq; cursante, abiectis armis pax  
inter eos firmissimo fœdere constituta. habes hoc omni=  
no Monluci, non dico à Fortuna, quam casus & teme=  
ritas regit, sed à te ipso: qui ad consilium & rationem  
omnia refers, ut in tuis actionibus felix usquequaque  
sis. nimirum fors, quam in rebus humanis dominari  
quidam sunt opinati, non omnium est æque communis,  
sed ipsa sibi uirtus propriam fortunam architectatur.  
non erras, quia non est errare sapientis: & quia sa=  
pienter agis, omnia procedunt. bonus etiam orator es,  
quia bonus uir: ingenium enim probitas cōmendat; nec  
minus mouet is, qui dicit, quàm ea, quæ dicuntur. quòd  
nisi latinum sermonem in Italia peregrinitas immutasse=  
set, nā tu nobis longo interuallo & Crassos, & Antoe=  
nios retulisses. sed quoniam ea lingua utimur, quam  
multis coeuntibus linguis generatam corrupta consue=  
tudo peperit: ueteribus Romanis oratione dissimilis, in=  
genio simillimus, non tu quidem loqueris ut illi, sed ut  
illi tamen & sapis & persuades. Quare non fuit ab  
re, cum ego eos libros, in quibus perfecti formam orato=  
ris à Cicerone uidemus expressam, mendis antea defor=  
matis, nunc mea correctione expolitos emitterem: non  
fuit inquam ab re, tuo nomini dicatos emittere; ut quæ  
de perfecto oratore traduntur, ea perfecti item oratoris  
titulo cohonestarentur. hoc cum ita existimasset, quia  
uidebatur esse aptissimum, feci, & feci eo libentius,  
q, cum tu mihi & multa iam summæ humanitatis offi=  
cia tribuisses, & is esses, qui tribuere etiā maiora posses;

ego, nisi aliquid, præsertim ubi daretur occasio, retribu-  
erem, uerebar ne, ex duobus maxime insignibus  
uitiis, alterutrius infamiam non effugerem, ut uel ea  
uiderer, quæ à te accepissem, minus meminisse, quod  
à consuetudine naturaq; mea alienissimum est; uel  
ea, quæ sperari possent, negligere; quod quia  
superbi esset, abest non modo à for-  
tuna mea, sed & à uolun-  
tate plurimum. Vale.

M. D. XLVI.

Venetijs.

5

M. TVLLII CICERONIS.  
AD QVINTVM FRAT-  
REM DIALOGI  
DE ORATORE.

OGITANTI mibi sapenume-  
ro, & memoria uetera repetenti, per  
C beati fuisse Quinte frater illi uideri  
solent, qui in optima rep. cum &  
honoribus, & rerum gestarum glo-  
ria florent, eum uitæ cursum tenere potuerunt, ut  
uel in negotio sine periculo, uel in otio cum dignitate  
esse possent. Ac fuit quidem tempus illud, cum mihi  
quoque initium requiescendi, atque animum ad utrius-  
usque nostrum præclara studia referendi fore, iustum,  
& propè ab omnibus concessum esse arbitrarer, si  
infinitus forensium rerum labor, & ambitionis oc-  
cupatio decursu honorum, etiam ætatis flexu consti-  
tisset. quam spem cogitationum, & consiliorum meo-  
rum cum graues communium temporum, tum uarij  
nostri casus sefellerunt. nam qui locus quietis, &  
tranquillitatis plenissimus fore uidebatur; in eo max-  
imæ molestiarum, & turbulentissimæ tempestates  
extiterunt. Neque uero nobis cupientibus, atque optan-  
tibus fructus otij datus est ad eas artes, quibus à  
pueris dediti fuimus, celebrandas, inter nosq; reco-  
lendas. nam & prima ætate incidimus in ipsam  
perturbationem disciplinæ ueteris: & Consulatu de-  
uenimus in medium rerum omnium certamen, atque  
discrimen: & hoc tempus omne post Consulatum ob-



ieciimus ijs fluctibus, qui per nos à cōmuni peste depulsi, in nosmet ipsos redundarunt. Sed tamen in his uel asperitatibus rerum, uel angustijs temporis obsequar studijs nostris: & quantum mihi uel fraus inimicorum, uel causæ amicorum, uel ipsa resp. tribuet otij, ad scribendum potissimum conferam. Tibi uero frater neque hor tanti deero, neque roganti. nam neq; auctoritate quisquam apud me plus ualere te potest, neque uoluntate. Ac mihi repetenda est ueteris cuiusdam memorie non sanè satis explicata recordatio, sed, ut arbitror, apta ad id, quod requiris: ut cognoscas, quæ uiri omnium eloquentissimi, clarissimiq; senserint de omni ratione dicendi. uis enim, ut mihi sæpe dixisti, quoniā, quæ pueris, aut adolescentulis nobis ex commentariolis nostris inchoata, atque rudia exciderunt, uix hac ætate digna, & hoc usu, quem ex causis, quas diximus, tot, tantisq; consecuti sumus; aliquid iisdem de rebus politius à nobis, perfectiusq; proferri: solesq; nonnunquā hac de re à me in disputationibus nostris dissentire; quòd ego eruditissimorum hominum artibus eloquentiam contineri statuam, tu autem illam ab elegantia doctrinæ segregandam putes, & in quodam ingenij, atque exercitationis genere ponendam. Ac mihi quidem sæpenumero in summos homines, ac summis ingenijs præditos intuenti, quærendum esse uisum est, quid esset, cur plures in omnibus artibus, quàm in dicendo, admirabiles extitissent. nam quocunque re animo, & cogitatione conuerteris, permultos excellentes in quocunque genere uidebis, non medicum artium, sed propè maximarum. quis enim est,

qui, si clarorum hominum scientiam rerum gestarum  
uel utilitate, uel magnitudine metiri uelit, non antepo-  
nat oratori Imperatorem? quis autem dubitet, quin  
belli duces ex hac una ciuitate praestantissimos penè in-  
numerabiles, in dicendo autem excellentes uix paucos  
proferre possimus? Iam uero, consilio, ac sapientia qui  
regere, ac gubernare remp. possent, multi nostra, plures  
patrum memoria, atque etiam maiorum extiterunt:  
cum boni perquandiu nulli, uix autem singulis etati-  
bus singuli tolerabiles oratores inuenirentur. Ac ne-  
quis forte cum alijs studijs, quæ reconditis in artibus,  
atque in quadam uarietate literarum uersentur, ma-  
gis hanc dicendi rationem, quàm tum Imperatoris  
laude, aut cum boni senatoris prudentia comparan-  
dam putet: conuertat animum, & ea ipsa artium  
genera circûspiciat, quiq; in ijs floruerint, quamq; mul-  
ti: sic facillime, quanta oratorum sit, semperq; fuerit  
paucitas, iudicabit. Neque enim te fugit, laudanda-  
rum artium omnium procreatricem quandam, &  
quasi parentem, eam, quam φιλοσοφία Græci uocant,  
ab hominibus doctissimis indicari: in qua, difficile est  
enumerare, quot uiri, quanta scientia, quantaq; in suis  
studijs uarietate, & copia fuerint; qui non aliqua in  
re una separatim elaborarint, sed omnia, quæcunque  
essent, uel scientiæ peruestigatione, uel differendi ratio-  
ne comprehenderint. Quis ignorat, ij, qui mathematici  
uocantur, quanta in obscuritate rerum, & quàm re-  
condita in arte, & multiplici, subtiliq; uersentur? quo  
tamen in genere ita multi perfecti homines extiterunt,  
ut nemo ferè studuisse ei scientiæ uehementius uideas

## D E O R A T O R E

tur, quin, quod uoluerit, consecutus sit. Quis musicis, quis huic studio literarum, quod profitentur ijs, qui græmatici uocantur, penitus se dedit, quin omnem illarum artium penè infinitam uim, & materiam scientiæ, & cognitione comprehenderit? Vere mihi hoc uideor esse dicturus: ex omnibus ijs, qui in harum artium studijs liberalissimis sint, doctrinisq; uersati, minimam copiam poetarum egregiorum extitisse: atque in hoc ipso numero, in quo perraro exoritur aliquis excellens, si diligenter & ex nostrorum, & Græcorum copia comparare uoles, multo tamen pauciores oratores, quàm poetæ boni reperientur. Quod hoc etiam mirabilius debet uideri, quia cæterarum artium studia ferè reconditis, atque abditis è fontibus hauriuntur: dicendi autem omni ratio in medio posita, communi quodam in usu, atque in hominum more, & sermone uersatur: ut in cæteris id maxime excellat, quod longissime sit ab imperitorum intelligentia, sensuq; disiunctum; in dicendo autem uitium uel maximum sit, à uulgari genere orationis, atque à consuetudine communis sensus abhorrere. Ac ne illud quidem uere dici potest, aut plures cæteris artibus inseruire, aut maiore delectatione, aut spe uberiore, aut præmijs ad perdiscendum amplioribus commoueri. Atque, ut omittam Græciam, quæ semper eloquentiæ princeps esse uoluit, atque illas omnium doctrinarum inuentrices Athenas, in quibus summa dicendi uis & inuenta est, & perfecta. in hac ipsa ciuitate profecto nulla unquam uehementius, quàm eloquentiæ studia uiguerunt. Nā posteaquam imperio omnium gentium constituto, diu-

turnitas pacis otium confirmavit; nemo ferè laudis cupidus adolescens non sibi ad dicendum studio omni enitendum putauit. Ac primo quidem totius rationis ignari, qui neque exercitationis ullam uiam, neque aliquod præceptum artis esse arbitrarentur, tantum, quantum ingenio, & cogitatione poterant, consequebantur. post autem auditis oratoribus Græcis, cognitisq; eorum literis, adhibitisq; doctores, incredibili quodam nostri homines dicendi studio flagrauerunt. Excitabat eos magnitudo, & uarietas, multitudoq; in omni genere causarum, ut ad eam doctrinam, quam suo quisque studio consecutus esset, adiungeretur usus frequens; qui omnium magistrorum præcepta superaret. Erant autem huic studio maxima, quæ nunc quoque sunt, proposita præmia, uel ad gratiam, uel ad opes, uel ad dignitatem. ingenia uero, ut multis rebus possumus iudicare, nostrorum hominum multum ceteris hominibus omnium gentium præstiterunt. Quibus de causis, quis non iure miretur, ex omni memoria ætatum, temporum, ciuitatum, tam exiguum oratorum numerum inueniri? Sed nimirum maius est hoc quiddam, quam homines opinantur, & pluribus ex artibus, studiisq; collectum. Quis enim aliud in maxima discen-  
tium multitudine, summa magistrorum copia, præstantissimis hominum ingenijs, infinita causarum uarietate, amplissimis eloquentiæ propositis præmijs, esse causæ putet, nisi rei quandam incredibilem magnitudinem, ac difficultatem? Est enim & scientia comprehendenda rerum plurimarum, sine qua uerborum uolubilitas inanis, atq; irridenda est: & ipsa

oratio conformanda non solum electione, sed etiam constructione uerborum: & omnes animorum motus, quos hominum generi rerum natura tribuit, penitus perno-  
scendi; quod omnis uis, ratioq; dicendi in eorum, qui audiunt, mentibus aut sedandis, aut excitandis ex-  
primenda est. Accedat eodem oportet lepos quidam, fa-  
cetiæq; , & eruditio libero digna, celeritasq; , & bre-  
uitas & respondendi, & laceffendi, subtili uenustate,  
atque urbanitate coniuncta. Tenenda praterea est om-  
nis antiquitas, exemplorumq; uis: neque legum, aut  
iurisciuiilis scientia negligenda. Nā quid ego de actio-  
ne ipsa plura dicam? quæ motu corporis, quæ gestu,  
quæ uultu, quæ uocis conformatione, ac uarietate mo-  
deranda est. quæ sola per se ipsa quanta sit, histrionum  
leuis ars, & scena declarat. in qua cum omnes in oris,  
& uocis, & motus moderatione elaborent: quis igno-  
rat, quā pauci sint, fuerintq; , quos animo æquo spe-  
ctare possimus? Quid dicam de thesauro rerum om-  
nium memoria? quæ nisi custos inuentis, cogitatisq; re-  
bus, & uerbis adhibeatur: intelligimus omnia, etiam si  
præclarissima fuerint, in oratore peritura. Quamob-  
rem mirari desinamus, quæ causa sit eloquentium pau-  
citatibus; cum ex illis rebus uniuersis eloquentia constet,  
quibus in singulis elaborare permagnum est: horte-  
murq; potius liberos nostros, ceterosq; , quorum glo-  
ria nobis, & dignitas chara est, ut animo rei magni-  
tudinem complectantur; neque ijs aut præceptis, aut  
magistris, aut exercitationibus, quibus utuntur omnes,  
sed alijs quibusdam se id, quod expetunt, consequi  
posse confidant. Ac mea quidem sententia nemo pote-

rit esse omni laude cumulat<sup>us</sup> orator, nisi erit omnium rerum magnarum, atque artium scientiam consecutus. etenim ex rerum cognitione efflorescat, & redundet oportet oratio: quæ, nisi subest res ab oratore percepta, & cognita, inanem quandam habet elocutionem, & penè puerilem. neque uero ego hoc tantum oneris imponam, nostris præsertim oratoribus in hac tanta occupatione urbis, ac uitæ, nihil ut ipsi putem licere nescire: quanquam uis oratoris, professioq; ipsa bene dicendi hoc suscipere, ac polliceri uideatur; ut omni de re, quæcunque sit proposita, ab eo ornate, copiosèq; dicatur. sed quia non dubito, quin hoc plerisque immensum, infinitumq; uideatur; & quòd Græcos homines non solum ingenio, & doctrina, sed etiam otio, studioq; abundantes partitionem quandam artium fecisse uideo, neque in uniuerso genere singulos elaborasse, sed seposuisse à cæteris dictionibus eam partem dicendi, quæ in forensibus disputationibus iudiciorum, aut deliberationum uersaretur, & id unum genus oratori reliquisse: non completar in his libris amplius, quàm quod huic generi, requæsita, & multum disputata, summorum hominum propè consensu est tributum: repetamq; non ab incunabulis nostræ ueteris, puerilisq; doctrinæ quendam ordinem præceptorum, sed ea, quæ quondam accepi in nostrorum hominum eloquentissimorum, & omni dignitate principum disputatione esse uersata: non quo illa contemnam, quæ Græci dicendi artifices, & doctores reliquerunt: sed, cum illa pateant, in promptuq; sint omnibus, neque ea interpretatione mea aut

ornatius explicari, aut planius exprimi possint; dabis hanc ueniam mi frater, ut opinor, ut eorum, quibus summa dicendi laus à nostris hominibus concessa est, auctoritatem Græcis anteponam.

CUM igitur uehementius inueheretur in causam principum Cos. Philippus; Drusiq; Tribunatus pro senatus auctoritate susceptus, infringi iam; ac debilitari uideretur: dici memini, ludorum Romanorum diebus L. Crassum quasi colligendi sui causam se in Tusculanum contulisse. uenisse eodem, socer eius qui fuerat, Q. Mutius dicebatur, & M. Antonius, homo & consiliorum in rep. socius, & summa cum Crasso familiaritate coniunctus. exierant autem cum ipso Crasso adolescentes & Drusi maxime familiares, & in quibus magnam tum spem maiores natu dignitatis suæ collocarant, C. Cotta, qui tum Tribunatum pl. petebat, & P. Sulpitius, qui deinceps eum magistratum petiturus putabatur. Hi primo die de temporibus illis, deq; uniuersa rep. quæ ob causam uenerant, multum inter se usque ad extremum tempus diei collocuti sunt. quo quidem in sermone multa diuinitus à tribus illis Cons. Cotta & commemorata, & deplorata narrabat: ut nihil incidisset postea ciuitati mali, quod non impendere illi tanto ante uidissent. eo autem omni sermone confecto, tantam in Crasso humanitatem fuisse, ut, cum lauti ac cubuissent, tolleretur omnis illa superior tristitia sermonis; eaq; esset in homine iucunditas, & tantus in iocando lepos, ut dies inter eos curiæ fuisse uideretur, conuiuium Tusculani. Postero autem die,

cum



cum illi maiores natu satis quiescent, in ambulationem uentum esse dicebat: tum Scaeuolam duobus spatijs, tribus uel factis dixisse, cur non imitamur Crasse Socratem illum, qui est in Phædro Platonis? nā me hæc tua platanus admonuit, quæ nō minus ad opacandum hūc locum patulis est diffusa ramis, q̄ illa, cuius umbram secutus est Socrates: quæ mihi uidetur non tam ipsa aquula, quæ describitur, quā Platonis oratione creuisset. Et quod ille durissimis pedibus fecit, ut se abiceret in herba, atque ita illa, quæ philosophi diuinitus ferūt esse dicta, loqueretur; id meis pedibus certe concedi est æquius. Tum Crassum, Immo uero cōmodius etiam: puluinosq; poposcisse, et omnes in ijs sedibus, quæ erāt sub platano, consedissee dicebat. Ibi, ut ex pristino sermone relaxarentur animi omnium, solebat Coita narrare, Crassum sermonem quendam de studio dicendi intulisse. Qui cum ita esset exorsus: non sibi cohortandum Sulpitium, et Cottam, sed magis utrunque collaudandum uideri, quod tātam iam essent facultatem adepti, ut non æqualibus suis solum anteponerentur, sed cum maioribus natu compararentur: Neque uero mihi quidquā, inquit, præstabilius uidetur, quā posse dicendo tenere hominum cœtus, mentes allicere, uoluntates impellere, quod uelis; unde autem uelis, deducere. hæc una res in omni libero populo, maximeq; in pacatis, tranquillisque ciuitatibus, præcipue semper floruit, semperq; dominata est. quid enim est aut tam admirabile, quā ex infinita multitudine hominū existere unum, qui id, quod omnibus natura sit datum, uel solus, uel cum paucis facere possit? aut tam iucun-



dum cognitu, atque auditu, quàm sapientissimis sententijs, grauiissimisq; uerbis ornata oratio, & perpolita? aut tam potens, tamq; magnificum, q̃ populi morus, iudicum religionem, senatus grauitatem unius oratione conuertri? Quid tam porrò regium, tam liberale, tam munificum, quàm opem ferrè supplicibus, excitare affliktos, dare salutē, liberare periculis, retinere homines in ciuitate? Quid autem tam necessarium, q̃ tenere semper arma, quibus uel teētus ipse esse possis, uel pro uocare improbos, uel te ulcisci laceffitus? Age uero, ne semper forū, subsellia, rostra, curiamq; mediteris; quid esse potest in otio aut incundius, aut magis propriū humanitatis, quàm sermo facetus, ac nulla in re rudis? hoc enim uno præstamus uel maxime feris, quòd colloquimur inter nos, et quòd exprimere dicendo sensa possumus. Quamobrem quis hoc non iure miretur, summeq; in eo elaborādum esse arbitretur, ut quo uno homines maxime bestijs præsent, in hoc hominibus ipsis antecellat? Vt uero iam ad illa summa ueniamus: quæ uis alia potuit aut dispersos homines unū in locum cōgregare; aut à fera, agrestiq; uita ad hunc humanum cultum, ciuilemq; deducere; aut iam constitutis ciuitatibus leges, iudicia, iura describere? Ac ne plura, quæ sunt penè innumerabilia, consecter, comprehendam breui: sic enim statuo, perfecti oratoris moderatione, & sapientia non solum ipsius dignitatem, sed & priuatorum plurimorum, & uniuersæ reip. salutem maxime contineri. Quamobrem pergite, ut facitis, adolescentes, atque in id studium, in quo estis, incumbite: ut & uobis honori & amicis utilitati, & reip. emo-

lumento esse possitis. Tum Scauola comiter, ut solebat, cætera, inquit, assentior Crasso, ne aut de C. Lælij soceri mei, aut de huius generi aut arte, aut gloria detrahā: sed illa duo Crasse uereor ut tibi possim concedere: unum, quod ab oratoribus ciuitates & ab initio constitutas, et sæpe conseruatas esse dixisti: alterum, quod remoto foro, cōcione, iudicijs, senatu, statuisse oratorem in omni genere sermonis, & humanitatis esse perfectum. Quis n. tibi hoc cōcesserit, aut initio genus hominum in mōtibus, ac syluis dissipatum nō prudentium cōsilijs pulsum potius, quā disertorum oratione delinitum, se oppidis, mœnibusq; sepsisse? aut uero reliquas utilitates aut instituendis, aut cōseruandis ciuitatibus, non à sapientibus, et fortibus uiris, sed à disertis, & ornate dicentibus esse constitutas? An uero tibi Romulus ille aut pastores, & conuenas congregasse, aut Sabinorum cōiubia coniunxisse, aut finitimorum uim repressisse eloquentia uidetur, non consilio, & sapientia singulari? Quid in Numa Pompilio? quid in Seruio Tullio? quid in cæteris regibus? quorum multa sunt eximia ad constituendam remp. num quod eloquentiæ uestigium apparet? Quid exactis regibus? tamen si ipsam exactiōem mente, non lingua perfectam L. Bruti esse cernimus. sed deinceps omnia non ne plena consiliorum, inania uerborum uidemus? Ego uero, si uelim & nostræ ciuitatis exemplis uti, & aliarum, plura proferre possim detrimēta publicis rebus, quā adiumenta per homines eloquentissimos importata. sed, ut reliqua prætermittam, omnium mihi uideor, exceptis Crasse uobis duobus, eloquentissi-

mos audisse, Ti. & C. Sempronios, quorum pater homo prudens, & gravis, haud quaquam eloquens, & sepe alias, & maxime Censor salutis reip. fuit. atque is non accurata quadam orationis copia, sed nutu, atque uerbo libertinos in urbanas tribus trāstulit: quod nisi fecisset, remp. quam nunc uix tenemus, iandiu nullam haberemus. At uero eius filij disertij, & omnibus uel naturae, uel doctrinae praesidijs ad dicendum parati, cum ciuitatem uel paterno consilio, uel auitis armis florentissimam acceperant, ista praecleara gubernatrice, ut ais, ciuitatum eloquentia remp. dissipauerunt. Quid leges ueteres, mosq; maiorum? quid auspicia, quibus et ego, & tu Crasse cum magna reip. salute praesumus? quid religiones, & caerimoniae? quid haec iura ciuilia, quae iampridem in nostra familia sine ulla eloquentiae laude uersantur? num aut inuenta sunt, aut cognita, aut omnino ab oratorum genere tractata? Equidem & Ser. Galbam memoria teneo diuinum hominem in dicendo, & M. Aemilium Porcinam, & C. ipsum Carbonem, quem tu adolescentulus perculisti, ignarum legum, haesitantem in maiorum institutis, rudem in iure ciuili: & haec aetas nostra, praeter te Crasse, qui tuo magis studio, quam proprio munere aliquo disertior, ius a nobis ciuile didicisti; quod interdum pudeat, iuris ignara est. Quod uero in extrema oratione quasi tuo iure sumpsisti, oratorem in omni sermonis disputatione copiosissime posse uersari: id, nisi hic in tuo regno essemus, non tulissem; multisq; praessem, qui aut interdicto tecum contenderent, aut te ex iure manu confectum uocarent, quod in alienas possessiones tam

temere irruisses. Agerent enim tecum lege primum Pythagorei omnes, atque Democritici, ceteriq; in suo genere physici: uindicarentq; ornatu homines in dicendo, & graues, quibuscum tibi iusto sacramento contendere non liceret. Urgerent præterea philosophorum greges, iam ab illo fonte, & capite Socrate: nihil te de bonis rebus in uita, nihil de malis, nihil de animi per motionibus, nihil de hominū moribus, nihil de ratione uitæ didicisse, nihil omnino quæsisse, nihil scire cōuincerent: & cum uniuersi in te impetum fecissent, tum singulæ familiæ litem tibi intenderent. Instaret Academia, quæ, quidquid dixisses, id te ipsum negare cogeret. Stoici uero nostri disputationum suarum, atque interrogationum laqueis te irretitum tenerent. Peripatetici autem etiam hæc ipsa, quæ propria oratorum pūtas esse adiumenta atque ornamenta dicendi, ab se pexti uincerent oportere: ac nō solum meliora, sed etiam multo plura Aristotelē, Theophrastumq; de his rebus, quā omnes dicendi magistros, scripssisse ostenderent. Misso facio mathematicos, grāmaticos, musicos, quorum artibus uestra ista dicendi uis ne minima quidem societate coniungitur. Quamobrem ista tanta, tamq; multa profitenda Crasse non censeo. satis id est magnum, quod potes præstare, ut in iudijs ea causa, quācunque tu dicis, melior, & probabilior esse uideatur: ut in concionibus, ut in sententijs dicendis ad persuadendum tua plurimum ualeat oratio: denique ut prudentibus diserte, stultis etiā uere dicere uidearis. hoc amplius si quid poteris, non id mihi uidebitur orator, sed Crassus sua quadam propria, non communi oratorum

facultate posse. Tum ille, Non sum, inquit, nescius Scæuola ista inter Græcos dici, & disceptari solere. audiui enim summos homines, cū Quæstor ex Macedonia uenissem Athenas florente Academia, ut temporibus illis ferebatur, quod eam Carneades, & Clitomachus, & Aeschines obtinebāt. erat etiam Metrodorus, qui cum illis unā ipsum illum Carneadem diligentius audierat, hominem omnium in dicēdo, ut ferebāt, acerrimum, & copiosissimum. uigebat auditor Panætij illius tū Mnēsarchus; & Peripatetici Critolaus, & Diodorus; multi etiam præterea præclari in philosophia, & nobiles: à quibus omnibus una penè repelli uoce oratorē, à gubernaculis ciuitatum, excludi ab omni doctrina, rerumq; maiorū scientia, ac tantum in iudicia, & cōciunculas, tanquam in aliquod pistrinum, detrudi, & compingi uidebam. Sed ego neque illis assentiebar, neque harum disputationum inuentori, & principi longe omnium in dicendo grauissimo, & eloquentissimo Platoni. cuius tū Athenis diligentius legi cum Carneade Gorgiam. quo in libro in hoc maxime admirabar Platonem, quod mihi in oratoribus irridendis ipse orator summus uidebatur. uerbi enim controuersia iandiu torquet græculos homines contentionis cupidiores, quam ueritatis. Nam si quis hunc statuet esse oratorem, qui tantummodo in iure, aut in iudicijs possit, aut apud populum, aut in senatu copiose loqui: tamē huic ipsi multa tribuat, & concedat necesse est. neque enim sine multa pertractione omnium rerum publicarum, neque sine legum, moris, iuris sciētia, neque natura hominū incognita, ac moribus, in his ipsis rebus satis cal-

lide uersari, et perire potest. qui autem hæc cognoucrit, sine quibus ne illa quidem minima in causis quisquã recte tueri potest, quid huic abesse poterit de maximarum rerum scientia? Sin oratoris nihil uis esse, nisi cõposite, ornate, copiose eloqui: quæro, id ipsum qui possit assequi sine ea scientia, quã ei non conceditis? dicendi enim uirtus, nisi ei, qui dicit, ea, de quibus dicit, percepta sint, extare non potest. Quamobrem si ornate locutus est, sicut fertur, et mihi uidetur, physicus ille Democritus: materies illa fuit physici, de qua dixit; ornatus uero ipse uerborum oratoris putandus est. et si Plato de rebus à civilibus controuersiis remotissimis diuinitus est locutus, quod ego concedo; si item Aristoteles, si Theophrastus, si Carneades in rebus ijs, de quibus disputauerunt, eloquentes, et in dicendo suauēs, atque ornatī fuerunt: sint ea res, de quibus disputant, in alijs quibusdã studijs; oratio quidẽ ipsa propria est huius unius rationis, de qua loquimur, et querimus. Etenim uidemus ijsdẽ de rebus ieiune quosdã, et exiliter, ut eum, quem acutissimũ ferunt, Chrysippum, disputauisse; neque ob eam rem philosophiã nõ satisfecisse, quod nõ habuerit hanc dicendi ex arte alienã facultatem. Quid ergo interest? aut qui discernes eorũ, quos nominaui, ubertatẽ in dicendo, et copiam, ab eorũ exilitate, qui hæc dicendi uarietate, et elegantia non utuntur? Vnũ erit profecto, quod ij, qui bene dicunt, afferunt proprium, compositam orationem, et ornata, et artificio quodam, et expolitione distinctam. hæc autem oratio, si res non subest ab oratore percepta, et cognita, aut nulla sit necesse est, aut omnium irrisione ludatur. quid est enim

tam furiosum, quàm uerborum uel optimorum, atque  
 ornatissimorum sonitus inanis nulla subiecta sententia,  
 nec scientia? Quidquid erit igitur, quacunque ex arte,  
 quocunque de genere; id orator si, tanquam clientis  
 causam, didicerit, dicet melius, & ornatus, quàm ille  
 ipse eius rei inuentor, atque artifex. Nam si quis erit,  
 qui hoc dicat, esse quasdam oratorum proprias senten-  
 tias, atque causas, & quasi certarum rerum forensibus  
 cancellis circumscriptam scientiam: fatebor equidem  
 in his magis assidue uersari hanc nostram dictionem:  
 sed tamen in his ipsis rebus permulta sunt, quæ isti ma-  
 gistri, qui rhetorici uocantur, nec tradunt, nec tenent.  
 Quis enim nescit maximam uim existere oratoris in  
 hominum mentibus uel ad iram, aut odium, aut dolo-  
 rem incitandis, uel ab hisce ipsis permotionibus ad le-  
 nitatem, misericordiamque; reuocandis? quæ, nisi qui na-  
 turas hominum, uimque omnem humanitatis, causasque;  
 eas, quibus mentes aut incitantur, aut reflectuntur, pe-  
 nitus perspexerit, dicendo, quod uolet, perficere non po-  
 terit. Atqui totus hic locus philosophorum putatur pro-  
 prius: neque orator me auctore unquam repugnabit:  
 sed, cum illis cognitionem rerum concesserit, quod in ea  
 solum illi uoluerint elaborare; tractationem orationis,  
 quæ sine illa scientia nulla est, sibi assumet. hoc enim  
 est proprium oratoris, quod sæpe iam dixi, oratio grauis,  
 & ornata, & hominum sensibus, ac mentibus accom-  
 data. Quibus de rebus Aristotelem, & Theophrastum  
 scripsisse fateor. sed uide, ne hoc Scauola totum sit à  
 me. nam ego, quæ sunt oratori cum illis communia, non  
 mutuor ab illis: isti, quæ de his rebus disputant, orato-



rum esse concedunt . itaque ceteros libros artis suæ nomine, hos rhetoricos & inscribunt , & appellant . Est enim, cum illi in dicendo inciderint loci, (quod per sepe euenit) ut de dijs immortalibus, de pietate, de cōcordia, de amicitia, de cōmuni ciuium, de hominū, de gentium iure, de æquitate, de temperantia, de magnitudine animi, de omni uirtutis genere sit dicendum : clamabunt credo omnia gymnasia, atque oēs philosophorum scholæ, sua hæc esse omnia propria, nihil omnino ad oratorum rem pertinere . quibus ego, ut de his rebus omnibus in angulis consumendi otij causa differant, cum concessero : illud tamen oratori tribuā , & dabo, ut eadem, de quibus illi tenui quodā, & exiguo sermone disputant, hic omni tū grauitate, tum etiam iucūditate explicet . Hæc ego cū ipsis philosophis tum Athenis differebā . congebat. n. me M. Marcellus hic noster, qui nunc Aedilis Cur. est : & profecto, nisi ludos nunc faceret, huic nostro sermoni interesset : ac iam tum erat adolescentulus his studijs mirifice deditus . Iam uero de legibus instituendis, de bello, de pace, de socijs, de uectigalibus, de iure ciuium generatim in ordines , ætatesq; descripto, dicant uel Græci, si uolunt, Lycurgum , aut Solonem ( quanquam illos quidem censem in numero eloquentium reponendos ) scisse melius, quàm Hyperidem, aut Demosthenem , perfectos iam homines in dicendo, & perpolitos: uel nostri decemuiros, qui XII tabulas perscripserūt, quos necesse est fuisse prudētes, antepōnāt in hoc genere & Ser. Galbæ , & socero tuo C. Lælio, quos constat dicendi gloria præstitisse. nunquā enim negabo esse quasdam artes proprias eorū, qui in his cognoscēdis,



atque tractandis studium suum omne posuerunt: sed oratorem plenum, atque perfectum esse eum dicam, qui de omnibus rebus possit uarie, copioseque dicere. Etenim saepe in ijs causis, quas omnes proprias esse oratorum confitentur, est aliquid, quod non ex usu forensi, quem solum oratoribus conceditis, sed ex obscuriore aliqua scientia sit promendum, & assumendum. quæro enim, num possit aut contra Imperatorem, aut pro Imperatore dici sine rei militaris usu, aut saepe etiam sine regionum terrestrium, aut maritimarum scientia? num apud populum de legibus iubendis, aut uetandis? num in senatu de omni reip. genere dici sine summa rerum civilium cognitione, & prudentia? num admoueri possit oratio ad sensus animorum, atque motus uel inflammandos, uel etiam extinguendos, quod unum in oratore dominatur, sine diligentissima peruestigatione earum omnium rationem, quæ de naturis humani generis, ac moribus à philosophis explicatur? Atque haud scio, an minus hoc uobis sim probaturus: equidem non dubitabo, quod sentio, dicere. physica ista ipsa, quæ paulo ante, & mathematica, & cæterarum artium propria, posuisti; scientiæ sunt eorum, qui illa profitentur: illustrare autem oratione si quis istas ipsas artes uelit, ad oratoris ei confugiendum est facultatem. Neque enim, si Philonem illum architectum, qui Atheniensibus armamentarium fecit, constat perdiserte populo rationem operis sui reddidisse; existimandum est architecti potius artificio disertum, quam oratoris fuisse. nec, si huic M. Antonio pro Hermodoro fuisset de naualium opere dicendum, non, cum ab illo causam didicisset, ipse orna-

te de alieno artificio, copioseq; dixisset. neque uero. Asclepiades, is, quo nos medico, amicoq; usi sumus; tum; cum eloquentia uincebat ceteros medicos, in eo ipso, quod ornate dicebat, medicinæ facultate utebatur, non eloquentiæ. Atque illud est probabilius, neque tamē uerum, quod Socrates dicere solebat; omnes in eo, quod scirent, satis esse eloquentes. illud uerius; neque quēquam in eo disertū esse posse, quod nesciat; neque, si optime sciat, ignarusq; sit faciundæ, ac polliendæ orationis, diserte id ipsum, de quo sciat, posse dicere. Quamobrem, si quis uniuersam, & proprii oratoris uim definire, complectiq; uult; is orator erit mea sententia hoc tam graui dignus nomine, qui, quæcunque res inciderit, quæ sit dictione explicanda, prudenter, & composite, & ornate, & memoriter dicat, cum quadam etiam actionis dignitate. Sin cuiquam nimis infinitum uidetur, quod ita proposui quacūque de re: licet hinc, quantum cuique uidebitur, circūcidat, atque amputet: tamē illud tenebo, si, quæ ceteris in artibus, aut studijs sita sunt, orator ignoret; tantumq; ea teneat, quæ sint in disceptationibus, aut in usu forēsi; tamē, his de rebus ipsis si sit ei dicendū; cū cognouerit ab ijs, qui tenēt, quæ sint in quaque re; multo oratorem melius, quàm ipsos illos, quorū eæ sunt artes, esse dicturum. Ita si de re militari dicendum huic erit Sulpitio, quæret à C. Mario affini nostro, & cum acceperit, ita pronūciabit, ut ipsi C. Mario penē hic melius, quàm ipse ille, scire uideatur. sin de iure ciuili, te cum communicabit, teq; hominem prudentissimum, & peritissimum, in ijs ipsis rebus, qua abs te didiz

cerit, dicendi arte superabit. Sin quæ res inciderit, in qua de natura, de uitijs hominum, de cupiditatibus, de modo, de continentia, de dolore, de morte dicendum sit: forsità, si ei sit uisum, (etsi hæc quidem nosse debet orator) cum Sex. Pompeio erudito homine in philosophia communicabit. hoc profecto efficiet, ut, quamcunque rem à quoque cognouerit, de ea re multo dicat ornatiùs, quàm ille ipse, unde cognorit. Sed, si me audierit, quoniã philosophia in tres partes est distributa, in nature obscuritatem, in differendi subtilitatem, in uitam, atque mores: duo illa relinquamus; idq; largiamur inertie nostræ: tertiũ uero, quod semper oratoris fuit, nisi tenebimus; nihil oratori, in quo magnus esse possit, relinquemus. quare hic locus de uita, & moribus totus est oratori perdiscendus: cetera, si non didicerit, tamen poterit, si quando uolet, ornare dicendo, cũ erũt ad eum delata, & tradita. etenim si constat inter doctos, hominem ignarum astrologiæ ornatissimis, atque optimis uersibus Aratum de coelo, stellisq; dixisse; si de rebus rusticis hominem ab agro remotissimum Nicanædrum Colophonium poetica quadam facultate non rustica scripsisse præclare: quid est, cur non orator de rebus ijs eloquentissime dicat, quas ad certam causam, tempusq; cognorit? est enim finitimus oratori poeta; numeris astrictior paulo, uerborum autem licentia liberior, multis uero ornandi generibus socius, ac penè par, in hoc quidẽ certe propè idem, nullis ut terminis circumscribat, aut definiat ius suum, quo minus ei liceat eadem illa facultate, & copia uagari, quàm uelit. Nam quòd illud Q. Scauola negasti te fuisse laturnũ,

nisi in meo regno esses; quod in omni genere sermonis, in omni parte humanitatis dixerim oratorem perfectum esse debere: nunquam mehercule hoc dicerem, si eum, quē fingo, me ipsum esse arbitrarer: sed ut solebat C. Lucilius sepe dicere, homo tibi subiratus, mihi propter eam ipsam causam minus, quā uolebat, familiaris, sed tamen & doctus, & perurbanus; sic sentio, neminem esse in oratorum numero habendum, qui non sit omnibus ijs artibus, quæ sunt libero homine dignæ, perpolitus: quibus ipsis si in dicendo non utimur, tamen apparet, atque extat, utrum simus earum rerū rudes, an didicerimus: ut qui pila ludunt, non utuntur in ipsa lusione artificio proprio palæstræ, sed indicat ipse motus, didicerint ne palæstram, an nesciant; & qui aliquid fingunt, etsi tum pictura nihil utitur, tamen utrum sciant pingere, an nesciant, non obscurum est: sic in orationibus hisce ipsis iudiciorum, concionū, senatus, etiam si proprie cæteræ non adhibentur artes, tamen facile declaratur, utrum is, qui dicat, tantummodo in hoc declamatorio sit opere iactatus, an ad dicendum omnibus ingenuis artibus instructus accesserit. Tum ridens Scæuola, Non luctabor, inquit, tecū Crasse amplius. id enim ipsum, quod contra me locutus es, artificio quodam es cōsecutus, ut & mihi, quæ ego uellem, non esse oratoris concederes; et ea ipsa nescio quo modo rursus detorqueres, atque oratori propria traderes. Hæc, cum ego Prætor Rhodū uenissem, & cum summo illo doctore istius disciplinæ Apollonio ea, quæ à Panætio acceperam, contulissem: irrisit ille quidē, ut solebat, philosophiam, atque contempsit; multaq; non

tam grauititer dixit, quàm facete: tua autem fuit oratio  
 eiusmodi, non ut ullam artem, doctrinam ue cōtem-  
 neres, sed ut omnes comites, ac ministras oratoris esse  
 diceres. quas, ego, si quis sit unus cōplexus omnes, idēq;  
 si ad eas facultatem istam ornatissimæ orationis adiun-  
 xerit; non possum dicere eum non egregium quēdam  
 hominem, atque admirādum fore. sed is, si quis esset,  
 aut si etiam unquam fuisset, aut aëro si esse posset; tu  
 esses unus profecto; qui & meo iudicio, & omniū uix  
 ullam ceteris oratoribus (pace horum dixerim) laudem  
 reliquisti. Verum si tibi ipsi nihil deest, quod in foren-  
 sibus rebus, ciuilibusq; uersetur, quin scias; neque eā ta-  
 men scientiam, quam adiungis oratori, complexus es: ui-  
 deamus, ne plus ei tribuas, quàm res, et ueritas ipsa cō-  
 cedat. Hic Crassus, Memento, inquit, me non de mea,  
 sed de oratoris facultate dixisse. Quid. n. nos aut didi-  
 cimus, aut scire potuimus? qui ante ad agēdum, quàm  
 ad cognoscendū uenimus: quos in foro, quos in ambitio-  
 ne, quos in rep. quos in amicorū negotiis res ipsa ante  
 confecit, quàm possemus aliquid de rebus tātis suspica-  
 ri. Quod si tibi tantum in nobis uidetur esse; quibus  
 etiā si ingeniū, ut tu putas, nō maxime defuit; doctri-  
 na certe, & orium, & hercule etiā studiū illud dicēdi  
 acerrimum defuit: quid censes, si ad alicuius ingenium  
 uel maius illa, quæ ego nō attigi, accesserint, qualem il-  
 lum, & quātum oratorē futurū? Tum Antonius, Pro-  
 bas mihi, inquit, ista Crasse, quæ dicis: nec dubito, quin  
 multo locupletior in dicendo futurus sit, si quis omniū  
 rerum, atque artium rationem, naturamq; compre-  
 henderit. sed primum id difficile factū est, præsertim

in hac nostra uita, nostrisq; occupationibus. deinde illud etiam uerendum est, ne abstrahamur ab hac exercitatione, & consuetudine dicendi populari, & forēsi. aliud enim mihi quoddam genus orationis esse uidetur eorū hominum, de quibus paulo ante dixisti: quāuis illi ornate, et grauitate aut de natura rerū, aut humanis de rebus loquuntur. nitidum quoddam genus est uerborum, & latum, sed palæstræ magis, & olei, quàm huius ciuilis turbæ, ac fori. nāque egomet, qui sero, ac leuiter græcas literas attigissem, tamen, cum Proconsul in Ciliciam proficiscens Athenas uenissem, cōplures tū ibi dies sum propter nauigandi difficultatem cōmoratus. sed cum quotidie mecū haberem homines doctissimos, eos ferè ipsos, qui abs te modo sunt nominati; cūq; hoc nescio quo modo apud eos increbuisset, me in causis maioribus, sicuti te, solere uersari: pro se quisq; eorū, quātum quisque poterat, de officio, & ratione oratoris disputabat. Horum alij, sicut iste ipse Mnesarchus, hos, quos nos oratores uocaremus, nihil esse dicebat, nisi quosdam operarios lingua celeri, et exercitata: oratorē autem, nisi qui sapiens esset, esse neminē: atque ipsam eloquentiam, quod ex bene dicendi scientia constaret, unam quandam esse uirtutem: & qui unā uirtutem haberet, omneis habere: easq; ipsas esse inter se æquales, et pares: ita, qui esset eloquens, eū uirtutes omneis habere, atque esse sapientē. Sed hæc erat spinosa quædam, et exilis oratio, longeq; à nostris sensibus abhorrebat. Carneades uero multo uberius iisdem de rebus loquebatur: non quo aperiret sententiam suam, (hic enim mos erat patrius Academiæ, aduersari sem-

per omnibus in disputando) sed tum maxime tamen hoc significabat: eos, qui rhetores nominarentur, & qui dicendi præcepta traderent, nihil planè tenere; neque posse quenquam facultatē assequi dicendi, nisi qui philosophorum inuenta didicisset. Disputabant contra disertī homines Athenienses, in rep. causisq; uersati: in quibus erat etiā is, qui nuper Romæ fuit, Menedemus hospes meus. qui cum diceret esse quandam prudentiam, quæ uersaretur in perspiciendis rationibus constituendarū, & regendarum rerum publicarū: excitabatur homo promptus ab homine abundanti doctrina, et quadam incredibili, uarietate rerum, & copia. omnes enim partes illius ipsius prudentiæ petēdas esse à philosophia docebat: neque ea, quæ statuerentur in rep. de dijs immortalibus, de disciplina iuuentutis, de iustitia, de patiētia, de temperantia, de modo rerum omnium, ceteraq; sine quibus ciuitates aut esse, aut bene morata esse non possent, usquam in eorum libris inueniri. Quod si tantā uim rerum maximarū arte sua rhetorici illi doctores cōplecterentur: quærebat, cur de proœmijs, & de epilogis, & de huiusmodi nugis (sic enim appellabat) referti essent eorum libri; de ciuitatibus instituendis, de scribendis legibus, de æquitate, de iustitia, de fide, de frangendis cupiditatibus, conformandisq; hominum moribus litera in eorum libris nulla inueniretur: ipsa uero præcepta sic illudere solebat, ut ostenderet non modo eos illius expertes esse prudentiæ, quam sibi asciscerent, sed ne hanc quidem ipsam dicendi rationem, ac uiam nosse. caput enim esse arbitrabatur oratoris, ut & ipsis, apud quos ageret, talis, qualem se

ipse



ipse optaret, uideretur; id fieri uite dignitate; de qua nihil rhetorici isti doctores in præceptis suis reliquissent. Et uti qui audirent, sic afficerentur animis, ut eos affici uellet orator: quod item fieri nullo modo posse, nisi cognosceret is, qui diceret, quot modis hominū mentes, et quibus rebus, et quo genere orationis in quaque partem mouerentur: hæc autem esse penitus in media philosophia retrusa, atque abdita: quæ isti rhetores ne primoribus quidem labris attingissent. Ea Menedemus exemplis magis, quam argumētis conabatur refellere. memoriter enim multa ex orationibus Demosthenis præclare scripta pronuntiis, docebat illū in animis uel iudicum, uel populi in omnem partem dicendo permo- uendis non fuisse ignarum, quibus ea rebus cōsequere- rur, quæ negaret ille sine philosophia quēquam scire posse. Hic respondebat, non se negare Demosthenē sum- mam prudentiam, summamq; uim habuisse dicendi: sed siue ille hoc ingenio potuisset; siue, id quod constaret, Platonis studiosus audiendi fuisset; nō quid ille po- tuisset, sed quid isti docerent, esse quærendum. Sæpe etiam in eam partē ferebatur oratione, ut omnino dis- putaret, nullam artē esse dicendi. idq; cum argumen- tis docuerat, quod ita nati essemus, ut et blādiri, et sup- pliciter insinuare ips, à quibus esset petendum, et aduer- sarios minaciter terrere possemus; et rē gestam expo- nere; et id, quod intēderemus, cōfirmare; et id, quod contra diceretur, refellere; et ad extremū deprecari ali- quid, et conqueri: quibus in rebus omnis oratorū uer- saretur facultas: et quod cōsuetudo, exercitatioq; et intelligendi prudentiam acueret, et eloquēdi celeritas



tem incitaret : tum etiam exemplorum copia nitebatur . nam primum quasi dedita opera neminem scriptorem artis ne mediocriter quidē disertum fuisse dicebat : cum repeteret usque à Corace nescio quo , & Tisia ; quos artis illius inuectores , & principes fuisse constaret . eloquentissimos autē homines , qui ista nec didicissent , nec omnino scisse curassent , innumerabiles quosdam nominabat : in quibus etiam siue ille irridēs , siue quòd ita putaret , atque ita audisset , me in illo numero , qui illa nō didicissem , & tamē ( ut ipse dicebat ) possem aliquid in dicendo , proferebat . quorum ego illi alterum facile assentiebar , nihil me didicisse : in altero autem me illudi ab eo , aut etiam ipsum errare arbitrabar . Artem uero negabat esse ullam , nisi quæ cognitis , penitusq; perspectis , & in unum exitum spectantibus . & nunquam fallentibus rebus contineretur : hæc autem omnia , quæ tractarentur ab oratoribus , dubia esse , & incerta ; cum & dicerentur ab ijs , qui ea omnia non planè tenerēt ; & audirētur ab ijs , quibus nō scientia esset tradenda , sed exigui temporis aut falsa , aut certe obscura opinio . Quid multa ? sic mihi tū persuadere uidebatur ; neque artificium ullum esse dicendi ; neque quenquam posse , nisi qui illa , quæ à doctissimis hominibus in philosophia dicerētur , cognosset , aut callide , aut copiose dicere . Quibus dicere Carneades solebat , ingenium tuum Crasse uehementer admirans , me sibi perfacile in dicēdo , te perpugnacem in disputando esse uisum . Tumq; ego hac eadem opinione adductus , scripsi etiam illud quodā in libello , qui me imprudente , & inuito excidit , & peruenit in manus ho-

minum; disertos me cognosse nonnullos, eloquentem adhuc neminem: quod eum statuebam disertum, qui posset satis acute, atque dilucide apud mediocres homines ex communi quadam hominum opinione dicere; eloquentem uero, qui mirabilis, et magnificentius augere posset, atque ornare, quae uellet, omnesque omnium rerum, quae ad dicendum pertinerent, fontis animo, ac memoria contineret. Id si est difficile nobis, qui ante, quam ad discendum ingressi sumus, obruimur ambitione, et foro: sit tamen in re positum, atque natura. Ego enim quantum auguror coniectura, quantaque ingenia in nostris hominibus esse uideo; non despero fore aliquem aliquando, qui et studio acriore, quam nos sumus, atque fuimus; et otio, ac facultate discendi maiore, ac maturiore; et labore, atque industria superiore, cum se ad audiendum, legendum, scribendumque maiore opera dediderit, existat talis orator, quale querimus; qui iure non solum disertus, sed etiam eloquens dici possit: qui tamen mea sententia aut hic est iam Crassus: aut, si quis pari fuerit ingenio, pluraque, quam hic, et audierit, et lectitarit, et scripserit; paulum huic aliquid poterit addere. Hoc loco Sulpitius, Insperanti mihi, inquit, et Cottae, sed ualde optanti utrique nostrum cecidit, ut in istum sermonem Crasse delaberemini. nobis enim huc uenientibus incundum satis fore uidebatur, si, cum uos de rebus alijs loqueremini, tamen nos aliquid ex sermone uestro memoria dignum excipere possemus: ut uero penitus in eam ipsam totius huius uel studij, uel artificij, uel facultatis disputationem penè intimam perueniretis, uix optandum nobis uidebatur. Ego enim, qui ab

ineunte ætate incensus essem studio utriusque uestrū,  
 Crassi uero etiam amore: cum ab eo nusquam discerem,  
 uerbum ex eo nūquam elicere potui de uia, ac de ratione dicendi; cum & per me ipsum egissem, & per Drusum saepe tentassem, quō in genere tu Antoni  
 (uere loquar) nunquam mihi percūctanti, aut quærenti aliquid defuisti; et per sepe me, quæ soleres in dicēdo  
 obseruare docuisti. Nunc, quoniam uterque uestrum  
 patefecit earū rerum ipsarū aditum, quas querimus; & quoniam princeps Crassus eius sermonis ordiendi  
 fuit: date nobis hanc ueniam, ut ea, quæ sentitis de omni  
 genere dicendi, subtiliter persequamini, quod quidē si erit à uobis impetratum: magnā habebō Crasse  
 huic palæstræ, & Tusculano tuo gratiā; & lōge Academiæ illi, ac Lycio tuum hoc suburbanū gymnasium  
 antepōnam. Tum ille, Immo uero, inquit, Sulpiti rogemus Antoniū;  
 qui et potest facere id, quod requiris; & consuevit, ut te audio, dicere, nam me quidem fa-  
 teor semper à genere hoc toto sermonis refugisse, et tibi cupiēti, atque instāti sapissime negasse, ut tute paulo  
 ante dixisti. quod ego nō superbia, neque inhumani-  
 tate faciebā; neque quo studio rectissimo, atque optimo non obsequi uellē;  
 præsertim cū te unum ex omnibus ad dicēdum maxime natum, aptumq; cognossem;  
 sed mehercule istius disputationis insolētia, atque earum rerum,  
 quæ quasi traduntur in arte, in scitiā. Tum Cotta. Quoniam id, quod difficillimum nobis ui-  
 debatur, ut omnino de his rebus Crasse loquerere, assecuti  
 sumus: de reliquo iam nostra culpa fuerit, si te, nisi omnia, quæ percunētati erimus, explicaris, dimis-

serimus. De ijs credo rebus, inquit Crassus, ut in conditionibus scribi solet, quibus sciam, poteroq; . Tum ille, Nanque quod tu non poteris, aut nescies, quis nostrum tam impudens est, qui se scire, aut posse postulet? Tam uero ista conditione, dum mihi liceat negare posse, quod non potero, & fateri nescire, quod nesciam; licet, inquit Crassus, uestro arbitratu percuntemini. Atque, inquit Sulpitius, hoc primum ex te, de quo modo Antonius exposuit, quid sentias querimus; existimes ne artem aliquam esse dicendi. Quid mihi nunc uos, inquit Crassus, tanquam alicui Græculo otioso, & loquaci, & fortasse docto, atque erudito questiunculam, de qua meo arbitratu loquar, imponitis? Quando enim me ista curasse, aut cogitasse arbitramini? non semper irrisisse potius eorū hominum impudētiam, qui, cum in schola assedissent, ex magna hominū frequentia dicere iuberent, si quis quid quereretur. quod primum ferunt Leontinum fecisse Gorgiam: qui permagnum quiddam suscipere, ac profiteri uidebatur, cū se ad omnia, de quibus quisque audire uellet, esse paratū denunciaret. postea uero uulgo hoc facere coeperunt, hodieq; faciunt; ut nulla sit res neque tanta, neque tam improvisa, neque tam noua, de qua se non omnia, quæ dici possunt, profiteantur esse dicturos. Quod si te Cotta arbitrarer, aut te Sulpiti de his rebus audire uelle: adduxissem huc Græcum aliquem, qui nos istiusmodi disputationibus delectaret. quod ne nunc quidem difficile factu est. est enim apud M. Pisonem adolescentem iam huic studio deditum, summo hominem ingenio, nostriq; cu-

pidissimum, peripateticus Staseas, homo nobis sanè familiaris, & ut inter homines peritos constare uideo, in illo suo genere omnium princeps. Quem tu mihi, inquit Mutius, Staseam, quem peripateticum narras? gerendus est tibi mos adolescentibus Crasse, qui nō Graeci alicuius quotidianam loquacitatem sine usu, neque ex scholis cantilenā requirunt, sed ex homine omnium sapiētissimo, atque ex eo, qui non in libellis, sed in maximis causis, & in hoc domicilio imperij, & gloriae sit consilio, linguaq; princeps: cuius uestigia persequi cupiunt, eius sententiam sciscitantur. Equidem tecum in dicendo semper putavi deum: tum uero tibi nunquam eloquentiae maiorem tribui laudem, quam humanitatis: qua nunc te uti uel maxime decet; neque defugere eam disputationem, ad quam te duo excellentis ingenij adolescentes cupiunt accedere. Ego uero, inquit, istis obsequi studeo: neque grauabor breuiter meo more, quid quaque de re sentiam, dicere. Ac primum illud (quoniam auctoritatem tuam negligere Scaeuola, fas mihi esse non puto) respondeo: mihi dicendi aut nullam artem, aut pertenuem uideri, sed omnem esse contentionem inter homines doctos in uerbi controuersia positam. Nam, si ars ita definitur, ut paulo ante exposuit Antonius, ex rebus penitus perspectis, planeq; cognitis, atque ab opinionis arbitrio seiunctis, scientiaq; comprehensis: non mihi uidetur ars oratoris esse ulla. sunt enim uaria, & ad uulgarem, popularemq; sensum accommodata omnia genera huius forensis nostrae dictionis. Sin autem ea, quae obseruata sunt in usu, ac tractatione dicendi, haec ab-

hominibus callidis, ac peritis animaduersa, ac notata, uerbis designata, generibus illustrata, partibus distributa sunt; id quod fieri potuisse uideo: non intelligo, quamobrem non, si minus illa subtili definitione, at hac uulgari opinione ars esse uideatur. Sed siue est ars, siue artis quædam similitudo: non est quidem ea negligenda; uerum intelligendum est, alia quædam ad consequendam eloquentiam esse maiora. Tum Antonius uehementer se assentiri Crasso dixit: quod neque ita amplecteretur artem, ut ij solerent, qui omnem uim dicendi in arte ponerent: neque rursus eam totam, sicut plerique philosophi facerent, repudiaret. Sed existimo, inquit, gratum te his esse Crasse facturum, si ista exposueris, quæ putas ad dicendum plus quàm ipsam artem posse prodesse. Dicam equidè, quonià institui; petamq; à uobis, inquit, ne has meas ineptias efferatis. quanquam moderabor ipse: ne, ut quidam magister, atque artifex, sed quasi unus è togatorum numero, atque ex forensi usu homo mediocris, neque omnino rudis, uidear non ipse aliquid à me prompsisse, sed fortuito in sermonem uestrum incidisse. Equidem cum peterem magistratus, solebam in prehensando dimittere à me Scæuolam; cum ei ita dicerem, me uelle esse ineptum. id erat petere blandius: quod nisi inepte fieret, bene non posset fieri: hunc autem esse unum hominem ex omnibus, quo præsentem ego ineptus esse minime uellem: quem quidem nunc mearum ineptiarum testem, & spectatorem fortuna cōstituit. nā quid est ineptius, quàm de dicendo dicere? cum id ipsum, dicere, nunquam sit nō

ineptum, nisi cum est necessarium. Perge uero Crasse, inquit Mutius: istam enim culpam, quam uereris, ego præstabo. Sic igitur sentio, inquit Crassus, naturam primum, atque ingenium ad dicendum uim asferre maximam: neque uero istis, de quibus paulo ante dixit Antonius, scriptoribus artis, rationem dicendi, et uiam, sed naturam defuisse. nam et animi, atque ingenij celeres quidam motus esse debent; qui ad exco- gitandum acuti, et ad explicandum, ornandumque sint uberes, et ad memoriam firmi, atque diuturni: et si quis est, qui hæc putet arte accipi posse; quod falsum est (præclare enim se res habeat, si hæc accendi, aut comoueri arte possint: inferi quidem, et donari ab arte non possunt omnia: sunt enim illa dona naturæ) quid de illis dicet, quæ certe cum ipso homine nascuntur? lingue solutio, uocis sonus, latera, uires, conformatio quædam, et figura totius oris, et corporis. Neque hæc ita dico, ut ars aliquid limare non possit: neque enim ignoro, et quæ bona sint, fieri meliora posse doctrina; et quæ non optima, aliquo modo acui tamen, et corrigi posse: sed sunt quidam aut ita lingua hæsitantes, aut ita uoce absoni, aut ita uultu, motuque corporis uasti, atque agrestes; ut etiam si ingenij, atque arte ualeant, tamen in oratorum numerum uenire non possint: sunt autem quidam ita naturæ muneribus in iisdem rebus habiles, ita ornati; ut non nati, sed ab aliquo deo facti esse uideantur. Magnum quoddam est onus, atque munus, suscipere, atque profiteri se esse omnibus silentibus unum maximis de rebus magno in cōuentu hominum audiendum. adest enim ferè nemo, quin acutius,



atque acrius uitia in dicente, quàm recta uideat. ita quidquid est, in quo offenditur; id etiam illa, quæ laudanda sunt, obruit. Neque hæc in eam sententiam disputo, ut homines adolescentes, si quid naturale forte non habeant, omnino à dicendi studio deterream. Quis enim non uideat C. Cælio æquali meo maximo honori fuisse homini nouo illi ipsam, quâcunque assequi potuerit, in dicendo mediocritatem? quis uestrum æqualem Q. Varium, uastum hominem, atque foedum, non intelligit illa ipsa facultate, quâcunque habet, magnâ esse in ciuitate gratiam consecutum? sed quia de oratore quærimus, fingendus est nobis oratione nostra detractis omnibus uitijs orator, atque omni laude cummulatus. neque enim, si multitudo litiû, si uarietas causarû, si hæc turba, & barbaria forensis dat locum uel uitiosissimis oratoribus, ideo nos hoc, quod quærimus, omitemus. Itaque in ijs artibus, in quibus non utilitas quæritur necessaria, sed animi libera quædã oblectatio, quàm diligenter, et quàm propè fastidiose iudicamus? nullæ. n. lites, neque cōtrouersie sunt, quæ cogunt homines, sicut in foro non bonos oratores, item in theatro actores malos perpeti. Est igitur oratori diligenter prouidendum, non uti illis satisfaciatur, quibus necesse est; sed ut ijs ipsis admirabilis esse uideatur, quibus libere liceat iudicare. Ac si quæritis planè, quid sentiam; enunciabo apud homines familiarissimos, quod adhuc semper tacui, & tacendum putavi: Mihi etiam quicquid optime dicunt, quicquid id facillime, atque ornatissime facere possunt; tamen, nisi timide ad dicendum accedunt, & in exordienda oratione perturbantur, penè impuden-

tes uidentur. tametsi id non accidere non potest. ut. n. quisque optime dicit; ita maxime dicendi difficultatem, uariosq; euentus orationis, hominumq; iudicia pertimescit. qui uero nihil potest dignum re, dignum nomine oratoris, dignum hominum auribus efficere, atque edere; is mihi, etiā si cōmouetur in dicendo, tamen impudens uidetur. non. n. pudendo, sed non faciendo id, quod non decet, impudentia nomē effugere debemus. quem uero non pudet; id quod in plerisque uideo; hunc ego non reprehensione solum, sed etiā pōna dignum puto. Equidem & in uobis animaduertere soleo, & in me ipso sapissime experior, ut exalbescā in principijs dicendi, & tota mente, atque omnibus artibus contremiscam. adolescentulus uero sic in initio accusationis examinatus sum, ut hoc summum beneficium Quinto Maximo debuerim, quod continuo consilium dimiserit, simul ac me fractū, ac debilitatum me tu uiderit. Hic omnes assensi, significare inter sese, & colloqui cōeperunt. fuit. n. mirificus quidam in Crasso pudor; qui tamen non modo non obesset eius orationi, sed etiam probitatis commendatione prodesset.

Tum Antonius. Sæpe, ut dicis, inquit, animaduerti Crasse & te, & cæteros summos oratores, quanquam tibi par mea sententia nemo unquam fuit, in dicendi exordio permoueri. cuius quidem rei cum causam quærerem, quidnam esset, cur, ut in quoque oratore plurimum esset, ita maxime is pertimesceret; has causas inueniebam duas: unam, quod intelligerent, ij quos usus, ac natura docuisset, nonnunquam summis oratoribus non satis ex sententia euentum dicendi procedere; ita

non iniuria, quotiescunque dicerent, id, quod aliquando posset accidere, ne tum accideret, timere. altera est hæc, de qua queri sæpe soleo. cæterarum homines artium spectati, & probati, si quando aliquid minus bene fecerunt, quàm solent; aut noluisse, aut ualitudine impediti non potuisse cõsequi id, quod scirent, putantur. noluit, inquit, hodie agere Roscius, aut crudior fuit. oratoris peccatum, si quod est animaduersum, stultitia peccatum uidetur. stultitia autem excusationem non habet: quia nemo uidetur, aut quia crudus fuerit, aut quòd ita maluerit, stultus fuisse. quo etiam grauius iudicium in dicendo subimus. quoties enim dicimus, toties de nobis iudicatur: & qui semel in gestu peccauit, nõ cõtino exiimatur nescire gestum: cuius in dicendo aliquid reprehensum est, aut aterna in eo, aut certe diuturna ualet opinio tarditatis. Illud uero, quod à te dictum est, esse permulta, quæ orator nisi à natura haberet, nõ multum à magistro adiungetur; ualde tibi assentior; inq; eo uel maxime probaui summum illum doctorem Alabandensem Apollonium: qui, cum mercede doceret, tamen non patiebatur eos, quos iudicabat non posse oratores euadere, operam apud sese perdere, dimittebatq; , & ad quæ quæque artē putabat esse aptum, ad eam impellere, atque hortari solebat. Satis est. n. cæteris artificijs percipiendis tantummodo similem esse hominis, et id, quod tradatur, uel etiam inculcetur, si quis forte sit tardior, posse percipere animo, & memoria custodire. non queritur mobilitas linguæ, non celeritas uerborum, non denique ea, quæ nobis non possumus fingere, fã

cies, uultus, sanus. In oratore autem acumen dialecti-  
corum, sententiæ philosophorum, uerba propè poetarum,  
memoria iuriscōsultorum, uox tragædorum, gestus pe-  
nè summorum actorum est requirendus. Quamob-  
rem nihil in hominum genere rarius perfectō oratore  
inueniri potest. quæ enim singularum rerum artifices  
singula si mediocriter adepti sunt, probantur; ea nisi  
omnia summa sunt in oratore, probari non possunt.  
Tum Crassus, Atqui uide, inquit, in artificio, & opera  
quàm tenui, & leui quanto plus adhibeatur diligen-  
tiæ, quàm in hac re, quàm constat esse maximam. Sæ-  
pe enim soleo audire Roscium, cum ita dicat: Se ad-  
huc reperire discipulū, quem quidem probaret, potuis-  
se neminem: non quo non essent quidam probabiles:  
sed quia, si aliquid modo esset uitij, id ferre ipse non  
posset, nihil est. n. tam insigne, nec tam ad diuturnitatē  
memoriæ stabile, quàm id, in quo aliquid offenderis.  
Itaque, ut ad hanc similitudinem huius histrionis ora-  
toriam laudem dirigamus: uidetis ne, quàm nihil ab  
eo, nisi perfecte, nihil nisi cum summa uenustate fiat;  
nihil nisi ita ut deceat; et uti omnes moueat, atque de-  
lectet? itaque hoc i. diu est consecutus, ut in quo quis-  
que artificio excelleret, is in suo genere Roscius dicere-  
tur. Hæc ego absolutionem, perfectionemq; in oratore  
desiderans, à qua ipse longe absum, facio impudenter.  
mibi enim uolo ignosci: cæteris ipse non ignosco. nam  
qui non potest, qui uitiose facit, quem denique non de-  
cet; hunc, ut Apollonius iubebat, ad id, quod facere  
possit, detrudendum puto. Nū tu igitur, inquit Sul-  
pitius, me, aut hunc Cottam ius ciuile, aut rem milita-

rem iubes discere : nam quis ad ista summa, atque in  
omni genere perfecta potest peruenire. Tu ille, Ego  
uero, inquit, quod in uobis egregiam quādam, ac præ-  
claram indolem ad dicendum esse cognoui; iccirco hæc  
exposui omnia : nec magis ad eos deterrendos, qui non  
possent, quàm ad uos, qui possetis, exacuendos accom-  
modaui orationem meam. Et quanquam in utroque  
uestrum summum esse ingenium, studiumq; perspexi-  
tamen hæc, quæ sunt in specie posita, de quibus plura  
fortasse dixi, quàm solent Græci dicere, in te Sulpiti di-  
uina sunt. Ego enim neminē nec motu corporis, neque  
ipso habitu, atque forma aptiorem, nec uoce pleniorē,  
aut suauiorē mihi uideor audisse : quæ quibus à na-  
tura minora data sunt, tamen illud assequi possunt,  
ut ipsæ, quæ habeant, modice, & scienter utantur, & ut  
ne dedeant. id enim est maxime uitandum : & de  
hoc uno minime est facile præcipere, non mihi modo,  
qui sicut unus paterfamilias his de rebus loquor ; sed  
etiam ipsi illi Roscio : quem sæpe audio dicere, Caput  
esse artis, decere ; quod tamē unum id esse, quod tradō  
arte non possit. Sed, si placet, sermonē alio transfe-  
ramus, & nostro more aliquando, nō rhetorico, loqua-  
mur. Minime uero, inquit Cotta : nūc enim te iam  
exoremus necesse est, quoniā retines nos in hoc studio,  
nec ad aliam dimittis artē, ut nobis explices, quidquid  
est istud, quod tu in dicendo potes. neque enim sumus  
nimis auidi : ista tua mediocri eloquentia contenti su-  
mus : idq; ex te querimus, ut ne plus non assequamur,  
quàm quantulū tu in dicendo affecutus es : quoniam,  
quæ à natura expetenda sunt, ea dicis nō nimis deesse

nobis: quid præterea esse assumendum putes. Tum  
 Crassus arridens, Quid censes, inquit, Cotta, nisi stu-  
 dium, & ardorem quendam amoris? sine quo cum in  
 uita nihil quidquam egregium, tum certe hoc, quod tu  
 expetis, nemo unquam assequetur. Neque uero uos  
 ad eam rem ut deo esse cohortandos: quos, cum mihi  
 quoque sitis molesti, nimis etiā flagrare intelligo cupi-  
 ditate. sed profecto studia nihil profunt perueniendi  
 aliquò, nisi illud, quod quò intēdas, ferat, deducatq;,  
 cognoris. Quare, quoniam mihi leuius quoddā onus  
 imponitis; neque ex me de oratoris arte, sed de hac  
 mea, quantulacūque est, facultate quæritis: exponam  
 uobis nō quandam aut perreconditam, aut ualde diffi-  
 cilem, aut magnificam, aut grauem rationem consue-  
 tudinis meæ; qua quondam solitus sum uti, cum mihi  
 in isto studio uersari adolescenti licebat. Tum Sul-  
 pitius, O diem Cotta nobis, inquit, optatum: quod  
 enim neque precibus unquam, nec insidiando, nec spe-  
 culando assequi potui, ut, quid Crassus ageret, meditan-  
 di, aut dicendi causa, nō modo uidere mihi, sed ex eius  
 scriptore, & lectore Diphilo suspicari liceret; id spero  
 nos esse adeptos, omniaq; iam ex ipso, quæ diu cupi-  
 mus, cognituros. Tum Crassus. Atqui arbitror Sul-  
 piti, cum audieris, non tam te hæc admiraturum, quæ  
 dixero; quàm existimaturum, tum, cum ea audire cu-  
 piebas, causam, cur cuperes, non fuisse. nihil enim di-  
 cam reconditum, nihil expectatione uestra dignum, ni-  
 hil aut inauditum uobis, aut cuiquam nouum. Nam  
 principio illud, quod est homine ingenuo, liberaliterq;  
 educato dignum, non negabo, me ista omnium commu-

nia, & cōtrita praecepta didicisse: Primū, oratoris officium esse, dicere ad persuadendum accommodatē: Deinde, esse omnem orationē aut de infinitae rei quaestione sine designatione personarū, & temporum; aut de re certis in personis, ac temporibus locata: in utraque autem re quidquid in cōtrouersia ueniat, in eo quæri solere, aut factum ne sit; aut, si est factū, quale sit; aut etiam quo nomine uocetur; aut, quod nonnulli addūt, recte ne factum esse uideatur: Existere autē controuersias etiam ex scripti interpretatione; in quo aut ambigue quid sit scriptū, aut cōtrarie, aut ita, ut à sententia scriptum dissideat: His autē omnibus partibus subiecta quædam esse argumenta propria: sed causarum, quæ sint à communi quaestione seiunctæ, partim in iudicijs uersari, partim in deliberationibus: Esse etiam genus tertiū, quod in laudandis, aut uituperandis hominibus poneretur: certosq; esse locos, quibus in iudicijs uteremur, in quibus æquitas quaeritur; alios in deliberationibus, qui oēs ad utilitatē diriguntur eorum, quibus consiliū daremus; alios itē in laudationibus, in quibus ad personarū dignitatem omnia referrentur. Cumq; esset omnis oratoris uis, ac facultas in quinque partes distributa; ut deberet reperire primū, quid diceret; de inde inuenta nō solū ordine, sed etiā momēto quod, atque iudicio dispēsare, atque disponere; tū ea denique uestire, atque ornare oratione; post memoria sepire; ad extremū agere cum dignitate, & uenustate: etiam illa cognorā, & acceperam, ante, quā de re diceremus, initio conciliandos eorum esse animos, qui audirēt; de inde rem demonstrandā; postea cōtrouersiam cōstitutē



dam; tum id, quod nos intenderemus, confirmandum; post, quæ cōtra dicerentur, refellenda; extrema autem oratione, ea, quæ pro nobis essent, amplificanda, & augenda; quæq; essent pro aduersarijs, infirmanda, atque frangenda. Audieram etiam, quæ de orationis ipsius ornamentis traderentur: in qua præcipitur primum, ut pure, & latine loquamur; deinde, ut plane, & dilucide; tum ut ornate; post ad rerum dignitatem apte, & quasi decore: singularumq; rerum præcepta cognoram. Quin etiam, quæ maxime propria essent naturæ, tamen his ipsis artem adhiberi uideram. nā de actione, & de memoria quædam breuia, sed magna cū exercitatione præcepta gustaram. In his enim ferè rebus omnis istorū artificum doctrina uersatur. quàm ego si nihil dicā adiuuare, mentiar: habet enim quædā quasi ad cōmonendum oratorem, quò quidque referat, & quò intuens, ab eo, quodcunque sibi proposuerit, minus aberret. uerum ego hāc uim intelligo esse in præceptis omnibus; non ut ea secuti oratores eloquentiæ laudem sint adepti; sed quæ sua sponte homines eloquentes facerent, ea quosdam obseruasse, atque delegisse: sic esse nō eloquentiam ex artificio, sed artificium ex eloquentia natum: quod tamen, ut ante dixi, non eiicio: est enim etiam si minus necessarium ad bene dicendū, tamen ad cognoscendum non illiberale. Eius exercitatio quædam suscipienda uobis est: quanquam uos quidem iam pridem estis in cursu: sed ijs, qui ingrediuntur ad studium, quiq; ea, quæ agenda sunt in foro tãquam in acie, possunt etiā nūc exercitatione quasi ludicra prædiscere, ac meditari. Hanc ipsam, inquit Sulpitius,

nosse

nosse uolumus. attamen ista, quæ abs te breuiter de arte decursa sunt, audire cupimus: quanquam sunt nobis quoque non inaudita. uerum illa mox. nunc, de ipsa exercitatione quid sentias, querimus. Equidem probo ista, Crassus inquit, quæ uos facere soletis, ut causa aliqua posita consimili causarum earum, quæ in forum deferuntur, dicatis quammaxime ad ueritatem accommodate. sed plerique in hoc uocem modo, neque eam scienter, & uires exercent suas, & linguæ celeritatem incit. it, uerborumq; frequentia delectatur. in quo fallit eos, quod audierunt; dicendo homines, ut dicant, efficere solere. uere enim etiam illud dicitur; peruerse dicere, homines peruerse dicendo facillime consequi. Quamobrem in istis ipsis exercitationibus et si utile est etiam subito sepe dicere: tamen illud utilius, sumpto spatio ad cogitandum paratius, atque accuratius dicere. Caput autem est; quod (ut uere dicam) minime facimus (est enim magni laboris; quem plerique fugimus) quamplurimum scribere. stylus optimus, & præstantissimus dicendi effector, ac magister: neque iniuria. nam si subitam, & fortuitam orationem cōmentatio, & cogitatio facile uincit: hanc ipsam profecto assidua, ac diligens scriptura superabit. omnes enim siue artis sunt loci, siue ingenij cuiusdam, atque prudentiæ, qui modo insunt in ea re, de qua scribimus; inquirentibus nobis, omniq; acie ingenij contemplantibus, ostendunt se, & occurrunt, omnesq; sententiæ, uerbaq; omnia, quæ sunt cuiusque generis maxime illustria, sub acumen styli subeant, & succedant, necesse est. tum ipsa collocatio, conformatioq; uerborum perficitur in

scribendo, non poetico, sed quodam oratorio numero, & modo. Hæc sunt, quæ clamores, & admirationes in bonis oratoribus efficiunt: neque ea quisquam, nisi diu, multumq; scriptitarit, etiam si uehementissime se in his subitis dictionibus exercuerit, cōsequetur: et qui à scribendi consuetudine ad dicendum uenit, hanc affert facultatem, ut etiam subito si dicat, tamen illa, quæ dicantur, similia scriptorum esse uideantur; atque etiam, si quādo in dicendo scriptum attulerit aliquid, cum ab eo discesserit, reliqua similis oratio cōsequetur. ut concitato nauigio cum remiges inhibuerunt, retinet tamen ipsa nauis motum & cursum suum intermisso impetu, pulsūq; remorum: sic in oratione perpetua, cum scripta deficiunt, parem tamen obtinet oratio reliquæ cursum, scriptorum similitudine & uī concitata. In quotidianis autem cōmentationibus equidem mihi adolescentulus proponere solebam illam exercitationem maxime, qua C. Carbonem, nostrum illum inimicum, solitum esse uti sciebam; ut aut uersibus propositis quammaxime grauib; aut oratione aliqua lecta ad eum finem, quem memoria possem comprehendere, eam rem ipsam, quam legissem, uerbis alijs quam maxime possem lectis pronunciare. sed post animaduerti hoc esse in hoc uitiū; quod ea uerba, quæ maxime cuiusque rei propria, quæq; essent ornatissima, atque optima, occupasset aut Ennius, si ad eius uersus me exercerem; aut Gracchus, si eius orationem mihi forte proposuissem: ita si iisdem uerbis uterer, nihil prodesse; si alijs, etiam obesse, cum minus idoneis uti consuescere. Postea mihi placuit, eoque sum usus adolescens,

ut summorum oratorum græcas orationes explicarem: quibus lectis, hoc assequebar; ut cum ea, quæ legerem græce, latine redderem; non solum optimis uerbis uterer, & tamē usitatis; sed etiam exprimerem quædam uerba imitādo, quæ noua nostris essent; dūmodo essent idonea. Iam, uocis, & spiritus, & totius corporis, & ipsius lingue motus, & exercitationes non tam artis indigent, quàm laboris. quibus in rebus habenda est ratio diligenter, quos imitemur, quorū similes uelimus esse. intuendi nobis sunt nō solū oratores, sed etiam actores; ne mala consuetudine ad aliquam deformitatem, prauitatemq; ueniamus. Exercenda est etiam memoria ediscendis ad uerbū quamplurimis & nostris scriptis, & alienis. atque in ea exercitatione nō sanè mihi displicet adhibere, si consueris, etiam istam locorū, simulacrorumq; rationem, quæ in arte traditur. Educenda deinde dictio est ex hac domestica exercitatione, & umbratili medium in agmen, in puluerem, in clamorē, in castra, atque aciem forensē: subeūdus usus omnium; & periclitandæ uires ingenij; & illa cōmentatio inclusa, in ueritatis lucem proferenda est. Legendi etiam poetæ: cognoscenda historia: omnium bonarum artium scriptores, ac doctores & legendi, & peruolandi, & exercitationis causa laudandi, interpretandi, corrigendi, uituperandi, refellendi: disputādumq; de omni re in contrarias partes: & quidquid erit in quaque re, quod probabile uideri possit, eliciendum, atque dicendum. Perdiscendum ius ciuile: cognoscendæ leges: percipiendā omnis antiquitas: senatoria consuetudo, disciplina recipi. iura sociorū, fœdera, pactiones, causa imperij

cognoscenda est. Libandus est etiam ex omni genere urbanitatis facietiarum quidam lepos, quo tanquā sa-  
 le perspergatur omnis oratio. Effudi vobis omnia, quæ  
 sentiebam: quæ fortasse, si quemcūque patrem fa-  
 milias arripuissetis ex aliquo circulo, eadem vobis per-  
 cunētantibus respondisset. Hæc cum Crassus dixis-  
 set, silentium est consecutum. sed quanquam satis ijs,  
 qui aderant, ad id, quod erat propositum, dictum uide-  
 batur: tamen sentiebāt celerius esse multo, quā ipsi  
 uellent, ab eo peroratum. Tum Scauola, Quid est  
 Cotta, inquit? quid tacetis? nihil ne vobis in mentem  
 uenit, quod præterea à Crasso requiratis? Immo id  
 mehercule, inquit, ipsum attendo. tantus enim cursus  
 uerborum fuit, & sic euolauit oratio; ut eius uim, &  
 incitationem aspexerim, uestigia, ingressumq; non ui-  
 derim. & tanquam in aliquam locupletem, ac refer-  
 tam domum uenerim, non explicata ueste, neque pro-  
 posito argento, neque tabulis, & signis propalam collo-  
 catis, sed his omnibus multis, magnificisq; rebus cōstru-  
 ctis, ac reconditis: sic modo in oratione Crassi diuitias,  
 ac ornamenta eius ingenij per quædam inuolucra, at-  
 que integumenta perspexi; sed ea cum cōtemplari cu-  
 perem, uix aspiciendi potestas fuit. ita neque hoc pos-  
 sum dicere, me omnino ignorare, quid possideat; neque  
 planè nosse, ac uidisse. Quin tu igitur facis idem, in-  
 quit Scauola, quod faceres, si in aliquam domum ple-  
 nam ornamentorum illam uenisses. si ea seposita, ut  
 dicis, essent; tuq; ualde spectandi cupidus esses: non  
 dubitares rogare dominum, ut proferri iuberet, præ-  
 sertim si esset familiaris. similiter nūc petes à Crasso,

ut eam copiam ornamentorum suorum, quam constru-  
 Etam uno in loco quasi per transfennam pratercuntes  
 striclim aspeximus, in lucem proferat, & suo quidque  
 loco collocet. Ego uero, inquit Cotta, à te peto Scæ-  
 uola: me enim, & hunc Sulpitium impedit pudor ab  
 homine omnium grauissimo, qui genus huiusmodi dis-  
 putationis semper contempserit, hæc, quæ ipsi forsitan  
 puerorum elementa uideantur, exquirere. sed tu hoc  
 nobis da Scæuola, & perfice, ut Crassus hæc, quæ coar-  
 Etauit, & peranguste referat in oratione sua, dilatet  
 nobis, atque explicet. Ego mehercule, inquit Mutius,  
 antea uestra magis hoc causa uolebam, quàm mea:  
 neque enim tantopere hanc à Crasso disputationem  
 desiderabam, quantopere eius in causis oratione. dele-  
 Etor: nunc uero Crasse mea quoque etiam causa ro-  
 go; ut, quoniam tantum habemus otij, quantum iana-  
 diu nobis non contigit, ne grauerè exedificare id o-  
 pus, quod instituisti. formam enim totius negotij opi-  
 nione maiorem, melioremq; uideo: quam uehementer  
 probo. Enim uero, inquit Crassus, mirari satis nō queo,  
 etiā te hæc Scæuola desiderare: quæ neque ego teneo,  
 uti ij, qui docent; neque sunt eius generis, ut, si optime  
 tenerem, digna essent ista sapientia, ac tuis auribus.  
 An tu, inquit ille, si de istis cōmūnibus, & peruagatis  
 uix huic ætati audiendum putas: etiam ne illa negli-  
 gere possumus, quæ tu oratori cognoscenda esse dixisti?  
 de naturis hominum, de moribus, de rationibus ijs, qui-  
 bus hominum mentes & incitarentur, & reprimeren-  
 tur, de historia, de antiquitate, de administratione reip,  
 denique de nostro ipso iure civili. hanc enim ego

omnem scientiam, & copiam rerum in tua prudentia sciebam inesse: in oratoris uero instrumento tam lauatam supelleſtilem nunquam uideram. Potes igitur, inquit Crassus, (ut alia omittā, quæ sunt innumerabilia, et immensa, & ad ipsum tuū ius ciuile ueniā) oratores putare eos, quos multas horas expectauit, cum in campum properaret, & ridens, & stomachās Scauola? cū Hypſæus maxima uoce plurimis uerbis à M. Crasso Præt. contenderet, ut ei, quem defendebat, causa cadere liceret: Cn. autem Octauius homo Cons. non minus longa oratione recusaret, ne aduersarius causa caderet, ac ne is, pro quo ipse diceret, turpi tutela iudicio; atq; omni molestia stultitia aduersarij liberaretur. Ego uero istos, inquit, (memini enim mihi narrare Mutiū) non modo oratoris nomine, sed ne foro quidem dignos putarem. Atqui nō defuit illis patronis, inquit Crassus, eloquentia, neque dicendi ratio, aut copia, sed iuris ciuilis prudentia: quòd alter plus lege agendo petebat; quàm quantum lex in XII tabulis permiserat; quod cum impetrasset, causa caderet: alter iniquū putabat; plus secum agi, quàm quod esset in actione; neque intelligebat, si ita esse actū, litem aduersarium perditurum. Quid his paucis diebus? nō ne, nobis in tribunali Q. Pompeij Præt. urbani familiaris nostri sedentibus, homo ex numero disertorum postulabat, ut illi, unde peteretur, uetus, atque usitata exceptio daretur, C. VI. V. S. pecunie dies nō fuisset? quod petitoris causa cōparatum esse non intelligebat: ut, si ille inficiator probasset iudici ante petita esse pecuniam, quàm esset cōcepta deberi; petitor rursus cum peteret, ne exceptione



excluderetur, quòd ea res in iudicium antea uenisset. Quid ergo hoc fieri turpius, aut dici potest, quàm cum, qui hanc personam susceperit, ut amicorum controuersias, causasq; tueatur, laborantibus succurrat, ægris medeatur, afflicto excitet; hunc in minimis, tenuissimisq; rebus ita labi, ut alijs miserandus, alijs irridendus esse uideatur? Equidem propinquum nostrum P. Crassum, illum diuitem, & multis alijs in rebus elegantem hominem, & ornatum, & præcipue in hoc efferendum, & laudandum puto; quòd cum P. Scæuolæ frater esset, solitus est ei persæpe dicere: neque illum in iure civili satis illi arti facere posse, nisi dicendi copiam assumpsisset; quod quidem hic, qui mecum Consul fuit, filius eius est consecutus: neque se ante causas amicorum tractare, atque agere cœpisse, quàm tus civile didicisset. Quid uero ille M. Cato? non ne & eloquentia tanta fuit, quantâ illa tempora, atque illa ætas in hac ciuitate ferre maximam potuit; & iuris civilis omnium peritissimus? Verecundius hac de re iandudum loquor, quòd adest uir in dicendo summus: quem ego unum oratorem maxime admiror: sed tamen idem hoc semper ius civile contempsit. Verum, quoniam sententiæ, atque opinionis meæ uolulistis esse participes: nihil occultabo; & quoad potero, uobis exponam, quid de quaque re sentiam.

Antonij incredibilis quedam, & propè singularis, & diuina uis ingenij uidetur, etiã si hac scientia iuris nudata sit, posse facile cæteris armis prudentiæ causas tueri, atque defendere. quãobrem hic nobis sit exceptus: ceteros uero non dubitabo primùm inertiam cõdennare: sententia mea, post etiã impudentiæ. nã uolitare in foro,

hære in iure, ac Prætorum tribunalibus, iudicia priuata magnarum rerum obire, in quibus sæpe nō de facto, sed de æquitate, ac iure certetur; iactare se in causis centumuiualibus, in quibus usucapionum, tutelarū, gentilitatum, agnationum, alluuiionum, circumluuiorū, nexorum, mancipiorum, parietum, luminum, stillicidiorum, testamentorum ruptorum, aut ratorum, cæterarumq; rerum innumerabilium iura uersentur; cum omnino, quid suum, quid alienum; quare denique ciuis, an peregrinus; seruus, an liber quispiam sit, ignoret; insignis est impudentiæ. Illa uero deridenda arrogantia est; in minoribus nauigijs rudem esse se confiteri, quinquereemes autem, aut etiam maiores gubernare didicisse. Tu mihi cum in circulo decipiari aduersarij stipulatiuncula, & cum obsignes tabellas clientis tui, quibus id sit scriptum, quo ille capiatur; ego tibi ullā causam maiorem committendam putem? citius hercule is, qui duorum scalmorum nauiculam in portu euerterit, in Euxino ponto Argonautarum nauem gubernarit. Quid, si ne parue quidem causæ sunt, sed sæpe maximæ, in quibus certatur de iure ciuili? quod tandem os est illius patroni, qui ad eas causas sine ulla sciētia iuris audet accedere? Quæ potuit igitur esse causa maior, quàm illius militis; de cuius morte cum domum falsus ab exercitu nuntius uenisset; & pater eius recredita testamentum mutasset; & quem ei uisum esset, fecisset heredem; essetq; ipse mortuus: res delata est ad Centumuiros, cum miles domum reuenisset, egissetq; lege in hereditatem paternam testamento exheres filius? Nempe in ea causa quæ situm est de iure ci-

uili, posset ne paternorum bonorum exheres esse filius, quem pater testamēto neque heredem, neque exheredem scripsisset nominatim. Quid, qua de re inter Marcellos, & Claudios patritios Centumuiři iudicarunt? cum Marcelli ab liberti filio stirpe, Claudij patritij eiusdem hominis hereditatem gente ad se redisse dicerēt, non ne in ea causa fuit oratoribus de toto stirpis, ac gentilicis iure dicendum? Quid, quod item in centumuirali iudicio certatum esse accepimus? qui Romam in exilium uenisset, cui Romæ exulare ius esset, si se ad aliquam quasi patronū applicuisset, intestatoq; esset mortuus: non ne in ea causa ius applicationis obsecurum sanē, & ignotum, patefactum in iudicio atque illustratum est à patrono? Quid nuper? cum ego C. Sergij Auratæ contra hūc nostrum Antonium iudicio priuato causam defenderem: non ne omnis nostra in iure uersata defensio est? cum enim Marius Gratidianus ædes Auratæ uendidisset, neque seruire quandam earum ædium partem in mancipij lege dixisset: defendebamus, quidquid fuisset incommodi in mancipio, id si uenditor scisset, neque declarasset, præstare debere. Quo quidem in genere familiaris noster M. Bucculeius, homo neque meo iudicio stultus, & suo ualde sapiens, et à iuris studio non abhorrens, simili in re quodam modo nuper errauit. nam cum ædes L. Fusio uenderet; in mancipio lumina, uti tum essent, ita recepit. Fusius autem, simulatq; ædificari cœptum est in quadam parte urbis, quæ modo ex illis ædibus conspicitur, egit statim cum Bucculeio, quod cuiusque particula cœli officeretur, ita, quamuis esse procul, mutat

ri lumina putabat. Quid uero, clarissima M. Curiij causa, & M. Coponij nuper apud Centumuiros quo concursu hominum, qua expectatione defensa est? cum Q. Scaeuola aequalis, & collega meus, homo omnium & disciplina iuris ciuilis eruditissimus, & ingenio, prudentiaq; acutissimus, & oratione maxime limatus, atque subtilis, atque, ut ego soleo dicere, iuris peritorum eloquentissimus, eloquentium iuris peritissimus, ex scripto testamentorum iura defenderet; negaretq; nisi posthumus & natus, & ante, quam in suam tutelam uenisset, mortuus esset, heredem eum esse posse, qui esset secundum posthumum & natum, & mortuum heres institutus: ego autem defenderem hac eum mente fuisse, qui testamentum fecisset; ut si filius non esset, qui in tutelam ueniret; M. Curius esset heres. num destitit uterque nostrum in ea causa in auctoritatibus, in exemplis, in testamentorum formulis, hoc est in medio iure ciuili uersari? Omitto iam plura exempla causarum amplissimarum: quae sunt innumerabilia. Capitis nostri saepe potest accidere ut causae uersentur in iure. Etenim si C. Mancinũ, nobilissimũ, atque optimum uirum, ac Cõsularẽ, cum propter inuidiam Numantini foederis paterpatratus ex S. C. Numantinis dedidisset, eumq; illi non recepissent, posteaq; Mancinus domum reuenisset, neque in Senatum introire dubitasset, P. Rutilius M. filius Trib. pl. de Senatu iussit educi, quod eum ciuem negaret esse, quia memoriae sic esset proditum; quem pater suus, aut populus uendidisset, aut paterpatratus dedidisset, ei nullum esse postliminium;

quā possumus reperire ex omnibus rebus ciuilibus causam, contentionemq; maiorem, quā de ordine, de ciuitate, de libertate, de capite hominis. Cons? praesertim cum haec non in crimine aliquo, quod ille posset inficiari, sed in ciuili iure consisteret. similiq; in genere, inferiore ordine, si quis apud nos seruisset ex populo foederato, seseq; liberasset, ac postea domum reuenisset; quaesitum est apud maiores nostros, num is ad suos postliminio rediisset, & amisisset hanc ciuitatem. Quid de libertate, quo iudicium grauius esse nullum potest? non ne ex iure ciuili potest esse contentio, cum quaeritur is, qui domini uoluntate census sit, si non sit conditum lustrum, sit ne liber? Quid? quod usu memoria patrum uenit, ut paterfamilias, qui ex Hispania Romam uenisset, cum uxorem pregnantem in prouincia reliquisset: Romaeq; alteram duxisset: neque nuncium priori remisisset: mortuusq; esset intestato: & ex utraque filius natus esset: mediocris ne res in controuersiam adducta est? cum quaeretur de duobus ciuium capitibus, & de puero, qui ex posteriore natus erat, & de eius matre: quae, si iudicaretur, certis quibusdam uerbis, non nouis nuptijs fieri cum superiore diuortium, in concubinae locum duceretur. Haec igitur, & horum similia iura sua ciuitatis ignorantem, erectum, & celsum, alteri & prompto ore ac uultu huc atque illuc intrantem uagari magna cum caterua toto foro, praesidium clientibus, atque opem amicis, & propè cunctis ciuibus lucem ingenij, & consilij sui porrigentem, atque tendentem, non ne in primis flagitiosum putandū est? Et quoniam de

impudentia dixi: castigemus etiam segnitiam hominū, atque inertiam. Nam si esset ista cognitio iuris magna, ac difficilis: tamen utilitatis magnitudo deberet homines ad suscipiendum dicendi laborem impellere. Sed ò Dij immortales, non dicerem hoc audiente Scævola, nisi ipse dicere soleret, nullius sibi artis faciliorem cognitionem uideri. quod quidem certis de causis à plerisque aliter existimatur: primum, quia ueteres illi, qui huic scientiæ præfuerunt, obtinenda, atque augenda potentiae suæ causa peruulgari artem suam noluerunt. deinde posteaquam est editum, expositis à Cn. Claudio primum actionibus, nulli fuerunt, qui illa artificiose digesta generatim componerent. nihil est enim, quod ad artē redigi possit, nisi ille prius, qui illa tenet, quorum artem instituere uult, habet illam scientiam; ut ex ijs rebus, quarum ars nondum sit, artem efficere possit. Hoc uideo, dum breuiter uoluerim dicere, dictū à me esse paulo obscurius: sed experiar, & dicam, si potero, planius. Omnia fere, quæ sunt conclusa nunc artibus, dispersa, & dissipata quondam fuerunt: ut in musicis numeri, et uoces, et modi; in geometria lineamenta, formæ, interualla, magnitudines; in astrologia cœli conuersio, ortus, oblitus, motusq; syderum; in græmaticis poetarū pertractatio, historiarum cognitio, uerborum interpretatio, pronuntiandi quidam sonus; in hac denique ipsa ratione dicendi excogitari, ornare, disponere, meminisse, agere, ignoto quondam omnibus, & diffusa late uidebātur. adhibita est igitur ars quædam extrinsecus ex alio genere quodam, quod sibi totū philosophi assumunt, quæ rem dissolutam, diuulsamq;

conglutinarer, & ratione quadam constringeret. Sit ergo in iure civili finis hic, legitima, atque usitata in rebus, causisq; civium æqualitatis conservatio. Tum sunt notanda genera, & ad certum numerum, paucitatemq; revocanda. Genus autem id est, quod sui similis cõmunione quadam, specie autem differentis, duas, aut plures complectitur partes. Partes autem sunt, quæ generibus ijs, ex quibus emanant, subiunguntur: omniaq; , quæ sunt vel generum, vel partium nomina, definitionibus, quam vim habeant, est exprimendum. est enim definitio, earum rerum, quæ sunt eius rei propriæ, quam definire volumus, brevis, et circumscripta quedam explicatio. Hisce ego rebus exempla adiungerem, nisi, apud quos hæc haberetur oratio, cernerem, nunc complectar, quod proposui, brevi. Si enim aut mihi facere licuerit, quod iandiu cogito; aut alius quispiam aut me impedito occuparit, aut mortuo effecerit; ut primum omne ius civile in genera digerat, quæ perpauca sunt; deinde eorum generum quasi quædam membra dispertiat; tum propriam cuiusque vim definitione declaret: perfectam artem iuris civilis habebitis, magis magnam, atque uberem, quam difficilem, & obscuram. Atque interea tamen, dum hæc, quæ dispersa sunt, coguntur, vel passim licet carpentem, & colligentem undique, repleti ista iuris civilis scientia. Non ne videtis, Equitem Romanum, hominem acutissimo omnium ingenio, sed minime cæteris artibus eruditum, C. Aculeonem, qui mecum vivit, semperq; vixit, ita tenere ius civile, ut ei, cum ab hoc discefferitis, nemo de ijs, qui peritissimi sunt, anteponatur? omnia enim



sunt posita ante oculos, collocata in usu quotidiano, in cōgressione hominum, atque in foro: neque ita multis literis, aut uoluminibus magnis cōtinentur. eadem. n. sunt elata primum à pluribus: deinde paucis commutatis uerbis etiam ab ijsdem scriptoribus scripta sunt sepius. Accedit uero, quo facilius percipi, cognosciq; ius ciuile possit, quod minime plerique arbitrantur, miraquædam in cognoscendo suauitas, & delectatio. Nam siue quem hæc aliena studia delectant: plurima est et in omni iure, & in Pontificum libris, & in XII tabulis antiquitatis effigies; quod & uerborum prisca uetustas cognoscitur; & actionum genera quædam maiorum consuetudinem, uitamq; declarant. Siue quis ciuilem scientiam contempletur; quam Scæuola non putat oratoris esse propriam, sed cuiusdam ex alio genere prudentiæ: totam hanc, descriptis omnibus ciuitatis utilitatibus, ac partibus, XII tabulis cōtineri uidebitis. Siue quem ista præpotens, et gloriosa philosophia delectat: dicam audacius, hosce habet fontem omnium disputationum suarum, qui iure ciuili, & legibus cōtinentur. ex his enim & dignitatem maxime expetendam uidemus, cum uerus, iustus, atque honestus labor honoribus, præmijs, atque splendore decoratur; uitia autem hominū, atque fraudes damnis, ignominijs, uinculis, uerberibus, exilijs, morte multantur: & docemur, non infinitis, concertationumq; plenis disputationibus, sed auctoritate, nutuq; legum, domitas habere libidines, coercere omnes cupiditates, nostra tueri, ab alienis mentes, oculos, manus abstinere. Fremant omnes licet: dicam quod sentio. bibliothecas mehercule omnium

philosophorum unus mihi uidetur XII tabularum libellus, si quis legum fontes, & capita uiderit, & auctoritatis pondere, & utilitatis ubertate superare. Ac si nos, id quod maxime debet, nostra patria delectat; cuius rei tanta est uis, ac tanta natura, ut Ithacā illam in asperrimis saxulis tanquam nidulum affixā sapientissimus uir immortalitati anteponeret: quo amore tandem inflammati esse debemus in eiusmodi patriā, quæ una in omnibus terris domus est uirtutis, imperij, dignitatis? cuius primū nobis mens, mos, disciplina nota esse debet: uel quia est patria parens omnium nostrum: uel quia tanta sapientia fuisse in iure constituendo putanda est, quāta fuit in his tantis opibus imperij cōparandis. Percipietis etiam illam ex cognitione iuris lætitiā, & uoluptatem, quod, quantū præstiterint nostri maiores prudentia cæteris gentibus, tū facillime intelligetis, si cum illorū Lycurgo, & Dracone, & Solone nostras leges cōferre uolueritis. incredibile est. n. quā sit omne ius ciuile, præter hoc nostrū, inconditū, ac penè ridiculum: de quo multa soleo in sermonibus quotidianis dicere, cū hominū nostrorū prudentiam cæteris hominibus, & maxime Græcis antepono. His ego de causis dixerā Scaeuola, ijs, qui perfecti oratores esse uellent, iuris ciuilis cognitionem esse necessariam. Iam uero ipsa per sese quantū affērat ijs, qui ei præsumt, honoris, gratiæ, dignitatis, quis ignorat? Itaque ut apud Græcos infimi homines mercedula adducti ministros se præbent in iudicijs oratoribus, ij, qui apud illos πρεσβυταικοι uocantur: sic in nostra ciuitate contra amplissimus quisque, et clarissimus uir, ut ille, qui propter h. c.

iuris ciuilis sciētiam sic appellatus à summo poeta est,  
 Egregie cordatus homo Catus Aeliu' Sextus;  
 multiq; praterea: qui cum ingenio sibi auēto digni-  
 tatem peperissent; perfecerunt, ut in respondendo iu-  
 re auctoritate plus etiam, quàm ipso ingenio ualerēt.  
 Seneētuti uero celebrandæ, & ornādæ quod honestius  
 potest esse perfugium, quàm iuris interpretatio? Equi-  
 dem mihi hoc subsidium iam inde ab adoleſcētis com-  
 paraui non solum ad causarum usum forensem, sed  
 etiam ad decus, atque ornamentum seneētutis: ut cum  
 me uires, quod ferè iam tempus adueniat, deficere cœ-  
 piſſent, ab solitudine domum meam uindicarem. Quid  
 est enim præclarius, quàm honoribus, & reip. muneribus  
 perfunctum senem posse suo iure dicere id, quod  
 apud Ennium dicat ille Pythius Apollo? se esse eum,  
 unde sibi, si non populi, & reges, at omnes sui ciues cō-  
 silium expetant,

Suarum rerum incerti: quos ego mea ope ex  
 Incertis certos, compotesq; consili

Dimitto, ut ne res temere tractent turbidas.

est enim sine dubio domus iurisconsulti, totius oracula  
 ciuitatis. Testis est huiusce Q. Mutij ianua, &  
 uestibulum: quod in eius infirmissima ualetudine, af-  
 feētāq; iam ætate, maxima quotidie frequentia ciuiū,  
 ac summorum hominum splendore celebratur. Iam,  
 illa non longam orationem desiderant, quā iobrem exi-  
 stimē publica quoque iura, quæ sunt propria ciuitatis,  
 atque imperij, tum monimenta rerum gestarum, &  
 uetustatis exempla oratori nota esse debere. nam ut in  
 rerum priuatarum causis, atque iudicijs depromenda  
 se pe

sæpe oratio est ex iure civili; & iccirco, ut ante diximus, oratori iuris civilis scientia necessaria est: sic in causis publicis iudiciorum, concionum, senatus omnis hæc & antiquitatis memoria, & publici iuris auctoritas, & regendæ reip. ratio, ac scientia, tanquam aliqua materies, ijs oratoribus, qui uersantur in rep. subiecta esse debent. non enim causidicum nescio quem, neque proclamatorem, aut rabulam hoc sermone nostro conquirimus, sed eum uirum, qui primum sit eius artis antistes; cuius cum ipsa natura magnam homini facultatem daret, tamen esse deus putatur; ut & ipsum, quod erat hominis proprium, non partum per nos, sed diuinitus ad nos delatum uideretur: deinde qui possit non tam caduceo, quàm nomine oratoris ornatus, incolumis uel inter hostium tela uersari: tum qui scelus, fraudemq; nocentis possit dicendo subiungere odio ciuium, supplicioq; constringere; idemq; ingenij præsidio innocentiam, iudiciorum poena liberare; idemq; languentem, labentemq; populum aut ad decus excitare, aut ab errore deducere; aut inflammare in improbos, aut incitatum in bonos mitigare: qui denique, quencunque in animis hominum motum res, et causa postulet, eum dicendo uel excitare possit, uel sedare. Hæc uim si quis existimat aut ab ijs, qui de dicendi ratione scripserunt; expositam esse; aut à me posse exponi tam breui: uehementer errat; neque solum inscientiam meam, sed ne rerum quidem magnitudinē perspicit. Equidem uobis, quoniā ita uoluistis, fontes, unde hauriretis; atque itinera ipsa ita putauī esse demonstranda; non ut ipse dux essem, quod & infinitū est, & non necessariū; sed

ut cōmonstrarem tantum uiam, & ut fieri solet, digi-  
 tum ad fontes intenderem. Mihi uero, inquit Mutius,  
 satis, superq; abs te uidetur istorū studijs, si modo sunt  
 studiōsi, esse factum. nam ut Socratem illum solitum  
 aiunt dicere, perfectum sibi opus esse, si quis satis esset  
 concitatus cohortatione sua ad studium cognoscendæ,  
 percipiendæq; uirtutis; quibus. n. id persuasum esset,  
 ut nihil mallent se esse, quàm bonos uiros, ijs reliquam  
 facilem esse doctrinam: sic ego intelligo, si in hæc, quæ  
 patefecit oratione sua Crassus, intrare uolueritis, facil-  
 lime uos ad ea, quæ cupitis, peruenturos, ab hoc aditu,  
 ianuâq; patefacta. Nobis uero, inquit Sulpitius, ista  
 sunt pergrata, perq; iucunda: sed pauca etiam requiri-  
 mus, in primisq; ea, quæ ualde breuiter à te Crasse de  
 ipsa arte percursa sunt, cum illa te & non contemne-  
 re, & didicisse confiterere. ea si paulo latius dixeris,  
 expleris omnem expectationem diuturni desiderij no-  
 stri. nam nunc, quibus studendum rebus esset, accepi-  
 mus: quod ipsum est tamen magnum: sed uias earū  
 rerum, rationemq; cupimus cognoscere. Quid si, in-  
 quit Crassus, quoniā ego, quo facilius uos apud me te-  
 nerem, uestre potius obsecutus sum uolūtati, quàm aut  
 consuetudini, aut naturæ meæ; petimus ab Antonio,  
 ut ea, quæ cōtinet, neq; adhuc protulit, ex quibus unū  
 libellum sibi excidisse iandudū questus est, explicet no-  
 bis, & illa dicendi mysteria enunciet? Ut uidetur,  
 inquit Sulpitius: nam Antonio dicente, etiam quid  
 tu sentias, intelligemus. Peto igitur, inquit Crassus,  
 à te, quoniā id nobis Antonī hominibus id ætatis one-  
 ris ab horum adolescentium studijs imponitur; ut ex-

ponas, quid ijs de rebus, quas à te queri uides, sentias. Deprehensum equidem me, inquit Antonius, planè uideo, atque sentio; non solū quòd ea requiruntur à me; quorum sum ignarus, atque insolēs; sed quia, quod in causis ualde fugere soleo, nè tibi Crasse succedā, id me nunc isti uitare nō sinūt. uerum hoc ingrediar ad ea, quæ uultis, audacius, quòd idem mihi spero usu esse uenturū in hac disputatione, quod in dicendo solet; ut nulla expectetur ornata oratio. neque. n. sumde arte dicturus, quam nunquā didici, sed de mea cōsuetudine: ipsaq; illa, quæ in cōmentarium meū retuli, sunt eiusmodi, non aliqua mihi doctrina tradita, sed in rerum usu, causisq; tractata. quæ si uobis hominibus eruditissimis non probabuntur: uestrà iniquitatē accusatoz te, qui ex me ea quæsieritis, quæ ego nescirem: meā facilitatem laudatoz, cū uobis nō meo iudicio, sed uestro studio inductus nō grauare respōdero. Tum Crassus, Perge modo, inquit, Antoni: nullum est. n. periculum; ne quid tu eloquare, nisi ita prudēter, ut neminem nostrū poeniteat ad hūc te sermonē impulsisse. Ego uero, inquit, pergam: & id faciam, quod in principio fieri in omnibus disputationibus oportere cōseo; ut quid illud sit, de quo disputetur, explanetur, ne uagari, & errare cogatur oratio, si ij, qui inter se dissenserint, non idem esse illud, de quo agitur, intelligent. Nam si forte quæreretur, quæ esset ars Imperatoris: constituendū putarem principio, quis esset Imperator: qui cum esset constitutus administrator quidem belli gerendi, tum adiūgeremus de exercitu, de castris, de agminibus, de signorum collationibus, de oppidorum oppugnationibus, de.

commeatn, de insidijs faciendis, atque uitandis, de reli-  
 quis rebus, quæ essent propriæ belli administrandi: qua-  
 rum qui essent animo, & scientia cōpotes, eos esse im-  
 peratores dicerem: utererq; exemplis Africanorum, et  
 Maximorum; Epaminundam, atque Annibalē, atque  
 eius generis homines nominarem. Sin autem quærere-  
 mus, quis esset is, qui ad remp. moderandam usum, &  
 scientiam, & studium suum cōtulisset: definirem hoc  
 modo: Qui, quibus rebus utilitas reip. pararetur, auge-  
 returq; teneret, ijsq; uteretur, hunc reip. rectorem, &  
 consilij publici auctorem esse habēdum: prædicaremq;  
 P. Lentulum principem illū, & Ti. Gracchum patrem,  
 & Q. Metellum, & P. Africanum, & C. Lælium, &  
 innumerabiles alios cum ex nostra ciuitate, tum ex  
 ceteris. Sin autem quæreretur, quisnam iurisconsul-  
 tus uere nominaretur: cum dicerem, qui legum, &  
 consuetudinis eius, quæ priuati in ciuitate uterentur,  
 & ad respondendum, & ad agendū, & ad cauēdum  
 peritus esset: & ex eo genere Sex. Aelium, M. Mani-  
 lium, P. Mutium nominarem. Atque, ut iam ad leuio-  
 ra artium studia ueniam: si musicus, si grammaticus,  
 si poeta quærat; possim similiter explicare, quid eo-  
 rum quisque profiteatur, & quo non amplius ab quo  
 quæ sit postulandum. Philosophi denique ipsius, qui de  
 sua ui, ac sapientia unus omnia penè proficitur, est ta-  
 men quadam descriptio; ut is, qui studeat omnium  
 rerum diuinarum, atque humanarum uim, naturam,  
 causasq; nosse, & omnem bene uiuendi rationem te-  
 nere, & persequi, nomine hoc appelletur. Oratorē  
 autem, quoniam de eo quærimus, equidem non facio



eundem, quem Crassus, qui mihi uisus est omnem omnium rerum, atque artium scientiam comprehendere uno oratoris officio, ac nomine: at eum puto esse, qui & uerbis ad audiendum incundis, & senectijs ad probandum accommodatis uti possit in causis forensibus, atque communibus. hunc ego appello oratorem: eumq; esse præterea instructum uoce, & actione, & lepore quodam uolo. Crassus uero mihi noster uisus est oratoris facultatem non illius artis terminis, sed ingenij sui finibus immensus penè describere. nam etiam ciuitatum regendarum oratori gubernacula sententia sua tradidit. in quo per mihi mirum uisum est Scæuola te hoc illi concedere; cum sæpissime tibi senatus breuiter, impoliteq; dicenti maximis sit de rebus assensus. M. uero Scaurus, quem non longe ruri apud se esse audio, uir regendæ reip. sciētissimus, si audierit hanc auctoritatē grauitatis, & consilij sui uindicari à te Crasse, quod eam oratoris propriam esse dicas; iam, credo, huc ueniat, & hanc loquacitatem nostram uultu ipso, aspectuq; conterreat. qui quanquam est in dicendo minime contemnendus: prudentia tamen rerum magnarum magis, quàm dicendi arte nititur. Neque uero, si quis utrunque potest; aut ille consilij publici auctor, ac senator bonus, ob eam ipsam causam orator est; aut hic disertus, atque eloquens, si est idem in procuratione ciuitatis egregius, illam scientiam dicendi copia est cōsecutus. multum inter se distant istæ facultates, longeq; sunt diuersæ, atque seiunctæ. neque eadem ratione, ac uia M. Cato, P. Africanus, Q. Metellus, C. Lælius, qui omnes eloquentes fuerunt, oratioq;

nem suam, & reip. dignitatem exornabant. neque enim est interdictum aut à rerum natura, aut à lege aliqua, atque more, ut singulis hominibus ne amplius quàm singulas artes nosse liceat. Quare non, etsi eloquentissimus Athenis Pericles, idemq; in ea ciuitate plurimos annos princeps consilij publici fuit, iccirco eiusdem hominis, atque artis utraque facultas existimanda est. nec, si P. Crassus idem fuit eloquens, & iuris peritus, ob eam causam inest in facultate dicendi iuris ciuili scientia. nam si quisque, ut in aliqua arte, & facultate excellens aliam quoque artem sibi assumpserit, is perficiet, ut, quod præterea sciet, id eius, in quo excellet, pars quædam esse uideatur: licet ista ratione dicamus, pila bene, et duodecim scrupis ludere, proprium esse iurisconsulti, quoniam utrunque eorum P. Mutius optime fecerit: eademq; ratione dicantur etiam quos *ποικίλοι* Græci uocant, iidem poete, quoniam Empedocles physicus egregium poema fecerit. At hoc ne philosophi quidem ipsi, qui omnia, sicut propria, sua esse, atque à se possideri uolunt, dicere audent; geometriam, aut musicam philosophi esse, quia Platonem omnes in illis artibus præstantissimum fuisse fateantur. Ac si iam placet omnes artes oratori subiungere: tolerabilius est sic potius dicere; ut, quoniam dicendi facultas non debeat esse ieiuna, atque nuda, sed aspersa, atque distincta multarum rerum iucunda quadam uarietate, sit boni oratoris multa auribus accepisse, multa uidisse, multa animo, & cogitatione, multa etiam legendo percurrisse; neque ea, ut sua, possedisse, sed, ut aliena, libasse. fateor enim callidum quen-

dam hunc, & nulla in re tironem, ac rudem, nec peregrinum, atque hospitem in agendo esse debere. Neque uero istis tragædijs tuis, quibus uti philosophi maxime solent, Crasse perturbor, quòd ita dixisti, neminem posse eorum mentes, qui audirent, aut inflammare dicendo, aut inflammatas reslinguere, cū eo maxime uis oratoris, magnitudoq; cernatur, nisi qui rerum omnium naturam, mores hominum, atque rationes penitus perspexerit; in quo philosophia sit oratori necessario percipienda. quo in studio hominū ingeniosissimorū, otiosissimorumq; totas ætates uidemus esse contritas. quorū ego copiam, magnitudinemq; cognitionis, atq; artis non modo non contemno, sed etiam uehementer admiror: nobis tamen, qui in hoc populo, foroq; uersamur, satis est ea de moribus hominum et scire, et dicere, quæ non abhorrent ab hominum moribus. Quis enim unquam orator magnus, & grauis, cum iratum aduersario iudicem facere uellet, hæsitauit ob eam causam, quòd nesciret, quid esset iracūdia, feruor'ne mentis, an cupiditas puniendi doloris? quis, cum ceteros animorū motus aut iudicibus, aut populo dicendo miscere, atque agitare uellet, ea dixit, quæ à philosophis dici solēt? qui partim omnino motus negant in animis ullos esse debere; quiq; eos in iudicium mentibus concitēt, scelus eos aiunt nefarium facere: partim, qui tolerabiliores uolunt esse, & ad ueritatem uitæ propius accedere, permediocres, ac potius leues motus debere esse dicunt. Orator autem omnia hæc, quæ putantur in communi uitæ consuetudine mala, ac molesta, & fugienda, multo maiora, et acerbiora uerbis facit: itemq; ea, quæ

vulgo expetenda, atque optabilia videtur, dicendo am-  
 plicat, atque ornat: neque vult ita sapiens inter stul-  
 tos uideri, uti, qui audiant, aut illum ineptum, aut græ-  
 culum putent, aut, etiam si ualde probent ingenium ora-  
 toris. sapientiam admirentur, se esse stultos moleste fe-  
 rant: sed ita peragrat per animos hominum, ita sensus,  
 mentesque; pertractat, ut non desideret philosophorum de-  
 scriptiones, neque exquirat oratione, summum illud bo-  
 num in animo ne sit, an in corpore; uirtute, an uolupta-  
 te definiatur, an hæc inter se iungi, copularique; possint;  
 an uero, ut quibusdam uisum, nihil certum sciri, nihil  
 planè cognosci, & percipi possit. Quarum rerum fa-  
 teor magnam, multiplicemque; esse disciplinam, & mul-  
 tas, copiosas, uariasque; rationes. sed aliud quiddam lon-  
 ge aliud Crasse querimus. acuto homine nobis opus  
 est, & natura, usuque; callido; qui sagaciter peruestiget,  
 quid sui ciues, ijque; homines, quibus aliquid dicendo per-  
 suadere uelit, cogitent, sentiant, opinentur, expectent.  
 Teneat oportet uenas cuiusque generis, ætatis, ordinis;  
 & eorum, apud quos aliquid aget, aut erit acturus,  
 mentes, sensusque; degustet: philosophorum autem li-  
 bros referuet sibi ad huiusmodi Tusculani requiem,  
 atque otium. nisi, si quando ei dicendum erit de iusti-  
 tia, & fide, mutuetur à Platone: qui cum hæc ex-  
 primenda uerbis arbitraretur, nouam quandam fin-  
 xit in libris ciuitatē: usque; eò illa, quæ dicēda de iustitia  
 putabat, à uitæ cōsuetudine, & à ciuitatū moribus ab-  
 horrebāt. Quod si ea probarētur in populis, atque in ci-  
 uitatibus: quis tibi Crasse cōcessisset clarissimo uiro, &  
 amplissimo principi ciuitatis, ut illa diceret in maxima

concione tuorum ciuium , quæ dixisti ? Eripite nos ex  
miserijs : eripite nos ex faucibus eorum, quorum crude  
litas nostro sanguine non potest expleri . Nolite sinere  
nos cuiquam seruire , nisi uobis uniuersis ; quibus &  
possumus, & debemus . Omitto miserias, in quibus, ut  
illi aiunt, uir fortis esse non potest : omitto fauces , ex  
quibus te eripi uis , ne iudicio iniquo exorbeatursan-  
guis tuus: quod sapienti negant accidere posse. seruire  
uero nō modo te , sed uniuersum senatum, cuius tum  
causam agebas, ausus es dicere ? Potest ne uirtus Crasse  
seruire istis auctioribus , quorum tu præcepta oratoris  
facultate complecteris ? quæ & semper, & sola libera  
est ; quæq; etiam si corpora capta sint armis, aut con-  
stricta uinculis, tamen suum ius, atque omnium rerum  
impunitam libertatem tenere debeat. Quæ uero addi-  
disti, non modo senatum seruire posse populo, sed etiā  
debere : quis hoc philosophus tam mollis, tam languis-  
cus , tam enervatus , tam omnia ad uoluptatem cor-  
poris, doloremq; referens probare posset ? senatum ser-  
uire populo , cui populus ipse moderandi , & regen-  
di sui potestatem quasi quasdam habenas tradidisset ?  
itaque hæc , cum à te diuinitus ego dicta arbitrarer ,  
P. Rutilius Rufus , homo doctus , & philosophiæ de-  
ditus, non modo parum commode , sed etiam turpiter,  
& flagitiose dicta esse dicebat . Idem q; Ser. Galbā, quē  
hominē probe cōmeminisse se aiebat, pergrauiter repre-  
hendere solebat, q; is, L. Scribonio quæstionem in eū fe-  
rente , populi misericordiam concitasset ; cū M. Cato,  
Galbæ grauis atque acer inimicus, asperere apud populū  
& uehementer esset locutus: quā orationem in Origis

bus suis exposuit. Reprehendebat igitur Galbam Rutilius, quod is C. Sulpitij Galli propinqui sui Q. Pupillum filium ipse penè in humeros suos extulisset, qui patris clarissimi recordatione, et memoria fletum populo moueret; & duos filios suos paruos tutelæ populi commendasset; ac se, tanquam in procinctu testamentum faceret, sine libra, atque tabulis populū R. tutorem instituere dixisset illorum orbitati. itaque cum & inuidia, & odio populi tū Galba premeretur; his quoque eum tragœdijs liberatum ferebat. quod item apud Catonem scriptū esse uideo: nisi pueris, & lacrymis usus esset, poenas eum daturum fuisse. Hæc Rutilius ualde uituperabat: & huic humilitati dicebat uel exilium fuisse, uel mortem anteponendam. neque uero hoc solum dixit, sed ipse & sensit, & fecit. nam cum esset ille uir exemplum, ut scitis, innocentie; cumq; illo nemo neque integrior esset in ciuitate, neque sanctior: nō modo supplex iudicibus esse noluit, sed ne ornatius quidem, aut uberius causam dici suam, q̃ simplex ratio ueritatis ferebat. paulum huic Cottæ tribuit partium, disertissimo adolescenti, sororis suæ filio. dixit item causam illam quadā ex parte Q. Mutius more suo, nullo apparatu, pure, & dilucide. q̃ si tu tum Crasse dixisses, qui subsidium oratori ex illo disputationibus, quibus philosophi utuntur, ad dicendi copiam petendū esse paulo ante dicebas; & si tibi pro P. Rutilio non philosophorum more, sed tuo licuisset dicere: quamuis scelerati illi fuissent, sicuti fuerunt, pestiferi ciues, supplicioq; digni; tamen omnem eorum importunitatē ex intimis mentibus euellisset uis orationis tuæ. nūc talis

uir amissus est, dum causa ita dicitur, ut si in illa com-  
mētia Platonis ciuitate res ageretur. nemo ingemuit :  
nemo inclamauit patronorū: nihil cuiquā doluit: nemo  
est questus: nemo remp. implorauit: nemo supplicauit.  
Quid multa? pedem nemo in illo iudicio supposuit; cre-  
do, ne Stoicis renunciaretur. Imitatus est homo Roma-  
nus, & cōsularis ueterem illū Socratem: qui cū omniū  
sapientissimus esset, sanctissimeq; uixisset; ita in iudi-  
cio capitis pro se ipse dixit, ut non supplex, aut reus, sed  
ut magister, aut dominus uideretur esse iudicum. quin  
etiam, cum ei scriptam orationem disertissimus orator  
Lysias attulisset, quā, si ei uideretur, edisceret, ut ea pro  
se in iudicio uteretur: nō inuitus legit, & cōmode scri-  
ptam esse dixit: sed inquit, ut si mihi calceos sicyonios  
attulisses, nō uterer, quamuis essent habiles, & apti ad  
pedem, quia non essent uiriles: sic illam orationem di-  
sertam sibi, & oratoriam uideri; fortem, & uirilē nō  
uideri. Ergo ille quoque damnatus est, neque solum  
primis sententijs, quibus tantum statuebant iudices dā-  
narent, an absoluerent; sed etiam illis, quas iterum  
legibus ferre debebant. Erat enim Athenis reo dama-  
nato, si fraus capitalis non esset, quasi pœnæ aesti-  
matio. ex sententia, cum iudicibus daretur, inter-  
rogabatur reus, quam quasi aestimationem commeruis-  
se se maxime confiteretur. quod cum interrogatus  
Socrates esset: respondit sese meruisse, ut amplissimis  
honoribus, & præmijs decoraretur, & ut ei uictus quo-  
tidianus in Prytaneo publice præberetur: qui honos  
apud Græcos maximus haberetur. cuius responso sic  
iudices exarserunt, ut capitis hominem innocentissimū



condemnarent . qui quidem si absolutus esset (quod mehercule, etiā si nihil ad nos pertinet , tamen propter eius ingenij magnitudinem uellem) quonam modo istos philosophos ferre possemus; qui nunc, cum ille dānatus est nullam aliam ob culpam, nisi propter dicendi insci-  
tiam , tamen à se oportere dicunt peti præcepta dicen-  
di ? quibuscum ego non pugno, utrum sit melius , aut uerius : tantum dico, & aliud illud esse atque hoc, & hoc sine illo summum esse posse . Nam quòd ius ciuile Crasse tam uehementer amplexus es : uideo, quid ege-  
ris, & tum, cum dicebas, uidebam . Primum Scæuolæ te dedidisti, quē omnes amare meritissimo pro eius exi-  
mia suauitate debemus : cuius artem cum indotatam esse, atque incomitatam, & incomptam uideres; uerbo-  
rum eam dote locupletasti, & ornasti . deinde quòd in ea tu plus operæ, laborisq; cōsumpseras, cum eius studi-  
tibi & hortator , & magister esset domi : ueritus es , nisi istam artem oratione exaggerasses, ne operam per-  
didisses . sed ego ne cum ista quidem arte pugno . sit sanè tanta, quantam tu illam esse uis : etenim sine cō-  
trouersia & magna est ; & late patet ; & ad multos pertinet ; & summo in honore semper fuit : & cla-  
rissimi ciues ei studio etiam hodie præsumt . sed uide Crasse, ne, dum nouo & alieno ornatu uelis ornare ius  
ciuile scientiam, suo quoque etiam concesso et tra-  
dito spoliis atque denudes . Nam si ita diceret ; qui iu-  
risconsultus esset, esse eum oratorem ; itemq; qui esset  
orator , iuris eundem esse consultum : præclaras duas  
arteis constitueres, atque inter se pares, & eiusdem so-  
cias dignitatis : nunc uero iurisconsultum sine hac

eloquentia, de qua quærimus, fateris esse posse, fuisseq; plurimos: oratorem negas, nisi illam scientiam assumpserit, esse posse: ita & tibi iuriconsultus ipse per se nihil, nisi legulcius quidam cautus, & acutus, præco actionum, cautior formularum, auceps syllabarum. Sed quia sæpe utitur orator subsidio iuris in causis: idcirco istam iuris scientiam eloquentiæ tanquam ancillulam, pedisequamq; adiunxisti. Quod uero impudentiam admiratus es eorum patronorum, qui aut, cum parua nescirent, magna profiterentur; aut ea, quæ maxima essent in iure civili, tractare auderent in causis, cū ea nescirent, nunquamq; didicissent: utriusque rei facilis est, & prompta defensio. Nam neque illud est mirandum, qui, quibus uerbis coemptio fiat, nesciat; eundem eius mulieris, quæ coëptionem fecerit, causam posse defendere: nec si parui nauigiū, & magni eadem est in gubernando scientia; iccirco qui, quibus uerbis hercisci oporteat, nesciat, idem herciscundæ familiæ causam agere non possit. Nam quod maximas centumuirales causas in iure positas protulisti: quæ tandem earum causa fuit, quæ ab homine eloquenti, iuris imperito nō ornatissime potuerit dici? quibus quidem in causis omnibus sicut in ipsa M. Curij, quæ abs te nuper est dicta, & in C. Hostilij Mancini controuersia, atque in eo puero, qui ex altera natus erat uxore non remisso nuncio superiori, fuit inter peritissimos homines summa de iure dissensio. Quæro igitur, quid adiunxerit oratorem in his causis iuris scientia: cum hic iuriconsultus superior fuerit discessurus, qui esset nō suo artificio, sed alieno, hoc est non iuris scientia, sed eloquen-

tia sustentatus. Equidem hoc saepe audiui: cum Aeditatem P. Crassus peteret; eumque maior natu, etiam consularis Ser. Galba affectaretur, quod Crassi filium Caio filio suo despondisset; accessisse ad Crassum consulendi causa quendam rusticanum. qui cum Crassum se-  
 duxisset; atque ad eum retulisset; responsumque ab eo uerum magis, quam ad suam rem accommodatum abstulisset: ut eum tristem Galba uidit, nomine appellauit; quæsiuitque, qua de re ad Crassum retulisset. ex quo ut audiuit; commotumque; ut uidit hominem: suspensio, inquit, animo, et occupato Crassum tibi respondisse uideo. deinde ipsum Crassum manuprehendit: et, Heus tu, inquit, quid tibi in mentem uenit ita respondere? tum illi fidenter homo peritissimus confirmare, ita se rem habere, ut respondisset; nec dubium esse posse. Galba autem alludens uarie et copiose multas similitudines afferre, multaque; pro æquitate contra ius dicere: atque illum, cum disserendo par esse non posset (quanquam fuit Crassus in numero disertorum, sed par Galbæ nullo modo) ad auctores confugisse; et id, quod ipse diceret, et in P. Mutij fratris sui libris, et in Sex. Aelij commentariis scriptum protulisse; ac tamen concessisse, Galbæ disputationem sibi probabilem, et propè ueram uideri. At tamen quæ causæ sunt eiusmodi, ut de earum iure dubium esse non possit, omnino in iudicium uocari non solent. Num quis eo testamento, quod paterfamilias ante fecit, quam ei filius natus est, hereditatem petit? nemo: quia constat agnoscendo rûpi testamentum. ergo in hoc genere iuris iudicia nulla sunt. Licet igitur impune oratori oem

hanc partem iuris in controuersijs ignorare: quæ pars sine dubio multo maxima est. In eo autem iure, quo de ambigitur inter peritissimos, non est difficile oratori, eius partis, quamcunque defendet, auctorem aliz quem inuenire, a quo cum amētatas hastas acceperit; ipse eas oratoris lacertis uiribusq; torquebit. Nisi uero (bona uenia huius optimi uiri dixerim) tu libellis, aut præceptis soceri tui causam M. Curiij defendisti, non arripuisti patrocinium æquitatis, & defensionem testamentorum, ac uoluntatis mortuorum. Ac mea quidem sententia (frequens enim te audiui, atque affui) multo maiorem partem sententiarum sale tuo, & lepore, & politissimis facetijs pellexisti; cum & illud nimium acumen illuderes; & admirarere ingenium Scaeuolæ, qui excogitasset nasci prius oportere, quàm emori; cūq; multa colligeres & ex legibus, & ex senatusconsultis, & ex uita, ac sermone cōmuni non modo acute, sed etiam ridicule, ac facete; ubi si uerba, non rem, sequeremur, confici nihil posset. itaque hilaritatis plenum iudicium, ac lætitiæ fuit: in quo quid tibi iuris ciuilis exercitatio profuerit, nō intelligo: dicēdi certe uis egregia summa festiuitate & uenustate cōiuncta profuit.

Ipse ille Mutius paterni iuris defensor, & quasi patrimonij propugnator sui, quid in illa causa, cum contra te diceret, attulit, quod de iure ciuili depromptum uideretur? quam legem recitauit? quid patefecit dicēdo, quod fuisset imperitis occultius? nempe eius omnis oratio uersata est in eo, ut scriptum plurimum ualere oportere defenderet. at in hoc genere pueri apud magistros exercentur omnes; cum in eiusmodi causis

aliàs scriptum, aliàs æquitatem defendere docentur. Et credo in illa militis causa si tu aut hæredem, aut militem defendisses; ad Hostilianas te actiones, non ad tuam uim & oratoriam facultatem contulisses. tu uero uel, si testamentum defenderes, sic ageres, ut omne omnium testamentorum ius in eo iudicio positum uideretur: uel, si causam ageres militis, patrem eius, ut soles, dicendo à mortuis excitasses, statuissem ante oculos: còplexus esset filium, flensq; eum Centumuiris còmendasset: lapides mehercule omnes flere, ac lamentari coegisses: ut totum illud, uti lingua nuncupasset, nò in XII tabulis, quas tu omnibus bibliothecis anteponis, sed in magistri carmine scriptum uideretur. Nà quòd inertiam accusas adolescentium, qui istam artem primum facillimam non ediscant: hæc quàm sit facilis, illi uiderint, qui eius artis arrogàtia, quasi difficillima sit, ita subnixa ambulant: deinde etiam tu ipse uideris, qui eam artem facilem esse dicis, quam concedis adhuc artem omnino non esse, sed aliquando, si quis aliam artem didicerit, ut hanc artē efficere possit, tum esse illam artem futuram. deinde quòd sit plena delectationis: in qua tibi remittunt omnes istam uoluptatem, & ea se carere patiuntur; nec quisquam est eorum, qui, si iam sit ediscendum sibi aliquid, non Teucrum Pacuuij malit, quàm Manilianas uenaliū uendendorum leges ediscere. Tu autem, quòd amore patriæ censes nos nostrorum maiorum inuenta nosse debere; non uides ueteres leges aut ipsas sua uetustate consenuisse, aut nouis legibus esse sublatas. Quòd uero uiros bonos iure civili fieri putas, quia legibus & præmia

præmia proposita sint uirtutibus, & supplicia uitij: equidem putabam uirtutem hominibus, si modo tradi ratione possit, instituendo, & persuadendo, non minis, & ui, ac metu tradi: nam ipsum quidem illud etiam sine cognitione iuris, quàm sit bellum cauere malum, scire possumus. De me autem ipso, cui uni tu concedis; ut sine ulla iuris sciëntia tamē causis satisfacere possim: tibi hoc Crasse respondeo; neque me unquam ius ciuile didicisse; neque tamen in ijs causis, quas in iure possem defendere, unquam istam scientiam desiderasse. aliud est enim esse artificem cuiusdā generis, atq; artis: aliud in communi uita, & uulgari hominum consuetudine non hebetem, nec rudem. Cui nostrum non licet fundos nostros obire, aut res rusticas uel fructus causa, uel delectationis inuisere? tamen nemo tam sine oculis, tam sine mente uiuit, ut, quid sit sementis ac messis, quid arborum putatio ac uitium, quo tempore anni aut quo modo ea fiant, omnino nesciat. Nū igitur, si cui fundus inspiciendus, aut si mandandum aliquid procuratori de agricultura, aut imperandum uillico sit, Magonis Carthaginienſis sunt libri perdiscendi, an hac communi intelligentia contenti esse possumus? Cur ergo non iſdem in iure ciuili, præsertim cū in causis, & in negotijs, & in foro conteramur, satis instruēti esse possumus ad hoc dūtaxat, ne in nostra patria peregrini, atque aduenæ esse uideamur? Ac si iam sit causa aliqua ad nos delata obscurior: difficile credo sit cum hoc Scæuola cōmunicare: quanquā ipse omnia, quorum negotiū est, consulta ad nos, & exquisita deferunt. An uero si de re ipsa, si de finibus, cum in

rem præsentem non uenimus, si de tabulis, & per-  
 prionibus controuersia est; contortas res, & sæpe diffi-  
 ciles necessario perdiscimus? si leges nobis, aut si homi-  
 num peritorum responsa cognoscenda sunt; ueremur,  
 ne ea, si ab adolescentia iuri civili minus studuerimus,  
 non queamus cognoscere? Nihil ne igitur prodest ora-  
 tori iuris civilis scientia? non possum negare prodesse  
 ullam scientiã, ei præsertim, cuius eloquentia copia re-  
 rum debeat esse ornata: sed multa, & magna, & dif-  
 ficilia sunt ea, quæ sunt oratori necessaria: ut eius in-  
 dustriam in plura studia distrahi nolim. Quis neget,  
 opus esse oratori in hoc oratorio motu, statuq; Roscij  
 gestum, & uenustatem? tamen nemo suaserit studio-  
 sis dicendi adolescentibus in gestu discendo histrionum  
 more elaborare. Quid est oratori tam necessarium, q̃  
 uox? tamen me auctore nemo dicendi studiosus Græ-  
 corum more & tragædorum uoci seruiet; qui & an-  
 nos complures sedentes declamitant: & quotidie, an-  
 tequam pronũcient, uocem cubantes sensim excitant;  
 eandemq; cum egerũt, sedentes ab acutissimo sono us-  
 que ad grauissimum sonum recipiunt, & quasi quo-  
 dammodo colligunt. hoc nos si facere uelimus; ante  
 condemnentur ij, quorum causas receperimus, quàm  
 toties, quoties præscribitur, Præanem, aut Munionem ci-  
 tarimus. Quod si in gestu, qui multum oratorem ad-  
 iuuat, & in uoce, quæ una maxime eloquentiam uel  
 commendat, uel sustinet, elaborare nobis non licet; at  
 tantum in utroque assequi possumus, quantum in hac  
 acie quotidiani muneris spatij nobis datur: quãto mi-  
 nus est ad iuris civilis perdiscendi occupationem descen-



dendum? quod & summatim percipi sine doctrina potest: & hanc habet ab illis rebus dissimilitudinem, quod uox, & gestus subito sumi, & aliunde arripi non potest; iuris utilitas ad quaque causam quauis repente uel aperitis, uel de libris depromi potest. Itaque illi disertissimi homines ministros habent in causis iuris pios, cum ipsi sint peritissimi, eos, qui, ut ab te paulo ante dictum est, *πρωτοι* uocantur. in quo nostri omnino melius multo; quod clarissimorum hominum auctoritate leges, et iura testata esse uoluerunt. sed tamen non fugisset hoc Græcos homines, si ita necesse esse arbitrati essent, oratorem ipsum erudire in iure civili, non pragmaticum adiutorem dare. Nam quod dicis senectutem à solitudine uindicari iuris civilis scientia: fortasse etiam pecunie magnitudine: sed nos, non quid nobis utile, uerum quid oratori necessarium sit, querimus. quanquam (quoniam multa ad oratoris similitudinem ab uno artifice sumimus) solet idem Roscius dicere, se, quo plus sibi ætatis accederet, eo tardiores tibi modis, et cantus remissiores esse facturum. Quod si ille astrictus certa quadam numerorum moderatione, et pedum, tamen aliquid ad requiem senectutis excogitat: quanto facilius nos non laxare modos, sed totos mutare possumus? Neque enim hoc te Crasse fallit, quam multa sint, et quam uaria genera dicendi: et quod haud sciam an tu primus ostenderis, qui iandiu multo dicis remissius, et lenius, quam solebas: neque minus hæc tamen tua grauiissimi sermonis lenitas, quam illa summa uis, & contentio probatur: multique oratores fuerunt, ut illud Scipionem audimus et Lælium, qui omnia sermone conficeret paulo intentiore, nunquam, ut Ser. Galba, lateret

bus, aut clamore contenderent. Quod si iam hoc facere non poteris, aut noles: uereris, ne tua domus talis et uiri, & ciuis, si à litigiosis hominibus non colatur, à cæteris deferatur? Equidem tantum absūm ab ista sententia; ut non modo non arbitrer subsidium senectutis in eorum, qui consultum ueniant, multitudine esse ponendum; sed tanquam portum aliquem expectem istam, quam tu times, solitudinem. subsidium enim bellicosissimum existimo esse senectuti otium. Reliqua uero, etiam si adiuuant; historiam dico, & prudentiam iuris publici, & antiquitatis iter, & exemplorum copiam; si quando opus erit, à uiro optimo, & istis rebus instructissimo familiari meo Longo mutuabor: neque repugnabo, quo minus, id quod modo hortatus es, omnia legant, omnia audiant, in omni recto studio, atque humanitate uersentur. sed mehercule non ita multum spatij mihi habere uidentur; si modo ea facere, et persequi uolent, quæ à te Crasse præcepta sunt; qui mihi propè etiam nimis duras leges imponere uisus es huic ætati, sed tamen ad id, quod cupiunt, adipiscendum propè necessaria. Nam & subita ad propositas causas exercitationes, & accuratæ & meditatæ commentationes, ac stylus ille tuus, quem tu uere dixisti perfectorem dicendi esse, quæ magistrum, multi sudoris est: & illa orationis suæ cum scriptis alienis comparatio, & de alieno scripto subita uel laudandi, uel uituperandi, uel comprobandi, uel refellendi causa disputatio, non medio cris contentionis est uel ad memoriam, uel ad imitandum. Illud uero fuit horribile: quod mehercule uereor, ne maiorem uim ad deterrendum habuerit, quam ad co-

hortandum . uoluisti enim in suo genere unumquemque nostrum quasi quendam esse Roscium : dixistiq; , non tam ea, quæ recta essent, probari, quàm, quæ praua sunt, fastidijs adherescere. quod ego non tam fastidiosè in nobis, quàm in histrionibus spectari puto. itaque nos raucos sæpe attentissime audiri uideo : ne etenim res ipsa, atque causa: at Aesopum, si paulû irrauerit, explodi . A quibus. n. nihil præter uoluptatem aurium queritur ; in ijs offenditur, simul atque immittitur aliquid de uoluptate . In eloquentia aut multa sunt, quæ teneant : quæ si omnia summa nõ sunt, et pleraque tamẽ magna sunt ; necesse est ea ipsa, quæ sent, mirabilia uideri. Ergo, ut ad primû illud reuertar : sit orator nobis is, qui, ut Crassus descripsit, accomodate ad persuadendum possit dicere : is aut concludatur in ea, quæ sunt in usu ciuitatû uulgari, ac forensi ; remotisq; cæteris studijs, quamuis ea sint ampla atque præclara, in hoc uno opere, ut ita dicam, nocteis & dies urgeatur ; imiteturq; illû, cui sine dubio summa uis dicendi conceditur, Atheniensem Demosthenem : in quo tantum studium fuisse, tantusq; labor dicitur, ut primum impedimenta naturæ diligentia, industriaq; superaret : cumq; ita balbus esset, ut eius ipsius artis, cui studeret, primam literam non posset dicere ; perfecit meditando, ut nemo planius eo locutus putaretur . deinde, cum spiritus eius esset angustior, tantum continenda anima in dicendo est affecutus, ut una continuatione uerborum, id quod eius scripta declarant, binæ ei contentiones uocis, & remissiones continerentur : qui etiam, ut memorie proditum

est) coniectis in osculculis, summa uoce uersus multos uno spiritu pronunciare consuecebat; neque id consistens in loco, sed inambulans, atque ascensu ingrediens arduo. Hisce ego cohortationibus Crasse ad studium, & ad laborē incitandos iuuenes uehemēter assentior: cetera, quæ collegisti ex uarijs, et diuersis studijs, & artibus, tametsi ipse es omnia consecutus, tamen ab oratoris proprio officio atque munere seiuncta esse arbitror. Hæc cum Antonius dixisset; sanè dubitare uisus est Sulpitius, & Cotta, utrius oratio propius ad ueritatem uideretur accedere. Tum Crassus. Operariū nobis quendam Antoni oratorem facis: atque haud scio, an aliter sentias, & utare tua illa mirifica ad refellendū consuetudine; qua tibi nemo unquam præstitit: cuius quidem ipsius facultatis exercitatio oratorū propria est, sed iam in philosophorum consuetudine uersatur, maximeq; eorū, qui de omni re proposita in utraq; partem solent copiosissime dicere. Verum ego non solum arbitrabar, his præsertim audiētibus, à me informari oportere, qualis esse posset is, qui habitaret in subsellijs; neque quidquam amplius afferret, quàm quod causarum necessitas postularet: sed maius quiddā uidebam, cum tensebam oratorem, præsertim in nostra rep. nullius ornamenti expertem esse oportere. Tu autem, quoniam exiguis quibusdam finibus totum oratoris munus circundedisti, hoc facilius nobis expones ea, quæ abs te de officijs, præceptisq; oratoris quesita sunt: sed opinor secundum hunc diem: satis enim multa à nobis hodie dicta sunt. Nunc & Scaeuola, quoniam in Tusculanum ire constituit, paulum requiescet, dum se

calor frangat: & nos ipsi, quoniam id temporis est, ualeat uilini demus operam. Placuit sic omnibus. Tum Scaeuola, Sanè, inquit, uellem non cōstituisse in Tusculanum me hodie uenturū esse Lælio: libenter au-  
 direm Antonium. & cum exurgeret, simul arridens, Neque. n. inquit, tam mihi molestus fuit, quòd ius no-  
 strum ciuile peruellit; quàm iucundus, quòd se id nez-  
 scire confessus est.

## M. TVLLII CICERONIS

## DE ORATORE

## LIBER III.

AGNA, nobis pueris, Quinte fra-  
 ter, si memoria tenes, opinio fuit, L.  
 Crassum non plus attigisse doctrinæ,  
 quàm quantum prima illa puerili in-  
 stitutione potuisset; M. autem Antos-  
 nium omnino omnis eruditionis expertem, atque igna-  
 rum fuisse. erantq; multi, qui, quanquam non ita se  
 rem habere arbitrarentur, tamen, quo facilius nos in-  
 censos studio discèdi à doctrina deterrerèt, libenter id,  
 quod dixi, de illis oratoribus prædicarent: ut, si homi-  
 nes non eruditi summam essent prudentiam, atque in-  
 credibilem eloquentiam consecuti, inanis omnis noster  
 esse labor, & stultum in nobis erudiendis patris no-  
 stri, optimi ac prudentissimi uiri, studium uidere-  
 tur. quos cum ut pueri refutare domesticis testibus, pa-

tre, & C. Aculeone propinquo nostro, & L. Cicerone patruo solebamus; quod de Crasso pater, & Aculeo, quocum erat nostra matertera; quem Crassus dilexit ex omnibus plurimum; & patruus, qui cum Antonio in Ciliciam profectus unà decesserat, multa nobis de eius studio, doctrinâq; sæpe narrauit. cumq; nos cum cōsobrinis nostris Aculeonis filiis & ea disceremus, quæ Crasso placerent; & ab ijs doctoribus, quibus ille uteretur, erudiremur: etiam illud sæpe intelleximus, cum essemus eiusmodi, quod uel pueri sentire poteramus; illum & græce sic loqui; nullam ut nosse aliam linguam uideretur; & doctoribus nostris ea ponere in percunctando, eaq; ipsum omni in sermone tractare, ut nihil esse ei nouum, nihil inauditum uideretur. De Antonio uero, quanquam sæpe ex humanissimo homine patruo nostro acceperamus, quæadmodum ille uel Athenis, uel Rhodi se doctissimorum hominum sermonibus dedidisset: tamē ipse adolescentulus, quantum illius ineuntis ætatis meæ patiebatur pudor, multa ex eo sæpe quasiui. Non erit profecto tibi, quod scribo, hoc nouum, (nam iam tum ex me audiebas) mihi illum ex multis, uarijsq; sermonibus, nullius rei, quæ quidem esset in ijs artibus, de quibus aliquid existimare possem; rudem, aut ignarum esse uisum. Sed fuit hoc in utroque eorum; ut Crassus non tam existimari uellet non didicisse, quàm illa despicere, & nostrorum hominum in omni genere prudentiam Græcis anteferre. Antonius autem probabiliore hoc populo orationem fore censebat suam, si omnino didicisse nunquam putaretur. atque ita se uterque grauiorem fore, si alter contene-

re, alter ne nosse quidem Græcos uideretur. Quorum consilium quale fuerit, nihil sanè ad hoc tempus: illud autem est huius institutæ scriptiois, ac temporis, nemi nem eloquentia non modo sine dicendi doctrina, sed ne sine omni quidem sapientia florere unquam, & præstare potuisse. Etenim ceteræ ferè artes se ipsæ per se tuentur singulæ: bene dicere autem, quod est scienter, & perite, & ornate dicere, non habet definitam aliquam regionem, cuius terminis septa teneatur. Omnia, quæcunque in hominum disceptationem cadere possunt, bene sunt ei dicenda, qui hoc se posse profiteatur: aut eloquentiæ nomen relinquendum est. Quare equidem & in nostra ciuitate, & in ipsa Græcia, quæ semper hæc summa duxit, multos & ingenijs, & magna laude dicendi sine summa rerum omnium scientia fuisse fateor: talem uero existere eloquentiã, qualis fuerit in Crasso, & Antonio, non cognitis rebus omnibus, quæ in tantam prudentiam pertinerent, tantamq; dicendi copiam, quanta in illis fuit, non potuisse confirmo. Quo etiam feci libentius, ut eũ sermonem, quem illi quondã inter se de his rebus habuissent, mandarem literis: uel ut illa opinio, quæ semper fuisset, tolleretur, alterum non doctissimũ, alterũ planè indoctũ fuisse: uel ut ea, quæ existimarẽ à summis oratoribus de eloquẽtia diuinitus esse dicta, custodirẽ literis, si ullo modo assequi, cõplectiq; potuissem: uel mehercule etiã ut laudem eorum iam propè senescentem, quantũ ego possem, ab obliuione hominum, atque à silentio uindicarem. Nam si ex scriptis cognosci ipsi suis potuissent, minus hoc fortasse mihi esse putassem laborandum:



sed cum alter non multum, quod quidem extaret, & id ipsum adolescens, alter nihil admodum scripti reliquisset: deberi hoc à me tantis hominū ingenijs putavi: ut cum etiam nunc uiuam illorum memoriam teneremus, hāc immortalem redderem, si possem. Quod hoc etiam spe aggredior maiore ad probandum; quia non de Ser. Galbæ, aut C. Carbonis eloquentia scribo aliquid; in quo liceat mihi fingere, si quid uelim, nullius memoria iam refellente: sed edo hęc ijs cognoscenda, qui eos ipsos, de quibus loquor, sæpe audierunt; ut duos summos uiros ijs, qui neutrum illorum uiderint, eorum, quibus ambo illi oratores cogniti sint, uiuorum & præsentium memoria teste commendemus. Nec uero te charissime frater atque optime rhetoricis nūc quibusdam libris, quos tu agrestis putas, insequor ut erudiam. quid. n. tua potest oratione aut subtilius, aut ornatiùs esse? sed quoniā siue iudicio, ut soles dicere; siue, ut ille pater eloquētiæ de se Isocrates scripsit ipse, pudore à dicendo, & timiditate ingenua quadam re fugisti; siue, ut ipse iocari soles, unum putasti satis esse nō modo in una familia rhetorem, sed penè in tota ciuitate: non tamen arbitror tibi hos libros in eo fore genere, quod merito propter eorum, qui dicendi ratione disputarunt, iciunitatem bonarum artium possit il ludi. nihil enim mihi quidem uidetur in Crassi, & Antonij sermone esse præteritū, quod quisquā à summis ingenijs, acerrimis studijs, optima doctrina, maximo usu cognosci, ac percipi potuisse arbitraretur. quod tu facillime poteris iudicare; qui prudētiā, rationemq; dicendi per te ipsum, usum autē per nos percipere uo-

luisi. Sed quo citius hoc, quod suscepimus, non medio cre munus conficere possimus; omissa nostra oratione, ad eorum, quos proposuimus, sermonem, disputationemque ueniamus. Postero igitur die, quam illa erant acta, hora fere secunda, cum etiam tum in lecto Crassus esset, et apud eum Sulpitius sederet, Antonius autem inambularet cum Cotta in porticu; repente eo Q. Catulus senex cum C. Iulio fratre uenit. quod ubi audiuit, commotus Crassus surrexit: omnesque admirati, maiorem aliquam esse causam eorum aduentus suspicati sunt. qui cum inter se, ut ipsorum usus ferebat, amicissime consalutassent; quid uos tandem Crassus? nunquid nam, inquit, noui? Nihil sane, inquit Catulus: etenim uides esse ludos: sed uel tu nos ineptos licet, inquit, uel molestos putes. cum ad me in Tusculanum, inquit, heri uespero uenisset Caesar de Tusculano suo; dixit mihi, a se Scaeuola hinc euntem esse conuentum, ex quo mira quaedam se audisse dicebat: te, quem ego toties omni ratione tentans ad disputandum elicere non potuissem, permulta de eloquentia cum Antonio disseruisse, et tanquam in schola prope ad Graecorum consuetudinem disputasse. Ita me frater exorauit, me ipsum non quidem a studio audiendi nimis abhorrentem, sed mehercule uerentem tamen ne molesti uobis interueniremus, ut huc secum uenirem. Etenim Scaeuolam ita dicere aiebat, bonam partem sermonis in hunc diem esse dilatam: hoc si tu cupidius factum existimas, Caesari attribues: si familiarius, utrique nostrum: nos quidem, nisi forte molesti interuenimus, uenisse delectat. Tu Crassus. Equidem

quæcūque causa nos huc attulisset, letarer, cum apud  
 me uiderem homines mihi charissimos, et amicissimos:  
 sed tamē, uere dicā, quæuis malle fuisset, quā ista,  
 quā dicis. ego, n. (ut, quemadmodum sentio, loquar)  
 nunquam mihi minus, quā hesterno die placui: mā-  
 gis adeo id facilitate, quā alia ulla culpa mea conti-  
 git: qui dum obsequor his adolescentibus, me senem  
 esse sum oblitus; feci q; id, quod ne adolescens quidem  
 feceram, ut ijs de rebus, quæ doctrina aliqua contine-  
 rentur, disputarem. Sed hoc tamen cecidit mihi per-  
 opportune, quòd transactis iam meis partibus ad Anto-  
 nium audiendum uenistis. Tum Cæsar, Equidem,  
 inquit, Crasse ita sum cupidus te in illa lōgiore, ac per-  
 petua disputatione audiendi, ut, si id mihi minus con-  
 tingat, uel hoc sim quotidiano tuo sermone contentus.  
 itaque experiar equidem illud, ut ne Sulpitius familia-  
 ris meus, aut Cotta plus, quā ego, apud te ualere ui-  
 deantur: & te exorabo profecto, ut mihi quoque, &  
 Catulo tuæ suauitatis aliquid impertiās. Sin tibi id  
 minus libebit: non te urgebo; neque committam, ut,  
 dum uereare ne tu sis ineptus, me esse iudices. Tum  
 ille, Ego mehercule inquit, Cæsar ex omnibus latinis  
 uerbis huius uerbi uim uel maximam semper putauī.  
 quem enim nos ineptum uocamus, is mihi uidetur ab  
 hoc nomen habere dictum, quòd non sit aptus: id q;  
 in sermonis nostri consuetudine perlate patet. Nam  
 qui aut, tempus quid postulet, non uidet; aut plura lo-  
 quitur; aut se ostentat; aut eorum, quibuscū est, uel  
 dignitatis, uel commodi rationem non habet; aut de-  
 nique in aliquo genere aut incōcinnus, aut multus est:

is ineptus dicitur. Hoc vitio cumulata est eruditissima illa Græcorum natio : itaque , quod vim huius mali Græci non vident, ne nomen quidem ei vitio imposuerunt . ut enim quæras omnia, quo modo Græci inepti appellent ; non reperies . Omnium autem ineptiarum , quæ sunt innumerabiles , haud scio an ulla sit maior , quam, ut illi solent, quocunque in loco, quoscunque inter homines uisum est, de rebus aut difficillimis, aut non necessarijs argutissime disputare. hoc nos ab istis adolescentibus facere inuiti , et recusantes heri coacti sumus. Tū Catulus, Ne Græci quidem, inquit, Crasse , qui in ciuitatibus suis clari, et magni fuerunt , sicuti tu es, nosq; omnes in nostra rep. uolumus esse , horum Græcorum, qui se inculcant auribus nostris, similes fuerunt ; nec tamen in otio sermones huiusmodi, disputationes fugiebant. Ac si tibi uidentur, qui temporis, qui loci, qui hominum rationem non habent , inepti, sicut debent uideri: num tandem aut locus hic non idoneus uidetur, in quo porticus hæc ipsa, ubi inambulamus, et palæstra, et tot locis sessiones, gymnasiorum , et græcarum disputationum memoriam quodammodo commouent ? aut importunum tempus in tanto otio: quod et raro datur , et nunc peroptato nobis datum est ? aut homines ab hoc genere disputationis alieni ? qui omnes ij sumus, ut sine his studijs nullam uitam esse dicamus . Omnia ista , inquit Crassus, ego alio modo interpretor ; qui primum palæstram, et sedes, et porticus etiam ipsos Catule Græcos exercitationis et delectationis causa , non disputationis inuenisse arbitror . nam et seculis multis ante gymnasia inuenta sunt ,

quàm in his philosophi garrire cœperunt: & hoc ipso tempore cum omnia gymnasia philosophi teneant, tamen eorum auditores discum audire, quàm philosophum malunt. qui simul ut increpuit; in media oratione de maximis rebus, et grauissimis disputantem philosophum omnes unctiōis causa relinquunt. ita leuissimam delectationē grauissimæ, ut ipsi ferunt, utilitati anteponunt. Otium autem quod diu esse, assentior: uerum otij fructus est non contentio animi, sed relaxatio. Sæpe ex socero meo audiui, cum is diceret socerum suum Lælium semper fere cum Scipione solitum rusticari; eosque incredibiliter repuerascere esse solitos, cum rus ex urbe tanquam ex uinculis euolauissent. Non audeo dicere de talibus uiris: sed tamen ita solet narrare Scæuola, conchas eos, & umbilicos ad Caietam, & ad Lucrinum legere consueisse, & ad omnem animi remissionem, ludumque descendere. Sic enim se res habet; ut quemadmodum uolucres uidemus procreationis, atque utilitatis suæ causa fingere, et construere nidos, easdem autem, cum aliquid effecerint, leuandi laboris sui causa passim ac libere solutas opere uolitare: sic nostri animi forensibus negotiis, atque urbano opere defessi gestiunt, ac uolitare cupiunt uacui cura, atque labore. Itaque illud, quod ego in causa Curiana Scæuolæ dixi; non dixi secus, ac sentiebam. Nam si inquam Scæuola nullum erit testamentum recte factum, nisi quod tu scripseris: omnes ad te ciues cum tabulis uenient: omnium testamenta tu scribes unus. quid igitur inquam? quando ages negotium publicum? quando amicorum? quando tuum? quando denique nihil ages? Tum illud addi-

di. mihi enim liber esse non uidetur, qui non aliquando nihil agit, in qua permaneo Catule sententia: meq; cum huc ueni, hoc ipsum nihil agere, & plane cessare delectat. Nam quod addidisti tertium; uos eos esse, qui uitam insuauem sine his studijs putaretis: id me non modo non hortatur ad disputandum, sed etiam deteret. Nam ut C. Lucilius, homo doctus & perurbanus, dicere solebat, ea, quæ scriberet, neque ab indoctissimis, neque ab doctissimis legi uelle; quod alteri nihil intelligerent, alteri plus fortasse, quam ipse: quo etiam scriptum sit, Persium non curo legere; hic enim fuit, ut noramus, omnium ferè nostrorum hominum doctissimus; Lælium Decimum uolo; quem cognouimus uirum bonum, & non illiteratum, sed nihil ad Persium: Sic ego, si iam mihi disputandum sit de his nostris studijs; nolim equidem apud rusticos, sed multo minus apud uos. malo enim non intelligi orationem meam, quam reprehendi. Tum Cæsar, Equidem, inquit, Catule iam mihi uideor nauasse operam, quod huc uenerim: nam hæc ipsa recusatio disputationis, disputatio quædam fuit mihi quidem pericula. Sed cur impedimus Antonium? cuius audio esse partes, ut de tota eloquentia differat: quemq; iamdudum & Cotta, & Sulpitius expectant. Ego uero, inquit Crassus, neque Antonium uerbum facere patiar: & ipse obmutescam, nisi prius à uobis impetraro. Quidnam, inquit Catulus? Ut hic sitis hodie. Tum, cum ille dubitaret, quod ad fratrem promiserat; ego, inquit Iulius, pro utroque respondeo; sic faciemus: atque ista quidem conditione, uel ut uerbum nullum faceres, me teneres. Hic Catulus arrisit: & simul, Præ-

cisa, inquit, mihi quidem dubitatio est: quoniam neque domi impetraram: & hic, apud quem eram futurus, sine mea sententia tam facile promisit. Tum omnes oculos in Antonium coniecerunt: & ille, Audite uero, audite, inquit: hominem enim audietis de schola, atque à magistro & græcis literis eruditum: & eo quidem loquor confidentius, quòd Catulus auditor accessit; cui non solum nos latini sermonis, sed etiam Græci ipsi solent suæ linguæ subtilitatem, elegantiamque concedere. Sed tamen, quoniam hoc totum, quidquid est, siue artificium, siue studium dicendi, nisi accessit os, nullum potest esse: docebo uos discipuli id, quod ipse non didici, quid de omni genere dicendi sentiam.

Hic posteaquam arriserunt, Res mihi uidetur esse, inquit, facultate præclara, arte mediocris. Ars enim earum rerum est, quæ sciuntur. Oratoris autem omnis actio opinionibus, non scientia continetur. Nam & apud eos dicimus, qui nesciunt: & ea dicimus, quæ nescimus ipsi. itaque & illi aliàs aliud ipsæ de rebus & sentiunt, & iudicant: & nos contrarias sæpe causas dicimus: non modo ut Crassus contra me dicat aliquando, aut ego contra Crassum; cū alterutri necesse sit falsum dicere: sed etiam ut uterque nostrum eadem de re aliàs aliud defendat; cum plus uno uero esse non possit. Ut igitur in eiusmodi re, quæ mediatio nixa sit, quæ ad scientiam non sæpe perueniat, quæ opiniones hominum, & sæpe errores aucupetur, ita dicam, si causam putatis esse, cur audiat. Nos uero & ualde quidem, Catulus inquit, putamus, atque eo magis, quòd nulla mihi ostentatione uideris esse usus.

exorsus



exorsus es enim non gloriose magis, ut tu putas, à ueritate, quàm à nescio qua dignitate. Ut igitur de ipso genere sum confessus, inquit Antonius, artem esse non maximam: sic illud affirmo, præcepta posse quadam dari peracuta ad pertrahendos animos hominum, & ad captandas eorum uoluntates. huius rei scientiam si quis uolet magnam quandam artem esse dicere, nõ repugnabo. Etenim, cum plerique temere, ac nulla ratione causas in foro dicant; nonnulli autem propter consuetudinem aliquam callidius id faciant: non est dubium, quin, si quis animaduernerit, quid sit, quare alij melius, quàm alij dicant, id possit notare. Ergo id qui toto in genere fecerit, is si non planè artem, at quasi artem quandam inuenerit. Atque utinam ut mihi illa uidere uideor in foro, atque in causa: ita nunc, quemadmodum ea referirentur, possim uobis exponere. Sed de me uidero. nunc hoc propono, quod mihi persuasi: quamuis ars non sit, tamen nihil esse perfectio oratore præclarius. nam ut usum dicendi omittā, qui in omni pacata, & libera ciuitate dominatur: tanta oblectatio est in ipsa facultate dicendi, ut nihil hominum aut auribus, aut mentibus iucundius percipi possit. Quis enim cantus moderata orationis pronuntiatione dulcior inueniri potest? quod carmen artificiosa uerborum conclusione aptius? qui actor in imitanda, quàm orator in suscipienda ueritate iucundior? quid autem subtilius, quàm acute, crebraq; sententia? quid admirabilius, quàm res splendore illustrata uerborum? quid plenius, quàm omni rerum genere cumulata oratio? Neque enim ulla non propria oratoris est

res, quæ quidem ornate dici, grauiusq; debeat. Huius est in dando consilio de maximis rebus cum dignitate explicata sententia: eiusdem & languentis populi incitatio, & effrenati moderatio. Eadem facultate fraus hominum ad perniciem, & integritas ad salutem uocatur. Quis cohortari ad uirtutem ardentius? quis a uitij acrius reuocare? quis uituperare improbos asperius? quis laudare bonos ornatius? quis cupiditatem uehementius frangere accusando potest? quis mœrorem leuare mitius consolando? Historia uero testis temporum, lux ueritatis, uitæ memoria, magistra uitæ, nūcia uetustatis, qua uoce alia, nisi oratoris, immortalitati commendatur? Nam si qua est ars alia, quæ uerborum aut faciendorum, aut deligendorum scientiam profiteatur; aut si quisquam dicitur, nisi orator, formare orationem, eamq; uariare, & distinguere quasi quibusdam uerborum, sententiarumq; insignibus, aut si uia ulla nisi ab hac una arte traditur aut argumentorum, aut sententiarum, aut denique descriptionis, atque ordinis: fateamur aut hoc, quod hac ars profiteatur, alienum esse, aut cum aliqua alia arte esse commune. sed si in hac una est ea ratio, atque doctrina: non, si qui aliarum artium bene locuti sunt, eo minus id est huius unius proprium: sed ut orator de ijs rebus, quæ cæterarum artium sunt, si modo eas cognorit (ut heri Crassus dicebat) potest dicere; sic cæterarum artium homines ornatius illa sua dicunt, si quid ab hac arte didicerūt. neque enim, si de rusticis rebus agricola quispiā, aut etiā, id quod multi, medicus de morbis, aut de fingēdo pictor aliquis diserte dixerit, aut scripserit

idcirco illius artis putanda sit eloquentia: in qua quia  
uis magna est in hominum ingenijs, eo multi etiam  
sine doctrina aliquid omnium generum, atque artium  
consequuntur. sed quod cuiusque sit proprium, etsi ex eo  
iudicari potest, cum uideris quid quæque doceant: ta-  
men hoc certius nihil esse potest, quàm quod omnes ar-  
tes aliæ sine eloquentia suum munus præstare possunt;  
orator sine ea nomen suum obtinere non potest: ut cæ-  
teri, si disertis sint, aliquid ab hoc habeant; hic, nisi do-  
mesticis se instruxerit copijs, aliunde dicendi copiam pe-  
tere non possit.

Tum Catulus, Etsi, inquit, Antoni  
minime impediendus est interpellatione iste cursus ora-  
tionis tuæ: pati tamen; mihiq; ignoscet: nō. n. pos-  
sum, quin exclamē, ut ait ille in Trinummo: ita mihi  
uim oratoris tui exprimere subtiliter uisus es, tui lauda-  
re copiosissime: quod quidē eloquentē uel optime face-  
re oportet, ut eloquentiā laudet: debet. n. ad eā laudan-  
dam ipsam illā adhibere, quam laudat. Sed perge por-  
ro. tibi. n. assentior, uestrum esse hoc totū disertē dice-  
re; idq; si quis in alia arte faciat, eū assumpto aliunde  
uti bono, non proprio, nec suo. At Crassus, Nox te, in-  
quit, nobis Antoni expoliuit, hominemq; reddidit: nā  
hesterno sermone unius cuiusdā operis, ut ait Cæcilius,  
remigē aliquem, aut baiulū nobis oratorem descripse-  
ras, inopem quendā humanitatis, atque inurbanum.

Tum Antonius, Heri. n. inquit, hoc mihi proposueram;  
ut, si te refellissem, hos à te discipulos abducerem. nūc  
Catulo audiente, et Cæsare, uideor debere nō tam pu-  
gnare tecū, quàm, quid ipse sentiam, dicere. Sequitur  
igitur, quoniā nobis est hic, de quo loquimur, in foro,



atque in oculis ciuium constituendus; ut uideamus, quid ei negotij demus, cuiq; cum muneri uelimus esse præpositum. Nam Crassus heri, cum uos Catule, & Caesar non adessetis, posuit breuiter in artis distributione idem, quod Græci plerique posuerunt; neque sane, quid ipse sentiret, sed quid ab illis diceretur, ostendit: duo prima genera questionum esse, in quibus eloquentia uersaretur; unum infinitum, alterum certum. Infinitum mihi uidetur id dicere, in quo aliquid generatim quæreretur, hoc modo; expetenda ne esset eloquentia, expetendi ne honores: certum autem, in quo quid in personis, & in constituta re, & definita quæreretur; cuiusmodi sunt, quæ in foro, atque in ciuium causis, disceptationibusq; uersantur. ea mihi uidentur aut in lite ordinanda, aut in cōsilio dando esse posita. Nam illud tertium, quod & à Crasso tectum est; & ut audio, ille ipse Aristoteles, qui hæc maxime illustrauit, adiunxit; etiā si opus est, tamē minus est necessariū. Quidnam, inquit Catulus? an laudationes? id enim uideo poni genus tertium. Ita, inquit Antonius: & in eo quidem genere scio & me, & omnes, qui affuerunt, delectatos esse uehementē, cum abs te est Popilia mater uestra laudata: cui primum mulieri hunc honorem in nostra ciuitate tributum puto. Sed non omnia, quæcunque loquimur, mihi uidentur ad artem, & ad præcepta esse reuocanda. ex ijs enim fontibus, unde omnia ornate dicendi præcepta sumentur, licet etiam laudationem ornare; neque illa elementa desiderare: quæ ut nemo tradat; quis est, qui nesciat, quæ sint in homine laudanda? positis enim ijs rebus,



quas Crassus in illius orationis suæ, quæ contra collegæ Cæsar habuit, principio dixit: quæ natura, aut fortuna darentur hominibus; in ijs rebus se uinci posse, animo æquo pati: quæ ipsi sibi homines parare possent, in ijs rebus se pati non posse uinci: qui laudabit quempiam, intelliget exponenda sibi esse fortunæ bona. Ea sunt, generis, pecuniæ, propinquorum, amicorum, opum, ualitudinis, formæ, uirium, ingenij, cæterarumq; rerum, quæ sunt aut corporis, aut extraneæ: si habuerit, bene his usum: si non habuerit, sapienter caruisse: si amisit, moderate tulisse: deinde quid sapienter is, quem laudet, qui liberaliter, quid fortiter, quid iuste, quid magnifice, quid pie, quid grate, quid humaniter, quid denique cum aliqua uirtute aut fecerit, aut tulerit.

Hæc, & quæ sint eius generis, facile uidebit qui uolet laudare quempiam: & qui uiuere, contraria. Cur igitur dubitas, inquit Catulus, facere hoc tertium genus, quoniam inest in ratione rerum? non enim, si est facilius, eo de numero quoque est excerpendum.

Quia nolo, inquit, omnia, quæ cadunt aliquando in oratorem, quamuis egregia sint, ea sic tractare, quasi nihil possit dici sine præceptis suis. nam & testimonium sæpe dicendum est, ac nonnunquam etiam accuratius: ut mihi necesse fuit in Sex. Titium seditiosum ciuem, & turbulentum. explicauit in eo testimonio dicendo omnia cōsilia Consulatus mei, quibus illi Tribuno pl. pro rep. restitissim: quæq; ab eo contra remp. facta arbitrarer, exposui: diu retentus sum: multa audiui; multa respondi. num igitur placet, cum de eloquentia præcipias, aliquid etiam de testimonijs dicen-

dis quasi in arte tradere? Nihil sanè, inquit Catulus, necesse est. Quid si, quod sæpe summis uiris accidit, mandata sint exponenda aut in Senatu ab Imperatore, aut ad Imperatorem, aut ad regem, aut ad populum aliquem à Senatu? num quia genere orationis in huiusmodi causis accuratiores est utendum; idcirco etiam pars hæc causarum numeranda uidetur, aut proprijs præceptis instruenda? Minime uero, inquit Catulus: non enim deerit homini diserto in eiusmodi rebus facultas ex cæteris rebus & causis comparata. Ergo item, inquit, illa, quæ sæpe diserte agenda sunt. & quæ ego paulo ante, cum eloquentiam laudarem, dixi oratoris esse; neque habent suum locum ullum in diuisione partium, neque certum præceptorum genus; et agenda sunt non minus diserte quàm quæ in lite dicuntur; obiurgatio, cohortatio, consolatio: quorum nihil est, quod non summa dicendi ornamenta desideret: sed ex artificio res istæ præcepta non quærunt. Planè, inquit Catulus, assentior. Age uero, inquit Antonius, qualis oratoris, & quanti hominis in dicendo putas esse historiam scribere? Si ut Græci scripserunt; summi, inquit Catulus: si ut nostri, nihil opus est oratore: satis est non esse mendacem. Atqui ne nostros contēnas, inquit Antonius; Græci ipsi sic initio scriptarunt, ut noster Cato, ut Pictor, ut Piso. erat enim historia nihil aliud, nisi annaliū confectio. cuius rei, memoriæq; publicæ retinendæ causa, ab initio rerū Romanarū usque ad P. Mutium Pontificem Max. res omnes singulorū annorū mādabat literis Pontifex Max. efferebatq; in albū: et proponebat tabulā domi, potestas ut

esset populo cognoscendi: ijq; etiam nunc annales maximè nominantur. Hanc similitudinem scribendi multè secuti sunt; qui sine ullis ornamentis monimenta solè temporū, hominū, locorum, gestarumq; rerū reliquerūt. itaque qualis apud Græcos Pherecydes, Hellanicus, Acusilas fuit, aliq; permulti: talis noster Cato, & Pictor, & Piso: qui neque tenent, quibus rebus ornetur oratio; (modo enim huc ista sunt importata) et, dū intelligatur quid dicāt, unā dicendi laudem putāt esse breuitatem. Paululū se crexit, et addidit historiae maiorem sonū uocis uir optimus Crassi familiaris Antipater. ceteri nō exornatores rerum, sed tantūmodo narratores fuerunt. Est, inquit Catulus, ut dicis: sed iste ipse Caelius neque distinxit historiam uarietate locorū; neque uerborū collocatione, et tractu orationis leui, et æquabili perpoliuit illud opus; sed, ut homo neque doctus, neq; maxime aptus ad dicendum, sicut potuit, dolauit: uicit tamen, ut dicis, superiores. Minime mirū, inquit Antonius, si ista res adhuc nostra lingua illustrata nō est. nemo enim studet eloquentiæ nostrorū hominum, nisi ut in causis atque in foro eluceat. apud Græcos autem eloquentissimi homines remoti à causis forensibus, cum ad ceteras res illustres, tum ad scribendam historiam maxime se applicauerūt. Nāque et Herodotū illum, qui princeps genus hoc ornauit, in causis nihil omnino uersatum esse accepimus. atqui tanta est eloquentia; ut me quidem, quantum ego græce scripta intelligere possim, magnopere delectet. et post illū Thucydides omnis dicendi artificio mea sententia facile uicit. qui ita creber est rerum frequentia; ut uerborū



propè numerum sententiarum numero consequatur :  
 ita porro uerbis aptus, & pressus, ut nescias, utrum res  
 oratione, an uerbo sententijs illustrentur. atqui ne hūc  
 quidem, quanquam est in rep. uersatus, ex numero ac-  
 cepimus eorum, qui causas dictitarunt : & hos libros  
 tum scripsisse dicitur, eū à rep. remotus, atque, id, quod  
 optimo cuique Athenis accidere solitum est, in exilium  
 pulsus esset. Hunc consecutus est Syracusius Philistus :  
 qui cum Dionysij tyranni familiarissimus esset, otium  
 suum cōsumpsit in historia scribēda ; maximeq; Thu-  
 cydidem est, sicut mihi uidetur, imitatus. Postea uero  
 quasi ex clarissima rhetoris officina duo prestantes in-  
 genio, Theopompus, & Ephorus ab Isocrate magistro  
 impulsī se ad historiam contulerunt : causas omnino  
 nunquam attigerunt. Denique etiam à philosophia  
 profectus princeps Xenophon Socraticus ille, post ab  
 Aristotele Callisthenes comes Alexandri scripsit histo-  
 riam ; & hic quidem rhetorico penè more ; ille autem  
 superior leniore quodam sono est usus, et qui illum im-  
 petum oratoris non habeat ; uehemens fortasse minus,  
 sed aliquanto tamen, ut mihi quidem uidetur, dulcior.  
 Minimus natu horum omnium Timæus, quantum  
 autem iudicare possum longe eruditissimus, & rerum  
 copia, & sententiarum uarietate abundantissimus, &  
 ipsa compositione uerborum non impolitus, magnam  
 eloquentiam ad scribendum attulit, sed nullum usum  
 forensem. Hec cum ille dixisset, Quid est inquit  
 Catule Cæsar ? ubi sunt, qui Antonium græce negant  
 scire ? quot historicos nōminauit ? quā scienter, quā  
 proprie de uno quoque dixit ? Id mehercule, inquit

Catulus, admirans, illud iam mirari desino, quod multo magis ante mirabar; hunc, cum hæc nesciret, in dicendo posse tantū. Atque Catule, inquit Antonius, non ego utilitatem aliquam ad dicendum aucupans, horum libros, & nonnullos alios, sed delectationis causa, cum est otium, legere soleo. Quid ergo est? fatebor: aliquid tamen, ut, cum in sole ambulem, etiam si aliam ob causam ambulem, fieri natura tamen ut colorer: sic cum istos libros ad Misenum (nam Romæ uix licet) studiosius legerim; sentio orationem meam illorum cantu quasi colorari. Sed ne latius hoc uobis patere uideatur: hæc duntaxat in Græcis intelligo, quæ ipsi, qui scripserunt, uoluerunt à uulgo intelligi. In philosophos nostros si quando incidi, deceptus indicibus librorum, quod sunt ferè inscripti de rebus notis et illustribus, de uirtute, de iustitia, de honestate, de uoluptate: uerbum prorsus nullum intelligo: ita sunt angustis, & concisis disputationibus illigati. Poetas omnino quasi alia quadam lingua locutos non conor attingere. Cum ijs me (ut dixi) oblecto, qui res gestas, aut qui orationes scripserunt suas; aut qui ita loquuntur, ut uideatur uoluisse esse nobis, qui non sumus eruditissimi, familiares. Sed illuc redeo. Videtis, ne quantum munus sit oratoris historia? haud scio, an flumine orationis, & uarietate maximum. neque eam reperio usquam separatim instructam rhetorum præceptis: sita sunt enim ante oculos. nam quis nescit primam esse historiæ legem, ne quid falsi dicere audeat: deinde ne quid uere non audeat: ne qua suspitio gratiæ sit in scribendo, ne qua similitudinis? Hæc scilicet fundamenta

nota sunt omnibus. ipsa autem exadificatio posita est in rebus, & uerbis. Rerum ratio ordinem temporum desiderat, regionum descriptionem: uult etiam, quoniā in rebus magnis, memoriaq; dignis consilia primum, deinde acta, postea euentus expectantur; & de consilijs significari quid scriptor probet, & in rebus gestis declarari, non solum quid actum, aut dictum sit, sed etiam quo modo; & cum de euentu dicatur, ut cause explicentur omnes uel casus, uel sapientiae, uel temeritatis; hominumq; ipsorum non solum res gestae, sed etiam, qui fama ac nomine excellent, de cuiusq; uita, atque natura. Verborum autem ratio, & genus orationis fusum, atque tractum, & cum lenitate quadam aequabili profluens sine hac iudiciali asperitate, et sententiarum forensium aculeis persequendum est.

Harum tot, tantarumq; rerum uidetis ne ulla esse praecepta, quae in artibus rhetorum reperiantur?

In eodem silentio multa alia oratorum officia iacuerunt; cohortationes, consolationes, praecepta, admonita: quae tractanda sunt omnia disertissime, sed locum suum in illis partibus, quae tradita sunt, habent nullum.

Atque in hoc genere illa quoque est infinita sylua; & oratori plerique (ut etiam Crassus ostendit) duo genera ad dicendum dederunt; unum de certa, definitaq; causa, quales sunt quae in litibus, quae in deliberationibus uersantur: (addat si quis uolet etiam laudationis) alterum, quod appellant omnes ferè scriptores, explicat nemo, infinitam generis sine tempore, & sine persona questionē. hoc quid, & quantum sit, cum dicunt; intelligere mihi non uidentur. Si enim est oratoris, quae

cunque res infinite posita sit, de ea posse dicere: dicendum erit ei, quanta sit solis magnitudo, quæ forma terræ: de mathematicis, de musicis rebus nõ poterit quin dicat, hoc onere suscepto, recusare. Denique ei, qui profiteretur esse suum non solum de ijs cõtrouersijs, quæ temporibus, & personis notatæ sunt, hoc est de omnibus forensibus, sed etiam de generum infinitis quæstionibus dicere; nullum potest esse genus orationis, quod sit exceptum. Sed si illam quoque partem quæstionũ oratori uolumus adiungere uagam, & liberã, & late patentem; ut de rebus bonis, aut malis; expectendis, aut fugiendis; honestis, aut turpibus; utilibus, aut inutilibus; de uirtute, de iustitia, de continentia, de prudentia, de magnitudine animi, de liberalitate, de pietate, de amicitia, de fide, de officio, de cæteris uirtutibus, contrarijsq; uitijs dicendum oratori putemus; itemq; de rep. de imperio, de re militari, de disciplina ciuitatis, de hominũ moribus: assumamus eam quoque partem, sed ita, ut sit circumscripta modicis regionibus. Equidem omnia, quæ pertinent ad usum ciuium, morem hominũ; quæ uersantur in consuetudine uitæ, in ratione reip. in hac societate ciuili, in sensu hominum cõmuni, in natura, in moribus; comprehendenda esse oratori puto; si minus ut separatim de his rebus philosophorum more respondeat; at certe ut in causa prudenter possit intexere; hi scæ autem ipsis de rebus ut ita loquatur, uti ij, qui iurã, qui leges, qui ciuitates cõstituerũt, locuti sunt, simpliciter, & splendide, sine ulla serie disputationum, et sine ieiuna cõcertatione uerborũ. Hoc loco ne qua sit admiratio, si tot, tãtarũq; rerũ nulla à me præcepta po

gulorum causis, ac multo etiam maius de natura deorum, quàm de hominum litibus dicere. Non est ita, inquit Antonius: dicam enim tibi Catule non tam doctus, quàm, id quod est maius, expertus. Omnium ceterarum rerum oratio, mihi crede, ludus est homini nõ hebeti, neque inexercitato, neque cõmunium literarũ, & politioris humanitatis experti. in causarum contentionibus magnum est quoddam opus, atque haud scio an de humanis operibus longe maximum: in quibus uis oratoris plerũque ab imperitis exitu, & uictoria iudicatur: ubi adest armatus aduersarius, qui sit & feriendus, et repellendus: ubi sæpe is, qui rei dominus futurus est, alienus, atque iratus, aut etiam amicus aduersario, & inimicus tibi est; cum aut docendus is est, aut dedocendus; aut reprimendus, aut incitandus; aut omni ratione ad tempus, ad causam, oratione moderandus: in quo sæpe beneuolentia ad odium, odium autẽ ad beneuolentiam deducendum est: qui tanquam machinatione aliqua tum ad seueritatem, tum ad remissionem animi, tum ad tristitiam, tum ad letitiam est contorquendus. omnium sententiarum grauitate, omnium uerborum ponderibus est, utendum. accedat oportet actio uaria, uehemens, plena animi, plena spiritus, plena doloris, plena seueritatis. In his operibus si quis illam artem comprehenderit, ut tanquam Phidias Mineruæ signum efficere possit: non sanè, quemadmodum in clypeo idem ille artifex minora illa opera facere discat, laborabit. Tum Catulus. Quo ista maiora, ac mirabiliora fecisti, eo me maior expectatio tenet, quibusnam rationibus, quibus uè præceptis ea tãta

uis compareretur : non quo mea quidem iam intersit :  
 (neque enim atas id mea desiderat : & aliud quod-  
 dam genus dicendi nos secuti sumus : qui nunquam  
 sententias de manibus iudicum vi quadam orationis  
 extorsimus, ac potius placatis eorum animis tantum, quan-  
 tum ipsi patiebantur, accepimus : ) sed tamen ista tua  
 nullum ad usum meum, tantum cognoscendi studio ad-  
 ductus, requiro. Nec mihi opus est Græco aliquo do-  
 ctore, qui mihi peruulgata præcepta decanter: cum ipse  
 nunquam forum, nunquam ullum iudicium aspexerit :  
 ut peripateticus ille dicitur Phormio : cum Annibal  
 Carthagine expulsus Ephesum ad Antiochum uenisset  
 exul ; proque eo, quod eius nomen erat magna apud om-  
 nes gloria, inuitatus esset ab hospitibus suis, ut eum,  
 quem dixi, si uellet, audiret ; cumque is se non nolle di-  
 xisset: locutus esse dicitur homo copiosus aliquot horas  
 de Imperatoris officio, & de omni re militari. tum cum  
 cæteri, qui illum audierant, uehementer essent delectati ;  
 quærebant ab Annibale, quidnam ille ipse de illo  
 philosopho iudicaret. hic Pænus non optime græce,  
 sed tamen libere respondisse fertur : multos se deliros  
 senes sæpe uidisse, sed qui magis, quam Phormio, deli-  
 raret, uidisse neminem. neque mehercule iniuria. quid  
 enim aut arrogatius, aut loquacius fieri potuit, quam  
 Annibali, qui tot annos de imperio cum populo Ro-  
 manum gentium uictore certasset, græcum hominem,  
 qui nunquam hostem, nunquam castra uidisset, nun-  
 quam denique minimam partem ullius publici mune-  
 ris attigisset, præcepta de re militari dare ? Hoc mihi  
 facere omnes isti, qui de arte dicendi præcipiunt, ui-

dentur. quod enim ipsi experti non sunt, id docent cæteros: sed hoc minus fortasse errant, quod non te, ut Annibalem, sed pueros, aut adolescentulos docere conantur. Erras Catule, inquit Antonius. nam ego met in multos iam Phormiones incidi. quis enim est istorum Græcorum, qui quenquam nostrum quidquam, intelligere arbitretur? ac mihi quidem non ita molesti sunt. facile omnes perpetior, & perfero: nam aut aliquid afferunt, quod mihi non displiceat: aut efficiunt, ut me non didicisse minus poeniteat. dimitto autem eos non tam contumeliose, quam philosophum illum Annibal: & eo fortasse plus habeo etiam negotij. sed tamen est, eorum doctrina, quantum ego iudicare possum, perdidicula. Diuidunt enim totam rem in duas partes, in causæ controuersiam, & in quæstionis. Causam appellant rem positam in disceptatione rerum, & controuersia: Quæstionem autem rem positam in infinita dubitatione. De causa præcepta dant. De altera parte dicendi mirum silentium. Denique quinque faciunt quasi membra eloquentiæ: inuenire, quid dicas: inuenta disponere: deinde ornare uerbis: post memoriæ mandare: tum ad extremum agere, ac pronunciare. rem sanè non reconditam. quis enim hoc non sua sponte uiderit, neminem posse apte dicere, nisi, & quid diceret, & quibus uerbis, & quo ordine diceret, haberet, et ea meminisset? Atque hæc ego non reprehendo, sed ante oculos posita esse dico, ut eas ite quatuor, quinque, sex uel partes, uel etiam septem, (quoniam aliter ab alijs digeruntur) in quas est ab his omnis oratio distributa, iubent anim exordiri ita, ut cum, qui audiat, beneuolum nobis



# DE ORATORE

faciamus, & docilem, & attentum : Deinde rem narrare ita, ut uerisimilis narratio sit, ut aperta, ut breuis : Post autem diuidere causam, aut proponere : nostra cōfirmare argumentis, ac rationibus, deinde contraria refutare. Tum autem alij conclusionem orationis, et quasi perorationem collocāt. alij iubent, ante quā peroretur, ornandi, aut augendi causa digredi, deinde concludere, ac perorare. ne hæc quidem reprehendo : sunt enim concinne distributa, sed tamen, id quod necesse fuit hominibus expertibus ueritatis, non perite. Quæ enim præcepta principiorum, & narrationum esse uoluerunt, ea in totis orationibus sunt conseruanda. Nam & ego mihi beneuolum iudicem facilius facere possum, cum sum in cursu orationis, quā cum omnia sunt inaudita : docilem autem non cum polliceor me demonstraturum, sed tum, cum doceo, & ex plano : attentum uero crebro tota actione excitandis mentibus iudicum, non prima denunciatione efficere possumus. Iam uero narrationem quod iubent uerisimilem esse, & apertam, & breuem : recte nos admonent. quod hæc narrationis magis putant esse propria, quā totius orationis : ualde mihi uidentur errare : omninoq; in hoc omnis est error, quod existimant artificium esse hoc quoddā non dissimile cæterorum : cuiusmodi de ipso iure ciuili hesterno die Crassus componi posse dicebat : ut genera rerum primum exponeretur ; in quo uitiū est, si genus ullum prætermittatur : deinde singulorum generum partes ; in quo & deesse aliquam partem, & superare, mendosum est : tū uerborum omnium definitiones ; in quibus neque abesse quidquam

quidq̄ decet, neque redūdare. Sed hoc si in iure ciuili, si etiā in paruis, aut mediocribus rebus doctores assequi possunt; nō idē sentio tanta hac in re, tamq̄; immensa posse fieri. sin autem qui arbitrantur, deducendi sunt ad eos, qui hęc docent: omnia iam explicata, & perpolitā assequentur. sunt. n. innumerabiles de his rebus libri, neque abditi, neque obscuri. sed uideant, quid uelint, ad ludendum ne, an ad pugnandū arma sint sumpturi. aliud. n. pugna, & acies, aliud ludus, campusq̄; noster desiderat. attamen ars ipsa ludicra armorum & gladiatorii, & militi prodest aliquid: sed animus acer, & præsens, & acutus idem, atque uersutus inuitos uiros efficit non difficilius arte coniuncta. Quare ego tibi oratorem sic iam instituā, si potuero, ut, quid efficere possit, ante perspiciam. Sit enim mihi tinētus literis: audierit aliquid: legerit: ista ipsa praecepta acceperit. tentabo, quid deceat; quid uoce, quid uiribus, quid spiritu, quid lingua efficere possit. Si intelligam posse ad summos peruenire: nō solum hortabor, ut elaboret, sed etiam, si uir quoque mihi bonus uidebitur; obsecrabo. tātum ego in eccellente oratore, & eodem uiro bono pono esse ornamenti uniuersae ciuitati. Sin uidebitur, cum omnia summa fecerit, tamen ad medio creis oratores esse uenturus: permittam ipsi, quid uelit; molestus magnopere non ero. Sin planē abhorrebit, & erit absurdus: ut se contineat, aut ad aliud studium transferat, admonebo. nam neque is, qui optime potest, deserendus ullo modo est à cohortatione nostra: neque is, qui aliquid potest, deterrendus. quod alterū diuinitatis mihi cuiusdam uidetur: alterum uel non fa-

cere, quod non optime possis; uel facere, quod nō pessime facias, humanitatis. tertium uero illud, clamare contra quā debeat, & quā possit, hominis est, ut tu Catule de quodā declamatore dixisti, stultitiæ suæ quā plurimos testis domestico præconio colligentis. De hoc igitur, qui erit talis, ut cohortādus, adinuandusq; sit, ita loquamur, ut ei tradamus ea dūtaxat, quæ nos usus docuit; ut nobis ducibus ueniat eò, quò sine duce ipsi peruenimus; quoniam meliora docere non possumus. Atque ut à familiari nostro exordiar: hunc ego Catule Sulpitium primum in causa paruula adolescentulū audiui, uoce, & forma, & motu corporis, et reliquis rebus aptum ad hoc munus, de quo quærimus; oratione autem celeri, & concitata, quod erat ingenij; & uerbis efferuescentibus, & paulo nimium redundantibus, quod erat ætatis. non sum aspernatus: uolo enim se efferat in adolescente fecunditas: nam facilius, sicut in uitibus, reuocantur ea, quæ sese nimium profuderunt, quā, si nihil ualet materies, noua sarmenta cultura excitantur: ita uolo esse in adolescente, unde aliquid amputem: non enim potest in eo esse succus diuturnus, quod nimis celeriter est maturitatem assecutū. uidi statim indolem; neque dimisi tempus; & eum sum cohortatus, ut forū sibi ludum putaret esse ad discendum, magistrum autem, quem uellet, eligeret; me quidem si audiret, L. Crassum. quod ille arripuit; & ita sese facturū confirmauit; atque etiā addidit, gratiæ scilicet causa, me quoque sibi magistrū futurū. Vix annus intercesserat ab hoc sermone cohortationis meæ, cū iste accusauit C. Norbanum defendente me. non est

credibile, quid interesse mihi sit uisum inter eum, qui  
tum erat, & qui anno ante fuerat. omnino in illud ge-  
nus eum Crassi magnificum atque præclarum natu-  
ra ipsa ducebat: sed ea non satis proficere potuisset,  
nisi eodem studio atque imitatione intendisset, atque  
ita dicere consueisset, ut tota mente Crassum atque o-  
mni animo intueretur. Ergo hoc sit primum in præce-  
ptis meis, ut demonstramus quem imitemur, atque ita,  
ut, quæ maxime excellât in eo quæ imitabitur, ea dili-  
gētissime persequatur. tū accedat exercitatio, qua illū,  
quem ante delegerit, imitādo effingat, atque ita expri-  
mat, nō ut multos imitatores sæpe cognoui, qui aut ea;  
quæ facilia sunt, aut etiā illa, quæ insignia ac penè ui-  
tiosa, consectantur imitando. nihil est facilius, quàm  
amictum imitari alicuius, aut statū, aut motū. si uero  
etiam uitiosi aliquid est; id sumere, & in eo uitiosum  
esse, non magnum est; ut ille, qui nunc etiam amissa  
uoce furit in rep. Fusius neruos in dicendo C. Fimbriæ,  
quos tamē habuit ille, non assequitur, oris præuitatem,  
& uerborum latitudinem imitatur: sed tamē ille nec  
deligere sciuit, cuius potissimum similis esset; & in eo  
ipso, quæ delegerat, imitari etiam uitia uoluit. Qui aut  
ita faciet ut oportet, primū uigilet necesse est in deligē-  
do: deinde, quem probauit, in eo quæ maxime excela-  
lent, ea diligentissime persequatur. quid enim causæ  
censetis esse, cur ætates extulerint singulæ singula pro-  
pè genera dicēdi? quod non t.ā facile in nostris orato-  
ribus possumus indicare, quia scripta, ex quibus iudi-  
cium fieri posset, non multa sanè reliquerūt, quàm in  
Græcis; ex quorū scriptis cuiusque ætatis, quæ dicendi

ratio uoluntasq; fuerit, intelligi potest. Antiquissimi  
 ferè sunt, quorum quidem scripta conslent, Pericles at=  
 que Alcibiades, & eadem atate Thucydides, subtiles,  
 acuti, breues, sententijs magis quàm uerbis abundantes.  
 non potuisset accidere, ut unum esset omnium genus,  
 nisi aliquem sibi proponerent ad imitandum. Consecu=  
 ti sunt hos Critias, Theramenes, Lysias. multa Lysiae  
 scripta sunt, non nulla Critiae, de Theramene audiui=  
 mus. omnes etiam tum retinebant illum Periclis suc=  
 cum, sed erant paulo uberiore filo. Ecce tibi exortus est  
 Isocrates, magister istorum omnium: cuius è ludo  
 tanquam ex equo Troiano innumeri principes exie=  
 runt: sed eorum partim in pompa, partim in acie il=  
 lustres esse uoluerunt. itaque & illi Theopompi, Epho=  
 ri, Phylisti, Naucratae, multiq; alij naturis differunt, uo=  
 luntate autem similes sunt inter sese: & magistri, et  
 ij, qui se ad causas cõtulerunt, ut Demosthenes, Hyper=  
 des, Lycurgus, Aeschines, Dynarchus, alijq; complures,  
 etsi inter se pares non fuerūt, tamen sunt omnes in eo=  
 dem ueritatis imitandæ genere uersati; quorum quan=  
 diu mansit imitatio, tandiu genus illud dicendi, stu=  
 diumq; uixit. posteaquam extinctis his, omnis eorum  
 memoria sensim obscurata est & euauit, alia quæ=  
 dam dicendi molliora ac remissiora genera uiguerūt.  
 inde Demochares, quem aiunt sororis filium fuisse  
 Demosthenis, tum Phalereus ille Demetrius, omnium  
 istorum mea sententia politissimus, alijq; eorum simi=  
 les extiterunt. quæ si uolemus usque ad hoc tempus  
 persequi, intelligemus, ut hodie Alabandensem illum  
 Meneclem, & eius fratrem Hieroclem, quos ego audi=

ui, tota imitetur Asia, sic semper fuisse aliquem, cuius se similes plerique esse uellent. hanc igitur similitudinem qui imitatione assequi uolet, tum exercitationibus crebris atque magnis, tum scribendo maxime persequatur. quod si noster Sulpitius faceret, multo eius oratio esset pressior: in qua nunc interdum, ut in herbis rustici solent dicere, in summa ubertate inest luxuriosae quaedam, quae stylo depascenda est. Hic Sulpitius, Me quidem, inquit, recte mones, idque mihi gratum est: sed ne te quidem Antoni multum scriptitasse arbitror. Tum ille, Quasi uero, inquit, non eam praecipiam alijs, quae mihi ipsi desunt. sed tamen ne tabulas quidem conficere existimor: uerum et in hoc ex re familiari mea, et in illo ex eo, quod dico, quantulum id cunae est, quid faciam iudicari potest. Atque esse tamen multos uidemus, qui neminem imitentur, et suapte natura, quod uelint, sine cuiusquam similitudine consequantur. quod et in uobis animaduerti recte potest Caesar et Cotta: quorum alter inusitatum quidem nostris oratoribus leporem quendam et saltem, alter acutissimum et subtilissimum dicendi genus est consecutus. Neque uero uester aequalis Curio, patre mea sententia uel eloquentissimo temporibus illis, quenquam mihi magnopere uidetur imitari; qui tamen uerborum grauitate, et elegantia, et copia suam quandam expressit quasi formam figuramque dicendi: quod ego maxime potui iudicare in ea causa, quam ille contra me apud Centumuiros pro fratribus Cossis dixit. in qua nihil illi defuit, quod non modo copiosus, sed etiam sapiens orator habere deberet. Verum ut aliquan-

do ad causas deducamus illum, quem constituimus, & eas quidem, in quibus plusculum negotij est, iudiciorū atque litium, (riserit aliquis fortasse hoc præceptū: est enim non tam acutū, quān necessarium, magisq; monitoris non fatui, quān eruditi magistri) hoc enim primum præcipientus, quasunque causas erit acturus, ut eas diligenter penitusq; cognoscat. hoc in ludo nō præcipitur: faciles enim causæ ad pueros deferuntur. Lex peregrinum uetat in murum ascendere: ascendit, hostes repulit, accusatur. nihil est negotij huiusmodi causam cognoscere. recte igitur de causa discenda præcipiunt. hæc est enim in ludo causarum ferè formula. at uero in foro tabulæ, testimonia, pacta, conuenta, stipulationes, cognationes, affinitates, decreta, responsa, uita denique eorum, qui in causa uersantur, tota cognoscenda est: quarum rerum negligentia plerasque causas, & maxime priuatas, (sunt enim multo sæpe obscuriores) uidemus amitti. ita nonnulli, dum operam suam multi aestimari uolunt, ut toto foro uolitare, et à causa ad causam ire uideantur, causas dicunt incognitas. In quo est illa quidem magna offensio, uel negligentia, susceptis rebus, uel perfidia, receptis; sed etiam illa maior opinione, quòd nemo potest de ea re, quam non nouit, non turpissime dicere. ita dum inertie uituperationem, quæ maior est, contemnunt, assequuntur etiam illam, quam magis ipsi fugiunt, tarditatis. Equidem soleo dare operam, ut de sua quisque re me ipse doceat; & ut ne quis alius adsit, quo liberius loquatur, et agere aduersarij causam, ut ille agat suam, et quidquid de sua re cogitarit, in medium proferat. itaque



cum ille discessit, tres personas unus sustineo summa animi æquitate, meam, aduersarij, iudicis. qui locus est talis, ut plus habeat adiumenti, quàm incommodi, hunc iudico esse dicendum. ubi plus mali, quàm boni reperio, id totum abiudico atque reijcio. ita assequor, ut alio tempore cogitem quid dicam, & alio dicā: quæ duo plerique ingenio freti simul faciunt; sed certe idē illi melius aliquanto dicerent, si aliud sumendum sibi tempus ad cogitandum, aliud ad dicendum putarent. Cum rem penitus causamq; cognoui, statim occurrit animo quæ sit causa ambigui. nihil est enim, quod inter homines ambigatur, siue ex crimine causa constet, ut facinoris; siue ex controuersia, ut hæreditatis; siue ex deliberatione, ut belli; siue ex persona, ut laudis; siue ex disputatione, ut de ratione uiuendi; in quo non, aut quid factum sit, aut fiat, futurum uel sit, queratur, aut quale sit, aut quid nocetur. Ac nostræ ferè causæ, quæ quidem sunt criminum, plerunque inficiatione defenduntur. nam & de pecunijs repetundis, quæ maximæ sunt, neganda ferè sunt omnia: & de ambitu raro illud datur, ut possis liberalitatem ac benignitatem ab ambitu atque largitione seiungere: de sicarijs, de ueneficijs, de peculatu inficiari necesse est. Id est igitur genus primum causarum in iudicijs, ex controuersia facti; in deliberationibus plerunque ex futuri, ratio etiā ex instātis, aut facti. Sape aut, res nō sit nec ne, sed qualis sit, queritur: ut cum L. Opimij causam defendebat apud populum audiēte me C. Carbo Consul, nihil de C. Gracchi nece negabat, sed id iure pro salute patriæ factum esse dicebat: ut ei-

dem Carboni Tribuno pl. alia tum mente temp. capessenti P. Africanus de Ti. Graccho interroganti respondit, iure casum uideri. Iure autem omnia defenduntur, quæ sunt eius generis, ut aut oportuerit, aut licuerit, aut necesse fuerit, aut imprudentia, aut casu facta esse uideantur. Iam quid nocetur queritur, cum, quo uerbo quid appellandum sit, contenditur: ut mihi ipsi cum hoc Sulpitio fuit in Norbani causa summa contentio: pleraque enim de ijs, quæ ab isto obijciebantur, cum confiterer, tamen ab illo maiestatem imminutam negabam, ex quo uerbo lege Apuleia tota illa causa pendebat. Atque in hoc genere causarum nonnulli præcipiunt, ut uerbum illud, quod causam facit, lucide breuiter uterque definiat. quod mihi quidem perquam puerile uideri solet. alia est enim, cum inter doctos homines de ijs ipsis rebus, quæ uersantur in artibus, disputatur, uerborum definitio: ut cum queritur quid sit ars, quid sit lex, quid sit ciuitas. In quibus hoc præcipit ratio atque doctrina, ut uis eius rei, quam definias, sic exprimatur, ut neque absit quidquam, neque supersit. quod quidem in illa causa neque Sulpitius fecit, neque ego facere conatus sum. nam quantum uterque nostrum potuit, omni copia dicendi dilatauit, quid esset maiestatem minuire. Etenim definitio primum reprehenso uerbo uno, aut addito, aut dempto sæpe extorquetur è manibus: deinde genere ipso doctrinâ reducta, exercitationemque penè puerilem: tum & in sensum & in mentem iudicis intrare non potest: ante enim præterlabitur, quam percepta est. Sed in eo genere, in quo, quale sit quid, ambigitur, existit etiam

ex scripti interpretatione sæpe contentio : in quo nulla potest esse nisi ex ambiguo controuersia . Nam illud ipsum , cum scriptum à sententia discrepat , genus quodam habet ambigui : quod tum explicatur , cum ea uerba , quæ desunt , suggesta sunt , quibus additis defenditur sententiam scripti perspicuam fuisse : & ex contrarijs scriptis si quid ambigitur , non nouum genus nascitur , sed superioris generis causa duplicatur : itaque aut nunquam dijudicari poterit , aut ita dijudicabitur , ut referendis præteritis uerbis id scriptum , quodcunque defendimus , suppleatur . ita fit , ut unum genus in ijs causis , quæ propter scriptum ambiguntur , relinquatur , si est scriptum aliquid ambigue . Ambiguum autem cum plura genera sunt , quæ mihi uidentur i melius nosse , qui dialectici appellantur ; i autem nostri ignorare , qui non minus nosse debeant : tum illud est frequentissimum in omni consuetudine uel sermonis , uel scripti , cum idcirco aliquid ambigitur , quod aut uerbum , aut uerba sint prætermissa . Iterum autem peccant , cum genus hoc causarum , quod in scripti interpretatione uersatur , ab illis causis , in quibus , quali quæque res sit , disceptatur , seiungunt : nusquam enim tam queritur quale sit genus ipsum rei , quam in scripto , quod totum à facti controuersia separatum est . Ita tria sunt omnino genera , quæ in disceptationem et controuersiam cadere possunt , quid fiat , factum , futurum uel sit , aut quale sit , aut quo modo nominetur . nam & illud quidem , quod quidam Græci adiungunt , recte ne factum sit , totum in eo est , quod quale sit , querimus . Sed iam ad institutum re-

uertar meum . Cū igitur accepto causæ genere & cognito re tractare cœpi, nihil prius cōstituo, quàm quid sit illud, quò mihi referenda sit omnis illa oratio, quæ sit propria quæstionis & iudiciij : deinde illa duo diligentissime considero ; quorum alterum cōmendationē habet nostrā, aut eorū, quos defendimus ; alterū est ac cōmodatū ad eorum animos, apud quos dicimus, ad id, quod uolumus, cōmouendos. Ita ratio omnis dicēdi tribus ad persuadendum rebus est nixa ; ut probemus uera esse ea , quæ defendimus ; ut conciliemus nobis eos, qui audiunt ; ut animos eorum ad quencunque causa postulabit motum uocemus . Ad probandum aut duplex est oratori subiecta materies : una rerum earum, quæ nō excogitantur ab oratore, sed in re positæ ratione tractantur, ut tabulæ, testimonia, pacta, conuenta , quæstiones, leges, senatusconsulta, res iudicatæ, decreta, responsa, & reliqua, si quæ sunt , quæ non ab oratore pariuntur, sed ad oratorem à causa atque à reīs deferuntur . altera est, quæ tota in disputatione & argumentatione oratoris collocata est. ita in superiøre genere de tractandis argumētis, in hoc aut etiam de inueniendis cogitandū est. Atque isti quidē, qui docēt , cum causas in plura genera secuerūt, singulis generibus argumentorū copiam suggerūt . quod etsi ad instituendos adolescentulos magis aptū est, ut simulac posita sit causa, habeāt quò se referāt, unde statim expedita possint argumēta depromere : tamē & tardi ingenij est, riuulos consecrari, fontes rerū non uidere ; & iā ætatis est ususq̃ ; nostri, à capite, quod uelimus, arcessere, & unde omnia manant uidere. Et primū genus illud earum re

rum, quæ ad oratorem deferuntur, meditatam nobis in perpetuum ad omnem usum similium rerum esse debet. nam pro tabulis & contra tabulas, & pro testibus & contra testes, pro quaestionibus & contra quaestiones, et item de cæteris rebus eiusdem generis, uel se paratim dicere solemus de genere uniuerso, uel definite de singulis temporibus, hominibus, causis. quos quidem locos (uobis hoc Cotta & Sulpiti dico) multa cõmentatione atque meditatione paratos atque expeditos habere debetis. longum est enim nunc me explicare, qua ratione aut confirmare, aut infirmare testes, tabulas, quaestiones oporteat. hæc sunt omnia ingenij uel mediocris, exercitationis autem maximæ: artem quidem & præcepta duntaxat hætenus requirunt, ut certis dicendi luminibus ornentur. itemq; illa, quæ sunt alterius generis, quæ tota ab oratore pariuntur, excogitationem non habent difficilem, explicationem magis illustrem perpolitamq; desiderant. Itaque cum hæc duo nobis quaerenda sint in causis, primum quid, deinde quo modo dicamus: alterum, quod totum arte tinctum uidetur, tametsi artem requirit, tamẽ prudentiæ est penè mediocris, quid dicendum sit, uidere; alterum est, in quo oratoris uis illa diuina uirtusq; cernitur, ea, quæ dicenda sunt, ornate, copiose, uarieq; dicere. quare illam partem superiorem, quoniam semel ita uobis placuit, non recusabo quo minus perpoliam atque conficiam; (quantum consequar, uos iudicabitis) quibus ex locis ad eas tres res, quæ ad fidem faciendam solæ ualent, ducatur oratio, ut & concilietur animi, & doceantur, & moueantur. hæc sunt

enim tria. ea uero quemadmodum illustrentur, præsto est qui omnes docere possit, qui hoc primus in nostros mores induxit, qui maxime auxit, qui solus effecit. nanque ego Catule (dicam enim non reuerens assentandi suspicionem) neminem esse oratorem paulo illustriorem arbitror, neque Græcum, neque Latinū, quem ætas nostra tulerit; quem non & sæpe & diligenter audierim. itaque si quid est in me, quod iam sperare uideor, quoniam quidem uos his ingenijs homines tantum operæ mihi ad audiendum datis, ex eo est, quod nihil quisquam unquam me audiēte egit orator, quod non in memoria mea penitus infederit. Atque ego is qui sum, quantuscunque sum ad iudicandum, omnibus auditis oratoribus, sine ulla dubitatione sic statuo & iudico, neminem omnium tot, & tanta, quanta sunt in Crasso, habuisse ornamenta dicendi. Quamobrem si uos quoque hoc idem existimatis, non erit, ut opinor, iniqua partitio, si, cum ego hunc oratorem, quem nūc fingo, ut institui, crearo, aluero, confirmaro, tradam eū Crasso & uestiendum, & ornandum. Tum Crassus, Tu uero, inquit, Antoni perge, ut instituisti. neque enim boni est, neque liberalis parentis, quem procreauit, & eduxerit, cum non & uestire, & ornare, præsertim cum te locupletem esse negare non possis. quod enim ornamentum, quæ uis, qui animus, quæ dignitas illi oratori defuit, qui in causa peroranda non dubitauit excitare reum consularem, & eius diloricare tunicam, & iudicibus cicatrices aduersas senis Imperatoris ostendere? qui idem hoc accusante Sulpitio, cum hominem seditiosum furiosumq; defenderet, non dubita-

uit seditiones ipsas ornare, ac demonstrare grauissimis  
 uerbis multos sæpe impetus populi non iniustos esse,  
 quos præstare nemo possit; multas etiã è rep. seditiones  
 sæpe esse factas, ut cū reges essent exacli, ut cū Tri-  
 bunitia potestas esset constituta; illam Norbani seditionem  
 ex luētū ciuium, & ex Cæpionis odio, qui exerciti-  
 um amiserat, neque reprimi potuisse, & iure esse cō-  
 flatam. potuit hic locus tam anceps, tam inauditus,  
 tam lubricus, tam nouus, sine quadam incredibili uir-  
 ac facultate dicendi tractari? Quid ego de Cn. Man-  
 lij, quid de Q. Regis commiseratione dicam? quid de  
 alijs innumerabilibus? in quibus hoc non maxime eni-  
 tuit, quod tibi omnes dant, acumen quoddam singula-  
 re; sed hæc ipsa, quæ nunc ad me delegare uis, ea sem-  
 per in te eximia & præstantia fuerunt. Tum Catu-  
 lus, Ego uero, inquit, in uobis hoc maxime admirari so-  
 leo, quod, cum inter uos in dicendo dissimillimi sitis,  
 ita tamē uterque uestrū dicat, ut ei nihil neq; à natu-  
 ra denegatum, neque à doctrina non delatum esse ui-  
 deatur, quare Crasse neque tu tua suauitate nos pri-  
 uabis, ut, si quid ab Antonio aut prætermisum, aut  
 relictum sit, non explices: neque te Antoni, si quid  
 non dixeris, existimabimus non potuisse potius, quàm  
 à Crassus dici maluisse. Hic Crassus, Quin tu, inquit,  
 Antoni omittis ista, quæ proposuisti, quæ nemo horum  
 desiderat, quibus ex locis ea, quæ dicenda sint in causis,  
 reperiantur: quæ quanquā abs te nouo quodam mo-  
 do, præclareq; dicuntur, sunt tamen & re faciliora,  
 & præceptis peruagata. illa deprome nobis unde af-  
 feras, quæ sæpiissime tractas, semperq; diuinitus. De-



promam equidem, inquit Antonius; & quo facilius id à te exigam quod peto, nihil tibi à me postulanti recusabo. Meæ totius orationis, & istius ipsius in dicēdo facultatis, quam modo Crassus in cœlum uerbis extulit, tres sunt rationes, ut ante dixi, una cōciliandorum hominum, altera docendorum, tertia concitandorum. Harum trium partium prima lenitatem orationis, secunda acumen, tertia uim desiderat. nam hoc necesse est, ut is, qui nobis causam adiudicaturus sit, aut inclinatione uolūtatis propēdeat in nos, aut defensionis argumentis adducatur, aut animi permotione cogatur. sed quoniā illa pars, in qua rerū ipsarum explicatio ac defensio posita est, uidetur omnem huius generis quasi doctrinam continere: de ea primum loquemur, & pauca dicemus: pauca enim sunt, quæ usu iam tractata, & animo quasi habere notata uideamur. Ac tibi sapienter monenti L. Crasse libenter assentiemur, ut singularum causarum defensiones, quas solent magistri pueris tradere, relinquamus; aperiamus autem ea capita, unde omnis ad omnem & causam & orationem disputatio ducitur. Neque enim quoties uerbum aliquod est scribendum nobis, toties eius uerbi literæ sunt cogitatione conquirendæ: nec, quoties causa dicenda est, toties ad eius causæ seposita argumenta reuolui nos oportet, sed habere certos locos, qui, ut literæ ad uerbum scribendum, sic illi ad causam explicandam statim occurrant. sed hi loci ei demum oratori prodesse possunt, qui est uersatus in rebus, uel usu, quem ætas denique affert, uel auditione & cogitatione, quæ studio & diligentia præcurrit ætatem. nam si tu mihi

quamuis eruditū hominem adduxeris, quamuis acrem  
et acutum in cogitando, quamuis ad pronūciandum  
expeditū, si erit idem in consuetudine ciuitatis, in exē-  
plis, in institutis, in moribus ac uolūtatibus ciuium suo-  
rum hospes, non multum ei loci proderunt illi, ex quib-  
us argumenta promūtur. subactō mihi ingenio opus  
est, ut agro non semel arato, sed nouato et iterato,  
quo meliores factus possit et grandiores edere. sub-  
actio autem est usus, auditio, lectio, literæ. Ac primum  
naturam causæ uideat, quæ nunquam latet: factum  
ne sit, queratur, an quale sit, an quod nomen habeat:  
quo perspecto, statim occurrit naturali quadam pru-  
dentia, non ijs subductionibus, quas isti docent, quid fa-  
ciat causam, id est, quo sublato controuersia stare non  
possit: deinde quid ueniat in iudiciū: quod isti sic in-  
bent querere: interfecit Opimius Gracchum, quid fa-  
cit causam? quod reip. causa, cum ex S.C. ad arma uo-  
casset: hoc tolle, causa non erit. At id ipsum negat con-  
tra leges licuisse Decius. Veniet igitur in iudicium, li-  
cuerit ne ex S.C. seruandæ reip. causa. Perspicua sunt  
hæc quidem, et in uulgari prudentia sita, sed illa  
querenda, quæ ab accusatore et defensore argumen-  
ta ad id, quod in iudicium uenit, spectantia debeant  
afferri. Atque hic illud uidendum est, in quo sum-  
mus est error istorum magistrorum, ad quos liberos no-  
stros mittimus: non quo hoc quidem ad dicendum ma-  
gnopere pertineat, sed tamen ut uideatis, quàm sit ge-  
nus hoc eorum, qui sibi eruditi uidētur, hebes atque im-  
politum. Constituant enim in partiendis orationum  
modis duo genera causarum. unū appellant, in quo sit

ne personis atque temporibus de uniuerso genere quæ-  
ratur : alterum, quod personis certis & temporibus de-  
finiatur : ignari omnes controuersias ad uniuersi gene-  
ris uim & naturam referri . nam in ea ipsa causa, de  
qua ante dixi , nihil pertinet ad oratoris locos Opi-  
mij persona, nihil Decij . de ipso enim uniuerso genere  
infinita quæstio est ; num pœna uideatur esse afficien-  
tus, qui ciuem ex S. C. patriæ conseruandæ causa inter-  
emerit, cum id per leges non liceret. Nulla denique est  
causa , in qua id , quod in iudicium uenit, ex reorum  
personis, ac non generũ ipsorum uniuersa disputatione  
queratur . Quin etiam in ijs ipsis, ubi de factò ambi-  
gitur, coeperit ne contra leges pecunias P. Decius, argu-  
menta & criminum & defensionis reuocentur oportet  
ad genus, & ad naturam uniuersam ; quòd sum-  
ptuosus, de luxuria ; quòd alieni appetēs, de auaritia ;  
quòd seditiosus , de turbulētis & malis ciuibz ; quòd  
à multis arguitur , de genere testium : contraq; quæ  
pro reo dicētur, omnia necessario à tempore atque ho-  
mine ad cōmunes rerum & generum summas reuel-  
uentur . Atque hæc forsitan homini non omnia, quæ  
sunt in natura rerum, celeriter animo comprehendē-  
ti, permulta uideātur, quæ ueniant in iudicium tum ,  
cum de factò queratur : sed tamen criminum est mul-  
titudo , non defensionum aut locorum infinita . Quæ  
uero, cum de factò non ambigitur, queruntur qualia  
sint ; ea, si ex reis numeres, & innumerabilia sunt, &  
obscura ; si ex rebus , ualde & modica , & illustra .  
Nam si Mancini causam in uno Mancino ponimus ;  
quotiescūque is, quem Paterpatratus dederit , rece-  
ptus

ptus non erit, toties causa noua nascetur. Sin illa controuersia causam facit, uideatur ne ei, quem Paterpatrus dederit, si is non sit receptus, postliminiū esse: nihil ad artem dicendi, nec ad argumenta defensionis Mancini nomen pertinet. Ac si quid affert præterea hominis aut dignitas, aut indignitas; extra quæstionem est; & ea tamen ipsa oratio ad uniuersi generis disputationem referatur necesse est. Hæc ego non eo consilio disputo, ut homines eruditos redarguam: quāquam reprehendēdi sunt, qui in genere definiēdo istas causas describunt in personis, & in temporibus positas esse. nam etsi incurrunt tempora & personæ: tamen intelligendum est, non ex ijs, sed ex genere quæstionis pendere causas. sed hoc nihil ad me. nullum enim nobis certamē cum istis esse debet: tantum satis est intelligi, ne hoc quidem eos consecutos, quod in tanto orio etiam sine hac forensi exercitatione efficere potuerūt, ut genera rerum discernent, eaq; paulo subtilius explicarent. uerum hoc, ut dixi, nihil ad me. illud ad me, ac multo etiam magis ad uos Cotta noster & Sulpiti: quo modo nunc se istorum artes habent, pertimescenda est multitudo causarum: est enim infinita. Si in personis ponitur, quot homines, tot causæ: sin ad generum uniuersas quæstiones referūtur, ita modicæ, & paucæ sunt, ut omnes eas diligentes, & memores, & sobrii oratores percursas animo, & propè decantatas habere debeant. nisi forte existimatis à Manio Curio causam didicisse L. Crassum, & ea re multum attulisse, quamobrem posthumo non nato Curium tamen heredem Coponij esse oporteret. nihil ad copiā

argumentorum, neque ad causæ vim ac naturam nomen Coponij ac Curij pertinuit. in genere erat uniuerso rei negotijq; ; non in tempore ac nominibus omnium quæstio, cum scriptum ita sit, Si mihi filius gignitur, isq; prius moritur, & cætera, tū ut mihi ille sit hæres: si natus filius non sit, uideatur ne is, qui filio mortuo institutus hæres sit, hæres esse. perpetui iuris, & uniuersi generis quæstio non hominum nomina, sed rationem dicendi, & argumentorum fontes desiderat. In quo etiā isti nos iurisconsulti impediūt, à discendoq; deterrent. uideo enim in Catonis & Bruti libris nominatim ferè referri, quid alicui de iure uiro aut mulieri responderint: credo ut putaremus in hominibus nō in re consultationis, aut dubitationis causam aliquam fuisse, ut, quod homines essent innumerabiles, debilitati à iure cognoscendo uoluntatem discendi simul cū spe perdiscendi abijceremus. Sed hæc Crassus aliquādo nobis expediet, & exponet descripta generatim. est enim, ne forte nescias, heri nobis ille hoc Catule pollicitus, se ius ciuile, quod nūc diffusum & dissipatum est, in certa genera coacturum, & ad artē facile redacturum. Et quidem, inquit Catulus, haudquaquam est difficile Crasso; qui &, quod disci potuit de iure, didicit; & quod ipsi, qui eum docuerūt, defuit, ipse afferet; ut, quæ sint in iure, uel acute describere, uel ornate illustrare possit. ergo ista, inquit Antonius, tum à Crasso discemus, cum se de turba, & à subsellijs in otium, ut cogitat, solitudinemq; contulerit. Iam id quidem sæpe, inquit Catulus, ex eo audiui, cū diceret sibi certū esse à iudicijs causisq; discedere: sed, ut ipsi soleo dicere, non

licebit : neque enim ipse auxilium suum sepe à uiris bonis frustra implorari patietur : neque id æquo animo feret ciuitas : quæ si uoce L. Crassi carebit , ornameto quodam sese spoliata putabit. Nam hercle, inquit Antonius, si hæc uere à Catulo dicta sunt, tibi mecum in eodem est pistrino Crasse uiuendum , & istam oscitantem & dormitantem sapientiam, Scæuolarum, & ceterorū beatorū otio cōcedamus. Arrisit hic Crassus leuiter, et, Pertexē modo, inquit, Antoni, quod exorsus es : me tamen ista oscitans sapientia , simul atque ad eam confugero, in libertatem uindictabit. Huius quidem loci, quem modo sum exorsus, hic est finis, inquit Antonius : quoniam intelligitur non in hominem innumerabilibus personis, neque in infinita temporū uarietate, sed in generum causis atque naturis omnia sita esse, quæ in dubium uocaretur ; genera autem esse definita non solum numero , sed etiam paucitate ; ut eam materiē orationis, quæ cuiusque esset generis, studiosi qui essent dicendi, omnibus locis descriptam , instructam, ornatamq; comprehenderent, rebus dico & sententijs . Ea uero sua uerba parient : quæ semper satis ornata mihi quidem uideri solent, si eiusmodi sunt, ut ea res ipsa peperisse uideatur . Ac si uerum queritis, quod mihi quidem uideatur : ( nihil enim aliud affirmare possum, nisi sententiā & opinionē meam ) hoc instrumentum causarum, & generū uniuersorum in forū deferre debemus, neque, ut quæq; res delata ad nos erit, tū deniq; scrutari locos, ex quibus argumēta eruamus : quæ quidem omnibus, qui ea mediocriter modo considerarint, studio adhibito, & usu, pertractata esse

possunt. sed tamen animus referendus est ad ea capita, & ad illos, quos sæpe iam appellauimus, locos, ex quibus omnia ad omnem orationem inuenta ducuntur. Atque hoc totum est siue artis, siue animaduersionis, siue consuetudinis, nosse regiones, intra quas uenere; ut peruestiges, quod quæras. Vbi cum locum omnem cogitatione sepsieris, si modo usum rerum percallueris, nihil te effugiet, atque omne, quod erit in re, occurret, atque incidet. Et sic cum ad inueniendum in dicendo tria sint, acumen, deinde ratio, quam licet, si uolumus, appellemus artem, tertium diligentia; nõ possum equidem non ingenio primas concedere, sed tamen ipsum ingenium diligentia etiam ex tarditate incitat. Diligentia, inquam, cum omnibus in rebus, tum in causis defendendis plurimum ualet. hæc præcipue colenda est nobis, hæc semper adhibenda, hæc nihil est quod non assequatur. causa ut penitus, quod initio dixi, nota sit, diligentia est. ut aduersarium attente audiamus; atque ut eius non solũ sententiã, sed etiam uerba omnia excipiamus, uultus denique perspiciamus omnes, qui sensus animi plerunque indicant, diligentia est. id tamen dissimulanter facere, ne sibi ille aliquid proficere uideatur, prudentia est. Deinde ut in ijs locis, quos proponam paulo post, peruoluatur animus, ut se penitus insinuet in causam, ut sit cura & cogitatione intentus, diligentia est. ut his rebus adhibeat, tanquam lumen aliquod, memoriam, ut uocem, ut uires, hæc magna sunt. Inter ingenium quidem & diligentiam perpaululum iocũ reliquum est arti. ars demonstrat tantum ubi quæras, atque ubi sit illud, quod studeas inue-



nire. reliqua sunt in cura, attentione animi, cogitatione, uigilantia, assiduitate, labore, complectar uno uerbo, quo saepe iam usi sumus, diligentia, qua una uirtute omnes uirtutes reliquæ continentur. Nam orationis quidem copia uidemus ut abundet philosophi, qui (ut opinor, sed tu hæc Catule melius) nulla dant præcepta dicendi, nec idcirco minus, quæcunque res proposita est, suscipiunt, de qua copiose & abundanter loquantur. Tum Catulus, Est, inquit, ut dicis, Antoni, ut plerique philosophi nulla tradant præcepta dicendi, & habeant paratum tamen quid de quaque re dicant. Sed Aristoteles, is, quem maxime ergo admiror, proposuit quosdam locos, ex quibus omnis argumentatio non modo ad philosophorum disputationem, sed etiã ad hanc, quã in causis utimur, inueniretur. à quo quidem homine iandudũ Antoni non aberrat oratio tua: siue tu similitudine illius diuini ingenij in eadẽ incurris uestigia: siue etiam illa ipsa legisti atque didicisti: quod quidẽ mihi magis uerisimile uidetur: plus enim te operæ Græcis dedisse rebus uideo, q̃ putaram. Tum ille, Verum, inquit, ex me audies Catule. semper ego existimaui iucundio rem et probabiliorem huic populo oratorem fore, qui primum quamminimã artificij alienius, deinde nullam Græcarum rerum significationẽ daret. atque ego idem existimaui pecudis esse, non hominis, cum tanta res Græci susciperent, profiterentur, agerent, seseq; & uiuendi res obscurissimas, & bene uiuendi, & copiose dicendi rationem hominibus daturus pollicerentur, non ad mouere aurem, & si palam audire eos non auderes, ne minueres apud rudes

ciues auctoritatem tuam, subauscultando tamen excipere uoces eorum, et procul, quid narrarent, attendere : itaq; feci Catule, & istorum omnium summatim causas, & genera ipsa gustavi. Valde hercule, inquit Catullus, timide, tanquam ad aliquem libidinis scopulum, sic tuam mentem ad philosophiam appulisti : quam hæc ciuitas aspernata nunquam est. nam & referta quondam Italia Pythagoreorum fuit, tum, cum erat in hac gente magna Græcia, ex quo etiam quidam Numam Pôpiliū regem nostrum fuisse Pythagoreum ferunt, qui annis permultis ante fuit, quam ipse Pythagoras ; quo etiam maior uir habendus est, cum illam sapientiam constituendæ ciuitatis duobus propè seculis ante cognouit, quam eam Græci natam esse senserunt : & certe nō tulit ullos hæc ciuitas aut gloria clariore, aut auctoritate grauiore, aut humanitate politiore P. Africano, C. Lælio, L. Furio, qui secum eruditissimos homines ex Græcia palam semper habuerunt. Atque ego ex istis sæpe audini, cum dicerent, pergratum Athenienses & sibi fecisse, & multis principibus ciuitatis, quod, cum ad senatum legatos de suis maximis rebus mitterent, tres illius ætatis nobilissimos philosophos misissent, Carneadem, & Critolaum, & Diogenem : itaque eos, dum Romæ essent, & à se, et ab alijs frequenter auditos. quos tu cum haberes auctores Antoni, minor cur philosophie, sicut Zethus ille Pacuuianus, propè bellum indixeris. Minime, inquit Antonius : ac sic decreui philosophari potius, ut Neopolemus apud Ennium, paucis. nam, omnino, haud placet. Sed tamen hæc est mea sententia, quam uidebar exposuisse

se : ego ista studia non improbo, moderata modo sint : opinionem istorum studiorum, & suspicionem artificij apud eos, qui res iudicent, oratori aduersariam esse arbitror : imminuit enim & oratoris auctoritatē, & orationis fidem. Sed ut eò reuocetur, unde huc declinauit oratio; ex tribus istis clarissimis philosophis, quos Romam uenisse dixisti, uides ne Diogenem fuisse, qui diceret, artem se tradere bene differendi, & uera ac falsa diiudicandi, quam uerbo Græco διαλεκτικὴν appellaret? In hac arte, si modo est hac ars, nullum est præceptum quo modo uerum inueniatur, sed tantum est quo modo iudicetur. nam & omne, quod eloquimur, sic ut aut esse dicamus id, aut non esse; & si simpliciter dictum sit, suscipiunt dialectici, ut iudicent uerum ne sit an falsum; & si coniuncte sit elatum, & adiuncta sint alia, iudicent recte ne adiuncta sint, & uera ne summa sit uniuscuiusque rationis: et ad extremum ipsi se compungunt suis acuminibus, & multa querendo reperiunt, non modo ea, quæ iam non possint ipsi dissoluere, sed etiam quibus ante exorsa, & potius detexta propè retexantur. Hic nos igitur Stoicus iste nihil adiuuat, quoniā, quemadmodum inueniam, quid dicam, non docet: atque idem etiā impedit, quod & multa reperit, quæ neget ullo modo posse dissolui; & genus sermonis affert non liquidū, non fusum ac profluens, sed exile, aridum, concisum, ac minutum: quod si quis probabit, ita probabit ut oratori tamen aptum non esse fateatur. hæc enim nostra oratio multitudinis est auribus accommodanda, ad oblectandos animos, ad impellendos, ad ea probanda, quæ non

artificis statera, sed quadam populari trutina exami-  
nantur. quare istam artem rotam dimittamus, quæ  
in excogitandis argumentis muta nimium est, in iudi-  
candis nimium loquax. Critolaum istum, quem simul  
cum Diogene uenisse commemoras, puto plus huic stu-  
dio nostro prodesse potuisse: erat enim ab isto Aristotele,  
a cuius inuentis tibi ego uideor non longe aberrare.  
atque inter hunc Aristotelem, cuius & illum legi  
librum, in quo exposuit dicendi artes omnium superio-  
rum, & illos, in quibus ipse sua quædam de eadem ar-  
te dixit, et hos germanos huius artis magistros hoc mi-  
hi uisum est interesse, quod ille eadem acie mentis, qua re-  
rum omnium uim naturamque uiderat, hæc quoque aspe-  
xit, quæ ad dicendi artem, quam ille despiciebat, pertine-  
bant: illi autem, qui hoc solum colendum ducebant, ha-  
bitarunt in hac una ratione tractanda, non eadem pru-  
dentia, qua ille, sed usu in hoc uno genere studioque ma-  
iore. Carneadis uero uis incredibilis illa dicendi, & ua-  
rietas perquam esset optanda nobis; qui nullam un-  
quam in illis suis disputationibus rem defendit, quam  
non probarit; nullam oppugnavit, quam non euertere-  
rit. Sed hoc maius est quiddam, quam ab ijs, qui hæc  
tradunt & docent, postulandum sit. Ego autem, si  
quem nunc plane rudem institui ad dicendum uelim,  
his potius tradam assiduis uno opere eadem incudem  
diem noctemque tundentibus, qui omnes tenuissimas par-  
ticulas, atque omnia minima mansa, ut nutrices in-  
fantibus pueris, in os inferant. Sin sit is, qui & do-  
ctrina mihi liberaliter institutus, & aliquo iam im-  
butus usu, & satis acris ingenio esse uideatur: illuc eum

rapiam, ubi non seclusa aliqua aquula teneatur, sed  
 unde uniuersum flumen erumpat; ut illi sedes, & tā-  
 quam domicilia omnium argumentorum cōmonstrē,  
 & ea breuiter illustrem, uerbisq; definiam. quid enim  
 est, in quo hæreat, qui uiderit, omne, quod sumatur in  
 oratione aut ad probandum, aut ad refellendum, aut  
 ex sua sumi ui atque natura, aut assumi foris? Ex sua  
 ui, cū aut, res quæ sit tota, queritur, aut pars eius; aut  
 uocabulum quod habeat, aut quippiam rem illā quod  
 attingat: extrinsecus autem, cum ea, quæ sunt foris,  
 neque hærent in rei natura, colliguntur. Si res tota  
 queritur, definitione uniuersa uis explicanda est, sic:  
 Si maiestas est amplitudo ac dignitas ciuitatis, is eam  
 minuit, qui exercitum hostibus populi R. tradidit, non  
 qui eum, qui id fecisset, populi R. potestati tradidit. Sin  
 pars, partitione, hoc modo: Aut senatus parendum de  
 salute reip. fuit, aut aliud consilium instituendū, aut  
 sua sponte faciendum: aliud consilium superbū,  
 suū arrogans: utendum igitur fuit consilio senatus.  
 » Si ex uocabulo, ut Carbo: Si Consul est, qui consu-  
 » lit patriæ: quid aliud fecit Optimus? Sin ab eo, quod  
 rem attingat; plures sunt argumentorum sedes ac lo-  
 ci, nam & coniuncta querimus: & genera, & par-  
 tes generibus subiectas, & similitudines, & dissimilitu-  
 dines, & contraria, & consequentia, & consentanea,  
 & quasi præcurrentia, & repugnantia, & causas re-  
 rum uestigabimus: & ea, quæ ex causis orta sunt, &  
 maiora, paria; minora quæremus. Ex coniunctis sic  
 argumenta ducuntur: Si pietati summa tribuenda  
 laus est, debetis moueri, cum Q. Metellum tam pie lu-

gere uideatis. Ex genere autem: Si magistratus in populi R. potestate esse debent; quid Norbanum accusas, cuius Tribunatus uoluntati paruit ciuitatis? Ex parte autem ea, quæ est subiecta generi: Si omnes, qui reip. consulunt, chari nobis esse debent; certe in primis imperatores, quorum consilijs, uirtute, periculis retinemus et nostram salutem, et imperij dignitatem. Ex similitudine autem: Si fere partus suos diligunt, quæ nos in liberos nostros indulgentia esse debemus? At ex dissimilitudine: Si barbarorum est in diem uiuere, nostra consilia sempiternum tempus spectare debent. Atque utroque in genere et similitudinis et dissimilitudinis, exempla sunt ex aliorum factis, aut dictis, aut euentis, et fide et narrationes sæpe ponende. Iam ex contrario: Si Gracchus nefarie, præclare Opimius. Ex consequentibus: Si et ferro interfectus ille, et tu inimicus eius cum gladio cruento comprehensus es in illo ipso loco, et nemo præter te ibi uisus est, et causa nemini, et tu semper audax; quid est, quod de facinore dubitare possimus? Ex consentaneis, et præcurrentibus, et repugnantibus, ut olim Crassus adolescens: Non, si Opimium defendisti Carbo, idcirco te isti bonum ciuem putabunt: simulasse te, et aliud quid quæsisse perspicuum est, quod Ti. Gracchi mortem sæpe in concionibus deplorasti, quod P. Africani necis socius fuisti, quod eam legem in Tribunatu tulisti, quod semper à bonis dissensisti. Ex causis autem rerum sic: Auaritiam si tollere uultis, mater eius est tollenda luxuries. Ex ijs autem, quæ sunt orta de causis: Si æuarij copijs et ad belli adiumenta, et ad ornamenta pacis utimur, uetigalibus ser

uiamus. Maiora autem, & minora, & paria cōparabimus sic. Ex maiore: Si bona existimatio diuitijs præstat, et pecunia tātopere expetitur, quāto gloria magis est expetenda? Ex minore sic: Hic parue cōsuetudinis causa huius mortem fert tam familiariter:

Quid, si ipse amasset? quid mihi hic faciet patri?

Ex pari sic: Est eiusdem & eripere contra temp. & largiri pecunias. Foris autem assumuntur ea, quæ non sua ui, sed extranea subleuantur, ut hæc: Hoc uerum est, dixit enim Q. Lutatius: Hoc falsum est, habita enim quæstio est: Hoc sequi necesse est, recito enim tabulas. de quo genere toto paulo ante dixi. Hæc ut breuissime dici potuerunt, ita à me dicta sunt. ut enim, si aurum cui, quod esset multifariam defossū, commonstrare uellem, satis esse deberet, si signa & notas ostenderem locorum; quibus cōgnitis ille sibi ipse foderet, & id, quod uellet, paruulo labore, nullo errore inueniret: sic has ego argumentorum noui notas, quæ illa mihi quærenti demonstrant ubi sint: reliqua cura & cogitatione eruuntur. Quod autem argumentorū genus cuique causarum generi maxime conueniat, nō est artis exquisita præscribere, sed est mediocris ingenij iudicare. neque enim nunc id agimus, ut artem aliz quam dicendi explicemus, sed ut doctissimis hominibus usus nostri quasi quedam monita tradamus. His igitur locis in mentē & cogitatione defixis, & in omni re ad dicendum posita excitatis, nihil erit, quod oratorem effugere possit, non modo in forensibus disceptationibus, sed omnino in ullo genere dicendi. si uero assequetur, ut talis uideatur, qualem



se uideri uelit; & animos eorū ita afficiat, apud quos  
 aget, ut eos, quocūque uelit, uel trahere, uel rapere pos-  
 sit: nihil profecto præterea ad dicendum requireret.  
 Iam illud uidemus nequaquā satis esse, reperire quid  
 dicas, nisi id inuentum tractare possis. Tractatio au-  
 tem uaria esse debet, ne aut cognoscat artem qui au-  
 diat, aut defatigetur similitudinis satietate. Proponi o-  
 portet, quid afferas; & id quare ita sit, ostendere; &  
 ex iisdem illis locis interdum concludere; relinquere  
 aliā, alioq; transire; sepe non proponere, ac ratione  
 ipsa afferenda, quid proponendum fuerit, declarare; si  
 cui quid simile dicas, prius ut simile confirmes; deinde,  
 quod agitur, adiungas; puncta argumentorum plerū-  
 que ut occulas, ne quis ea numerare possit, ut re distin-  
 guantur, uerbis confusa esse uideantur. Hæc ut et pro-  
 perans, & apud doctos, & semidoctus ipse percurro,  
 ut aliquando ad illa maiora ueniamus. Nihil est enim  
 in dicendo Catule maius, quàm ut faueat oratori is,  
 qui audiet; utq; ipse sic moueatur, ut impetu quodā  
 animi & perturbatione magis, quàm iudicio aut con-  
 silio regatur. Plura enim multo homines iudicant o-  
 dio, aut amore, aut cupiditate, aut iracūdia, aut dolo-  
 re, aut letitia, aut spe, aut timore, aut errore, aut ali-  
 qua permotione mentis, q̄ ueritate, aut præscripto, aut  
 iuris norma aliqua, aut iudicij formula, aut legibus:  
 quare, nisi quid uobis aliud placet, ad illa pergamus.  
 Paulum, inquit Catulus, etiam nunc deesse uidetur ijs  
 rebus Antoni, quas exposuisti, quod sit tibi ante expli-  
 candum, quàm illuc proficiscare, quod te dicis intende-  
 re. Quidnam, inquit? Qui ordo tibi placet, inquit

Catulus, & quæ dispositio argumentorum : in qua tu mihi semper deus uideri soles. Vide quàm sim in isto genere, inquit, Catule deus : non mehercule mihi nisi admonito uenisset in mentem : ut possis existimare me in ea, in quibus nonnunquam aliquid efficere uideor, usu solere in dicendo, uel casu potius incurrere. Ac res quidem ista, quam ego, quia nō noram, sic tanquam ignotum hominem præteribam, tātum potest in dicendo, ut ad uincendum nulla plus possit. Sed tamen mihi uideris ante tempus à me rationem ordinis, & disponendarum rerum requisisse. Nam si ego omnem uim oratoris in argumentis, & in re ipsa per se comprobanda posuisssem, tempus esset iam de ordine argumentorū, & de collocatione aliquid dicere : sed cum tria sint à me proposita, de uno dictum, cū de duobus reliquis dixero, tū erit denique de disponenda tota oratione quæ rendum. Valet igitur multum ad uincendum, probari mores, instituta, & facta, & uitam eorū, qui agent causas, & eorum, pro quibus ; & item improbari aduersariorum, animosq; eorum, apud quos agitur, conciliari quammaxime ad beneuolentiam cum erga oratorem, tum erga illum, pro quo dicet orator. Conciliantur autem animi dignitate hominis, rebus gestis, estimatione uitæ : quæ facilius ornari possunt, si modo sunt, quàm fingi, si nulla sunt. Sed hæc adiuvant in oratore, lenitas uocis, uultus, pudoris significatio, uerborum comitas. Si quid persequare acrius, ut inuitus et coactus facere uideare, facilitatis, liberalitatis, mansuetudinis, pietatis, grati animi, non appetentis, non auidi signa proferri perutile est : eaq; omnia, quæ pro-

borum, demissorum, non acrium, non pertinacium, non  
 litigiosorum, nō acerborum sunt, ualde beneuolentiam  
 conciliant, ab alienantq; ab ijs, in quibus hæc non sunt.  
 itaque eadem sunt in aduersarios ex contrario confe=  
 renda. Sed genus hoc totum orationis in ijs causis ex=  
 cellet, in quibus minus potest inflammari animus iudi=  
 cis acri & uehementi quadam incitatione. non enim  
 semper fortis oratio quæritur, sed sæpe placida, summi=  
 sa, lenis, quæ maxime commendat reos. reos autem ap=  
 pello non eos modo, qui arguuntur, sed omnes, quorum  
 de re disceptatur. sic enim olim loquebantur. Horum  
 igitur exprimere mores oratione, iustos, integros, reli=  
 giosos, timidos, perferentes iniuriarū, mirū quiddā ua=  
 let: & hoc uel in principijs, uel in re narranda, uel in  
 peroranda tantam habet uim, si est suauiter & cum  
 sensu tractatum, ut sæpe plus, quàm causa, ualeat. Tā=  
 tum autem efficitur sensu quodam ac ratione dicēdi,  
 ut quasi mores oratoris effingat oratio. genere enim  
 quodam sententiarum, & genere uerborum, adhibita  
 etiam actione leni facultateq; significandi, efficitur, ut  
 probi, ut bene morati, ut boni uiri esse uideantur. Huic  
 autem est illa dispar adiuncta ratio orationis, quæ  
 alio quodam genere mentes iudicum permouet im=  
 pellitq; ; ut aut oderint, aut diligant; aut inuideant,  
 aut saluum uelint; aut metuant, aut spernant; aut  
 eupiant, aut abhorreant; aut latentur, aut mœre=  
 ant; aut misereantur, aut punire uelint; aut ad eos  
 motus adducantur, si qui finitimi sunt & propinqui  
 his ac talibus animi perturbationibus: Atque illud op=  
 tandum est oratori, ut aliquam permotionem animo=

rum sua sponte ipsi afferant ad causam iudices, ad id, quod utilitas oratoris feret, accommodatam. facilius est. n. currētem (ut aiunt) incitare, q̄ cōmouere languentem. sin id aut non erit, aut erit obscurius: sicut medico diligenti prius quā conetur agro adhibere medicinam, non solū morbus eius, cui mederi uolet, sed etiā consuetudo ualentis, & natura corporis cognoscenda est; sic equidem cum aggredior ancipitem causam, & grauem ad animos iudicum pertractandos, omni mente in ea cogitatione curāq; uersor, ut odoror quīsagacissime possim, quid sentiant, quid existiment, quid expectent, quid uelint, quò deduci oratione facillime posse uideātur. Si se dant, et, ut ante dixi, sua spōte, quò impellimus, inclinant, atque propendent: accipio quod datur, & ad id, unde aliquis status ostenditur, uelado. Sin est integer quietusq; iudex, plus est operis. sunt enim omnia dicendo excitanda, nihil adiuuante natura. Sed tantam uim habet illa, quæ reſſe à bono poeta dicta est flexanima, atque omnium regina rerum oratio, ut non modo inclinantem erigere, aut stantem inclinare, sed etiam aduersantem & repugnantem, ut Imperator bonus ac fortis, capere possit. Hæc sunt illa, quæ me ludens Crassus modo flagitabat, quæ à me diuinitus tractari solere diceret, & in causa M. Aquilij Caijq; Norbani, nonnullisq; alijs quasi præclare acta laudaret: quæ mehercule ego Crasse, cū à te tractantur in causis, horrere soleo: tanta uis animi, tantus impetus, tantus dolor, oculis, uultu, gestu, digito denique isto tuo significari solet: tantum est flu-  
men grauiſſimorū optimorumq; uerborū, tam integræ

sententiæ, tam ueræ, tam nouæ, tam sine pigmentis fu-  
coq; puerili, ut mihi non solum tu incédere iudicem,  
sed ipse ardere uidearis. Neque fieri potest, ut doleat  
is, qui audit, ut oderit, ut inuideat, ut pertimescat ali-  
quid, ut ad fletum misericordiamq; deducatur, nisi om-  
nesij motus, quos orator adhibere uolet iudici, in ipso  
oratore impressi esse atque inusti uidebuntur. Quod  
si fictus aliquis dolor suscipiendus esset, & si in eiusmo-  
di genere orationis nihil esset, nisi falsum, atque imita-  
tione simulatum; maior ars aliqua forsitan esset re-  
quirenda. nunc ego, quid tibi Crasse, quid cæteris ac-  
cidat, nescio: de me autem, causa nulla est, cur apud  
homines prudētissimos, atque amicissimos mentiar: nō  
mehercule unquam apud iudices aut dolorem, aut mi-  
sericordiam, aut inuidiam, aut odiū excitare dicēdo  
uolui, quin ipse in commouendis iudicibus, ijs ipsis sensi-  
bus, ad quos illos adducere uellem, permouerer. neque  
enim facile est perficere, ut irascatur cui tu uelis index,  
si tu ipse id lente ferre uideare; neque ut oderit eum,  
quem tu uelis, nisi te ipsum flagrantem odio ante uide-  
rit: neque ad misericordiam adducetur, nisi ei tu si-  
gnæ doloris tui uerbis, sententijs, uoce, uultu, collacry-  
matione denique ostenderis. Ut enim nulla materies  
tam facilis ad exardescendū est, quæ nisi admoto igni  
ignem concipere possit: sic nulla mens est tam ad com-  
prehendendū uim oratoris parata, quæ possit incendi,  
nisi inflammatu ipse ad eam & ardens accesseris. Ac  
ne forte hoc magnum, ac mirabile esse uideatur, homi-  
nem toties irasci, toties dolere, toties omni animi motu  
concitari, præsertim in rebus alienis: magna uis est  
earum

earum sententiarum atque eorum locorum, quos agas, tractesq; dicendo, ut nihil opus sit simulatione & fallacijs. ipsa enim natura orationis eius, quæ suscipitur ad aliorum animos permouendos, oratorem ipsum magis etiam, quàm quenquam eorum, qui audiunt, permouet. Et ne hoc in causis, in iudicijs, in amicorum periculis, in concursu hominum, in ciuitate, in foro accidere miremur, cum agitur non solum ingenij nostri existimatio, (nam id esset leuius: quanquam, cum professus sis te id posse facere, quod pauci, ne id quidem negligendum est) sed alia sunt maiora multo, fides, officium, diligentia; quibus rebus adducti, etiam cum alienissimos defendimus, tamen eos alienos, si ipsi uiri boni uolumus haberi, existimare non possumus: sed, ut dixi, ne hoc in nobis mirum esse uideatur, quid potest esse tã fictũ, quàm uersus, quàm scena, quàm fabulæ? tamen in hoc genere sæpe ipse uidi, cum ex persona mihi ardere oculi hominis histrionis uiderentur spondalia illa dicentis,

Segregare abste ausus, aut sine illo Salamina ingredi,  
Neque paternum aspectum es ueritus?

nunquam illum aspectum dicebat, quin mihi Telamõ iratus fuere luẽtu filij uideretur. Vt idem inflexa ad miserabilem sonum uoce,

Quem ætate exaẽta indigem

Liberum laceraſti, orbaſti, extinti, neque fratris necis,  
Neque gnati eius parui, qui tibi in tutelã est traditus:  
flets ac lugens dicere uidebatur.

quæ si ille histrio, quotidie cũ ageret, tamen recte agere sine dolore non poterat: quid Pacuuium putatis in

scribendo leni animo ac remisso fuisse? fieri nullo modo potuit. sepe enim audiui, poetam bonum neminem, id quod à Democrito & Platone in scriptis relictum esse dicunt, sine inflammatione animorum existere posse, & sine quodam afflatu quasi furoris. quare nolite existimare, me ipsum, qui non heroum ueteres casus fictosq; luctus uellem imitari, atque adumbrare dicendo, neq; actor essem alienæ personæ, sed auctor meæ; cum mihi M. Aquilius in ciuitate retinendus esset, quæ in illa causa peroranda fecerim, sine magno dolore fecissem. quem enim ego Consulem fuisse, Imperatorem ornatum à senatu, ouantem in Capitolium ascendisse meminisse, hunc cum afflictum, debilitatum, moerentem, in summum discrimen adductum uiderem, non prius sum conatus misericordiam alijs commouere, quam misericordia sum ipse captus. sensi equidem tum magnopere moueri iudices, cum excitaui moestum ac sordidatum senem, & cum ista feci, quæ tu Crasse laudas, non arte, de qua quid loquar nescio, sed motu magno animi ac dolore, ut discinderem tunicam, ut cicatrices ostenderem; cum C. Marius moerorem orationis meæ præsens ac sedens multum lacrymis suis adiuuaret; cumq; ego illum crebro appellans, collegam ei suum commendarem, atque ipsum aduocatum ad communem Imperatorum fortunam defendendam inuocarem. non fuit hæc sine meis lacrymis, non sine dolore magno miseratio, omniumq; deorum, & hominum, & ciuium, & sociorum imploratio. quibus omnibus uerbis, quæ à me tum sunt habita, si dolor abfuisset meus, non modo non miserabilis, sed etiam irridenda



fuiſſet oratio mea. Quamobrem hoc uos doceo Sulpitius, bonus ego uidelicet atque eruditus magiſter, ut in dicendo irasſi, ut dolore, ut flere poſſitis. quanquam te quidem quid hoc doceam, qui in accuſando ſodali & Quaſtore meo tantum incendium non oratione ſolum, ſed multo etiam magis ui, & dolore, & ardore animi concitaras, ut ego ad id reſtinguendum uix conarer accedere? habueras enim tum omnia in cauſa ſuperiora: uim, fugam, lapidationem, crudelitatem Tribunitiam in Capionis graui miſerabiliq; caſu, in iudicium uocabas: deinde principem & ſenatus & ciuitatis M. Aemilium lapide percuſſum eſſe conſtabat: ui pulſum ex templo L. Cottam & T. Didium, cum intercedere uellent rogationi, nemo poterat negare.

Accedebat, ut hæc tu adoleſcens pro rep. queri ſumma cum dignitate exiſtimarere; ego homo cenſorius uix ſatis honeſte uiderer ſeditioſum ciuem, & in hominis conſularis calamitate crudelem poſſe defendere. Erant optimi ciues iudices, bonorum uirorum plenum forum; uix ut mihi tenuis quædam uenia daretur excuſationis, quòd tamen eum defenderem, qui mihi Quaſtor fuiſſet. Hic ego quid dicam me artem aliquam adhibuiſſe? quid fecerim, narrabo: ſi placuerit, uos meam deſenſionem in aliquo artis loco reponetis. Omnium ſeditionum genera, uitia, pericula collegi; eamq; orationem ex omni reip. noſtræ temporū uarietate repetui; concluſiq; ita, ut dicerem, etſi omnes moleſtæ ſemper ſeditiones fuiſſent, iuſtas tamen fuiſſe nonnullas, & propè neceſſarias. Tum illa, quæ modo Craſſus cōmemorabat, egi, neque reges ex hac ciuitate exigi, neque

Tribunospl. creari, neque plebiscitis toties consularem potestatem minui, neque prouocationem patronam illam ciuitatis ac uindictam libertatis populi R. dari sine nobilium dissensione potuisse: ac si illæ seditiones saluti huic ciuitati fuissent, non continuo, si quis motus populi factus esset, id C. Norbano in nefario crimine, atq; in fraude capitali esse ponendum. quod si unquam populo Rom. concessum esset, ut iure cõcitatus uideretur, id quod docebam sæpe esse concessum: nullam illa causam iustiore fuisse. Tum omnem orationem traduxi & conuerti in increpandam Cæpionis fugam, in deplorandum interitum exercitus: sic & eorum dolorem, qui lugebant suos, oratione refricabam, & animos Equitum Romanorum, apud quos tum iudices causa agebatur, ad Q. Cæpionis odium, à quo erant ipsi propter iudicia abalienati, renouabam, atque reuocabam. Quod ubi sensi me in possessione iudicij ac defensionis meæ constituisse; quod & populi beneuolentiam mihi conciliaram, cuius ius etiam cum seditionis coniunctione defenderam, & iudicum animos totos uel calamitate ciuitatis, uel luctu ac desiderio propinquorum, uel odio proprio in Cæpionem ad causam nostram conuerteram: tunc admiscere huic generi orationis uehementi atque atroci genus illud alterum, de quo ante disputauimus, lenitatis & mansuetudinis cœpi; me pro meo sodali, qui mihi in liberum loco more maiorum esse deberet, & pro mea omni fama propè fortunisq; decernere; nihil mihi ad existimationem turpius, nihil ad dolorem acerbius accidere posse, quàm si is, qui sæpe alienissimis à me, sed meis tamen ciuibus saluti existima-

rer fuisse, sodali meo auxilium ferre non potuissem. Petebam à iudicibus, ut illud ætati meæ, ut honoribus, ut rebus gestis, si iusto, si pio dolore me esse affectum uiderent, concederent; præsertim si in alijs causis intellexissent, omnia me semper pro amicorum periculis, nihil unquam pro me ipso deprecatum. Sic in illa omni defensione atque causa, quod esse in arte positum uidebatur, ut de lege Apuleia dicerem, ut, quid esset minuire maiestatem, explicarem, perquam breuiter perstrinxi atque attigi. His duabus partibus orationis, quarum altera concitationem habet, altera commendationem, quæ minime præceptis artium sunt perpolitæ, omnis est à me illa causa tractata; ut & acerrimus in Cæpionis inuidia renouanda, & in meis moribus erga meos necessarios declarandis mansuetissimus uiderer. ita magis affectis animis iudicum, quàm doctis, tua Sulpiti est à nobis tum accusatio uicta. Hic Sulpitius, Vere hercule, inquit, Antoni ista commemoras. nam ego nihil unquam uidi, quod tam è manibus elaberetur, quàm mihi tum est elapsa illa causa. Cum enim, quemadmodum dixisti, tibi ego non iudicium, sed incendium tradidissem, quod tuum principium dij immortales fuit? qui timor? quæ dubitatio? quanta hæsitatio tractusque uerborum? Ut illud initio, quod tibi unum ad ignoscendum homines dabant, tenuisti, te pro homine pernecessario Quæstore tuo dicere? quam tibi primum munisti ad te audiendum uiam? Ecce autem, cum te nihil aliud profecisse arbitrarer, nisi ut homines tibi ciuem improbum defendenti ignoscendum propter necessitudinem arbitrarentur, serpere occulte cœpisti nihil dum

alijs suspicantibus, me uero iam pertimescente, ut illam non Norbani seditionem, sed populi R. iracundiam, neque eam iniustam, sed meritam ac debitam fuisse defenderes. deinde qui locus abs te prætermisus est in Cæpionem? ut tu illa omnia odio, inuidia, misericordia miscuisti? Neque hæc solum in defensione, sed etiam in Scauro, cæterisq; meis testibus; quorum testimonia, non refellendo, sed ad eundem impetum populi confugiendo, refutasti. Quæ cum abs te modo commemorarentur, equidem nulla præcepta desiderabam. istam enim ipsam demonstrationem defensionum tuarum abs te ipso commemoratam, doctrinam esse non me diocrem puto. Atqui, si ita placet, inquit Antonius, trademus etiam, quæ nos sequi in dicendo, quæq; maxime spectare solemus: docuit enim iam nos longa uita, ususq; rerum maximarum, ut, quibus rebus animi hominum mouerentur, teneremus. Equidem primum considerare soleo, postulet ne causa: nam neque paruis in rebus adhibenda sunt hæ dicendi facies, neque ita animatis hominibus, ut nihil ad eorum mentes oratione flectendas proficere possimus; ne aut irrisione, aut odio digni putemur, si aut tragædias agamus in nugis, aut conuelle re adoriamur ea, quæ non possint commoueri. Nam quoniam hæc ferè maxime sunt in iudicium animis, aut quicunque illi erunt, apud quos agemus, oratione molienda, amor, odium, iracundia, inuidia, misericordia, spes, letitia, timor, molestia; sentimus amorem conciliari, si id uelle uideare, quod sit utile ipsis, apud quos agas, defendere; si aut pro bonis uiris, aut certe pro ijs, qui illis boni atque utiles sint, laborare.

namque hæc res amorem magis conciliat, illa uirtutis defensio charitatem: plusq; proficit, si proponitur spes utilitatis futura, quam præteriti beneficii commemoratio. Enitendum est, ut ostendas in ea re, quam defendas, aut dignitatem inesse, aut utilitatem, eumq; , cui concilies hunc amorem, significes nihil ad utilitatem suam retulisse, ac nihil omnino fecisse causa sua. inuidetur enim commodis hominum ipsorum, studiis autem eorum cæteris commodandi fauetur. Videndumq; hoc loco est, ne, quos ob benefacta diligere uolemus, eorum laudem atque gloriam, cui maxime inuideri solet, nimis efferre uideamur. Atque iisdem his ex locis & odium in alios struere discemus, & à nobis ac nostris dimouere: eademq; hæc genera tractanda sunt in iracundia uel excitanda, uel sedanda. Nam si, quod ipsis, qui audiunt, perniciosum aut inutile sit, id factum augeas, odium creatur: sin quod aut in bonos uiros, aut in eos, quos quisque minime debuerit, aut in reip. tum excitatur si non tam acerbum odium, tamen aut inuidiæ, aut odij non dissimilis offensio. Item timor incutitur aut ex ipsorum periculis, aut ex communibus. interior est ille proprius, sed hic quoque communis ad eandem similitudinem est perducendus. Par atque una ratio est spei, letitiæ, molestiæ. Sed haud sciam an acerrimus longe sit omnium motus inuidiæ, nec minus uirium opus sit in ea comprimenda, quam in excitanda. Inuident autem homines maxime paribus aut inferioribus, cum se relictos sentiunt, illos autem dolent euolasse: sed etiam superioribus inuidetur sæpe uehementer, & eo magis, si intolerantius se iactant, &

æquabilitatem communis iuris, præstantia dignitatis  
 aut fortunæ suæ transeunt. quæ si inflāmanda sunt,  
 maxime dicendum est non esse uirtute parta, deinde  
 etiā uitij atque peccatis. tum si erunt honestiora at=  
 que grauiora, tamen non esse tanti ulla merita, quan=  
 ta insolentia hominis, quantumq; fastidium. Ad se=  
 dandum autem, magna illa labore magnis periculis ef=  
 se parta, nec ad suum commodum, sed ad aliorum esse  
 collata, seseq; si quam gloriam peperisse uideatur;  
 tametsi ea non sit iniqua merces periculi, tamen ea nō  
 delectari, totamq; abijcere atque deponere: omninoq;  
 perficiendum est, (quoniam plerique sunt inuidi, maxi=  
 meq; est hoc commune uitium & peruagatum: inxi=  
 detur autem præstanti florentiq; fortunæ) ut hæc opi=  
 nio minuatur, & illa excellens opinione fortuna cum  
 laboribus & miserijs permixta esse uideatur. Iam mi=  
 sericordia mouetur, si is, qui audit, adduci potest, ut il=  
 la: quæ de altero deplorentur, ad suas res reuocet, quas  
 aut tulerit acerbis, aut timeat; ut intuens alium cre=  
 bro ad se ipsum reuertatur. Ita cum singuli casus hu=  
 manarum miseriæ grauius accipiuntur, si dicun=  
 tur dolenter, tum afflicta & posstrata uirtus maxime  
 lætuosa est. & ut illa altera pars orationis, quæ pro=  
 bitatis commendatione boni uiri debet speciem tueri, le=  
 nis, ut sæpe iam dixi, atque summissa; sic hæc, quæ su=  
 scipitur ab oratore ad commutandos animos, atque o=  
 mni ratione flectendos, intenta ac uehemens esse debet.  
 Sed est quædam in his duobus generibus, quorum alte=  
 rum lene, alterum uehemens esse uolumus, difficilis  
 ad distinguendum similitudo. nam ex illa lenita =

re, qua conciliamur ijs, qui audiunt, ad hanc uim acerrimam, qua eosdem excitamus, influat oportet aliquid, & ex hac uim nonnunquam animi aliquid influendum est illi lenitati: neque est ulla temperatior oratio, quàm illa, in qua asperitas contentionis oratoris ipsius humanitate conditur: remissio autem lenitatis quadam grauiate & contentione firmatur. In utroque autem genere dicendi, & illo, in quo uis atque contentio quæritur, & hoc, quod ad uitam & mores accommodatur, & principia tarda sunt, & exitus tamen spissi & producti esse debent. nam neque assilicndum statim est ad illud genus orationis: (abest enim totum à causa) & homines prius ipsum illud, quod proprium sui iudicij est, audire desiderât, nec, cum in eam rationem ingressus sis, celeriter discedendum est. non enim, sicut argumentum, simul atque positum est, arripitur, alterumq; & tertium poscitur; ita misericordiam, aut inuidiam, aut iracundiam, simul atque intuleris, possis commouere. argumentum enim ratio ipsa confirmat: quæ simul atque emissa est, adhærescit. illud autem genus orationis non cognitionem iudicis, sed magis perturbationem requirit: quam consequi nisi multa, & uaria, & copiosa oratione, & simili contentione actionis nemo potest. quare qui aut breuiter, aut summisse dicunt, docere iudicem possunt, commouere non possunt, in quo sunt omnia. iam illud perspicuum est, omnium rerum in contrarias partes facultatem ex iisdem supeditari locis. Sed argumento resistendum est, aut ijs, quæ comprobandi eius causa sumuntur, reprehendendis, aut demonstrando id, quod concludere illi uelint, non



effici ex propositis, nec esse consequens: aut, si ita non  
 refellas, afferendum est in contrariam partem, quod sit  
 aut grauius, aut æque graue. Illa autem, quæ aut con=  
 ciliationis causa leuiter, aut permotionis uehementer  
 aguntur, contrarijs commotionibus inferenda sunt, ut  
 odio beneuolentia, misericordia inuidia tollatur. Sua=  
 uis autem est, & uehementer sæpe utilis iocus, & fa=  
 cetiæ: quæ etiam si alia omnia tradi arte possunt, natu=  
 ræ sunt propria certe, neque ullam artem desiderant.  
 in quibus tu longe alijs mea sententia Cæsar excellis.  
 quo magis mihi etiam testis esse potes, aut nullam esse  
 artem salis, aut, si qua est, eam nos tu potissimum doce=  
 bis. Ego uero, inquit Cæsar, omni de re facetiùs puto pos=  
 se ab homine nō inurbano, quàm de ipsis facetijs, dispu=  
 tari. itaque cum quosdam Græcos inscriptos libros esse  
 uidissem de ridiculis, nonnullam in spem ueneram pos=  
 se me aliquid ex istis discere, inueni autem ridicula &  
 falsa multa Græcorum: nam & Siculi in eo genere,  
 & Rhodij, & Byzanti, & præter ceteros Attici excel=  
 lunt: sed qui eius rei rationem quandam conati sunt  
 artemq; tradere, sic insulsi extiterūt, ut nihil aliud eo=  
 rum, nisi ipsa insulsitas, rideatur. quare mihi nullo ui=  
 detur modo doctrina ista res posse tradi. Etenim cum  
 duo genera sint facetiarum, alterum æquabiliter in o=  
 mni sermone fusum, alterum peracutum, & breue: illa  
 à ueteribus superior cauillatio, hæc altera dicacitas no=  
 minata est. leue nomen habet utraque res: quippe:  
 leue enim est totum hoc, risum mouere. uerūtamen, ut  
 dicis Antoni, multum in causis persæpe lepore & face=  
 tijs profici uidi. Sed cum in illo genere perpetuæ festi=

uitatis ars non desideretur; natura enim fingit homines & creat imitatores & narratores facetos, & uultu adiuuante & uoce, & ipso genere sermonis: tum uero in hoc altero dicacitatis quid habet ars loci, cum ante illud facetum dictum emissum hæere debeat, quæ cogitari potuisse uideatur? Quid enim hic meus frater ab arte adiuuari potuit, cum à Philippo interrogatus quid latraret, Furem se uidere respondit? quid in omni oratione Crassus uel apud Centumuiros contra Scæuolam, uel contra accusatorem Brutum, cum pro Cn. Plancio diceret? nam id, quod tu mihi tribuis Antoni, Crasso est omnium sententia concedendum. non enim ferè quisquam reperietur, præter hunc, in utroque genere leporis excellens, & illo quod in perpetuitate sermonis, & hoc quod in celeritate atque dicto est. nã hæc perpetua contra Scæuolam Curiana defensio, totum redundauit hilaritate quadam & ioco, dicta illa breuia non habuit. parcebat enim aduersarij dignitati: in quo ipso seruabat suam: quod est hominibus facietis & dicacibus difficillimum, habere hominum rationem & temporum, & ea, quæ occurrant, cum salissimè dici possint, tenere. itaque nonnulli ridiculi homines hoc ipsum non insulse interpretantur. dicere enim aiunt Ennium, flammam à sapiente facilius ore in ardente opprimi, quàm bona dicta teneat, hæc scilicet bona dicta, quæ salsa sint. nam ea dicta appellantur proprio iam nomine. Sed ut in Scæuolam contumuit ea Crassus, atque illo altero genere, in quo nulli aculei contumeliarum inerant, causam illam dispositionemq; lusit: sic in Brutum, quem oderat, & quem

dignum contumelia iudicabat, utroque genere pugnavit. quàm multa de balneis, quas nuper ille uendiderat, quàm multa de amisso patrimonio dixit? atque illa breuia, cum ille diceret se sine causa sudare, Minime mirum, inquit: modo enim existi de balneis. Innumerable huiusmodi fuerunt, sed non minus illa iucunda perpetua. Cum enim Brutus duos lectores excitasset, & alter de colonia Narbonensi Crassi orationem legendam dedisset, alteri de lege Servilia; & cum contraria inter sese de repub. capita contulisset; noster hic facetissime tres patris Bruti de iure civili libellos tribus legendos dedit. ex libro primo, Forte evenit ut in Priuernati essemus. Brute testificatur pater se tibi Priuernatem fundum reliquisse. Deinde in libro secundo, In Albano eramus ego & Marcus filius. Sapiens uidelicet homo cum primis nostræ ciuitatis norat hunc gurgitem; metuebat, ne, cum is nihil haberet, nihil esse ei relictum putaretur. Tum ex libro tertio, in quo finem scribendi fecit: (tot enim, ut audiui Scævolâ dicere, sunt ueri Bruti libri) In Tiburti forte assedimus ego & Marcus filius. Vbi sunt ij fundi Brute, quos tibi pater publicis commentarijs consignatos reliquit? quod nisi puberem te, inquit, iam haberet; quartum librum composuisset, & se etiam in balneis locutum cū filio scriptum reliquisset. Quis est igitur, qui non fateatur hoc lepore, atque his facetijs nō minus refutatum esse Brutum, quàm illis tragœdijs, quas egit idem, cum casu in eadem causa efferretur anus Iunia? prò Dij immortales, quæ fuit illa, quanta uis, quàm inexpectata, quàm repentina? cum coniectis oculis, gestu omni

imminenti, summa gravitate & celeritate uerborum, Brute quid sedes? quid illam anum patri nunciare uis tuo? quid illis omnibus, quorum imagines duci uides? quid maioribus tuis? quid L.Bruto, qui hunc populum dominatu regio liberauit? quid te facere? cui rei, cui gloriæ, cui uirtuti studere? patrimonio ne augendo? at id non est nobilitatis. sed fac esse: nihil superest: libidines totum dissipauerunt. an iuri civili? est paternum. sed dicet te, cum ædes uenderes, ne in rutis quidem & cæsis solum tibi paternum recepisse. an rei militari? qui unquam castra uideris. an eloquentiæ? quæ nulla est in te: & quidquid est uocis ac linguae, omne in istum turpissimum calumniæ quæstum contulisti. Tu lucem aspicere audes? tu hos intueri? tu in foro, tu in urbe, tu in ciuium esse conspectu? tu illam mortuam, tu imagines ipsas non perhorrescis? quibus non modo imitandis, sed ne collocandis quidem tibi ullum locum reliquisti. Sed hæc tragica atque diuina: faceta autem & urbana innumerabilia ex una concione meministis: nec enim concio maior unquam fuit, nec apud populum grauior oratio, quàm huius contra collegam in Censura nuper, neque lepore & festiuitate conditior. Quare tibi Antoni utrumque assentior, & multum facetias in dicendo prodesse sæpe, & eas arte nullo modo posse tradi: & illud quidem admiror, te nobis in eo genere tribuisse tantum, & non huius rei quoque palmam, ut cæterarum, Crasso detulisse. Tum Antonius, Ego uero ita fecissem, inquit, nisi interdum in hoc, Crasso paulum inuiderem. nam esse quamuis facetum atque falsum, non nimis est per se ipsum inui-

dendum: sed cum omnium sis uenustissimus & urbanissimus, omnium grauiissimum & seuerissimum & esse, & uideri, quod isti contigit uni, id mihi uix ferendum uidebatur. Hic cum arrisisset ipse Crassus, Attamen, inquit Antonius, cum artem esse facietiarum Iuli negares, aperuisti quiddam, quod præcipiendum uidetur. haberi enim dixisti rationem oportere hominum, rei, temporis, ne quid iocus de grauitate decerperet: quod quidem in primis à Crasso obseruari solet. Sed hoc præceptum prætermittendum est facietiarum, quòd his nihil opus sit: nos autem, quo modo utamur, cum opus sit, quærimus; ut in aduersarium, & maxime si eius stultitia poterit agitari; in testem stultum, cupidum, leuem, si facile homines audituri uidebuntur. Omnino probabiliora sunt, quæ laceffiti dicimus, quàm quæ priores. nam & ingenij celeritas maior est, quæ apparet in respondendo: & humanitatis est responsio. uideremur enim quieturi fuisse, nisi essemus laceffiti: ut in ista ipsa concione nihil ferè dictum est ab hoc, quod quidem facetiùs dictum uideretur, quod non prouocatus responderit. Erat autem tanta grauitas in Domitio, tanta auctoritas, ut, quod esset ab eo obiectum, lepore magis eleuandum, quàm contentione frangendum uideretur. Tum Sulpitius, Quid igitur, inquit, patiemur Cæsarem, qui quanquam Crasso facietias concedit, tamen multo in eo studio magis ipse elaborat, non explicare totum nobis genus hoc iocandi quale sit, & unde deducatur, præsertim cum tantam uim & utilitatem salis & urbanitatis esse fateamur? Quid si, inquit Iulius, assentior Antonio, dicenti nullam esse

artem salis? Hic cum Sulpitius reticuiſſet, Quasi uero, inquit Crassus, horum ipsorum, de quibus Antonius tandiu loquitur, ars ulla sit: obseruatio quædam est, ut ipse dixit, earum rerum, quæ in dicendo ualent: quæ si eloquentes facere posset, quis esset non eloquens? quis enim hæc uel non facile, uel certe aliquo modo posset ediscere? Sed ego in his præceptis hanc uim et hanc utilitatem esse arbitror, non ut ad reperiendum, quid dicamus, arte ducamur, sed ut ea, quæ natura, quæ studio, quæ exercitatione consequimur, aut recta esse confidamus, aut praua intelligamus, cum, quò referenda sunt, didicerimus. quare Cæsar ego quoque à te hoc peto, ut, si tibi uideatur, dispuſtes de hoc toto iocandi genere quid sentias, ne qua forte dicendi pars, quoniam ita uoluisti, in hoc tali coetu, atque in tam accurato sermone præterita esse uideatur. Ego uero, inquit ille, quoniam collectam à conuiuia Crasse exiſtis, non committam, ut, si defugerim, tibi causam aliquam dem recusandi: quanquam soleo sæpe mirari eorum impudentiam, qui agunt in scenâ gestum spectante Roscio. quis enim sese commouere potest, cuius ille uitia non uideat? sic ego nunc Crasso audiente primùm loquar de facetiis, et docebo sus (ut aiunt) oratorem eum, quem cum Catulus nuper audisset, sœnum alios aiebat esse oportere. Tum ille, locabatur, inquit, Catulus, præsertim cum ita dicat ipse, ut ambrosia alendus esse uideatur. uerum te Cæsar audiamus, ut ad Antonij reliqua redeamus. Et Antonius, Per pauca quidē mihi restant, inquit: sed tamen defessus iam labore atque itinere disputationis, requiescā in Cæsaris sermone, quasi in aliquo peropportuno diuersorio. Atqui,

inquit Iulius, non nimium liberale hospitium meum dices: nam te in uiam, simul ac perpaululum gustaris, extrudam & eijciam. Ac ne diutius uos demorer, de omni isto genere quid sentiam, perbreuiter exponam. De risu quinque sunt quæ quærantur: unum, quid sit; alterum, unde sit; tertium, sit ne oratoris uelle risum mouere; quartum, quatenus; quintum, quæ sint genera ridiculi. Atque illud primum, quid sit ipse risus quo pacto concitetur, ubi sit, quo modo existat, atque ita repente erumpat, ut eum cupientes tenere nequeamus, & quo modo simul latera, os, uenas, uultum, oculos occupet, uiderit Democritus: neque enim ad hunc sermonem hoc pertinet, & si pertineret, nescire me tamen id non puderet, quod ne ipsi quidem illi scirent, qui pollicentur. Locus autem & regio quasi ridiculi (nam id proxime queritur) turpitudine & deformitate quædam continetur. hæc enim ridentur uel sola, uel maxime, quæ notant & designant turpitudinem aliquā non turpiter. Est autem, ut ad illud tertium ueniam, est plane oratoris mouere risum: uel quòd ipsa hilaritas beneuolentiam conciliat ei, per quem excitata est: uel quòd admirantur omnes acumen uno sæpe in uerbo positum, maxime respondentis, nonnunquam etiam laceffentis: uel quòd frangit aduersarium, quòd impedit, quòd eleuat, quòd deterret, quòd refutat: uel quòd ipsum oratorem politum esse hominem significat, quòd eruditum, quòd urbanum: maximeq; quòd tristitiam ac seueritatem mitigat, & relaxat, odiosasq; res sæpe, quas argumentis dilui non facile est, ioco risuq; dissoluit. Quatenus autem sint ridicula tractanda oratori,

perquam



perquam diligenter uidendum est : id quod in quarto loco querendi posueramus . nam nec insignis improbitas, & scelere iuncta; nec rursus miseria insignis agitata ridetur . facinorosos maiore quadam ui, quàm ridiculi, uulnerari uolunt : miseros illudi nolunt, nisi si se forte iactant . Parcendum est autem maxime charitati hominum; ne temere in eos dicas, qui diliguntur. Hæc igitur adhibenda est primum in iocando moderatio : itaque ea facillime luduntur, quæ neque odio magno, nec misericordia maxima digna sunt. Quamotrè materies omnis ridiculorum est in istis uitis, quæ sunt in uita hominum neque charorum, neque calamitosorum, neque eorum, qui ob facinus ad supplicium rapiendi uidentur: eaq; belle agitata ridentur. Est etiã deformitatis & corporis uitiorum satis bella materies ad iocandum . Sed quærimus idem, quod in cæteris rebus maxime quærèdum est, quatenus. In quo non modo illud præcipitur, ne quid insulse, sed etiam si quid perridicule possis . uitandum est oratori utrunque, ne aut scurrilis iocus sit, aut mimicus. quæ cuiusmodi sint, facilius iam intelligemus, cum ad ipsa ridiculorum genera uenerimus . Duo enim sunt genera facetiarum, quorum alterum re tractatur, alterum dicto . Re, si quando quid tanquã aliqua fabella narratur, ut olim tu Crasse in Memmium, comedisse eum lacertum Largij, cum esset cum eo Tarracinae de amicula rixatus : salsa, attamen à te ipso ficta tota narratio . addidisti clausulam, tota Tarracina tum omnibus in parietibus inscriptas fuisse literas tria L L L, duo M M : cū quæres id quid esset, senem tibi quendam oppidanũ dĩ-

xisse, Lacerat lacertum Largij mordax Memmius. Per-  
spicitis, hoc genus quàm sit facetum, quàm elegans,  
quàm oratorium, siue habeas uere, quod narrare pos-  
sis, quod tamen est mendaciunculis aspergendum, siue  
fingas. Est autem hac huius generis uirtus, ut ita facta  
demonstres, ut mores eius, de quo narres, ut sermo, ut  
uultus omnes exprimantur, ut ijs, qui audiunt, tum ge-  
ri illa, fieriq; uideantur. In re est item ridiculum;  
quod ex quadam deprauata imitatione sumi solet, ut  
» idem Crassus, Per tuam nobilitatem, per uestram fami-  
» liam. Quid aliud fuit, in quo concio rideret, nisi illa  
» uultus & uocis imitatio? Per tuas statuas uero, cum  
» dixit, & extento brachio paululum etiam de gestu ad-  
didit, uehementius risimus. Ex hoc genere est illa Ro-  
» sciana imitatio senis, Tibi ego Antipho has sero, inqt.  
senium est cum audio. Atque ita est totum hoc ipso ge-  
nere ridiculum, ut cautiissime tractandum sit. Mi-  
morum est enim ethologorum, si nimia est imitatio, si  
cut obscœnitas. orator surripiat oportet imitationem,  
ut is, qui audiat, cogitet plura, quàm uideat, præstet  
idē ingenuitatem & ruborē suū uerborū turpitudine  
& rerum obscœnitate uitanda. Ergo hac duo genera  
sunt eius ridiculi, quod in re positum est: quæ sunt pro-  
pria perpetuarum facetiarū, in quibus describuntur ho-  
minum mores, & ita effinguntur, ut aut re narrata  
aliqua, quales sunt, intelligantur, aut imitatione breui  
iniecta in aliquo insigni ad irridendum uitio reperian-  
tur. In dicto autem ridiculū est id, quod uerbi aut sen-  
tentiæ quodam acumine mouetur: sed ut illo superiore  
genere, uel narrationis, uel imitationis, uitanda est mi-

morū ethologorum similitudo, sic in hoc scurrilis ora-  
 tori dicacitas magnopere fugienda est. Qui igitur distin-  
 guemus à Crasso, à Catulo, à cæteris familiare uestrū  
 Granium, aut Vargulam amicum meum? nō meher-  
 cule in mentem mihi quidem uenit: sunt enim dica-  
 ces: Granio quidē nemo dicacior, hoc opinor primum,  
 ne, quotiescunque potuerit dictum dici, necesse habea-  
 mus dicere. Pusillus testis processit, Licet, inquit, rogare  
 Philippus? Tum quæsitōr properans, Modo breuiter.  
 Hic ille, Non accusabis, perpusillum rogabo. Ridicule.  
 sed sedebat iudex L. Aurifex, breuior etiam, quā ipse  
 testis: omnis est risus in iudicem conuersus: uisum est  
 totum scurrile iudiciū. Ergo hæc, quæ cadere possunt  
 in quos nolis, quamuis sint bella, sunt tamen ipso gene-  
 re scurrilia: ut iste, qui se uult dicacem, & mehercule  
 est, Appius, sed nonnūquam in hoc uitium scurrile de-  
 labitur. Cœnabo, inquit, apud te, huic lusco familiari  
 meo C. Sestio: uni. n. locum esse uideo. Est hoc scur-  
 rile: & quod sine causa lacessiuit; & tamen id di-  
 xit, quod in omnes luscōs conueniret. Ea quia medita-  
 ta putantur esse, minus ridentur. Illud egregium Se-  
 stij, & ex tempore, Manus laua, inquit, & cœna. Tem-  
 poris igitur ratio, & ipsius dicacitatis moderatio, &  
 temperantia, & raritas dictorum distinguet oratorē  
 à scurra: & quod nos cum causa dicimus, non ut ri-  
 diculi uideamur, sed ut proficiamus aliquid, illi totum  
 diem & sine causa. Quid. n. est Vargula affecutus, cū  
 eum candidatus A. Sempronius cum Marco suo fratre  
 complexus esset, Puer abige muscas? Risum quæsiuit:  
 qui est mea sententia uel tenuissimus ingenij fructus.

Tempus igitur dicendi prudentia & gravitate moderabimur: quarum utinam artē aliquam haberemus, sed domina natura est. Nunc exponamus genera ipsa summatim, quæ risum maxime moueant. Hæc igitur sit prima partitio: quod facete dicatur, id aliàs in re habere, aliàs in uerbo facetias; maxime autem homines delectari, si quando risus coniuncte re uerboq; moueatur. Sed hoc mementote, quoscunque locos attingam, unde ridicula ducantur, ex iisdem locis ferè etiã graues sententias posse duci. tantum interest, quòd grauitas honestis in rebus seuerè, iocus in turpiculis, & quasi deformibus ponitur: uelut in iisdem uerbis & laudare frugi seruū possumus, et, si est nequam, iocari. Ridiculum est illud Neronianum uetus in furace seruo, Solum esse, cui domi nihil sit nec obsignatum, nec occlusum: quod idem in bono seruo dici solet, sed hoc iisdem etiam uerbis. Ex iisdem autem locis omnia nascuntur. Nam quod Sp. Caruilio grauitè claudicanti ex uulnere ob remp. accepto, & ob eam causam uerecundati in publicum prodire, mater dixit, Quin prodis mi Spuri, ut, quotiescunque gradum facies, toties tibi tuarum uirtutum ueniat in mentem: præclarum & graue est. Quod Caluino Glaucia claudicanti, Vbi est uetus illud? num claudicat? at hic clodicat. hoc ridiculum est: & utrunque ex eo, quod in claudicatione animaduerti potuit, est ductum. Quid hoc Næuio ignauius? seuerè Scipio, at in male olentem, Video me à te circumueniri. subridicule Philippus. At utrunque genus cōtinet uerbi ad literam immutati similitudo. Ex ambiguo dicta, uel argutissima putan-

tur, sed nō semper in ioco, sēpe etiam in gravitate uersantur. Africano illi maiori coronam sibi in conuiuiō ad caput accommodanti, cum ea sapius rumpere tur, P. Licinius Varus, Noli mirari, inquit, si non conuenit: caput enim magnum est. laudabile & honestum: At ex eodem genere est. Caluus satis est: quod dicit parum. ne multa; nullum genus est ioci, quo nō ex eodem seuera & graua sumantur. Atque hoc etiā animaduertendum, nō esse omnia ridicula faceta. quid enim potest tam ridiculum, quā Sannio est? sed ore, uultu, imitādis moribus, uoce, denique corpore ridetur ipso. falsum hunc possum dicere, atque ita, non ut eius modi oratorem esse uelim, sed ut mimum. Quare primum genus hoc, quod risum uel maxime mouet, nō est nostrum, morosum, superstitiosum, suspiciosum, gloriosum, stultum. naturæ ridentur ipsæ, quas personas agitare solemus non sustinere. Alterum genus est imitatione admodum ridiculum, sed nobis tantum licet furtim, si quando & cursim: aliter enim minime est liberale. Tertium, oris deprauatio non digna nobis. Quartum obscœnitas, non solum non foro digna, sed uix conuiuiō liberorum. Detraētis igitur tot rebus ex hoc oratorio loco, facetiæ reliquæ sunt, quæ aut in re, ut ante diuisi, positi uidentur esse, aut in uerbo. nā quod, quibuscūque uerbis dixeris, facetū tamen est, re continetur: quod mutatis uerbis salem amittit, in uerbis habet lepore omnem. Ambigua sunt in primis acuta, atque in uerbo posita, nō in re: sed nō sēpe magnū risum mouent, magis ut belle & literate dicta laudantur: at illud in Titium: qui cum studiose pila luderet,

Et idem signa sacra noctu frangere putaretur, gregalesq; cur in campum non uenisset requirerent, excusauit Vesp̃a Terentius, quod eum brachium fregisse diceret. Vt illud Africani, quod est apud Lucilium, Quid Decius Nuculam, an confixum uis facere, inquit? Vt tuus amicus Crasse Granius, non esse sextantis. Et si quæritis, is, qui appellatur dicax, hoc genere maxime excellit, sed risus mouent alia maiores. Ambiguum per se ipsum, probatur id quidem, ut ante dixi, uel maxime; ingeniosi enim uidetur uim uerbi in aliud, atque ceteri accipiant, posse ducere; sed admirationem magis, quàm risum mouet: nisi si quando incidit in aliud genus ridiculi. Quæ genera percurrã equidem; sed scitis esse notissimnm ridiculi genus, cū aliud expectamus, aliud dicitur. hic nobismet ipsi noster error risum mouet: quod, si admixtum est etiam ambiguum, fit falsius: ut apud Næuium uidetur esse miscricors ille, qui iudicatum duci uidet, percunctatur ita, Quanti addictus? mille nummum. Si addidisset tantummodo, Ducas licet; esset illud genus ridiculi præter expectationem: sed quia addidit, Nihil addo, ducas licet; addito ambiguo altero genere ridiculi, fuit, ut mihi quidem uidetur, falsissimus. Hoc tū est uenustissimum, cum in altercatione arripitur ab aduersario uerbum, et ex eo, ut à Catulo in Philippum, in eum ipsum aliquid, qui lacessiuit, infligitur. Sed cum plura sint ambigui genera, de quibus est doctrina quædam subtilior; attendere et aucupari uerba oportebit: in quo, ut ea, quæ sint frigidiora, uitemus, (etenim cauendum est, ne arcessitum dictum putetur) permulta tamē acua

te dicemus. Alterum genus est, quod habet parvū uerbi  
 immutationem, quod in litera positū Græci uocant πα  
 γαρομοίαι, ut Nobiliore mobiliore Cato : aut ut idē,  
 cum cuidam dixisset, Eamus deambulatum, et ille, Quid  
 opus fuit de ? Imo uero, inquit, quid opus fuit te ? aut  
 eiusdem responsio illa, Si tu et aduersus & aduersus im  
 pudicus es. Etiam interpretatio nominis habet acumē,  
 cum ad ridiculum conuertas, quamobrem ita quis uo  
 cetur, ut ego nuper Nummium diuisorem, ut Neoptole  
 mum ad Troiam, sic illum in campo Martio nomē in  
 uenisse. Atque hæc omnia uerbo continentur. Sape  
 etiam uersus facete interponitur, uel ut est, uel paulu  
 lū immutatus, aut aliqua pars uersus, ut socius Scauro  
 stomachanti; ex quo sunt nonnulli, qui tuam legem de  
 ciuitate natam Crasse dicant :

Si, tacete, quid hoc clamoris est ? quibus nec pater, nec  
 mater sit,

Tanta confidentia estis ? auferte istam enim superbiā.

Nam in Calio sanè etiā ad causam utile fuit tuū il  
 lud Antoni, cum ille à se pecuniā profectam diceret te  
 stis, & haberet filium delictiorem, abeunte tam illo,  
 Sentin' senem esse tactum triginta minis ?

In hoc genus coniunguntur prouerbia : ut illud Scipio  
 nis, cum Asellus omnes provincias stipendia merentem  
 se peragrasse gloriaretur, Agas Asellum. & cætera.  
 Quare ea quoque, quoniā mutatis uerbis nō possunt re  
 tinere eandem uenustatē, nō in re, sed in uerbis posita  
 ducantur. Est etiam in uerbo positū non insulsum ge  
 nus ex eo, cū ad uerbū, non ad sententiā rem accipe ui  
 deare. ex quo uno genere totus est tutor mimus uetus,



oppido ridiculus. Sed ab eo à mimis: tantū genus huius  
 ridiculi insigni aliqua & nota re notari uolo. Est au-  
 tem ex hoc genere illud, quod tu Crasse nuper ei, qui  
 te rogasset, num tibi molestus esset futurus, si ad te be-  
 ne ante lucē uenisset: Tu uero, inquisti, molestus non  
 eris: libebis igitur te, inquit, suscitari? & tu, Certe nega-  
 ras te molestum futurum. Ex eodem hoc uetus illud  
 est, quod aiunt Maluginensem illum M. Scipionem,  
 cum ex centuria sua renunciaret Accidinum Consulē;  
 præcoq; dixisset, Dic de L. Manlio: Virum bonum, in-  
 quit, egregiumq; ciuem esse arbitror. Ridicule etiam il-  
 lud L. Porcius Nasicæ Censori Catoni, cum ille, Ex tui  
 animi sententia tu uxore habes? Non hercule, inquit,  
 ex animi tui sententia. Hæc aut frigida sunt, aut tum  
 falsa, cum aliud est expectatum. natura enim nos  
 (ut ante dixi) noster delectat error, ex quo cum quasi  
 decepti sumus expectatione, ridemus. In uerbis etiam  
 illa sunt, quæ aut ex immutata oratione ducuntur, aut  
 ex unius uerbi translatione, aut ex inuersione uerbo-  
 rum. Ex immutatione, ut olim Rusca cum legem fer-  
 ret annalem, dissuasor M. Seruilius, Dic mihi, inquit,  
 M. Pinnari, num, si contra te dixero, mihi male dictu-  
 rus es, ut ceteris fecisti? Ut sementem feceris, ita me-  
 tes, inquit. Ex translatione autem, ut cum Scipio ille  
 maior Corinthijs statuam pollicentibus eo loco, ubi alio  
 rum essent Imperatorum, turmales dixit displicere.  
 Inuertuntur autem uerba, ut Crassus apud M. Per-  
 pennam iudicem pro Aculeone cū diceret, aderat con-  
 tra Aculeonem Gratidiano L. Elius Lamia deformis,  
 ut nostis: qui cum interpellaret odiose, Audiamus, in-

quit, pulchellū puerū, Crassus. Cum esset arrisum, Nō potui mihi, inquit Lamia, formam ipse fingere, ingenium potui. Tum hic, Audiamus, inquit, disertum: multo etiam arrisum est uehementius. Sunt etiam illa uenusta, ut in grauib; sententijs, sic in facetijs. Dixi enim dudum materiam aliam esse ioci, aliam seueritatis, grauium autem & iocorum unam esse rationem. Ornant igitur in primis orationem uerba relaxata contrarie: quod idem genus sæpe est etiam facetū: ut Seruius ille Galba, cum iudices L. Scribonio Tribuno pl. ferret familiares suos, & dixisset Libo, Quando tandem Galba de triclinio tuo exibis? Cum tu, inquit, de cubiculo alieno. A quo genere ne illud quidem plurimum distat, Glaucia Metello, Villam in Tyburte habes, cortem in Palatio. Ac uerborum quidem genera, quæ essent faceta, dixisse me puto: rerum plura sunt, eaq; magis (ut dixi ante) ridentur, in quibus est narratio. res sanè difficilis exprimenda enim sunt, et ponenda ante oculos ea, quæ uideantur & uerisimilia, quod est proprium narrationis, & quæ sint, quod ridiculi proprium est, subturpia: cuius exemplum, ut breues simus, sit sanè illud, quod ante posui, Crassi de Memmio. Et ad hoc genus ascribamus etiam narrationes apologorum. Trahitur etiam aliquid ex historia: ut cū Sex. Titius se Cassandram esse diceret, Multos, inquit Antonius, possum tuos Aiaces Oileos nominare. Est etiam ex similitudine, quæ aut collationē habet, aut tãquam imaginem: Collationem: ut ille Gallus olim testis in Pisonem, cū innumerabilem Magio præfecto pecuniam dixisset datam, idq; Scaurus tenuitate Magij redargue

ret, Erras, inquit, Scaure: ego enim Magium non conseruasse dico, sed, tanquam nudus nuces legeret, in uentrem abstulisse. Vt illud M. Cicero senex, huius uiri optimi nostri familiaris pater, nostros homines similes esse Syrorum uenaliū, ut quisque optime Græce sciret; ita esse nequissimū. Valde autem ridentur etiam imagines, quæ ferè in deformitatem, aut in aliquod uitiū corporis ducuntur cum similitudine turpioris: ut meū illud in Helmium Manciam, iam ostendam cuiusmodi sis: cum ille, Ostende, quæso, demonstrauit digito pictum Gallum in Mariano scuto Cimbrico sub Nouis, distortum, eiec̃ta lingua, buccis fluentibus: risus est cōmotus: nihil tam Manciae simile uisum est. ut cum Sestio Penario mentum in dicendo intorquenti, tum ut dicere si quid uellet, si nucem fregisset. Etiam illa, quæ minuendi aut augendi causa ad incredibilem admirationem efferuntur, uelut tu Crasse in concione, ita sibi ipsum magnum uideri Memmium, ut in forum descendens caput ad fornicem Fabij dmitteret. Ex quo genere etiam illud, quod Scipio apud Numantiam, cum stomacharetur cum C. Metello dixisse dicitur. Si quintum pareret mater eius, asinum fuisse parituram. Arguta etiam significatio est, cum parua re, & sæpe uerbo res obscura & latens illustratur: ut cum C. Fabricio P. Cornelius homo, ut existimabatur, auarus & furax, sed egregie fortis & bonus Imperator, gratias ageret, quod se homo inimicus Cōsulem fecisset, bello præsertim magno & graui; Nihil est, quo mihi gratias agas, inquit, si malui compilari, quam uenire. Vt Asellio Africanus obijc̃ienti lustrū illud infelix, Noli, inquit,

mirari : is enim, qui te ex ærarijs exemit, lustrum con-  
didit, & taurum immolauit . Tanta suspicio est, ut re-  
ligione ciuitatem obstrinxisse uideatur Mūmius, quòd  
Asellum ignominia leuarit. Urbana etiam dissimula-  
tio est, cū alia dicuntur ac sentias, nō illo genere de quo  
ante dixi, cū contraria dicas, ut Lamiæ Crassus, sed cū  
toto genere orationis seuerè ludas, cū aliter sentias ac  
loquare: ut noster Scæuola Septimuleio illi Anagnino,  
cui pro C. Gracchi capite erat aurū repensum, roganti,  
ut se in Asiā præfectū duceret, Quid tibi uis, inquit, in-  
sane? tanta malorū est multitudo ciuiū, ut tibi ego hæc  
confirmē, si Romæ manseris, te paucis annis ad maxia-  
mas pecunias esse uenturū. In hoc genere Fānius in an-  
nalibus suis Africanū hunc Aemilianū dicit fuisse, &  
eum Græco uerbo appellat εἰρωνία: sed uti ferunt, qui  
melius hæc norūt, Socratē opinor in hac ironia dissimu-  
lātiāq; longe lepore & humanitate omnibus præstitis-  
se. genus est perelegās, & cum gravitate falsum, cumq;  
oratorijs dictionibus, tū urbanis sermonibus accomoda-  
tum. Et hercule omnia hæc, quæ à me de facetijs di-  
sputantur, non maiora forensium actionū, quàm om-  
nium sermonū condimēta sunt. Nam quod apud Ca-  
tonem est, qui multa retulit, ex quibus à me exēpli cau-  
sa multa ponuntur, per mihi scitum uidetur, C. Publici-  
ciū solitū dicere, P. Mummiū cuius temporis hominem  
esse. Sic profecto res se habet, nullum ut sit uitæ tēpus,  
in quo non deceat leporem humanitatēq; uersari.  
Sed redeo ad cætera. Est huic finitimum dissimulatio-  
ni, cum honesto uerbo uitiosa res appellatur: ut cum  
Africanus Censor tribu mouebat eū centurionem, qui

# DE ORATORE

in Pauli pugna non affuerat: cum ille se custodiæ causa diceret in castris remansisse, quæreretq; cur ab eo notaretur, Non amo, inquit, nimium diligentes. Acutum etiam illud est, cum ex alterius oratione aliud excipias atque ille uult: ut Salinatori Maximus, cum Tarento amisso arcem tamen Liuius retinuisset, multaq; ex ea prælia præclara fecisset, cum aliquot post annis Maximus id oppidum recepisset, rogaretq; eum Salinator, ut meminisset opera sua se Tarentum recepisse; Quid ni, inquit, meminerim? nunquam ego recepissem, nisi tu perdidisses. Sunt etiam illa subabsurda, sed eo ipso nomine sæpe ridicula, non solum mimis perapposita, sed etiam quodā modo nobis: Homo fatuus postquam rem habere cœpit, est mortuus. Quid est tibi ista mulier? uxor? similis mediusfidius. Quandiu ad aquas fuit, nunquam est mortuus. Genus hoc leuius, & ut dixi, mimicum: sed habet nonnunquam aliquid etiam apud nos loci, ut uel non stultus quasi stulte cum sale dicat aliquid: ut tibi Antoni Mancina, cum audisset te Censorem à M. Dūronio de ambitu postulatum, Aliquando, inquit, tibi tuum negotium agere licebit. Valde hæc ridentur, & hercule omnia, quæ à prudentibus quasi per dissimulationem nō intelligendi subabsurde falsèq; dicuntur. Ex quo genere est etiam non uideri intelligere quod intelligas, ut Pontidius, Qualem existimas, qui in adulterio deprehenditur? tardum. Ut ego, qui in delectu Metello, cum excusationem oculorum à me non acciperet, & dixisset, Tu igitur nihil uides? Ego uero inquam à porta Esquilina uideo uillam tuā. Ut illud Nasicæ, qui cum ad poetam Ennium uenisset,

eiq; ab ostio querenti Ennium, ancilla dixisset domi nō  
 esse, Nasicā sensit illam domini iussu dixisse, & illum  
 intus esse. paucis post diebus cum ad Nasicā uenisse  
 set Ennius, & eum à ianua quæreretur, exclamat Nasi-  
 cā, se domi non esse: tum Ennius, Quid? ego non co-  
 gnosco uocem, inquit, tuam? Hic Nasicā, Homo es im-  
 pudens: ego, cum te quærerem, ancillæ tuæ credidi te  
 domi non esse; tu mihi non credis ipsi? Est bellum illud  
 quoque, ex quo is, qui dixit, irridetur in eo ipso genere,  
 quod dixit: ut cum Q. Opimius consularis, qui adole-  
 scentulus male audisset, festino homini Egilio, qui uide-  
 retur mollior, nec esset, dixisset,

- Quid tu Egilia mea,

Quando ad me uenis cum tua colu & lana?

- Non pol, inquit, audeo:

Nam me ad famosas uetuit mater accedere.

Salsa sunt etiam, quæ habent suspicionem ridiculi ab-  
 sconditam: quo in genere est illud Sicali, qui, cum fami-  
 liaris quidam quæreretur, quod diceret uxorem suam  
 suspendisse se de ficu, Amabo te, inquit, da mihi ex ista  
 arbore quos seram surculos. In eodem genere est, quod  
 Catulus dixit cuidam oratori malo: qui cum in epilogo  
 misericordiam se mouisse putaret, postquam affedit, ro-  
 gavit hunc, uideretur ne misericordiam mouisse: ac  
 magnam quidem, inquit: neminem enim puto esse tā  
 durū, cui non oratio tua miseranda uisa sit. Me qui-  
 dem hercule ualde illa mouent stomachosa, & quasi  
 submorosa ridicula, non cum à moroso dicuntur: tum  
 enim non sal, sed natura ridetur. in quo, ut mihi ui-  
 detur, persalsum illud est apud Næuium,

# DE ORATORIE

Quid ploras pater? mirū ni cantem, condēnatus sum. Huic generi quasi contrariū est ridiculi genus patientis ac lentī: ut cum Cato percussus esset ab eo, qui arcā ferebat, cum ille diceret, Caue: rogauit nunquid aliud ferret præter arcam. Etiam stultitiæ salsa reprehensio: ut ille Siculus, cui Prætor Scipio patronum causæ dabat hospitem suum hominem nobilem, sed admodum stultū: Quæso, inquit, Prætor aduersario meo da istum patronum, deinde mihi neminem dederis. Mouent illa etiam, quæ coniectura explanantur longe aliter atque sunt, sed acute atque concinne: ut cum Scaurus accusaret Rutilium ambitus, cum ipse Consul esset factus, ille repulsam tulisset, & in eius tabulis ostenderet literas, A. F. P. R. idq; diceret esse, actum fide P. Rutilij: Rutilius autem, ante factum, post relatum; C. Canius eques R. cum Rufo adesset, exclamat neutrum illis literis declarari. Quid ergo, inquit Scaurus? Aemilius fecit, plectitur Rutilius. Ridentur etiam discrepantia. quid huic abest, nisi res & uirtus? Bella etiam est familiaris reprehensio quasi errantis: ut cū obiurgauit Albutium Granius, quod, cum eius tabulis quiddam Albutio probatum uideretur, & ualde absoluto Scæuola gauderet, neque intelligeret contra suas tabulas esse iudicatum. Huic similis est etiam admonitio in consilio dando familiaris, ut cum patrono malo, cum uocem in dicendo obtudisset, suadebat. Granius, ut mulsum frigidum biberet simulac domū redisset, Perdam, inquit, uocē, si id fecero. melius est, inquit, quàm reum. Bellum etiam est, cum, quid cuique sit consentaneum, dicitur: ut cum Scaurus nonnullam haberet in



uidiam ex eo quòd Phrygionis Pompeij locupletis hominis bona sine testamento possederat, federetq; aduocatus reo Bestia, cum funus quoddam duceretur, accusator C. Memmius, Vide, inquit, Scaure, mortuus rapitur, si potes esse possessor. Sed ex his omnibus nihil magis ridetur, quàm quod est. præter expectationem: cuius innumerabilia sunt exempla, uel Appij maioris illius, qui in senatu, cum ageretur de agris publicis, & de lege Thoria, & premeretur Lucilius ab ijs, qui à pecore eius depasci agros publicos dicerent, Non est, inquit, Lucilij pecus illud, erratis (defendere Lucilium uidebatur) ego liberum puto esse: quàm lubet pascitur. Placet etiam mihi illud Scipionis illius, qui Ti. Gracchum perculit, cum ei M. Flaccus multis probris obiectis P. Mutium iudicem tulisset, Eiero, inquit, iniquus est. cum esset admurmuratum, Ah, inquit, P. C. non ego mihi illum iniquum eiero, uerum omnibus. Ab hoc uero Crasso nihil facetius, cum læsisset testis Silus Pisonem, quòd se in eum audisse dixisset, Potest fieri, inquit, Silu, ut is, unde te audisse dicis, iratus dixerit: annuit Silus. potest etiam, ut tu non recte intellexeris: id quoque toto capite annuit, ut se Crasso daret. potest etiam fieri, inquit, ut omnino, quod te audisse dicis, nunquam audieris: hoc ita præter expectationem accidit, ut testem omnium risus obrueret. Huius generis est plenus Næuius, & iocus est familiaris, Sapiens si algebis, tremes. & alia permulta.

Sæpe etiã facete cõcedas aduersario id ipsum, quod tibi ille detrahit, ut C. Lælius, cum ei quidam malo

genere natus diceret indignum esse suis maioribus, At  
 hercule, inquit, tu tuis dignus. Sæpe etiam sententiose  
 ridicula dicuntur: ut M. Cincius, quo die legem de do-  
 nis & muneribus tulit, cum C. Cento prodijisset, & sa-  
 tis contumeliose, quid fers Cinciole, quæfisset: Vt emas,  
 inquit, Cai, si uti uelis. Sæpe etiam false, quæ fieri non  
 possunt, optantur: ut M. Lepidus, cum cæteris in cam-  
 po exercentibus in herba ipse recubuiisset, Vellem hoc  
 esset, inquit, laborare. Salsum est etiam quærentibus,  
 & quasi percontantibus lente respondere quod nollent:  
 ut Censor Lepidus, cum M. Antistio Pyrgensi equum  
 ademisset, amiciq; cum uociferarentur, & quærent  
 quid ille patri suo responderet, cur adæptum sibi equū  
 diceret, cum optimus colonus, parcissimus, modestissi-  
 mus, frugalissimus esset, Me istorum, inquit, nihil cre-  
 dere. Colliguntur à Græcis alia nonnulla, execratio-  
 nes, admirationes, minationes. Sed hæc ipsa nimis mihi  
 uideor multa in genera descripsisse. nam illa, quæ  
 uerbi ratione, & uī cōtinentur, certa ferè ac definita  
 sunt, quæ plerūque, ut ante dixi, laudari magis, quàm  
 rideri solent: hæc autem, quæ sunt in re, & in ipsa  
 sententia, partibus sunt innumerabilia, generibus pau-  
 ca. Expectationibus enim decipiendis, & naturis alio-  
 rum irridendis, ipsorum ridicule indicandis, & simili-  
 tudine turpioris, & dissimulatione, & subabsurda di-  
 cendo, & stulta reprehendendo, risus mouentur. ita-  
 que imbuendus est is, qui iocose uult dicere, quasi na-  
 tura quadam apta ad hæc genera & moribus; ut ad  
 cuiusque modi genus ridiculi uultus etiam accommo-  
 detur: qui quidem quo seuerior est & tristior, ut in  
 te Crasse,

te Crasse, hoc illa, quæ dicuntur, falsiora uideri solent. Sed iam tu Antoni, qui in hoc diuersorio sermonis mei libenter acquieturum te esse dixisti, tanquam in Pontinum diuerteris, neque amœnum, neque salubrem locum, censeo ut satis diu te putes requiesse, & iter reliquum conficere pergas. Ego uero atque hilare quidē à te acceptus, inquit: et cum doctior per te, tum etiam audacior factus sum ad iocandum. Non enim uereor, nequis me in isto genere leuiorem iam putet, quoniam quidem tu Fabritios mihi auctores, & Africanos, Maximos, Catones, Lepidos protulisti. Sed habetis ea, quæ uoluistis ex me audire, de quibus quidem accuratius dicendum & cogitandum fuit: nam cetera faciliora sunt, atque ex iis, quæ iam dicta sunt, reliqua nascuntur omnia. Ego enim cum ad causam sum aggressus, atque omnia cogitando, quoad facere potui, persecutus, cum & argumenta causæ, & eos locos, quibus animi iudicium conciliantur, & illos, quibus permouentur, uidi atque cognoui: tum constituo quid habeat quæque causa boni, quid mali. Nulla enim ferè res potest in dicendi disceptationem aut cōtrouersiam uocari, quæ nō habeat utrunque: sed quantum habeat, id refert. Mea autem ratio in dicendo hæc esse solet, ut, boni quod habeat, id amplectar, exornem, exaggerem, ibi cōmorer, ibi habitem, ibi hæream: à malo autem uitioq; causæ ita recedam, non ut id me defugere appareat, sed ut totum bono illo ornando & augendo dissimulatum obruatur. Et si causa est in argumentis, firmissima quæque maxime tueor, siue plura sunt, siue aliquod unū. Sin autē in conciliatione, aut in permotione causa est,

ad eam me potissimum partem, quæ maxime commouere animos hominum potest, confero. Summa denique huius generis hæc est, ut si in refellendo aduersario firmior esse oratio, quàm in confirmandis nostris rebus potest, omnia in illum conferam tela: sin nostra facilius probari, quàm illa redargui possunt, abducere animos à contraria defensione, & ad nostram conor traducere. Duo denique illa, quæ facillima uidentur, quoniam, quæ difficiliora sunt, non possum, mihi pro meo iure sumo. Vnum, ut molesto, aut difficili argumēto, aut loco nonnunquā omnino nihil respondeā, quod forsitan aliquis iure irriserit. Quis enim est, qui id facere non possit? sed tamen ego de mea nunc, non de aliorum facultate disputo, confiteorq; me, si quæ premat res uehementius, ita cedere solere, ut non modo non abiecto, sed ne reiecto quidem scuto fugere uidear, sed adhibere quandam in dicendo speciem atque pompam, & pugnae similem fugam; consistere uero in meo præsidio, sic ut non fugiendi hostis, sed capiendi loci causa cessisse uidear. Alterū est illud, quod ego oratori maxime cauendum & providendū puto, quodq; me sollicitare summe solet. non tam ut prosim causis, elaborare soleo, quàm ut ne quid obsim: nō quoniam enitendum sit in utroque: sed tamen multo est turpius oratori, nocuisse uideri causæ, quàm non profuisse. Sed quid hoc loco uos inter uos Catule? an hæc, ut sunt contemnenda, contemnitis? Minime inquit ille: sed Cæsar de isto ipso quiddam uelle dicere uidebatur. Me uero lubente, inquit Antonius, dixerit, siue refellendi causa, siue quærendi. Tum Iulius, Ego

mehercule, inquit, Antoni semper is fui, qui de te oratore sic predicarem, unum te in dicendo mihi uideri rectissimum, propriumq; hoc esse laudis tuæ, nihil à te unquam esse dictum, quod obesset ei, pro quo diceret: idq; memoria teneo, cum mihi sermo cū hoc ipso Crasso multis audientibus esset de te institutus, Crassusq; plurimis uerbis eloquentiam laudaret tuam, dixisse me, cum cæteris tuis laudibus hanc esse uel maximam, quod non solum, quod opus esset, diceret, sed etiam, quod non opus esset, non diceret: tum illum mihi respondere memini; cætera in te summe esse laudanda, illud uero improbi esse hominis, & perfidiosi, dicere quod alienum esset, & noceret ei, pro quo quisque diceret; quare non sibi eum disertum, qui id non faceret, uideri, sed improbum, qui faceret. Nunc, si tibi uidetur Antoni, demonstres uelim, quare tu hoc ita magnum putes, nihil in causa mali facere, ut nihil tibi in oratore maius esse uideatur. Dicam equidem Cæsar, inquit, quid intelligam: sed & tu, & uos omnes hoc, inquit, mementote, non me de perfecti oratoris diuinitate quadam loqui, sed de exercitationis & consuetudinis meæ mediocritate. Crassi quidem responsum excellentis cuiusdam est ingenij ac singularis, cui quidem portetū simile esse uisum est, posse aliquē inueniri oratorem, qui aliquid mali faceret dicendo, obessetq; ei quē defenderet. Facit. n. de se coniecturam: cuius tanta uis ingenij est, ut neminem nisi consulto putet, quod cōtra se ipsum sit, dicere: sed ego non de præstanti quadam et eximia, sed propè de uulgarī et cōmuni prudentia disputo. Ut apud Græcos fertur incredibili quadam

magnitudine consilij atque ingenij Atheniēsis ille fuisse Themistocles, ad quem quidam doctus homo, atque in primis eruditus accessisse dicitur, eiq; artem memorie, quæ tum primū proferebatur, pollicitum esse se traditurum: cū ille quæsisset, quidnam illa ars efficere posset, dixisse illum doctorem, ut omnia meminisset: & ei Themistoclem respondisse, gratius sibi illum esse facturū, si se obliuisci quæ uellet, quàm si meminisse docuisset. Vides ne quæ uis in homine acerrimi ingenij, quàm potens, & quanta mens fuerit? qui ita responderit, ut intelligere possemus, nihil ex illius animo, quod semel esset infusum, unquam effluere potuisse: cum quidem ei fuerit optabilius obliuisci posse potius, quod meminisse nollet, q̃, quod semel audisset uidisset ne, meminisset. Sed neque propter hoc Themistoclis responsū memorie nobis opera danda nō est, neque illa mea cautio & timiditas in causis propter præstantem prudentiam Crassi negligenda est. Vterque enim istorum non mihi attulit aliquam, sed suam significauit facultatem. Etenim permulta sunt in causis, in omni parte orationis circumspectiunda, ne quid offendas, ne quò irruas. Sæpe aliquis testis aut non lædit, aut minus lædit, nisi laceffatur: orat reus, urgent aduocati, ut inuehamur, ut male dicamus, denique ut interrogemus: non moueor, non obtempero, nō satisfacio, neque tamen ullam assequor laudē. Homines enim imperiti facilius, quod stulte dixeris, reprehendere, quàm, quod sapienter tacueris, laudare possunt. Hic quantum fit mali, si iratum, si non stultum, si non leuem testem læseris: habet enim & uoluntatem nocendi in iracundia, &

uim in ingenio, & pondus in uita: nec, si hoc Crassus non committit, ideo non multi, & saepe committunt: quo quidem mihi uideri turpius nihil solet, quàm cum ex oratoris dicto aliquo, aut responso, aut rogatu, sermo ille sequitur, Occidit ille aduersariū ne? immo uero aiunt se, & eum quem defendit. Hoc Crassus non putat nisi perfidia accidere posse: ego autem sapissime uideo in causis aliquid mali facere homines minime malos. Quid illud, quod supra dixi, solere me cedere, & ut planius dicam, fugere ea, quæ ualde causam meam premerent? cum id non faciunt alij, uersanturq; in hostium castris, ac sua praesidia dimittunt, mediocriter ne causis nocent? cum aut aduersariorum adtumenta confirmant, aut ea, quæ sanare nequeunt, exulcerant? Quid, cum personarum, quas defendunt, rationem nō habent? si quæ sunt in his inuidiosa, non mitigant extenuando, sed laudando & efferendo inuidiosiora faciunt, quantum est in eo tandem mali? Quid, si in homines charos, iudicibusq; iucundos sine ulla pramuntione orationis acerbius, & contumeliosius inuehere, non ne abs te iudices ab alienes? Quid? si quæ uitia, aut incommoda sunt in aliquo iudice uno, aut pluribus: ea tu in aduersarijs exprobrando non intelligas te in iudices inuehi, mediocre peccatum est? Quid? si cum pro altero dicas, litem tuam facias, aut laesus offere rare iracundia, causam relinquas, nihil ne noceas? In quo ego non quo libenter male audiam, sed quia ego causam non libenter relinquo, nimium patiens & lentus existimor: ut cum te ipsum Sulpiti obiurgabam, quod ministratorem peteres non aduersarium: Ex quo



etiam illud assequor, ut si quis mihi male dicat, petulās aut planē infānus esse uideatur. In ipsis autem argumētis si quid posuerimus aut apte falsum, aut ei, quod dixeris, dicturus uersus contrarium, aut genere ipso remotum ab usu iudiciorum ac foro, nihil ne noceas? Quid multa? omnis cura mea solet in hoc uersari semper (dicam enim saepius) si possim, ut boni aliquid efficiam dicendo: sin id minus, ut certe ne quid mali. Itaque nunc illuc redeo Catule, in quo tu me paulo ante laudabas, ad ordinē, collocationemq; rerum ac locorū. Cuius ratio est duplex: altera, quā affert natura causarum: altera, quæ oratorū iudicio & prudentia comparatur. Nam ut aliquid ante rem dicamus, deinde ut rem exponamus, post ut eam probemus nostris præsidij confirmandis, contrariis refutandis, deinde ut concludamus, atque ita peroremus, hoc dicendi genus natura ipsa præscribit. Ut uero statuamus ea, quæ probandi, docendi, persuadendi causa dicenda sunt, quemadmodum componamus, id est uel maxime proprium oratoris prudentiæ. Multa enim occurrunt argumenta, multa quæ in dicendo profutura uideantur: sed eorū partim ita leuia sunt ut contemnenda sint, partim etiā si quid habent adiumenti, sunt nonnunquam eiusmodi, ut insit in ijs aliquid uitij; neque tanti sit illud quod prodesse uideatur, ut cum aliquo malo coniungatur. Quæ autem sunt utilia atque firma, si ea tamen (ut saepe fit) ualde multa sunt, ea, quæ ex ijs aut leuissima sunt, aut alijs grauioribus consimilia, secerni arbitror oportere, atque ex oratione remoueri. Equidē cum colligo argumenta causarum, nō tam ea numerare soleo

quàm expendere. Et quoniam, quod sæpe iam dixi, tribus rebus omnes ad nostram sententiã perducimus, aut docendo, aut conciliando, aut permouendo, una ex tribus his rebus res præ nobis est ferenda, ut nihil aliud nisi docere uelle uideamur: reliquæ duæ sicuti sanguis in corporibus, sic illæ in perpetuis orationibus fusæ esse debent. Nam & principia, & cæteræ partes orationis, quibus paulo post pauca dicemus, habere hanc uim magnopere debent, ut ad eorum mentes, apud quos agitur, mouendas permanere possint. Sed his partibus orationis, quæ etsi nihil docent argumentando, persuadendo tamen & commouendo proficiunt plurimum, quanquam maxime proprius est locus & in exor- diendo, & in perorando: digredi tamen ab eo, quod proposueris atque agas, permouendorum animorũ causa, sæpe utile est. Itaque uel narratione exposita sæpe datur ad commouendos animos digrediendi locus, uel argumentis nostris confirmatis, uel contrarijs refutatis, uel utroque loco, uel omnibus, si habet eam causa dignitatem atque copiam, recte id fieri potest: eæq; causæ sunt ad agendum, & ad ornandum grauissimæ atque plenissimæ, quæ plurimos exitus dant ad eiusmodi digressionem, ut ijs locis uti liceat, quibus animorum impetus eorum, qui audiunt, aut impellantur, aut reflectantur. Atque etiam in illo reprehendo eos, qui, quæ minime firma sunt, ea prima collocant. In quo illos quoque errare arbitror; qui si quando, id quod mihi nunquam placuit, plureis adhibent patronos, ut in quoque eorum minimum putant esse, ita eum primum uolunt dicere. res enim hoc

postulat, ut eorum expectationi, qui audiunt, quamcellerrime occurratur: cui si initio satisfactum non sit, multo plus sit in reliqua causa laborandum. male enim se res habet, quæ non statim, ut dici coëpta est, melior fieri uidetur. Ergo ut in oratore optimus quisque, sic & in oratione firmissimum quidque sit primum: dum illud tamen in utroque teneatur, ut ea, quæ excellent, seruentur etiam ad perorandum: si quæ erunt mediocria (nam uitiosis nusquam esse oportet locum) in mediam turbam atque in gregem coniiciantur. Hisce omnibus rebus consideratis, tum denique id, quod primum est dicendum, postremo soleo cogitare, quo utar exordio. Nam si quando id primum inuenire uolui, nullum mihi occurrit, nisi aut exile, aut nugatorium; aut uulgare atque commune. Principia autem dicendi semper cum accurata & acuta & instructa sententijs, apta uerbis, tum uero causarum propria esse debent. Prima est enim quasi cognitio & commendatio orationis in principio, quæ continuo cum, qui audit, permulcere atque allicere debet. In quo admirari soleo non equidem istos, qui nullam huic rei operam dederunt: sed hominem in primis disertum atque eruditum Philippum, qui ita solet ad dicendum surgere, ut quod primum uerbum habiturus sit, nesciat: & ait idem, cum brachium concalefecerit, tum se solere pugnare: neque attendit eos ipsos, unde hoc simile ducat, illas primas hastas ita iactare leniter, ut & uenustati uel maxime seruiant, & reliquis uiribus suis consulant. Neque est dubium quin exordium dicendi uehemens, & pugnax non saepe esse debeat: sed

si in ipso illo gladiatorio uitæ certamine, quo ferro decernitur, tamen ante congressum multa fiunt, quæ nō ad uulnus, sed ad speciem ualere uideantur: quanto hoc magis in oratione expectandum est, in qua non uis potius, sed delectatio postulatur? Nihil est denique in natura rerū omnium, quod se uniuersum profundat, & quod totum repente euolet: sic omnia quæ fiunt, quæq; aguntur acerrime, leuioribus principiis natura ipsa prætexult. Hæc autem in dicendo nō extrinsecus alicunde querenda, sed ex ipsis uisceribus causæ sumenda sunt. idcirco tota causa pertentata, atque perspecta, locis omnibus inuentis atque instructis, consid. randum est quo principio sit utendum. sic enim facile reperiatur. sumentur enim ex ijs rebus, quæ erunt uberissime, uel in argumentis, uel in ijs partibus, ad quas dixi digredi sæpe oportere. ita & momenti aliquid afferent, cū erunt penè ex intima defensione deprompta; & apparebit ea non modo non esse communia, nec in alias causas posse transferri, sed penitus ex ea causa, quæ tum agatur, defluxisse. Omne autem principium aut rei totius, quæ agetur, significationē habere debet, aut aditū ad causam & munitionem, aut quoddā ornamentum & dignitatem. Sed oportet, ut adibus ac templis uestibula & aditus, sic causis principia proportionē rerū præponere. Itaque in paruis atque in frequentibus causis ab ipsa re est exordiri sæpe comodius. Sed cum erit utendum principio, quod plerunque erit; aut ex reo, aut ex aduersario, aut ex re, aut ex eis, apud quos agitur, sententias duci licebit. Ex reo (reos appello, quorum res est) quæ significant uirum bonum,

quæ liberalem, quæ calamitosum, quæ misericordia dignum, quæ ualeant contra falsam criminationem. Ex aduersario, iisdem ex locis fere contraria. Ex re, si crudelis, si infanda, si præter opinionem, si immerito, si misera, si ingrata, si indigna, si noua, si quæ restitui sanariq; non possit. Ex ijs autem, apud quos agetur, ut beneuolos, beneq; existimantes efficiamus, quod agendo efficitur melius quàm rogando. est id quidem in tota orationem confundendum, nec minime in extremam, sed tamen multa principia ex eo genere gignuntur. nam & attentum, monent Græci, ut principio faciamus iudicem, & docilem: quæ sunt utilia, sed non principij magis propria quàm reliquarum partium: facilia etiam in principijs, quod & attentum maxime sunt, cum omnia expectât, & dociles magis initijs esse possunt. Illustriora enim sunt, quæ in principijs, quàm quæ in medijs causis dicuntur, aut arguendo, aut refellendo. Maxima autem copia principiorum ad iudicem aut alliciendum, aut incitandum, ex ijs locis trahitur, qui ad motus animorum conficiendos inerunt in causa: quos tamen totos in principio explicari non oportebit, sed tantum impelli primo iudicem leuiter, ut iam inclinato reliqua incumbat oratio. Cõnexum autem ita sit principium consequenti orationi, ut non tãquam citharædi procæmium affectum aliquod, sed coherens cum omni corpore membrum esse uideatur. Nã nonnulli cum illud meditati ediderunt; sic ad reliqua transeunt, ut audientiam sibi fieri uelle uideantur. Atque eiusmodi illa prolusio debet esse, nõ ut Samnitum, qui uibrant hastas ante pugnam, quibus in pugnando

nihil utuntur; sed ut ipsis sententijs, quibus proluserunt, uel pugnare possint. Narrare uero rem quod breuiter iubent: si breuitas appellanda est, cum uerbum nullum redundet; brevis est L. Crassi oratio. sin tum est breuitas, cum tantum uerborum est, quantum necesse est: aliquando id opus est, sed sepe obest uel maxime in narrando, non solum quod obscuritatem affert, sed etiam quod eam uirtutem, quæ narrationis est maxima, ut iucunda, et ad persuadendum accommodata sit, tollit: uidelicet illa, Nam is postquam excessit ex ephebis, quàm longa est narratio? mores adolescētis ipsius & seruilis percontatio, mors Chrysidis, uultus & forma, et lamentatio sororis: reliqua per uarie iucundeque narratur. quod si hanc breuitatem quæsisset, Effertur, imus, ad sepulcrum uenimus; In ignem posita est, in his ferè decem uersiculis totum conficere potuisset: quanquam hoc ipsum, Effertur, imus, cōcisum est, ita ut non breuitati seruitum sit, sed magis uenustati. Quod si nihil fuisset, nisi, In igne posita est, tamen res tota cognosci facile potuisset. Sed & festiuitatem habet narratio distincta personis et in terpuneta sermonibus: et est probabilius quod gestum esse dicas, cū quæadmodum actū sit, exponas: et multe apertius ad intelligendum est, si sic constituitur aliquid quando, ac non ista breuitate percurritur. Apertam enim narrationem tam esse oportet, quàm cætera: sed hoc magis in hoc elaborandum est, quod & difficilius est, non esse obscurum in re narranda, quàm aut in principio; aut in argumento, aut in purgando, aut perorando; & maiore periculo hæc pars orationis ob-

scura est quàm cetera: uel quia si quo alio in loco est  
 dictum quid obscurius, tātum id perit, quod ita dictū  
 est; narratio obscura totam obcæcat orationem: uel  
 quod alia possit, semel si obscurius dixeris, dicere alio  
 loco planius; narrationis unus est in causa locus. Erit  
 autem perspicua narratio, si uerbis usitatis, si ordine  
 temporum conseruato, si non interrupte narrabitur.  
 Sed quando utendum sit, aut non sit narratione, id  
 est consilij: neque enim, si nota res est, nec si dubium  
 sit quid gestum sit, narrari oportet, nec si aduersarius  
 narrauit, nisi si refellemus: ac si quando erit narran-  
 dum, ne illa, quæ suspicionem & crimen efficient, con-  
 traq; nos erunt, acriter persequamur, & quidquid po-  
 terit, detrahamus: ne illud, quod Crassus, si quando  
 fiat, perfidia non stultitia fieri putat, ut causæ noceamus,  
 accidat: nam ad summam totius causæ pertinet,  
 caute an contra demonstrata res sit, quod omnis ora-  
 tionis reliquæ fons est narratio. Sequitur ut causa po-  
 natur: in quo uidendum est, quid in controuersiam ue-  
 niat. Tunc suggerenda sunt. firmamenta causæ con-  
 iuncte & infirmandis contrarijs & tuis confirmadis.  
 nanque una in causis ratio quædam est eius orationis,  
 quæ ad probandam argumentationem ualet: ea au-  
 tem & confirmationem et reprehensionem querit: sed  
 quia neque reprehendi, quæ contra dicuntur, possunt,  
 nisi tua confirmes; neque hæc confirmari, nisi illa re-  
 prehendas; idcirco hæc & natura, & utilitate, & tra-  
 ctatione coniuncta sunt. Omnia autem concludenda  
 plerunque rebus augendis, uel inflammando iudice, uel  
 mitigando: omniaq; cum superioribus orationis locis,



tum maxime extremo, ad mentes iudicum quammaxi-  
me permouendas, & ad utilitatem nostram uocandas,  
conferenda sunt. Neque sanè iam causa uidetur esse,  
cur secernamus ea præcepta, quæ de suasionibus tradē-  
da sunt, aut laudationibus: sunt enim pleraque com-  
munia, sed tamen suadere aliquid aut dissuadere,  
grauissima mihi uidetur esse personæ. Nam & sapien-  
tis est, consilium explicare suum de maximis rebus, &  
honesti, & disertis, ut mente providere, auctoritate pro-  
bare, oratione persuadere possit. Atque hæc in senatu  
minore apparatu agenda sunt. Sapiens enim est consi-  
lium, multisq; alijs dicendi relinquendus locus, uitanda  
etiam ingenij ostentationis suspicio. Concio capit om-  
nem uim orationis, & grauitatem uarietatemq; desi-  
derat. Ergo in suadendo nihil est optabilius, quam di-  
gnitas: nam qui utilitatem putat, non quid maxime  
uelit suasor, sed quid interdum magis sequatur, uidet.  
Nemo est enim, præsertim in clara ciuitate, quin putet  
expetendam maxime dignitatem: sed uincit utilitas  
plerunque, cum subest ille timor, ea neglecta, ne digni-  
tatem quidem posse retineri. Controuersia autem in-  
ter hominū sententias, aut in illo est, utrum sit utilius:  
aut etiam cum id conuenit, certatur utrum honestati  
potius, an utilitati consulendum sit. Quæ quia pugna-  
re sæpe inter se uidentur, qui utilitatem defendet, enu-  
merabit commoda pacis, opum, potētiae, pecuniæ, uicti-  
galium, præsidij, militum, utilitates cæterarum rerum,  
quarum fructum utilitate metimur, itemq; incōmoda  
contrariorum. Qui ad dignitatem impellet, maiorum  
exempla, quæ erunt uel cum periculo gloriosa, colliget,

posteritatis immortalem memoriam augebit, utilitatē ex laude nasci defendet, semperq; eam cum dignitate esse coniunctam. Sed quid fieri possit, aut non possit, quidq; etiam sit necesse aut non sit, in utraque re maxime est quærendum. Inciditur enim omnis iam deliberatio, si intelligitur non posse fieri, aut si necessitas affertur, & qui id docuit non uidentibus alijs, is plurimum uidit. Ad consilium autem de rep. dandum caput est, nosse rempub. ad dicendum uero probabiliter, nosse mores ciuitatis, qui quia crebro mutantur, genus quoque orationis est sæpe mutandum. & quanquam una ferè uis est eloquentiæ, tamen quia summa dignitas est populi, grauissima causa reipub. maximi motus multitudinis, genus quoque dicendi grandius quoddam & illustrius esse adhibendum uidetur, maximaq; pars orationis ad mouenda est ad animorum motus, nonnūquam aut cohortatione, aut commemoratione aliqua, aut in spem, aut in metum, aut ad cupiditatem, aut ad gloriam concitandos: sæpe etiam à temeritate, iracundia, spe, iniuria, inuidia, crudelitate reuocandos. Fit autem, ut quia maxima quasi oratori scena uideatur concio, natura ipsa ad ornatius dicendi genus excitetur. Habet enim multitudo uim quandam talem, ut quemadmodum tibicen sine tibys canere, sic orator sine multitudine audiente eloquens esse nō possit. Et cū sint populares multi uarij; lapsus, uitanda est acclamatio aduersa populi, quæ aut oratiōis peccato aliquo excitatur, si asperere, si arroganter, si turpiter, si sordide, si quoquo animi uitio dictū esse aliquid uideatur, aut hominum offensione uel inuidia, quæ aut iusta

est, aut ex criminatione atque fama, aut res si displicet, aut si est in aliquo motu suæ cupiditatis, aut metus multitudo: hisq; quatuor causis totidem medicinæ opponuntur. Tum obiurgatio, si est auctoritas, tū admonitio quasi lenior obiurgatio, tū promissio si audierint probaturos, tū deprecatio, quod est infirmū, sed nō nunquam utile. Nullo autem loco plus facetiæ prosunt, & celeritas, & breue aliquod dictum nec sine dignitate & cum lepore. Nihil enim tam facile, quàm multitudo à tristitia & sæpe acerbitate, commode ac breuiter, & acute, & hilare dicto deducitur. Exposui ferè, ut potui, uobis, in utroque genere causarum quæ sequi solerem, quæ fugere, quæ spectare, quæ omnino in causis ratione uersari. Nec illud tertium laudationum genus est difficile: quod ego initio quasi à præceptis nostris secreuerā: sed & quia multa sunt orationum genera, & grauiora, & maioris copię, de quibus nemo ferè præciperet, & quòd nos laudationibus non ita multum uti soleremus, totum hunc segregabam locum. Ipsi enim Græci legendi. qui magis aut delectationis, aut hominis alicuius ornandi, quàm utilitatis huius forensis causa laudationes scriptitauerunt: quorum sunt libri, quibus Themistocles, Aristides, Agesilaus, Epaminondas, Philippus, Alexander, aliq; laudantur. Nostræ laudationes, quibus in foro utimur, aut testimonij breuitatem habent nudam atque inornatam, aut scribuntur ad funebrem concionem, quæ ad orationis laudem minime accommodata est. Sed tamen, quoniam est utendum aliquando, nonnunquam etiam scribendum uelut Quæ Tubæ

roni Africanum auunculum laudanti scripsit C. Le-  
lius: uel ut nosmet ipsi ornandi causa Græcorum mo-  
re, si quos uelimus, laudare possimus: sit à nobis quo-  
que tractatus hic locus. Perspicuum est igitur alia esse  
in homine optanda, alia laudanda. Genus, forma,  
uires, opes, diuitiæ, cæteraq; quæ fortuna det aut ex-  
trinsecus, aut corpori, non habet in se ueram laudem,  
quæ deberi uirtuti uni putatur: sed tamen, q̄ ipsa uir-  
tus in earum rerum usu ac moderatione maxime cer-  
nitur, tractanda etiã in laudationibus hæc sunt na-  
tura & fortunæ bona, in quibus est summa laus non  
extulisse se in potestate, non fuisse insolentem in pecu-  
nia, non se prætulisse alijs propter abundantiam fortu-  
næ, ut opes & copiæ non superbix uideantur ac libidi-  
ni, sed bonitati ac moderationi facultatem & mate-  
riam dedisse. Virtus autem, quæ est per se ipsa lauda-  
bilis, & sine qua nihil laudari potest, tamen habet plu-  
res partes, quarũ alia est alia ad laudationem aptior.  
Sunt enim aliæ uirtutes, quæ uidentur in moribus ho-  
minum, & quadam comitate ac beneficentia positæ:  
aliæ, quæ in ingenij aliqua facultate aut animi magni-  
tudine ac robore. nam clementia, iustitia, benignitas,  
fides, fortitudo in periculis communibus, iucunda est  
auditu in laudationibus: omnes enim hæc uirtutes non  
tam ipsis, qui eas in se habent, quàm generi hominum  
fructuose putantur: sapientia & magnitudo animi,  
quæ omnes res humanæ tenues & pro nihilo putantur,  
& in extorgitando uis quædam ingenij, & ipsa elo-  
quentia admirationis habet non minus, iucunditatis  
minus. ipsos enim magis uidetur, quos laudamus, quã  
illos,

illos, apud quos laudamus, ornare ac tueri: sed tamen in laudando iungenda sunt etiam hæc genera uirtutū. ferunt enim aures hominum, cum illa, quæ iucunda, et grata, tū etiam illa, quæ mirabilia sunt, in uirtute laudari. Et quoniam singularum uirtutum sunt certa quædam officia ac munera, et sua cuique uirtuti laus propria debetur: erit explicandum in laude iustitiæ, quid cum fide, quid cum æquabilitate, quid cum eiusmodi aliquo officio is, qui laudabitur, fecerit. itemque in cæteris res gestæ ad cuiusque uirtutis genus et uim et nomen accommodabuntur. gratissima autem laus eorum factorum habetur, quæ suscepta uidentur à uiris fortibus sine emolumento ac præmio: quæ uero etiā cum labore et periculo ipsorum, hæc habent uberrimā copiam ad laudandum, quod et dici ornatissime possunt, et audiri facillime. ea enim denique uirtus esse uidetur præstantis uiri, quæ est fructuosa alijs, ipsi autem laboriosa, aut periculosa, aut certe gratuita. Magna etiam illa laus et admirabilis uideri solet, tulisse casus sapienter aduersos, non fractum esse fortuna, retinuisse in rebus asperis dignitatem. Neque tamen illa non ornant, habiti honores, decreta uirtutis præmia, res gestæ iudicijs hominum comprobata: in quibus etiam felicitatem ipsam deorum immortalium iudicio tribui, laudationis est. Sumende autem res erunt aut magnitudine præstabiles, aut nouitate primæ, aut genere ipso singulares: neque enim parua, neque usitata, neque uulgares, admiratione aut omnino laude dignæ uideri solent. Est etiam cum cæteris præstantibus uiris comparatio in laudatione præclara. De quo genere li-

bitum est mihi paulo plura, quàm ostenderam, dicere, non tam propter usum forensem, qui est à me in omni hoc sermone tractatus, quàm ut hoc uideretis, si laudationes essent in oratoris officio, quod nemo negat, oratori uirtutum omnium cognitionem, sine qua laudatio effici non possit, esse necessariam. Iam uituperandi præcepta contrarijs ex uitjs sumenda esse perspicuum est. simul est illud ante oculos, nec bonum uirum proprie & copiose laudari, sine uirtutum, nec improbum notari ac uituperari, sine uitiorum cognitione, satis insigne atque asperum posse. Atque his locis & laudandi & uituperandi sæpe nobis est utendum in omni genere causarum. Habetis de inueniendis rebus disponendisq; quid sentiam: adiungam etiam de memoria, ut labore Crassum leuè, neque ei quidquam aliud, de quo differat, relinquā, nisi ea, quibus hæc exornentur. Perge uero, inquit Crassus: libenter enim te cognitum iam artificem, aliquandoq; euolutum illis integumentis dissimulationis tuæ, nudatumq; perspicio: & q mihi nihil, aut quòd non multum relinquis, percommode facis, estq; mihi gratum. Iam istuc quantum tibi ego reliquerim, inquit Antonius, erit in tua potestate. si enim uere agere uolueris, omnia tibi relinquo: sin dissimulare, tu quemadmodum his satisfacias, uideris. Sed ut ad rem redeam, non sum tanto ego, inquit, ingenio, quanto Themistocles fuit, ut obliuionis artem quàm memoriæ malim: gratiamq; habeo Simonidi illi Chio, quem primum ferunt artem memoriæ protulisse. Dicunt enim, cum cœnaret Cranone in Theffalia Simonides apud Scopam fortunatū hominem, & nobilem,

cecinissetq; id carmen, quod in eum scripssisset, in quo multa ornandi causa poetarū more in Castorem scripta & Pollucem fuissent, nimis illum sordide Simonidi dixisse, se dimidium eius ei, quod pactus esset pro illo carmine, daturum: reliquum à suis Tyndaridis, quos æque laudasset, peteret, si ei uideretur. Paulo post esse ferunt nunciatum Simonidi, ut prodiret, iuvenes stare ad ianuam duos quosdam, qui eū magnopere euocarent: surrexisse illum ipsum, prodisse, uidisse neminem: hoc interim spatio conclaue illud, ubi epularetur Scopas, concidisse, ea ruina ipsum oppressum cum suis interisse: quos cum humare uellent sui, neque possent obtritatos internoscere ullo modo, Simonides dicitur ex eo, quod meminisset, quo eorum loco quisq; cubuisset, demonstrator uniuscuiusque sepeliendi fuisse. Hac tum re admonitus inuenisse fertur, ordinem esse maxime, qui memoriae lumen afferret: itaque ijs, qui hanc partem ingenij exercerent, locos esse capiendos, et ea, quæ memoria tenere uellent, effingenda animo, atque in his locis collocanda: sic fore, ut ordinem rerum locorum ordo conseruaret, res autem ipsas rerum effigies notaret, atque, ut locis pro cera, simulacris pro literis uteremur. Qui sit autem oratori memoriae fructus, quanta utilitas, quanta uis, quid me attinet dicere? tenere, quæ didiceris in accipienda causa; quæ ipse cogitaris; omnes fixas esse in animo sententias, omnem descriptum uerborum apparatus; ita audire uel eum unde dicas, uel eum cui respondendum sit, ut illi non infundere in aures tuas orationem, sed in animo uideantur inscribere. itaque soli qui



memoria uigent, sciunt quid, & quatenus, & quo modo dicturi sint, quid responderint, quid supersit: ijdemq; multa ex alijs causis aliquando à se acta; multa ab alijs audita meminerunt. Quare confiteor equidem huius boni naturam esse principem, sicut earum rerū, de quibus ante locutus sum, omnium: sed hæc ars tota dicendi, siue artis imago quædam & similitudo est, habet hanc uim, non ut totum aliquid, cuius in ingenijs nostris pars nulla sit, pariat & procreet; uerum ut ea, quæ sunt orta iam in nobis & procreata, educet atque confirmet. Veruntamen neque tam acri memoria ferre quisquam est, ut, non dispositis notatisq; rebus, ordinem uerborum aut sententiarum complectatur: neque uero tam hebeti, ut nihil hac consuetudine et exercitatione adiuuetur. Vidit enim hoc prudenter siue Simonides, siue alius quis inuenit, ea maxime animis effingi nostris, quæ essent à sensu tradita atque impressa: acerrimum autem ex omnibus nostris sensibus esse sensum uidendi: quare facillime animo teneri posse ea, quæ perciperentur auribus aut cogitatione, si etiam oculorum commendatione animis traderetur, ut res cæcas & ab aspectus iudicio remotas confirmatio quædā & imago & figura ita notaret, ut ea, quæ cogitando complecti uix possemus, intuendo quasi teneremus. His autem formis atque corporibus, sicut omnibus, quæ sub aspectum ueniunt, sede opus est: etenim corpus intelligi sine loco non potest. quare, ne in re nota & peruulgata multus & insolens sim, locis est utendum multis, illustribus, explicatis, modicis interualis, imaginibus autem agentibus, acribus, insignitis,

• quæ occurrere celeriterq; percutere animum possint.

Quam facultatem & exercitatio dabit, ex qua consuetudo gignitur, similium uerborum conseruata & immutata casibus, aut traducta ex parte ad genus notationis, et unius uerbi imagine totius sententiæ informatio, pictoris cuiusdam summi ratione & modo, formarum uarietate locos distinguētis. Sed uerborum memoria, quæ minus est nobis necessaria, maiore imaginum uarietate distinguitur. Multa enim sunt uerba, quæ quasi articuli connectunt membra orationis, quæ formari similitudine nulla possunt: eorum fingenda nobis sunt imagines, quibus semper utamur.

Rerum memoria propria est oratoris: eam singulis personis bene positis notare possumus, ut sententiæ imaginibus, ordinem locis comprehendamus. Neque uerū est, quod ab inertibus dicitur, opprimi memoriam imaginum pondere, & obscurari etiam id, quod per se natura tenere potuisset. Vidi enim ego summos homines, & diuina propè memoria, Athenis Carneadem, in Asia, quem uiuere hodie aiunt, Sceptium Metrodorum, quorum uterque, tanquam literis in cera, sic se aiebat imaginibus in ijs locis, quos haberet, quæ meminisse uellet, perscribere. Quare hac exercitatione non eruen-da memoria est, si est ulla naturalis, sed certe, si latet, euocanda est. Habetis sermonem bene longum hominis utinam non impudentis, illud quidem certe non nimis uerecundi: qui quidem cum te Catule, tum etiam L. Crasso audiente de dicendi ratione tam multa dixerim. nam istorū ætas minus me fortasse mouere debuit: sed mihi ignoscetis profecto, si modo, quæ causa me ad hanc

insolitam mihi loquacitatem impulerit, acceperitis. Nos uero, inquit Catulus, (etenim pro me hoc, & pro meo fratre respódeo) non modo tibi ignoscimus, sed te diligimus, magnamq; tibi habemus gratiam: & cum humanitatem & facilitatem agnoscimus tuam, tum admiramur istam scientiam & copiam. Equidē etiam hoc me affecutum puto, q̄ magno sum leuatus errore, & illa admiratione liberatus, q̄ multis cum alijs semper admirari solebam, unde esset illa tanta tua in causis diuinitas: nec enim te ista artigisse arbitrabar, quæ diligentissime cognosse, & undique collegisse, usq; doctum partim correxisse uideo, partim comprobasse. Neque eo minus eloquentiam tuam, & multo magis uirtutem & diligentiam admiror, & simul gaudeo iudicium animi mei probari, quod semper statui, neminem sapientia laudem & eloquentiæ sine summo studio & labore & doctrina consequi posse. Sed tamē quidnam est id, quod dixisti, fore ut tibi ignoscere mus, si cognossemus, quæ te causa in sermonem impulisset? Quæ est enim alia causa, nisi quod nobis, & horum adolescentium studio, qui te attentissime audierunt, morem gerere uoluisti? Tum ille, Adimere, inquit, omnem recusationem Crasso uolui, quæ ego paulo sciebam uel pudētius uel inuitius (nolo enim dicere de tam suauī homine fastidiosius) ad hoc genus sermonis accedere: Quid enim poterit dicere? Consularem se esse hominem & Censorium? eadem nostra causa est. An ætatem afferet? triennio minor est. An se nescire? quæ ego sero, quæ cursim arripui, quæ subsiciuis operis (ut aiunt) iste à puero summo studio,

summis doctōribus. Nihil dicam de ingenio, cui par nemo fuit: etenim me dicētem qui audierit, nemo unquam tam sui despiciēs fuit, quin speraret aut melius, aut eodem modo se posse dicere: Crasso dicente nemo tam arrogans, qui similiter se unquam dicturum esse consideret. Quamobrem ne frustra hi tales uiri uenerint, te aliquando Crasse audiamus. Tum ille, Ut ita ista esse cōcedā, inquit, Antoni, quæ sunt lōge secus, quid mihi tu tādē hodie, aut cuiquam homini, quod dici possit, reliquisti? Dicam enim uere, amicissimi homines, quod sentio: sæpe ego doctos homines, quid dico sæpe? imo nonnunquam: sæpe enim qui potui, qui puer in forum uenerim, neque inde unquam diutius quā Quæstor abfuerim? sed tamen audiui, ut heri dicebam, & Athenis cum essem, doctissimos uiros, & in Asia istum ipsum Sceptium Metrodorum, cum de his ipsis rebus disputaret: neque uero mihi quisquam copiosius unquam uisus est, neque subtilius in hoc genere dicendi, quā iste hodie, esse uersatus: quod si esset aliter, & aliquid intelligerem ab Antonio prætermisum, non essem tam inurbanus ac penē inhumanus, ut in eo grauarer, quod uos cupere sentirem. Tum Sulpitius, An ergo, inquit, oblitus es Crasse, Antonium ita partitum esse tecum, ut ipse instrumentum oratoris exponeret, tibi eius distinctiōnem atque ornatum relinqueret? Hic ille, Primum quis Antonio permisit, inquit, ut & partes faceret, & utram uellet prior ipse sumeret? deinde, si ego recte intellexi, cum ualde libenter audirem, mihi coniuncte est uisus de utraque re dicere. Ille ue-

ro, inquit Cotta, ornamenta orationis non attigit, neque eam laudem, ex qua eloquentia nomen ipsum inuenit. Verba igitur, inquit Crassus, mihi reliquit Antonius, rem ipse sumpsit. Tum Caesar, Si, quod difficilius est, id tibi reliquit: est nobis, inquit, causa, cur te audire cupiamus: sin quod facilius, tibi causa non est, cur recuses. Et Catulus, Quid quod dixisti, inquit, Crasse, si hic hodie apud te maneremus, te more nobis esse gesturum, nihil ne ad fidem tuam putas pertinere? Tum Cotta ridens, Possem tibi, inquit, Crasse cōcedere, sed uide ne quid Catulus attulerit religionis. opus hoc censorium est: id autem cōmittere, uide quā sit homini turpe censorio. Agite uero, ille inquit, ut uultis: sed nunc quidem, quoniam id temporis est, surgendum censeo, & requiescendum: post meridiem, si ita uobis est commodum, loquemur aliquid: nisi forte in crastinum differre mauultis. Omnes se uel statim, uel, si ipse post meridiem mallet, quamprimum tamen audire uelle dixerunt.

## M. TVLLII CICERONIS

## DE ORATORE

## LIBER III.

NSTITVENT I mihi Quinte  
 frater cum sermonem referre, & mā  
 I dare huic tertio libro, quem post An-  
 tonij disputationē Crassus habuisset,  
 acerba sanē recordatio ueterem an-  
 ni curam molestiamq; renouauit. nam illud immor-  
 talitate dignum ingenium, illa humanitas, illa uirtus  
 L. Crassi morte extincta subita est; uix diebus decem  
 post eum diem, qui hoc & superiore libro continetur.  
 ut enim Romam redijt extremo Scenicorum ludorum  
 die, uehementer commotus ea oratione, quæ ferebatur  
 habita esse in concione à Philippo, quem dixisse cōsta-  
 bat, uidendum sibi aliud esse consilium, illo senatu se  
 remp. gerere non posse: mane Idibus Septembris &  
 ille, & senatus frequens uocatu Drusi in curiā uenit.  
 ibi cum Drusus multa de Philippo questus esset, retulit  
 ad senatum de illo ipso, quod Consul in eum ordinem  
 tam grauius in concione esset inuectus. hic, ut saepe  
 inter homines sapientissimos constare uidi, quanquam  
 hoc Crasso, cum aliquid accuratius dixisset, semper fe-  
 re contigisset, ut nunquam dixisse melius putaretur:  
 tamen omnium consensu sic esse tum iudicatum, ceteros  
 à Crasso semper omnes, illo autem die etiam ipsum  
 à sese superatum. deplorauit enim casum atque orbis  
 tatem senatus, cuius ordinis à Consule, qui quasi pās

rens bonus aut tutor fidelis esse deberet, tanquam ab aliquo nefario prædone diriperetur patrimonium dignitatis: neque uero esse mirandum, si, cum suis consilijs remp. profligasset, consilium senatus à rep. repudiaret. hic cum homini & uehementi, & disertò, & in primis fortì ad resistendum Philippo quasi quasdam uerborum faces adnouisset, non tulit ille, & grauiter exarsit, pignoribusq; ablatis Crassum institit coercere. quo quidè ipso in loco multa à Crasso diuinitus dicta efferebantur, cum sibi illum Còsulem esse negaret, cui senator ipse non esset. An tu, cum omnem auctoritatem uniuersi ordinis pro pignore putaris, eamq; in conspectu populi R. concideris, me his pignoribus existimas posse terreri? non tibi illa sunt credenda, si Crassum uis coercere: hæc tibi est excidenda lingua; qua uel euulsa spiritu ipso libidinem tuâ libertas mea refutabit. Per multa tum uehemētissima contentione animi, ingenij, uirium ab eo dicta esse constabat; sententiamq; eā, quam senatus frequens secutus est ornatissimis & grauissimis uerbis, ut populo R. satisfaceret, nunquam senatus neque consilium reip. nec fidem de fuisse, ab eo dictam; & eundem, id quod in auctoritatibus per scriptis extat, scribendo affuisse. Illa tanquam cygnea fuit diuini hominis uox & oratio, quam quasi expectantes post eius interitum ueniebamus in curiā, ut uestigium illud ipsum, in quo ille postremū inluisse, contueremur. nanque tum latus ei dicenti condoluisse, sudoremq; multum consecutum esse audiebamur: ex quo cum cohorruiisset, cum febris domum redijt, dieq; septimo est lateris dolore consumptus.



O fallacem hominum spem, fragilemque fortunam, et inanes nostras contentiones, quæ in medio spatio sæpe franguntur et corruunt, et ante in ipso cursu obruuntur, quam portum conspiciere potuerunt. nam quæ diu Crassi fuit ambitionis labore uita districta, tæ diu priuatis magis officiis et ingenij laude floruit, quam fructu amplitudinis aut reip. dignitate. qui autem ei annus primus ab honorum perfunçãoe aditum omnium concessu ad summam auctoritatem dabat, is eius omnem spem, atque omnia uitæ consilia morte peruertit. fuit hoc luctuosum suis, acerbum patriæ, graue bonis omnibus: sed ij tamen remp. casus secuti sunt, ut mihi non erepta L. Crasso à dijs immortalibus uita, sed docta mors esse uideatur. non uidit flagrantem bello Italiam, non ardentem inuidia senatum, non sceleris nefarii principes ciuitatis reos, non luctum filie, non exilium generi, non acerbissimam C. Marij fugam, non illam post reditum eius cadem omnium crudelissimam, non denique in omni genere deformatam eam ciuitatem, in qua ipse florentissima multum omnibus gloria præstitisset. Sed quoniam attrigi cogitatione uim uarietatemque fortunæ, non uagabitur oratio mea longius, atque eis ipsis definietur uiris, qui hoc sermone, quem referre cœpimus, continetur. quis enim non iure beatam L. Crassi mortem illam, quæ est à multis sæpe defleta, dixerit, cum horum ipsorum sit, qui tum cum illo postremum fere collocuti sunt, euentum recordatus? tenemus enim memoria, C. Catulum, uirum omni laude præstantem, cum sibi non incolumem fortunam, sed exilium et fugam deprecaretur, esse coactum

ut uita se ipse priuaret. iam M. Antonij in ijs ipsis rostris, in quibus ille remp. constantissime Consul defenderat, quæq; Censor imperatorijs manubijs ornat, positum caput illud fuit, à quo erant multorum ciuium capita seruata. neque uero longe ab eo C. Iulij caput hospitis Hetrusci scelere proditum cum L. Iulij fratris capite iacuit: ut ille, qui hæc non uidit, & uixisse cum rep. pariter, et cum illa simul extinctus esse uideatur. neque enim propinquum suum maximi animi uirum P. Crassum suapte interfectū manu, neque collegæ sui Pontificis maximi sanguine simulacrum Vestæ respersum esse uidit: cui, mærori (qua mēte ille in patriam fuit) etiā C. Carbonis inimicissimi hominis eodem illo die mors nefaria fuisset. non uidit eorum ipsorum, qui rum adolescentes Crasso se dicarūt, horribiles miserosq; casus, ex quibus C. Cotta, quem ille florentem reliquerat, paucis diebus post mortem Crassi depulsus per inuidiam Tribunatu, nō multis ab eo tempore mensibus ciectus est è ciuitate. Sulpitius autem, qui in eadem inuidiæ flamma fuisset, quibuscū priuatus coniūctissime uixerat, hos in Tribunatu spoliare instituit omni dignitate: cui quidem ad summam gloriam eloquentiæ florenti, ferro erepta uita est, & pœna temeritati non sine magno reip. malo cōstituta. Ego uero te Crasse, cum uitæ flore, tum mortis opportunitate, diuino cōsilio & ortum, & extinctum esse arbitror. nā tibi aut pro uirtute animi constantiaq; tua ciuili ferri subeūda fuit crudelitas, aut, si quate fortuna ab atrocitate mortis uendicasset, eadem esse te funerum patriæ spectatorem coegisset: neque solum tibi improborum do-

minatus, sed etiam propter admixtam civium cædem bonorum, uictoria mærori fuisset. Mihi quidem Quinte frater & eorum casus, de quibus ante dixi, & ea, quæ nosmet ipsi ob amorem in remp. incredibilem & singularem pertulimus, ac sensimus, cogitanti, sententia sæpe tua uera ac sapiens uideri solet, qui propter tot, tantos, tamq; præcipites casus clarissimorum hominum, atque optimorum uirorum, me semper ab omni contentione ac dimicatione reuocasti. sed quoniam hæc iam neque in integro nobis esse possunt, & summi labores nostri magna compensati gloria mitigantur: pergamus ad ea solatia, quæ non modo sedatis molestiis iucunda, sed etiam hærentibus salutaria nobis esse possunt; sermonemq; L. Crassi reliquum ac penè postremum memorie prodamus; atque ei, etsi nequaquam parem illius ingenio, at pro nostro tamen studio meritam gratiam debitamq; referamus. neque enim quisquam nostrum, cum libros Platonis mirabiliter scriptos legit, in quibus fere Socrates exprimitur, non, quanquam illa scripta sunt diuinitus, tamẽ maius quiddam de illo, de quo scripta sunt, suspicatur. quod item nos postulamus, nõ à te quidem, qui nobis summa omnia tribuis, sed à cæteris, qui hæc in manus sumẽt, ut maius quiddam de L. Crasso, quàm quicquid à nobis exprimeretur, suspicentur. nos enim, qui ipsi sermoni non interfuisse mus, & quibus C. Cotta tantummodo locos ac sententias huius disputationis tradidisset, quo in genere orationis utrumque oratorem cognoueramus, id ipsum sumus in eorum sermone adumbrare conati. quod si quis erit, qui ductus opinione uulgi, aut Antonium ie-

iuniorem, aut Crassum fuisse pleniorē putet, quā  
 quo modo à nobis uterque inductus est; is erit ex ijs,  
 qui aut illos non audierit, aut iudicare non possit. nā  
 fuit uterque, ut exposui antea, cum studio, atque inge-  
 nio, & doctrina præstans omnibus, tum in suo genere  
 perfectus; ut neque in Antonio deesset hic ornatus or-  
 rationis, neque in Crasso redundaret. Ut igitur ante  
 meridiem discesserunt, paululumq; requierunt, in pri-  
 mis hoc à se Cotta animaduersum esse dicebat, omne  
 illud tempus meridianum Crassum in acerrima atque  
 attentissima cogitatione posuisse, seseq; , qui uultum  
 eius, cum ei dicendum esset, obtutumq; oculorum in  
 cogitando prope nossset, atque in maximis causis sæpe  
 uidisset, cum dedita opera quiescentibus alijs in eam  
 exedram uenisset, in qua Crassus lectulo posito re-  
 cubuisset, cumq; cum in cogitatione defixum esse sen-  
 sisset, statim recessisse, atque in eo silentio duas ho-  
 ras ferè esse consumptas: deinde cum omnes incli-  
 nato iam in postmeridianum tempus die uenissent ad  
 Crassum, Quid est Crasse; inquit Iulius, imus ne-  
 sessum? etsi admonitum uenimus te, non flagitatum.  
 Tum Crassus, An me tam impudentem esse existi-  
 matis, ut uobis hoc præsertim munus putem diutius  
 posse debere? Quinam igitur, inquit, ille locus? an  
 in media sylua placet? Est enim is maxime & opacus  
 & frigidus. Sanè, inquit Crassus: etenim est in eo  
 loco sedes huic nostro non inopportuna sermoni. Cum  
 placuisset idem cæteris in syluam uenitur, & ibi ma-  
 gna cum audiendi expectatione confiditur. Tum  
 Crassus, Cum auctoritas atque amicitia uestra, tum

Antonij facilitas eripuit, inquit, mihi in optima mea  
 causa libertatem recusandi: quanquam in partienda  
 disputatione nostra, cum sibi de ijs, quæ dici ab ora-  
 tore oporteret, sumeret, mihi autem relinqueret ut  
 explicarem quemadmodum illa ornari oporteret, ea  
 diuisit, quæ seiuncta esse non possunt. Nam cum om-  
 nnis ex re atque uerbis constet oratio, neque uerba  
 sedem habere possunt si rem subtraxeris, neque res lu-  
 men si uerba semoueris. Ac mihi quidem ueteres illi  
 maius quiddam animos complexi, plus multo etiam ui-  
 disse uidentur, quam quantum nostrorum ingenio-  
 rum acies intu eri potest: qui omnia hæc, quæ supra  
 & subter, unum esse, & una ui, atque una con-  
 sensione naturæ constrieta esse dixerunt. nullum est  
 enim genus rerum, quod aut auulsum à cæteris per se  
 ipsum constare, aut quo cætera si careant, uim suam  
 atque æternitatem conseruare possint. Sed hæc maior  
 esse ratio uidetur, quam ut hominum possit sensu aut  
 cogitatione comprehendere. est etiam illa Platonis uera,  
 & tibi Catule certe non inaudita uox, Omnem do-  
 ctrinam harum ingenuarum & humanarum artium  
 uno quodam societatis uinculo contineri. ubi enim  
 perspecta uis est rationis eius, qua cause rerum atque  
 exitus cognoscuntur, mirus quidam omnium quasi con-  
 sensus doctrinarum concentusq; reperitur. Sed si hoc  
 quoque uidetur esse altius, quam ut id nos humi stræ-  
 ti suspicere possimus, illud certe tamen, quod amplexi  
 sumus, quod profitemur, quod suscepimus, nosse & te-  
 nere debemus. Vna est enim, quod & ego hesternæ die  
 dixi, & aliquot locis antemeridiano sermone signifi-

cavit Antonius, eloquentia, quasunque in oras disputationis regiones uel delata est. Nam siue de cœli natura loquitur, siue de terræ, siue de diuina ui, siue de humana, siue ex inferiore loco, siue ex æquo, siue ex superiore, siue ut impellat homines, siue ut doceat, siue ut deterreat, siue ut concitet, siue ut reflectat, siue ut incendat, siue ut leniat, siue ad paucos, siue ad multos, siue inter alienos, siue cum suis, siue secum, riuus est deducta oratio, non fontibus: & quocunque ingreditur, eodem est instructu ornatuq; comitata. Sed quoniam oppressi iam sumus opinionibus nō modo uulgi, uerum etiam hominum leuiter eruditorum, qui, quæ cōplecti tota nequeunt, hæc facilius diuulsa & quasi discerpta contrectant; & qui, tanquā ab animo corpus, sic à sententijs uerba seiungunt; quorū sine interitu fieri neutrum potest: non suscipiam oratione meapluſ quā mihi imponitur: tantum significabo breui, neque uerborum ornatum inueniri posse non partitis expressisq; sententijs, neque esse ullam sententiam illustrem sine luce uerborum. Sed prius quā illa conor attingere, quibus orationem ornari atque illuminari putem, proponam breuiter quid sentiam de uniuerso genere dicēdi. Natura nulla est (ut mihi uidetur) quæ nō habeat in suo genere res complures dissimiles inter se, quæ tamen consimili laude dignentur. Nam & auribus multa percipimus, quæ etsi nos uocibus delectāt, tamē ita sunt uaria sæpe, ut id, quod proximū audias, iucundissimum esse uideatur: et oculis colliguntur penē innumerabiles uoluptates, quæ nos ita capiunt, ut unū sensum dissimili genere delectent, & reliquos sensus

sus voluptates oblectēt dispares, ut sit difficile iudiciū  
excellentis maxime suauitatis. At hoc idem, quod est  
in naturis rerum, transferri potest etiam ad artes. Vna  
singendi est ars, in qua præstantes fuerunt Myro, Poly-  
cletus, Lysippus, qui omnes inter se dissimiles fuerunt,  
sed ita tamē, ut neminē sui uelis esse dissimilē. Vna est  
ars ratioq; picturæ, dissimillimiq; tamē inter se Zeus,us,  
Aglaophon, Apelles: neque eorum quisquam est, cui  
quidquam in arte sua deesse uideatur. Et si hoc in his  
quasi mutis artibus est mirandum, & tamen uerum:  
quanto admirabilius in oratione atque in lingua, quæ  
cum in iisdem sententijs uerbisq; uersetur, summas ha-  
bet dissimilitudines, non sic, ut alij uituperandi sint, sed  
ut ij, quos constet esse laudandos, in dispari tamē gene-  
re laudentur: Atque id primum in poetis cerni licet,  
quibus est proxima cognatio cū oratoribus, quàm sint  
inter sese Ennius, Pacuuius, Acciusq; dissimiles: quàm  
apud Græcos Aeschylus, Sophocles, Euripides, quanquā  
omnibus par penē laus in dissimili scribēdi genere tri-  
buatur. Aspicite nunc eos homines atque intuemini,  
quorum de facultate quærimus, quid intersit inter ora-  
torum studia atque naturas. suauitatem Isocrates, sub-  
tilitatem Lysias, acumē Hyperides, sonitum Aeschines,  
uim Demosthenes habuit: quis eorum non egregius?  
tamen quis cuiusquam nisi sui similis? Grauitatem  
Africanus, lenitatem Lælius, asperitatem Galba, pro-  
fluens quiddam habuit Carbo & canorum. quis ho-  
rum non princeps temporibus illis fuit? & suo tamen  
quisque in genere princeps. Sed quid ego uetera con-  
quiram, cum mihi liceat uti præsentibus exēplis atque



niuis? Quid incūdus auribus nostris unquam accidit  
 huius oratione Catuli? quæ est pura sic, ut Latine lo-  
 qui penè solus uideatur: sic autem grauis, ut in singu-  
 lari dignitate omnis tamen adsit humanitas ac lepos.  
 Quid multa? istum audiens equidem sic indicare so-  
 leo, quidquid aut addideris, aut mutaueris, aut detra-  
 xeris, uitiosius & deterius futurum. Quid noster hic  
 Caesar? non ne nouam quandam rationem attulit or-  
 rationis, & dicendi genus induxit propè singulare?  
 Quis unquam res præter hūc tragicas penè comice, tri-  
 stes remisse, seueras hilare, forenses scenica propè ue-  
 nustate tractauit, atque ita, ut neque iocus magnitu-  
 dine rerum excluderetur, nec grauitas facetijs minue-  
 retur? Ecce præsentēs duo propè æquales Sulpitius &  
 Cotta. quid tam inter se dissimile? quid tam in suo  
 genere præstans? limatus alter & subtilis, rē explicās  
 proprijs aptisq; uerbis, hæret in causa semper: & quid  
 iudici probandum sit, cum acutissime uidit, ommissis cæ-  
 teris argumētis in eo mētem orationemq; defigit. Sul-  
 pitius autem fortissimo quodā animi impetu, plenissi-  
 ma & maxima uoce, summa cōtentione corporis, &  
 dignitate motus, uerborum quoque ea grauitate et co-  
 pia est, ut unus ad dicēdum instructissimus à natura  
 esse uideatur. Ad nosmet ipsos iam reuertor: (quoniā  
 sic fuimus semper comparati, ut hominū sermonibus  
 quasi in aliquod contentionis iudicium uocaremur)  
 quid tam dissimile, quàm ego in dicēdo, & Antonius?  
 cum ille is sit orator, ut nihil eo possit esse præstantius;  
 ego autem, quanquam memet mei pœnitet, cū hoc ma-  
 xime tamen in comparatione coniūgar. Videtis ne ge-

nus hoc quod sit Antonij? forte, uehemens, cōmotum  
 in agēdo, prēmunitum, et ex omni parte causæ septū,  
 acre, acutum, enucleatum, in unaquaque re cōmorans,  
 honeste cedens, acriter insequens, terrens, supplicans,  
 summa orationis uarietate, nulla nostrarū aurium sa-  
 tietate. Nos autem, quicūque in dicendo sumus, (quo-  
 niā esse aliquo in numero uobis uidemur) certe tamē  
 ab huius multum genere distamus: quod quale sit, non  
 est meum dicere; propterea quod minime sibi quisque  
 notus est, & difficillime de se quisque sentit: sed ta-  
 men dissimilitudo intelligi potest & ex motus mei me-  
 diocritate, & ex eo, quod quibus uestigijs primū insti-  
 ti, in ijs ferē soleo perorare; & quod aliquanto me ma-  
 ior in uerbis, & in sententijs eligēdis, quā cum labor  
 & cura torquet, uerentem, ne, si paulo obsoletior fue-  
 rit oratio, non digna expectatione & silentio fuisse ui-  
 deatur. Quod si in nobis, qui adsumus, tantæ dissimili-  
 tudines, tam certæ res cuiusque propriæ, & in ea ua-  
 rietate ferē melius à deteriore facultate magis, quā  
 genere distinguitur, atque omne laudatur, quod in suo  
 genere perfectum est: quid censetis, si omnes, qui ubi-  
 que sunt aut fuerunt oratores, amplecti uoluerimus,  
 num ne fore, ut quot oratores, totidem penē reperian-  
 tur genera dicendi? Ex qua mea disputatione forsità  
 occurrat illud, si penē innumerabiles sint quasi formæ  
 figuræq; dicendi, specie dispares, genere laudabiles, non  
 posse ea, quæ inter se discrepāt, iisdem præceptis atque  
 in una institutione formari. Quod non est ita, dili-  
 gentissimeq; hoc est eis, qui instituūt aliquos atque eru-  
 diunt, uidendū, quò suā quenque natura maxime fer-

re uideatur. Etenim uidemus ex eodē quasi ludo sum-  
 morum in suo cuiusque genere artificum & magistro-  
 rum exisse discipulos dissimiles inter se, attamen lau-  
 dandos, cum ad cuiusque naturam institutio doctōris  
 accommodaretur. Cuius est uel maxime insigne illud  
 exemplum (ut ceteras artes omittamus) quod dicebat  
 Isocrates doctō singularis, se calcaribus in Ephoro, con-  
 tra autē in Theopompo frenis uti solere: alterū enim  
 exultantem uerborum audacia reprimebat, alterū cun-  
 ctantem & quasi uerecundantem incitabat. Neque  
 eos similes effecit inter se, sed tantū alteri affinxit, de  
 altero limauit, ut id conformaret in utroq; quod utri-  
 usque natura pateretur. Hæc eo mihi prædicenda fue-  
 runt, ut si non omnia, quæ proponerentur à me ad o-  
 mnium uestrum studium, & ad genus id, quod quisq;  
 uestrum in dicendo probaret, adhærescerēt, id à me ge-  
 nus exprimi sentiretis, quod maxime mihi ipsi probare  
 tur. Ergo hæc & agenda sunt ab oratore, quæ expli-  
 cauit Antonius, & dicenda quodam modo. Quinā igitur  
 dicendi est modus melior (nam de actione post uī-  
 dero) quàm ut Latine, ut plane, ut ornate, ut ad id,  
 quodcumque agetur, apte, congruenterq; dicamus? At-  
 que eorum quidem, quæ duo prima dixi, rationem nō  
 arbitror expectari à me puri dilucidiq; sermonis: neq;  
 enim conamur docere eū dicere, qui loqui nesciat; nec  
 sperare, qui Latine non possit, hunc ornate esse dictu-  
 rum; neque uero qui nō dicat quod intelligamus, hūc  
 posse, quod admiremur, dicere. Linquamus igitur hæc,  
 quæ cognitionem habent facilem, usum necessarium:  
 nam alterum traditur literis doctrināq; puerili: alte-

rum adhibetur ob eam causam, ut intelligatur, quid quisque dicat: quod uidemus ita esse necessarium, ut tamen eo minus nihil esse possit. Sed omnis loquendi elegantia, quanquam expolitur scientia literarum, tamen augetur legendis oratoribus & poetis: sunt enim illi ueteres, qui ornare nondum poterant ea quæ dicebant, omnes propè præclare locuti: quorum sermone assuefacti qui erunt, ne cupientes quidem poterunt loqui nisi Latine. Neque tamen erit utèdum uerbis istis, quibus iam consuetudo nostra non utitur, nisi quando ornandi causa parce, quod ostendam, sed usitatius ita poterit uti lectissimis, ut utatur is, qui in ueteribus erit scriptis studiose & multum uolutatus. Atque ut Latine loquamur, non solum uidendum est, ut & uerba efferamus ea, quæ nemo iure reprehendat: & ea sic & casibus, & temporibus, & genere, & numero conseruemus, ut ne quid perturbatū ac discrepās, aut præposterum sit, sed etiam lingua, & spiritus, & uocis sonus est ipse moderatus. Nolo exprimi literas putidius, nolo obscurari negligentius: nolo uerba exiliter exanimata exire, nolo inflata & quasi anhelata grauius. nam de uoce non ea dico, quæ sunt actionis, sed hoc, quod mihi cum sermone quasi coniunctum uidetur. sunt enim certa uitia, quæ nemo est quin effugere cœpiat, mollis uox; ut muliebris, aut quasi extra modum absona atque absurda. est autem uitium quod nonnulli de industria conseruantur. Rustica uox & agrestis quosdam delectat, quo magis antiquitatē, si ita sonet, eorum sermo retinere uideatur, ut tuus Catule sodalis L. Cotta gaudere mihi uidetur grauitate linguæ. so-

noq; uocis agresti, & illud quod loquitur, priscum uisum iri putat, si plane fuerit rusticanum. Me autem tuus sonus & suauitas ista delectat, omitto uerborum, quanquam est caput, uerum id affert ratio, docent litera, confirmat consuetudo & legendi & loquendi: sed hanc dico suauitatem, quae exit ex ore, quae quidem ut apud Graecos Atticorum, sic in Latino sermone huius est urbis maxime propria. Athenis iandiu doctrina ipsorum Atheniensium interijt, domicilium tantum in illa urbe remanet studiorum, quibus uacant ciues, peregrini fruuntur, capti quodam modo nomine urbis & auctoritate: tamen eruditissimos homines Asiaticos quiuis Atheniensis indoctus, non uerbis, sed sono uocis, nec tam bene quam suauiter loquendo facile superabit. Nostri minus student literis quam Latini, tamen ex istis, quos nostis, urbanis, in quibus minimum est literarum, nemo est quin literatissimum togatorum omnium Quam Valerium Soranum lenitate uocis atque ipso oris pressu & sono facile uincat. Quare cum sit quaedam certa uox Romani generis urbisq; propria, in qua nihil offendi, nihil displicere, nihil animaduerti possit, nihil sonare aut olere peregrinum, hanc sequamur: neque solum rusticam asperitatem, sed etiam peregrinam insolentiam fugere discamus. Equidem cum audio sonum meam Leliam (facilius enim mulieres incorruptam antiquitatem conseruant, quod multorum sermonis expertes, ea tenent semper quae prima didicerunt) sed eam sic audio, ut Plautum mihi aut Nauium uidear audire: sono ipso uocis ita recto & simplici est, ut nihil ostentationis aut imitationis asferre uideatur:

ex quo sic locutum esse eius patrem iudico, sic maiores, non asperere, ut ille quem dixi, non uaste, non rustice, non hiulce, sed presse, & æquabiliter, & leniter. Quare Cotta noster, cuius tu illa lata Sulpiti non nunquam imitaris, ut iotam literam tollas, & è plenissimum dicas, non mihi oratores antiquos, sed menses uideatur imitari. Hic cum arrisisset ipse Sulpitius, Sic agam uobiscum, inquit Crassus, ut, quoniam me loqui uoluistis, aliquid de uestris uitijs audiat.

Utinam quidem, inquit ille: id enim ipsum uolumus, idque si feceris, multa (ut arbitror) hic hodie uitia ponemus. At enim non sine meo periculo, Crassus, inquit, possum Sulpiti te reprehendere, quoniam Antonius mihi te simillimum dixit sibi uideri. Tum ille, Tum cum monuit idem, ut ea, quæ in quoque maxima essent, imitaremur. ex quo uereor, ne nihil sim tui nisi suppletionem pedis imitatus, & pauca quædam uerba, & aliquem si forte motum. Ergo ista, inquit Crassus, quæ habes à me, non reprehendo, ne me ipsum irrideam: sunt autem mea multa & plura & maiora quam dicis: quæ autem sunt aut tua planè, aut imitatione ex aliquo expressa, de ijs te, si qui me forte locus admonuerit, commonebo. Prætereamus igitur præcepta Latine loquendi, quæ puerilis doctrina traditi, & subtilior cognitio ac ratio literarum alit, aut consuetudo sermonis quotidiani ac domestici, libri confirmant, & lectio ueterum oratorum & poetarum. Neque uero in illo altero diutius commoremur, ut disputemus quibus rebus assequi possimus, ut ea, quæ dicamus, intelligantur, Latine scilicet dicen-

do uerbis usitatis ac proprie demonstratibus ea quæ si  
 gnificari ac declarari uolemus, sine ambiguo uerbo aut  
 sermone, non nimis longa continuatione uerborum, non  
 ualde productis ijs, quæ similitudinis causa ex alijs re-  
 bus transferuntur, non disceptis sententijs, non præpo-  
 sitis temporibus, non confusis personis, non perturbato  
 ordine. quid multa? tam facilis est tota res, ut mihi  
 permirum sæpe uideatur, cum difficilius intelligatur  
 quid patronus uelit dicere, quàm si ipse ille, qui patro-  
 num adhibet, de re sua diceret. Isti enim, qui ad nos  
 causas deferunt, ita nos plerunque ipsi docent, ut non  
 desideres planius dici. Easdem res autem simulac Fu-  
 sius, aut uester æqualis Pomponius agere cœpit, non  
 æque, quid dicant, nisi admodum attendi, intelligo:  
 ita cōfusa est oratio, ita perturbata, nihil ut sit primū,  
 nihil ut secundum: tantaq; insolentia ac turba uerbo-  
 rum, ut oratio, quæ lumen adhibere rebus debet, ea ob-  
 scuritatem & tenebras afferat, atque ut quodam mo-  
 do ipsi sibi in dicendo obstrepere uideantur. Verum si  
 placet, quoniam hæc satis spero, uobis quidem certe  
 maioribus natu, molesta & putida uideri, ad reliqua  
 aliquanto odiosiora pergamus. Atqui uides, inquit  
 Antonius, quàm alias res agamus, quàm te inuiri au-  
 diamus, qui adduci possumus, de me enim conijcio,  
 relictis ut rebus omnibus te sectemur, te audiamus: ita  
 de horridis rebus nitida, de ieiunis plena, de peruul-  
 gatis noua quædam est oratio tua. Faciles enim, in-  
 quit, Antoni partes eæ fuerunt duæ, quas modo percur-  
 ri, uel potius penè præterij, Latine loquendi, planeq;  
 dicendi: reliquæ sunt magnæ, implicate, uariæ, gra-



ues, quibus omnis admiratio ingenij, omnis laus eloquentie continetur. Nemo enim unquam est oratorem, quod Latine loqueretur, admiratus: si est aliter, irrident: neque eum oratorem tantummodo, sed hominem non putant. nemo extulit eum uerbis, qui ita dixisset, ut, qui adessent, intelligerent quid diceret, sed contempsit eum, qui minus id facere potuisset. In quo igitur homines exhorrescunt? quem stupefacti dicentem inuentur? in quo exclamant? quem deum, ut ita dicam, inter homines putant? qui distincte, qui explicite, qui abundanter, qui illuminate & rebus & uerbis dicunt, & in ipsa oratione quasi quendam numerum uersumque cōficiunt, id est quod dico ornate. Qui idem ita moderantur, ut rerum, ut personarum dignitates ferūt, si sunt in eo genere laudandi laudis, quod ego aptum & congruens nominem: qui ita dicerent, eos negauit adhuc se uidisse Antonius, & ijs hoc nomen dixit eloquentiae solis esse tribuendum. Quare omnes istos me auctore deridete, atque contemnite, qui se horum, qui nunc ita appellantur, rhetorum praeceptis omnem oratorum uim complexos esse arbitratur, neque adhuc, quam personam teneant, aut quid profiteantur, intelligere potuerunt. Verum enim oratori, quae sunt in hominum uita, quandoquidem in ea uersatur orator, atque ea est ei subiecta materies, omnia quaesita, audita, lecta, disputata, tractata, agitata esse debent. Est enim eloquentia una quaedam de summis uirtutibus, quanquam sunt omnes uirtutes aequales & pares, sed tamen est species alia magis alia formosa & illustris, sicut haec uis, quae scientiam complexa rerum, sensa

mentis et consilia sic uerbis explicat, ut eos, qui audiunt, quocunque incubuerit, possit impellere: quæ quo maior est uis, hoc est magis probitate iungenda summaque prudentia: quarum uirtutum expertibus si dicendi copiam tradiderimus, non eos quidem oratores effecerimus, sed furentibus quædam arma dederimus. Hanc inquam cogitandi pronunciandique rationem, uimque dicendi ueteres Græci sapientiam nominabant: hinc illi Lycurgi, hinc Pittaci, hinc Solones, atque ab hac similitudine Coruncani nostri, Fabricij, Catones, Scipiones fuerunt, non tam fortasse docti, sed impetu mentis simili et uoluntate. Eadem autem alij prudentia, sed consilio ad uitæ studia dispari, quietem atque otium secuti, ut Pythagoras, Democritus, Anaxagoras, a regendis ciuitatibus totos se ad cognitionem rerum trāstulerunt, quæ uita propter tranquillitatem, et propter ipsius scientiæ suauitatem, qua nihil est hominibus iucundius, plures, quam utile fuit rebus publicis, delectauit. Itaque ut ei studio se excellentissimis ingenijs homines dediderunt, ex ea summa facultate uacui ac liberi temporis, multo plura, quam erat necesse, doctissimi homines, otio nimio, et ingenijs uberrimis affluentes, curanda sibi esse ac quærenda et inuestiganda duxerunt. Nam uetus quidem illa doctrina eadem uidetur et recte faciendi et bene dicendi magistra: neque deiuncti doctores, sed iudem erant uiuendi præceptores atque dicendi: ut ille apud Homerum Phœnix, qui se a Peleo patre Achilli iuueni comitem esse datum dicit ad bellum, ut illum efficeret oratorem uerborum actoremque rerum. Sed ut homines la-

bore assiduo & quotidiano assueti, cum tempestatis causa opere prohibentur, ad pilam se, aut ad talos, aut ad tesseras conferunt, aut etiam nouum sibi ipsi aliquem excogitant in otio ludum: sic illi à negotiis publicis, tanquam ab opere, aut temporibus exclusi, aut uoluntate sua feriati, totos se alij ad poetas, alij ad geometras, alij ad musicos contulerunt, alij etiam, ut didactici, nouum sibi ipsi studium ludumq; pepererunt, atque in ijs artibus, quæ repertæ sunt, ut puerorum mentes ad humanitatem fingerentur atque uirtutem, omne tempus atque ætates suas consumpserunt. Sed quòd erant quidam, ijq; multi, qui aut in re publica propter ancipitem, quæ non potest esse seiuncta, faciendi dicendiq; sapientiam florent, ut Themistocles, ut Pericles, ut Theramenes, aut qui minus ipsi in re uersarentur, sed ut huius tamen eiusdem sapientie doctores essent, ut Gorgias, Thrasymachus, Isocrates: inuenti sunt, qui cum ipsi doctrina & ingenijs abundarent, à re autem ciuili, & à negotiis animi quodam iudicio abhorrent, hanc dicendi exercitationem exagitant atque contemnerent: quorū princeps Socrates, is, qui omnium eruditorum testimonio, totiusq; iudicio Græciæ cum prudentia, & acumine, & uenustate, & subtilitate, tum uero eloquentia, uarietate, copia, quam se cunque in partem dedisset, omnium fuit facile princeps, ijs, qui hæc, quæ nos nunc quærimus, tractarent, agerent, docerent, cum nomine appellarentur uno, quòd omnis rerum optimarum cognitio, atque in ijs exercitatio philosophia nominaretur, hoc commune nomen eripuit,

sapienterq; sentiendi et ornatè dicendi scientiam re coherentes, disputationibus suis separauit: cuius ingenium uariosq; sermones immortalitati scriptis suis Plato tradidit, cum ipse literam Socrates nullam reliquisset.

Hinc dissidium illud extitit quasi linguae atque cordis, absurdum sanè et inutile & reprehendendum, ut alij nos sapere, alij dicere docerent. Nam cum essent plures orti ferè à Socrate, quòd ex illius uarijs & diuersis, & in omnem partem diffusis disputationibus aliud aliud apprehenderat, profeminata sunt quasi familiae dissentientes inter se, & multum disiunctae, & dispares, cum tamen omnes se philosophi Socraticos et dici uellent, & esse arbitrarentur. Ac primo ab ipso Platone Aristoteles & Xenocrates, quorum alter Peripateticorum, alter Academiae nomen obtinuit: deinde ab Antisthene, qui patientiam & duritiam in Socratico sermone maxime adamarat, Cynici primum, deinde Stoici: tum ab Aristippo, quem illa magis uoluptariae disputationes delectarant, Cyrenaica philosophia manauit: quam ille & eius posterì simpliciter defenderant, ij, qui nunc uoluptate omnia metiuntur, dum uerecundius id agunt, nec dignitati satisfaciunt, quam non aspernantur, nec uoluptatem tuentur, quam amplexari uolunt. Fuerunt etiam alia genera philosophorum, qui se omnes ferè Socraticos esse dicebant, Eretricorum, Herilliorum, Megaricorum, Pyrrhonorum: sed ea horum uì et disputationibus sunt iandiu fracta & extincta. Ex illis autem, quae remanent, ea philosophia, quae suscepit patrociniu uoluptatis, etsi cui uerà uideatur, procul abest tamen ab eo uiro, quem quae=

rimus, & quem auctorem publici consilij, & regende ciuitatis ducem, & sententiæ atque eloquentiæ principem in senatu, in populo, in causis publicis esse uolumus: nec ulla tamen ei philosophiæ fiet iniuria à nobis: non enim repelletur inde, quò aggredi cupiet, sed in hortulis quiescet suis, ubi uult, ubi etià recubàs moliter et delicate, nos auocat à rostris, à iudicijs, à curia, fortasse sapienter, ac præsertim à rep. Verum ego non quero nūc, quæ sit philosophia uerissima, sed quæ oratori coniuncta maxime. Quare istos sine ulla contumelia dimittamus, sunt enim & boni uiri, & quoniam sibi ita uidentur, beati: tantumq; eos admoneamus, ut illud, etiam si est uerissimum, tacitum tamen tãquam mysterium teneant, quòd negant uersari in rep. esse sapientis. Nam si hoc nobis atque optimo cuique persuaferint, non poterunt ipsi esse, id quod maxime cupiunt, otiosi. Stoicos autem, quos minime improbo, dimitto tamen, nec eos iratos uereor, quoniam omnino irasci nesciunt: atque hanc ipsi habeo gratiam, quòd soli ex omnibus eloquentiam uirtutem ac sapientiam esse dixerunt: sed utrumque est in his, quod ab hoc, quem instruimus, oratorem ualde abhorreat: uel quòd omnes, qui sapientes non sint, seruos, latrones, hostes, insanos esse dicunt, neque tamen quenquam esse sapientem. ualde autem est absurdum, ei cõcionem, aut senatum, aut ullum cõtum hominum committere, cui nemo illorum, qui adsint, sanus, nemo ciuis, nemo liber esse uideatur. Accedit quòd orationis etiam genus habent fortasse subtile, & certe acutum, sed, ut in oratore, exile, inusitatum, abhorrens ab auribus uulgi, obscurum,

inane, ieiunium, attamen eiusmodi, quo uti ad vulgus nullo modo possis. alia enim & bona & mala uidentur Stoicis, & cæteris ciuibus, uel potius gentibus: alia uis honoris, ignominie, præmij, supplicij: uere an secus, nihil ad hoc tempus: sed ea si sequamur, nullā unquā rem dicendo expedire possimus. Reliqui sunt Peripatetici & Academici, quanquam Academicorum nomen est unum, sententiae duæ. nam Speusippus Platonis sororis filius, & Xenocrates, qui Platonem audierat, & qui Xenocratem Polemo, & Crantor, nihil ab Aristotele, qui unā audierat Platonem, magnopere dissensit, copia fortasse & uarietate dicendi pares nō fuerunt. Arcefilas primū, qui Polemonē audierat, ex uarijs Platonis libris, sermonibusq; Socraticis hoc maxime arripuit, nihil esse certi, quod aut sensibus, aut animo percipi possit: quem ferunt eximio quodam usum lepore dicendi, aspernatum esse omne animi sensusq; iudiciū, primumq; instituisse (quanquam id fuit Socraticū maxime) non quid ipse sentiret ostendere, sed contra id, quod quisque se sentire dixisset, disputare. Hinc hæc recentior Academia emanauit, in qua extitit diuina quædam celeritate ingenij dicēdiq; copia Carneades: cuius ego etsi multos auditores cognoui Athenis, tamen auctores certissimos laudare possum, & socerum meum Scæuolam, qui eum Romæ audiuit adolescens, & Q. Metellum L.F. familiarem meū, clarissimum uirum, qui illum à se adolescente Athenis, iam affectum senectute, multos dies auditum esse dicebat. Hæc autem, ut ex Apennino fluminum, sic ex communi sapientium iugo sunt doctrinarum facta diuortia, ut philo

sophi tanquam in superum mare Ionium defluerent, Græcum quiddam, & portuosum; oratores autem in inferum hoc Thuscum, & Barbarum, scopulosum, atque infestum laberentur, in quo etiam ipse Vlysses errasset. Quare si hac eloquentia, atque hoc oratore contenti sumus, qui sciat aut negare oportere quod arguare, aut, si id non possis, tum ostendere quod is fecerit, qui insimuletur, aut recte factum, aut alterius culpa, aut iniuria, aut ex lege, aut non contra legem, aut imprudentia, aut necessario, aut non eo nomine usurpandum quo arguatur, aut nō ita agi, ut debuerit ac licuerit; & si satis esse putatis, ea, quæ isti scriptores artis docent, discere; quæ multo tamen ornatiùs, quàm ab illis dicuntur, & uberius explicauit Antonius: sed si his contenti estis, atque ijs etiam, quæ dici uoluistis à me, ex ingenti quodam oratore, immensoq; campo in exiguum sanè gyrum compellit. Sin ueterem illum Periclem, aut hunc etiam, qui familiarior nobis propter scriptorum multitudinē est, Demosthenem sequi uultis, & si illam præclaram, & eximiam speciem oratoris perfecti, & pulchritudinem adamastis: aut uobis hæc Carneadia, aut illa Aristotelia uis comprehendenda est. Nanque (ut ante dixi) ueteres illi usque ad Socratem omne omnium rerum, quæ ad mores hominum, quæ ad uitam, quæ ad uirtutē, quæ ad remp. pertinebant, cognitionem & scientiam cum dicendi ratione iungebant: postea dissociati (ut exposui) à Socrate, diserti à doctis, & deinceps à Socraticis item omnibus, philosophi eloquentiā despexerunt, oratores sapientiam: neque quidquam



ex alterius parte tetigerūt, nisi quod illi ab his, aut ab illis hi mutuarentur, ex quo promiscue haurirent, si manere in pristina communione uoluissent. Sed ut Pontifices ueteres propter sacrificiorum multitudinem tres uiros epulones esse uoluerūt, cum essent ipsi à Numa, ut etiam illud ludorum epulare sacrificium facerent, instituti: sic Socratici à se causarum aētores à cōmuni philosophiæ nomine separauerunt, cū ueteres dicendi & intelligendi mirificam societatem esse uoluissent. Quæ cum ita sint, paululum equidem de me deprecabor, & petam à uobis, ut ea, quæ dicam, non de memet ipso, sed de oratore dicere putetis. Ego enim sum is qui cum summo studio patris in pueritia doctus essem, & in forum ingenij tantum quantum ipse sentio, non tantum quantum ipse forsitā uobis uidear, de tulissem, non possum dicere me hæc, quæ nunc complector, perinde, ut dicam discenda esse, didicisse; quippe qui omniū maturrime ad publicas causas accesserim, annosq; natus unum & uiginti nobilissimū hominem & eloquentissimum in iudicium uocarim, cui disciplinæ fuerit forum, magister usus, & leges, & instituta populi Romosq; maiorum. Paulum, sitiens istarum artium, de quibus loquor, gustauī Quæstor in Asia, cum essem æqualem ferè meū ex Academia rhetorem natus Metrodorum illum, de cuius memoria cōmemorauit Antonius: & inde decedens, Athenis: ubi ego diutius essem moratus, nisi Atheniensibus, quod mysteria non referrent, ad quæ biduo serius ueneram, succensuissem. Quare hoc, quòd complector tantam scientiā uimq; doctrinæ, non modo non pro me, sed contra me

est potius : non enim, quid ego, sed quid orator possit, disputo, atque hos omnes, qui artes rhetoricas exponunt, perridiculos. Scribunt enim de litium genere, et de principiis, et de narrationibus : illa uis autem eloquentiae tanta est, ut omnium rerum, uirtutum, officiorum, omnisque naturae, quae mores hominum, quae animos, quae uitam continet, originem, uim, mutationesque teneat ; ea de mores, leges, iura describat, remp. regat, omnia, quae ad quancunque rem pertineant, ornate copioseque dicat. In quo genere nos quidem uersamur tantum, quantum possumus, quantum ingenio, quantum mediocri doctrina, quantum usu ualemus : neque tamen istis, qui in una philosophia quasi tabernaculum uitae suae collocarunt, multum sane in disputatione concedimus. Quid enim meus familiaris C. Velleius afferre potest, quod ob rem uoluptas sit summum bonum, quod ego non copiosius possim uel tutari, si uelim, uel refellere ex illis locis, quos exposuit Antonius, hac dicendi exercitatione, in qua Velleius est rudis, unusquisque nostrum uersatus? Quid est, quod aut Sex. Pompeius, aut duo Balbi, aut meus amicus, qui cum Panætio uixit, M. Visellius, de uirtute homines Stoici possint dicere, quae in disputatione ego his debeam, aut uestrum quisquam concedere? non est philosophia similis artium reliquarum : nam quid faciet in geometria, qui non didicerit? quin in musicis? aut taceat oportebit, aut ne sanus quidem indicetur. Haec uero, quae sunt in philosophia, ingenijs eruuntur ad id, quod in quoque uerisimile est, eliciendum acutis atque acribus, eaque exercitata oratione poliuntur. Hic hic noster uulgaris ora-

tor, si minus erit doctus, attamen in dicendo exercitatus, hac ipsa exercitatione communi, istos quidem nostros uerberabit, neque se ab ijs contemni ac despici sinet. Sin aliquis extiterit aliquando, qui Aristotelio more de omnibus rebus in utranque sententiam possit dicere, & in omni causa duas contrarias orationes præceptis illius cognitis explicare, aut hoc Arcefilæ modo et Carneadis cōtra omne, quod propositum sit, differat, quiq; ad eam rationem adiungat hunc rhetoricum usum, moremq; , exercitationemq; dicendi: is sit uerus, is perfectus, is solus orator. Nam neque sine forensibus neruis satis uehemēs & grauis, nec sine uarietate doctrinæ satis politus, & sapiens esse orator potest. Quare Coracem istum uestrum patiamur nos quidem pullos suos excludere in nido, qui euolent clamatores odiosi ac molesti, Pamphilumq; nescio quem sinamus in infulis tantam rem tanquam pueriles delicias aliquas depingere: nosq; ipsi hac tam exigua disputatione hesterni & hodierni diei totum oratoris munus explicemus, dummodo illa res tanta sit, ut omnibus philosophorum libris, quos nemo oratorum istorum unquam attigit, comprehensa esse uideatur. Tum Catulus, Haudquaquam hercle, inquit, Crasse mirandum est, esse in te tantam dicendi uel uim, uel suauitatem, uel copiam: quem quidem antea natura rebar ita dicere, ut mihi non solum orator summus, sed etiam sapientissimus homo uiderere: nunc intelligo illa te semper etiam potiora duxisse, quæ ad sapientiam spectarent, atque ex his hanc dicendi copiam fluxisse: sed tamen cum omnes gradus ætatis

recordor tuæ , cumq; uitam tuam ac stadia considero;  
 neque, quo tempore ista didiceris, uideo, nec magnope-  
 re te istis studijs, hominibus, libris intelligo deditu: neq;  
 tamē possum statuere, utrum magis mirer, te illa, qua  
 mihi persuades maxima esse adiumenta, potuisse in tuis  
 tantis occupationibus perdiscere , an, si non potueris,  
 posse isto modo dicere . Hic Crassus , Hoc tibi, inquit,  
 Catule primum persuadeas uelim , me non multo se-  
 tus facere , cum de oratore disputem , ac facerem , si  
 esset mihi de histrione dicendum : negarem enim posse  
 eum satisfacere in gestu , nisi palæstram , nisi saltare  
 didicisset : neque, ea cum dicerem , me esse histrionem  
 necesse esset , sed fortasse non stultum alieni artificij  
 existimatorem . Similiter nunc de oratore, uestro im-  
 pulsū loquor, summo scilicet . Semper enim, quacun-  
 quē de arte , aut facultate quæritur , de absoluta &  
 perfecta quæri solet. Quare si iam me uultis esse ora-  
 torem, si etiam sat bonum, si bonum denique, non rea-  
 pugnabo : ( quid enim nunc sim ineptus ? ita me exi-  
 stimari scio ) quod si ita est, summus tamen certe non  
 sum. neque enim apud homines res est ulla difficilior,  
 neque maior , neque quæ plura adiumenta doctrinæ  
 desideret . Attamen, quoniam de oratore nobis dispu-  
 tandum est, de summo oratore dicam necesse est.  
 Vis enim & natura rei, nisi perfecta ante oculos  
 ponitur , qualis & quanta sit , intelligi non potest.  
 Me autem Catule fateor neque hodie in istis libris ,  
 & cum istis hominibus uiuere: nec uero, id quod tu re-  
 cte commeministi, ullū unquam habuisse sepositū tem-  
 pus ad discendum, ac tantum tribuisse doctrinæ tēpo-

ris, quantum mihi puerilis ætas, forenses. seræ concesserint. At si quæris Catule, de doctrina ista quid ego sentiam: non tantum ingenioso homini, & ei, qui forum, qui curiam, qui causas, qui remp. spectet, opus esse arbitror temporis, quantum sibi ij sumpserunt, quos discentes uita defecit. omnes enim artes aliter ab ijs tractantur, qui eas ad usum transferunt; aliter ab ijs, qui ipsarum artium tractatu delectati, nihil in uita sunt aliud acturi. Magister hic Samnitium summam senectute est, & quotidie commentatur: nihil enim curat aliud, atque uelocius puer addidicerat. sed quod erat aptus ad illud, totumq; cognorat, fuit, ut est apud Lucilium,

\*

Quamuis bonus ipse

Samnis, in ludo ac rudibus cuius satis asper.

sed plus operæ foro tribuebat, amicis, rei familiari. Valerius quotidie cantabat: erat enim scenicus. quid faceret aliud? At Numerius Furius noster familiaris, cum est comodum, cantat: est enim paterfamilias, est Eques Romanus, puer didicit, quod discendum. Eadem ratio est harum artium maximarum: dies & noctes uirum summa uirtute & prudentia uidebamus philosopho cum operam daret Q. Tiberonem: at eius auunculum uix intelligeres id agere, cum ageret tamē, Africani. Ista dicuntur facile, si & tantum sumas, quantum opus sit, & habeas qui docere fideliter possit, & scias etiam ipse discere. Sed si tota uita nihil uelis aliud agere, ipsa tractatio & questio quotidie ex se gignit aliquid, quod cum desidiosa delectatione uel stiges: ita fit, ut agitatione rerum sit infinita cognitio,

facilis usus doctrinam confirmet, mediocris opera tribuatur, memoria studiumque permaneat. libet autem semper discere, ut si uelim ego talis optime ludere, aut pile studio tenear, etiam fortasse si assequi non possim: at alij quia preclare faciunt, uehementius, quam causa postulat, delectantur, ut Titius pila, Brulla talis.

Quare nihil est, quod quisquam magnitudinem artium ex eo, quod senes discunt, pertimescat: nanque aut senes ad eas accesserunt, aut usque ad senectutem in studijs detinentur, aut sunt tardissimi. Res quidem se mea sententia sic habet, ut nisi quod quisque cito potuerit, nunquam omnino possit perdiscere. Iam iam, inquit Catulus, intelligo Crasse quid dicas, et hercule assentior: satis uideo tibi, homini ad perdiscendum acerrimo, ad ea cognoscenda, quae dicis, fuisse temporis: Pergis ne, inquit Crassus, me, quae dicam, de me non de re putare dicere? Sed iam si placet ad instituta redeamus. Mihi uero, Catulus inquit, placet. Tum Crassus, Quorsum igitur haec spectat, inquit, tam longe, et tam alte repetita oratio? haec duae partes, quae mihi supersunt, illustrandae orationis, ac totius eloquentiae cum mulandae, quarum altera dici postulat ornate, altera apte, hanc habent uim, ut sit quammaxime iucunda, quammaxime in sensus eorum, qui audiunt, influat, et quamplurimis sit rebus instructa. Instrumentum autem hoc forense, litigiosum, acre, tractum ex uulgi opinionibus, exiguum sane atque mendicium est: illud rursus ipsum, quod tradunt isti, qui profitentur se dicendi magistros, non multo est maius, quam illud uulgare ac forense. Apparatu nobis opus est, et rebus ex quibus

sitis undique, & collectis, arcessitis, comportatis, ut tibi  
 Caesar faciendū est ad annum, ut ego in Aedilitate la-  
 boravi, quod quotidianis & uernaculis rebus satisfac-  
 cere me posse huic populo non putabam. Verborū eli-  
 gendorum, & collocandorum, & concludendorum fa-  
 cilis est uel ratio, uel sine ratione ipsa exercitatio. Rerū  
 est sylua magna, quam cum Græci iam non tenerent,  
 ob eamq; causam iuuentus nostra dediceret penè discē-  
 do, etiam Latini, si dijs placet, hoc biennio magistri di-  
 cendi extiterunt, quos ego Censor edicto meo sustule-  
 ram, non quo (ut nescio quos dicere aiebant) acui in-  
 genia adolescentium nollem, sed contra ingenia obtū-  
 di nolui, corroborari impudentiam: nam apud Græ-  
 eos, cuiusmodi essent, uidebam tamen esse, præter hanc  
 exercitationem linguæ, doctrinam aliquam, & huma-  
 nitatem dignam scientia: hos uero novos magistros ni-  
 hil intelligebam posse docere, nisi ut auderent: quod  
 etiam cum bonis rebus coniunctum, per se ipsum est  
 magnopere fugiendum. hoc cum unum traderetur,  
 & cum impudentia ludus esset, putavi esse Censoris,  
 ne longius id serperet, providere. quanquam nō hæc  
 ita statim atque decerno, ut desperem Latine ea, de  
 quibus disputauimus, tradi ac perpoliri: patitur enim  
 & lingua nostra, & natura rerum, ueterem illam,  
 excellentemq; prudentiam Græcorū ad nostrum usum,  
 moremq; transferri: sed hominibus opus est eruditis,  
 qui adhuc in hoc quidē genere nostri nulli fuerūt: sin-  
 quando extiterint, etiam Græcis erunt antepponendi.  
 Ornatur igitur oratio genere primum, & quasi co-  
 lore quodam, & succo suo: nam ut grauis, ut suauis



uis, ut erudita sit, ut liberalis, ut admirabilis, ut polita, ut sensus, ut dolores habeat, quantum opus sit, non est singulorum articulorum, in toto spectantur hæc corpore. Ut porro conspersa sit quasi uerborum sententiarumq; floribus, id non debet esse fuscum æquabiliter per omnem orationem, sed ita distinctum, ut sint quasi in ornatu disposita quedam insignia & lumina. Genus igitur dicendi est eligendum, quod maxime teneat eos, qui audiant, & quod non solum deleat, sed etiam sine satietate deleat. (non enim à me iam expectari puto, ut moneam, ut caueatis, ne exilis, ne inculta sit uestra oratio, ne uulgaris, ne obsoleta: aliud quiddam maius & ingenia me hortantur uestra, & ætates) difficile enim dictu est, quanam causa sit, cur ea, quæ maxime sensus nostros impellunt, uoluptate, & specie prima acerrime commouent, ab ijs celerrime fastidio quodam & satietate abalienemur. Quanto colorum pulchritudine, et uarietate floridiora sunt in picturis nouis pleraque, quàm in ueteribus? quæ tamen etiam si primo aspectu nos ceperunt, diutius non delectant, cum iidem nos in antiquis tabulis illo ipso horrido obsoletoq; teneamur. Quanto moltores sunt, & delicatiores in cantu flexiones, & falsæ uoculæ, quàm certæ & seueræ? quibus tamen non modo austeri, sed, si sæpius fiunt, multitudo ipsa reclamationem. Licet hoc uidere in reliquis sensibus, unguentis minus diu nos delectari summa & acerrima suauitate cõditis, quàm his moderatis; & magis laudari quod terram, quàm quod crocum olere uideatur: in ipso tactu esse modum et mol-

litudinis & leuitatis. Quin etiam gustatus, qui est sensus ex omnibus maxime uoluptarius, quiq; dulcitudine præter cæteros sensus comouetur, quàm cito id, quod ualde dulce est, aspernatur ac respuit? quis potione  
 \* uti, aut cibo dulci diutius potest? Quàm utroque in genere ea, quæ leuiter sensum uoluptate moueant, facillime fugiant satietatem: sic omnibus in rebus uoluptatibus maximis fastidium finitimum est. Quo hoc minus in oratione miremur, in qua uel ex poetis, uel ex oratoribus possumus iudicare, concinnam, distinctam, ornata, festiuam, sine intermissione, sine reprehensione, sine uarietate, quâuis claris sit coloribus picta uel poetis, uel oratio, non posse in delectatione esse diuturna. atque eo citius in oratoris, aut in poetæ cincinnis ac fuco offenditur, quòd sensus in nimia uoluptate natura, non mente satiantur: in scriptis & in dictis, non aurium solum, sed animi iudicio etiam magis, infucata uitia noscuntur. Quare, bene & præclare, quamuis nobis sæpe dicatur: belle & festiue, nimium sæpe uolo. quanquam illa ipsa exclamatio, Non potest melius, sit uelim crebra, sed habeat tamen illa in dicendo admiratio ac summa laus umbram aliquam & recessum, quo magis id, quod erit illuminatū, extare atque eminere uideatur. Nunquam agit hunc uersum Roscius eo gestu, quo potest,  
 Nā sapiēs uirtuti honore præmiū, haud prædam petit:  
 sed abiicit prorsus, ut in proximo,  
 Sed quid uideo? ferro septus possidet sedes sacras,  
 Incidat, aspiciat, admiretur, stupefeat. Quid ille alter?  
 Quid petam præsidij? Quàm leniter, quàm remisse,

quàm non actuose? instat enim,  
O pater, o patria, o Priami domus.

In quo tanta commoueri actio non posset, si esset consumpta superiore motu & exhausta. Neque id actores prius uiderunt, quàm ipsi poetae, quàm denique illi etiam, qui fecerunt modos, à quibus utrisque summittitur aliquid, deinde augetur, extenuatur, inflatur, uariatur, distinguitur. Ita sit nobis igitur ornatus & suauis orator, nec tamen potest aliter esse, ut suauitatem habeat austeram & solidam, non dulcem atque decoctam. nam ipsa ad ornandum præcepta, quæ dantur, eiusmodi sunt, ut ea quamuis uitiosissimus orator explicare possit. Quare, ut ante dixi, primum sylvarum ac sententiarum comparanda est, qua de parte dixit Antonius: hæc formanda filo ipso & genere orationis, illuminanda uerbis, uarianda sententijs. Summa autem laus eloquentiæ est, amplificare rem ornando: quod ualet non solùm ad augendum aliquid & tollendum altius dicendo, sed etiam ad extenuandũ atque abijciendum. Id desideratur omnibus ijs in locis, quos ad fidem orationis faciendam adhiberi dixit Antonius, uel cum explanamus aliquid, uel cum conciliamus animos, uel cum concitamus. Sed in hoc, quod postremum dixi, amplificatio potest plurimum, eaq; una laus oratoris est, & propria maxime. Etiam maior est illa exercitatio, quam extremo sermone instruxit Antonius, (primo reiiciebat) laudandi & uituperandi. Nihil est enim ad exaggerandam & amplificandam orationem accommodatius, quàm utrunque horũ cumulatissime facere posse. Consequentur etiam illi loci,

qui quanquam proprii causarum, & inherentes in eorum nervis esse debent, tamen quia de universa retrahantur solent, communes à veteribus nominati sunt: quorum partim habent vitiorum et peccatorum acrem quandam cum amplificatione incusationem, aut querelam, contra quam dici nihil solet, nec potest, ut in depeculatorem, in proditorem, in parricidam, quibus uti confirmatis criminibus oportet: aliter enim ieiuni sunt atque inanes. Alij autem habent deprecationem aut miserationem: alij vero ancipites disputationes, in quibus de universo genere in utranque partem differi copiose licet. Quae exercitatio nunc propria duarum philosophiarum, de quibus ante dixi, putatur: apud antiquos erat eorum, à quibus omnis de rebus forensibus dicendi ratio & copia petebatur. De virtute enim, de officio, de æquo & bono, de dignitate, honore, ignominia, præmio, poena, similibusque de rebus in utranque partem dicendi, omnino & vim & artem habere debemus: sed quoniam de nostra possessione depulsi in parvo & eo litigioso prædiolo relictii sumus, & aliorum patroni nostra tenere tuerique non potuimus: ab ijs, quod indignissimum est, qui in nostrum patrimonium irruerunt, quod opus est nobis, mutuemur. Dicunt igitur nunc quidem illi, qui ex particula parva urbis, ac loci nomen habent, & Peripatetici philosophi, aut Academici nominantur, olim autem propter eximiam rerum maximarum scientiam à Grecis Politici philosophi appellati universarum rerum publicarum nomine vocabantur, omnem civilem orationem in horum alterutro genere versari, aut definita controversia certis temporibus ac

reis; hoc modo, placeat ne à Carthaginensibus capti-  
uos nostros redditis suis recuperari: aut infinite de uni-  
uerso genere quærentis, quid omnino de captiuis sta-  
tuendum, ac sentiendum sit: atque horum superius  
illud genus causam, aut controuersiam appellant,  
eamq; tribus, lite, aut deliberatione, aut laudatione  
definiunt: hac autem altera quæstio infinita & quasi  
proposita, consultatio nominatur. atque hætenus lo-  
quuntur. Etiam hac instituendo diuisione utuntur,  
sed ita, non ut iure aut iudicio, ut denique recuperare  
amissam possessionem, sed ut ex iure civili surculo de  
fringendo usurpare uideantur. Nam illud alterum  
genus, quod est temporibus, locis, reis definitum, ob-  
tinent, atque id ipsum lacinia. Nunc enim apud Phi-  
lonem, quem in Academia maxime uigere audio,  
etiam harum iam causarum cognitio exercitatioq; ce-  
lebratur. Alterum uero tantummodo in prima arte  
tradenda nominant, & oratoris esse dicunt: sed ne-  
que uim, neque naturam eius, nec partes, nec genera  
proponunt: ut præteriri omnino fuerit satius, quàm  
attemptatum deferi. nunc enim inopia reticere intelli-  
guntur, tum iudicio uiderentur. Omnis igitur res ean-  
dem habet naturam ambigendi, de qua quæri & dis-  
ceptari potest, siue in infinitis consultationibus disce-  
ptatur, siue in ijs causis, quæ in civili, atque in fo-  
rensi disceptatione uersantur: neque est ulla, quæ non  
aut ad cognoscendi, aut ad agendi uim rationemq;  
referatur. nam aut ipsa cognitio rei scientiaq;  
perquiritur, ut, Virtus suam ne propter dignitatem;  
an propter fructus aliquos expetatur: aut agendi

consilium exquiritur, ut sit ne sapienti capeſſenda res publica. Cognitionis autem tres modi, coniectura, deſinitio, et, ut ita dicam, conſecutio. Nam quid in re ſit, coniectura quaeritur, ut illud, Sit ne in humano genere ſapientia. Quam autem vim quaeque res habeat, deſinitio explicat, ut ſi quaeratur, quid ſit ſapientia. Conſecutio autem traëtatur, cum, quid quaque rem ſequatur, inquiritur, ut illud, Sit ne aliquando mentiri boni uiri. Redeunt rursus ad coniecturam, eamq; in quatuor genera diſpertunt: nam, aut quid ſit, quaeritur, hoc modo: Natura ne ſit ius inter homines, an opinio- nibus: aut quae ſit origo cuiusque rei, ut quod ſit initium legum aut rerum publicarum: aut cauſa & ratio, ut ſi quaeratur, cur doctiſſimi homines de maximis rebus diſſentiant: aut de immutatione, ut ſi diſputetur, num interire uirtus in homine, aut nũ in uitium poſſit conuerti. Definitionis autem ſunt diſceptationes, ut cum quaeritur, quid in communi mente quaſi impreſſum ſit: ut ſi diſſeratur, id ne ſit ius, quod maximae parti ſit utile: aut cũ, quid cuiusque ſit proprium, exquiritur, ut ornate dicere proprium ne ſit oratoris, an id etiam aliquis prætereā poſſit: aut cum res diſtribuitur in partes, ut ſi quaeratur, quot ſint genera rerum expetendarum, ut ſint ne tria, corporis, animi, externa- rumq; rerum: aut cum, quae forma & quaſi naturalis nota cuiusque ſit, deſcribitur, ut ſi quaeratur auari ſpecies, ſeditioſi, glorioſi. Conſecutionis autem duo prima quaestionum genera ponuntur. nam aut ſimplex eſt diſceptatio, ut ſi diſſeratur, expetenda ne ſit gloria: aut ex comparatione, laus an diuitiae magis expeten-

de sint. Simplicium autem sunt tres modi, de expetendis fugiendisue rebus, ut expetendi ne honores sint, num fugienda paupertas: de æquo aut iniquo, æquum ne sit ulcisci iniurias etiam propinquorum: de honesto aut turpi, ut hoc, sit ne honestū gloriæ causa mortem obire. Comparationis autem duo sunt modi: unus, cum, idem ne sit, an aliquid intersit, queritur: ut metueret & uereret, ut rex & tyrannus, ut assentator & amicus: alter, cum, quid præstet aliud alijs, queritur: ut illud, optimi ne cuiusque sapientes, an populari laude ducantur. Atque hæc quidem disceptationes, quæ ad cognitionem referuntur, sic ferè à doctissimis hominibus describuntur. Quæ uero referuntur ad agendum, aut in officijs disceptatione uersantur, quo in genere quid rectum faciendumque sit queritur, cui loco omnis uirtutum & uitiorum est sylua subiecta: aut in animorum aliqua permotione aut gignenda, aut sedida tollendaue tractantur. huic generi subiectæ sunt cohortationes, obiurgationes, cōsolationes, miserationes, omnisque ad omnem animi motum & impulsio, et, si ita res feret, mitigatio. Explicatis igitur his generibus ac modis disceptationum omnium, nihil sanè ad rem pertinet, si qua in re discrepauit ab Antonij diuisione nostra partitio: eadem enim sunt membra in utrisque disputationibus, sed paulo secus à me, atque ab illo, partita ac distributa. Nunc ad reliqua progrediar, meque ad meum munus pensumque reuocabo. Nam ex illis locis, quos exposuit Antonius, omnia sunt ad quæque genera questionum argumenta sumenda: sed alijs generibus alijs loci magis erunt apti: de quo, non tã quia.



longum est, quàm quia perspicuum, dici nihil est neces-  
se. Ornatissimæ sunt igitur orationes eæ, quæ latissime  
uagantur, & à priuata ac singulari cōtrouersia se ad  
uniuersi generis uim explicandam conferunt & con-  
uertunt, ut ij, qui audiant, natura & genere & uni-  
uersa re cognita, de singulis reis & criminibus & liti-  
bus statuere possint. Hanc ad consuetudinem exercita-  
tionis nos adolescentes est cohortatus Antonius, atque  
à minutis angustisq; concertationibus ad omnem uim  
uarietatemq; differendi traducendos putauit. Quare  
non est paucorum libellorum hoc munus, ut ij, qui scri-  
pserunt de dicendi ratione, arbitrati sunt, neque Tu-  
sculani atque huius ambulationis antemeridianæ, aut  
nostræ pomeridianæ sessionis. Non enim solum acue-  
da nobis neque procudenda lingua est, sed onerandum  
complendumq; pectus maximarū rerum & plurima-  
rum suauitate, copia, uarietate. Nostra est enim (si  
modo nos oratores sumus, si in ciuium disceptationi-  
bus, si in periculis, si in deliberationibus publicis adhi-  
bendi auctores & principes sumus) nostra est, inquā,  
omnis ista prudētiæ doctrinæq; possessio, in quā homi-  
nes quasi caducam atque uacuam abundātes otio no-  
bis occupatis inuolauerunt, atque etiam aut irridentes  
oratorem, ut ille in Gorgia Socrates, cauillantur, aut  
aliquid de oratoris arte paucis præcipiunt libellis, eosq;  
rhetoricos inscribunt: quasi non illa sint propria rhe-  
torum, quæ ab ijsdem de iustitia, de officio, de ciui-  
tatibus instituendis & regendis, de omni uiuēdi, deni-  
que etiam de naturæ ratione dicuntur. Quæ quoniam  
iam aliunde non possumus, sumenda sunt nobis ab ijs

ipsis, à quibus expilati sumus, dummodo illa ad hanc  
ciuilem scientiam, quò pertinent, & quam intuetur,  
transferamus, neque (ut ante dixi) omnem tera=  
mus in his discendis rebus ætatem, sed cum fontes ui=  
derimus, quos nisi qui celeriter cognorit, nunquam co=  
gnosceret omnino, tum, quotiescunque opus erit, ex ijs  
tantum, quantum res petet, hauriemus. Nam ne=  
que tam est acris acies in naturis hominum & inge=  
nijs, ut res tantas quisquam nisi monstratas possit ui=  
dere, neque tanta tamen in rebus obscuritas, ut eas  
nò penitus acri uir ingenio cernat, si modo aspexerit.  
In hoc igitur tanto, tamq; immenso campo cum liceat  
oratori uagari libere, atque, ubicunque constiterit, con=  
sistere in suo, facile suppeditat omnis apparatus orna=  
tusq; dicendi. Rerum enim copia uerborum copiam  
gignit: & si est honestas in rebus ipsis, de quibus di=  
citur, existit ex rei natura quidam splendor in uerbis.  
sit modo is, qui dicet aut scribet, institutus liberaliter  
educatione doctrinaq; puerili, & flagret studio, & à  
natura adiuuetur, & in uniuersorum generum insi=  
nitls disceptationibus exercitatus, ornatissimos scripto=  
res oratoresq; ad cognoscendum imitandumq; cognos=  
cit: nã ille haud sanè, quemadmodum uerba struat  
& illuminet, à magistris istis requireret. Ita facile  
in rerum abundantia ad orationis ornamenta sine  
duce, natura ipsa, si modo est exercitata, labetur.  
Hic Catulus, Dij immortales, inquit, quantam rerum  
uarietatem, quantam uim, quantam copiam Crasse cõ=  
plexus es, quantisq; ex angustijs oratorem educere au=  
sus es, & in maiorum suorum regno collocare. Nãque

# DE ORATORE

illos ueteres doctores auctoresq; dicendi nullum genus  
 disputationis à se alienū putasse accepimus, semperq;  
 esse in omni orationis ratione uersatos. ex quibus He-  
 leus Hippias, cū Olympiam uenisset, maxima illa quin-  
 quennali celebritate ludorum, gloriatus est cuncta pe-  
 nè audiente Græcia, nihil esse ulla in arte rerum om-  
 nium, quod ipse nesciret: nec solū has artes, quibus li-  
 berales doctrinæ atque ingenuæ continerentur, geome-  
 triam, musicam, literarum cognitionem & poetarum,  
 atque illa, quæ de naturis rerum, quæ de hominū mo-  
 ribus, quæ de rebus publicis dicerentur; sed annulum  
 quem haberet, pallium quo amictus, soccos quibus in-  
 ductus esset, se sua manu confecisse. scilicet nimis hic  
 quidem est progressus, sed ex eo ipso est coniectura fa-  
 cilis, quantum sibi illi ipsi oratores de præclarissimis ar-  
 tibus appetierint, qui ne sordidiores quidē repudiarent.  
 Quid de Prodicō Cio, quid de Thrasymacho Chalce-  
 donio, de Protagora Abderita loquar? quorum unus-  
 quisque plurimū temporibus illis etiam de natura re-  
 rum & disseruit, & scripsit. Ipse ille Leontinus Gora-  
 gias, quo patrono (ut Plato uoluit) philosopho succu-  
 buit orator, qui aut nō est uictus unquā à Socrate, ne-  
 que sermo ille Platonis uerus est: aut, si est uictus, elo-  
 quētiō uidelicet fuit, et disertior Socrates, et, ut tu ap-  
 pellas, copiosior et melior orator. Sed hic in illo ipso Pla-  
 tonis libro de omni re, quæcunque in disceptationem  
 quæstionemq; uocaretur, se copiosissime dicturum esse  
 profitetur: isq; princeps ex omnibus ausus est in con-  
 uentu poscere, quæ de re quisque uellet audire: cui tā-  
 tus honos habitus est à Græcia, soli ut ex omnibus  
 Delphis

Delphis non inaurata statua, sed aurea statueretur. Atque ij, quos nominaui, multiq; præterea summi discendi doctores uno tempore fuerunt, ex quibus intelligi potest, ita se rem habere, ut tu Crasse dicis, oratorisq; nomen apud antiquos in Græcia maiore quadam uel copia, uel gloria floruisse. Quo quidem magis dubito, tibi ne plus laudis, an Græcis uituperationis esse tribuendum statuam: cum tu in alia lingua ac moribus natus, occupatissima in ciuitate uel priuatorum negotijs penè omnibus, uel orbis terræ procuratione, ac summi imperij gubernatione distractus, tantam uim rerum cognitionemq; comprehenderis, eamq; omnem cum eius, qui consilio & oratione in ciuitate ualeat, scientia atque exercitatione sociaris; illi nati in literis, ardentesq; his studijs, otio uero diffuentes, non modo nihil acquisierint, sed ne relictum quidem, & traditum, & suum conseruauerint. Tum Crassus, Non in hac, inquit, una Catule re, sed in alijs etiam compluribus, distributione partium ac separatione magnitudines sunt artium diminutæ. An tu existimas, cū esset Hippocrates ille Coss, fuisse tū alios medicos qui morbis, alios qui uulneribus, alios qui oculis mederentur? non geometriam Euclide aut Archimede, num musicam Damone aut Aristoxeno; num ipsas literas Aristophane aut Callimacho tractante tam discerptas fuisse, ut nemo genus uniuersum complecteretur, atque ut alius aliam sibi partem, in qua elaboraret, seponeret? Equidem sæpe hoc audiui de patre & de socero meo, nostros quoque homines, qui excellere sapientiæ gloria uellent, omnia, quæ quidem tum hæc ciuitas nosset, solitos esse comple

Eli. Meminerant illi Sex. Aelium, M. uero Manlium nos etiam uidimus transuerso ambulante foro: quod erat insigne, eum, qui id faceret, facere ciuibus omnibus consilij sui copiam: ad quos olim & ita ambulantes, & in solio sedentes domi sic adibatur, non solū ut de iure ciuili ad eos, uerum etiam de filia collocanda, de fundo emendo, de agro colendo, de omni denique aut officio aut negotio referretur. Hæc fuit P. Crassi illius ueteris, hæc T. Coruncani, hæc proauj generi mei Scipionis prudentissimi hominis sapientia, qui omnes pontifices maximi fuerunt, ut ad eos de omnibus diuinis atque humanis rebus referretur: ijdemq; & in senatu, & apud populum, & in causis amicorū, & domi, & militiæ consilium suum fidemq; præstabant. Quid enim M. Catoni præter hanc politissimam doctrinam transmarinam atque aduentitiam defuit? nūquid ius ciuile didicerat, causas non dicebat? aut quid poterat dicere, iuris scientiam negligebat? at utroque in genere & laborauit, & præstitit. num propter hanc ex priuatorum negotijs collectam gratiam tardior in rep. capeffenda fuit? nemo apud populum fortior, nemo melior senator, idem facile optimus Imperator: denique nihil in hac ciuitate tēporibus istis sciri disci uē potuit, quod ille non cum inuestigarit & scierit, tum etiam conscripserit. Nunc contra plerique ad honores adipiscendos, & ad rempublicam gerendam nudi ueniunt atque inermes, nulla cognitione rerum, nulla scientia ornati. Sin aliquis excellit unus ē multis, effert se, si unum aliquid affert, ut bellicam uirtutem, aut usum aliquem militarem, quæ sanē nunc

quidem obsoleuerunt: aut iuris scientiam, ne eius quidem uniuersi: nam pontificium, quod est coniunctum, nemo discit: aut eloquentiam, quam in clamore & in uerborum cursu positam putant: omnium uero bonarum artium, denique uirtutum ipsarum societatem cognitionemq; non norunt. Sed ut ad Græcos referam orationem (quibus carere in hoc quidem sermonis genere non possumus: nam ut uirtutis à nostris, sic doctrinæ sunt ab illis exempla petenda) septem fuisse dicuntur uno tempore, qui sapientes & haberentur et uocarentur: hi omnes præter Mileesium Thalem ciuitatibus suis præfuerunt. Quis doctior iisdem illis temporibus, aut cuius eloquentia literis instructior fuisse traditur, quàm Pisistrati? qui primus Homeri libros confusos antea, sic disposuisse dicitur ut nunc habemus. Non fuit ille quidem ciuibus suis utilis, sed ita eloquentia floruit, ut literis doctrinæq; præstaret. Quid Pericles? de cuius dicendi copia sic accepimus, ut cum contra uoluntatem Atheniensem loqueretur pro salute patriæ, seuerius tamē id ipsum, quod ille contra populares homines diceret, popolare omnibus & iucundum uideretur: cuius in labris ueteres comici, etiam cum illi maledicerent, (quod tum Athenis fieri licebat) leporem habitasse dixerunt: tantamq; in eum fuisse, ut in eorum mentibus, qui audissent, quasi aculeos quosdam relinqueret. At hunc non declamator aliquis ad clepsydram latrare docuerat, sed, ut accepimus, Clazomenius ille Anaxagoras, uir summus in maximarum rerum scientia. Itaque hic doctrina, consilio, eloquentia excellens, quadraginta

annos præfuit Athenis, & urbanis eodem tempore & bellicis rebus. Quid Critias? quid Alcibiades? ciuitatibus suis quidem non boni, sed certe docti atque eloquentes, non ne Socraticis erant disputationibus eruditi? Quis Dionem Syracusum doctrinis omnibus expoliuit? non Plato? atque cum idem ille non linguæ solum, uerum etiam animi ac uirtutis magister, ad liberandam patriam impulit, instruxit, armauit. Alijs ne igitur artibus hunc Dionem instituit Plato? alijs Isocrates clarissimum uirum Timotheum Cononis præstantissimi Imperatoris filium, summum ipsum Imperatorem hominemque doctissimum? aut alijs Pythagoreus ille Lysias Thebanum Epaminondæ, haud scio an summum uirum unum omnis Græciæ? aut Xenophon Agesilaum? aut Philolaum Archytas Tarentinus? aut ipse Pythagoras totam illam ueterem Italiæ Græciam, quæ quondam magna uocitata est? equidem non arbitror. Sic enim uideo unam quandam omnium rerum, quæ essent homine erudito dignæ, atque eo, qui in re. uellet excellere, fuisse doctrinam: quam qui accepissent, si iisdem ingenio ad pronūciandum ualuisent, & se ad dicendum quoque non repugnante natura dedissent, eloquentia præstitisse. Itaque ipse Aristoteles, cum florere Isocratem nobilitate discipulorum uideret, quod ipse suas disputationes à causis forensibus et ciuilibus ad inanem sermonis elegantiam transtulisset, mutauit repente totam formam propè disciplinæ suæ, uersumque quendam Philoctetæ paulo secus dixit. ille enim turpe sibi ait esse tacere cum Barbaris: hic autem, cum Isocratem pateretur dicere. itaque ornauit & illu-



strauit doctrinam illam omnem rerumq; cognitionem cum orationis exercitatione coniunxit. Neque uero hoc fugit sapientissimum regem Philippum, qui hunc Alexandro filio doctorem accierit, à quo eodem ille et agendi acciperet præcepta, & eloquedi. Nunc siue quæ uolet cum philosophum, qui copiam nobis rerum orationisq; tradat, per me appellet oratorem licet: siue hunc oratorem, quem ego dico sapientiam iunctam habere eloquentiam, philosophum appellare malit, non impediam: dummodo hoc constet, neque infantiam eius, qui rem non rit, sed eam explicare dicendo non queat, neque inscientiam illius, cui res non suppetit, uerba non desint, esse laudandam: quorum si alterum sit optandum, malim quidem indifertam prudentiam, quam stultitiam loquacem. Sin querimus, quid unum excellat ex omnibus: docto oratori palma danda est: quem si patiuntur eundem esse philosophum, sublata controuersia est: sin eos disiungent, hoc erunt inferiores, quod in oratore perfectio inest illorum omnis scientia, in philosophorum autem cognitione non continuo inest eloquentia: quæ quauis contemnatur ab eis, necesse est tamen aliquem cumulū illorum artibus asferre uideatur. Hæc cum Crassus dixisset, parumper & ipse conticuit, & ceteris silentium fuit. Tum Cotta, Equidem, inquit, Crasse non possum queri, quod mihi uideare aliud quiddam, & non id, quod suscepis, disputasse: plus enim aliquanto attulisti, quam tibi erat tributum à nobis ac denunciatum. sed certe hæ partes fuerunt tue, de illustranda oratione ut diceret: & eras ipse iam ingressus, atque in quatuor partes omnem orationis laudem descripseras: cumq; de duaz

bus primis nobis quidem satis, sed, ut ipse dicebas, celeriter exigueq; dixisses, duas tibi reliquas feceras, quæ ad modum primum ornate, deinde etiã apte diceremus: quò cum ingressus esses, repente te quasi quidam æstus ingenij tui procul à terra abripuit, atque in altum à conspectu penè omnium abstraxit, omnemq; rerum scientiam complexus, non tu quidem eam nobis tradidisti, (neque enim fuit tam exigui temporis) sed apud hos quid profeceris, nescio: me quidem in Academiam totum compulisti: in qua uelim sit illud, quod sæpe posuisti, ut non necesse sit cõsumere ætatem, atque ut possit is illa omnia cernere, qui tantum modo aspexerit: sed etiã si est aliquanto spissius, aut si ego sum tardior, profecto nunquam cõquiescam, neque defatigabor ante, quàm illorum ancipites uias rationesq; & pro omnibus, & contra omnia disputandi percepero. Tũ Cæsar, Vnum, inquit, me ex tuo sermone maxime Crasse commouit, quòd eum negasti, qui non cito quid didicisset, unquam omnino posse perdiscere: ut mihi non sit difficile periclitari, & aut statim percipere ista, quæ tu uerbis ad cœlum extulisti: aut si non potuerim, tempus non perdere, cum tamen his nostris possim esse contentus. Hic Sulpitius, Ego uero, inquit, Crasse neque Aristotelem istum, neque Carneadem, nec philosophorum quenquam desidero, uel me licet existimes desperare posse ista perdiscere, uel id, quod facio, contemnere: mihi rerum forensium & communium uulgaris hæc cognitio satis magna est ad eam, quam specto, eloquentiam: ex qua ipsa tamen permulta nescio, quæ tum denique, cum causa aliqua, quæ à me di-

cenda est, desiderat, quero. Quamobrem nisi forte es-  
iam defessus, & si tibi non graues sumus, refer ad illa-  
te, quæ ad ipsius orationis laudem splendoremq; perti-  
nent: quæ ego ex te audire uolui, non ut desperarem  
me eloquentiam consequi posse, sed ut aliquid addisce-  
rem. Tum Crassus, Peruulgatas res requiris, inquit,  
& tibi non incognitas Sulpiti. quis enim de isto genere  
non docuit, non instituit, non etiam scriptum reliquit?  
sed geram morem, et ea duntaxat, quæ mihi nota sunt,  
breuiter exponam tibi: censebo tamen ad eos, qui au-  
ctores & inuentores sunt harum sanè minutarum re-  
rum, reuertendum. Omnis igitur oratio conficitur  
ex uerbis. quorum primum nobis ratio simpliciter ui-  
denda est, deinde coniuncte. Nam est quidam orna-  
tus orationis, qui ex singulis uerbis est: alius qui ex  
continuatis coniunctisq; constat. Ergo utemur uer-  
bis aut ijs, quæ propria sunt, & certa quasi uocabula  
rerum, penè unà nata cum rebus ipsis: aut ijs, quæ  
transferuntur, & quasi alieno in loco collocantur:  
aut ijs, quæ nouamus & facimus ipsi. In proprijs est  
igitur uerbis illa laus oratoris, ut abiecta atque obso-  
leta fugiat, lectis atque illustribus utatur, in quibus  
plenum quiddam & sonans inesse uideatur. Sed in  
hoc uerborum genere priorum delectus est quidam  
habendus, atque is aurium quodam iudicio ponde-  
randus, in quo consuetudo etiam bene loquendi ualet  
plurimum. Etiam hoc, quod uulgo de oratoribus ab  
imperitis dici solet, bonis is uerbis, aut aliquis non  
bonis utitur, non arte aliqua perpenditur, sed  
quodam quasi naturali sensu indicatur: in quo

non magna laus est uitare uitium, (quanquam id est magnum) uerum hoc quasi solum quoddam atque fundamentum est, uerborum usus & copia bonorum. Sed quid ipse ædificet orator, & in quo adiungat artē, id esse à nobis querendum atque explicandum uidetur. Tria sunt igitur in uerbo simplici, quæ orator afferat ad illustrandam atque exornandam orationem, aut inusitatum uerbum, aut nouatum, aut translatum. Inusitata sunt prisca ferè ac uetusta, & ab usu quotidiani sermonis iandiu intermissa, qua sunt poetarum licentia liberiora, quam nostræ: sed tamen raro habet etiā in oratione poeticum aliquod uerbum dignitatem. ne quæ enim illud fugerim dicere, ut Cælius, qua tempestate Pœnus in Italiam uenit: nec prolem aut sobolem, aut effari aut nuncupari: aut, ut tu soles Catule, non rebar aut opinabar: & alia multa, quibus loco positus grandior atque antiquior oratio sæpe uideri solet. Nouantur autem uerba, quæ ab eo, qui dicit, ipso gignuntur ac fiunt: uel coniungendis uerbis, ut hæc, Tū pauor sapientiam mihi oēm ex animo expectorat. Num non uis huius me uersutiloquas malitias. uidetis enim & uersutiloquas, & expectorat ex coniunctione facta esse uerba, non nata. Vel sæpe sine coniunctione uerba nouantur, ut ille sensus disertus in  
 \* digenitalis, ut,  
 Baccarum ubertate incuruescere.  
 Tertius ille modus transferendi uerbilare patet, quem necessitas genuit inopia coacta & angustius, post autem delectatio incunditasque celebravit. nam ut uestis frigoris depellendi causa reperia primo, post adhiberi

cœpta est ad ornatum etiam corporis & dignitatem :  
sic uerbi translatio instituta est inopiæ causa , frequen-  
tata delectationis . nam gemmare uites , luxuriam esse  
in herbis , lætas segetes , etiam rustici dicunt . quod enim  
declarari uix uerbo proprio potest , id translato cū est  
dictū , illustrat id , quod intelligi uolumus , eius rei , quā  
alieno uerbo posuimus , similitudo . Ergo hæ transla-  
tiones quasi mutationes sunt , cum , quod non habeas ,  
aliunde sumas . Illæ paulo audaciores , quæ nō inopiam  
indicāt , sed orationi splendoris aliquid accersunt . qua-  
rum ego quid uobis aut inueniēdi rationem , aut gene-  
ra ponam ? Similitudinis est ad uerbum unum contra-  
cta breuitas : quod uerbum in alieno loco tanquam in  
suo positum , si agnoscitur , delectat : si simile nihil ha-  
bet , repudiatur . Sed ea transferri oportet , quæ aut  
clariorem faciunt rem , ut illa omnia :

-Inhorrescit mare ,  
Tenebræ conduplicantur , noctisq; & nimbum occu-  
cat nigror ,

Flāma inter nubes coruscat , cœlum tonitru contremir ,  
Grando mista imbro largifluo subita præcipitans cadit ,  
Undique omnes uenti erumpūt , seui existūt turbines ,  
Feruēt æstu pelagus .

Omnia ferè , quo essent clariora , translatis per simili-  
tudinem uerbis dicta sunt . Aut quò significetur magis  
res tota , siue facti alicuius , siue consilij , ut ille , qui oc-  
cultantem consulto , ne id , quod ageretur , intelligi pos-  
set , duobus translatis uerbis similitudine ipsa indicat ,  
Quandoquidem iste circumuestit dictis , sepit sedulo .  
Nonnunquam etiam breuitas translatione conficitur ,

ut illud, Si telum manu fugit. Imprudentia teli emis-  
 si breuius proprijs uerbis exponi non potuit, quàm est  
 uno significato translato. Atque hoc in genere per se=  
 pe mihi admirandum uidetur, quid sit, q omnes trans=  
 latis & alienis magis delectatur uerbis, quàm proprijs  
 & suis. Nam si res suum nomen & proprium uoca=  
 bulum non habet, ut pes in naui, ut nexum, quod per  
 libram agitur, ut in uxore diuortium, necessitas cogit,  
 quod non habeas, aliunde sumere: sed in suorum uer=  
 borũ maximã copia, tamen homines aliena multo ma=  
 gis, si sunt ratione translata, delectant. Id accidere  
 credo, uel quòd ingenij specimen est quoddam transili=  
 re ante pedes posita, & alia lóge repetita sumere: uel  
 quòd is qui audit, aliò ducitur cogitatione, neque tamẽ  
 aberrat, quæ maxima est delectatio: uel quòd singulis  
 uerbis res, ac totum simile conficitur: uel quòd omnis  
 trãslatio, quæ quidẽ sumpta ratione est, ad sensus ipsos  
 admouetur, maxime oculorũ, qui est sensus acerrimus.  
 Nò & odor urbanitatis, & mollitudo humanitatis, &  
 murmur maris, et dulcedo orationis, sunt ducta à cæ=  
 teris sensibus. Illa uerò oculorũ multo acriora, quæ po=  
 nũt penè in cõspectu animi, quæ cernere et uidere nò  
 possumus. Nihil est enim in rerũ natura, cuius nos nò in  
 alijs rebus possumus uti uocabulo et nomine: unde enim  
 simile duci potest, (potest aut ex omnibus) indidem uer=  
 bũ unũ, quod similitudinẽ cõtinet, trãslatũ, lumẽ affert  
 oratiõĩ. Quo in genere primũ fugiẽda est dissimilitudo,  
 Caeli ingentes fornices.

Quãuis sphærã in scenam (ut dicitur) attulerit Ennius,  
 tamen in sphæra fornicis similitudo nò potest inesse.

Vine Ulysses dum licet :

Oculis postremum lumen radiatum rape .

Non dixit cape , non pete : haberet enim moram sperantis diutius esse sese uicturum : sed rape : hoc uerbum est ad id aptatum, quod ante dixerat, dum licet .

Deinde uidendum est, ne longe simile sit ductum, Syrtim patrimonij, scopulum libentius dixerim : Charybdis bonorum, uoraginem potius : facilius enim ad ea, quæ uisa, quam ad illa, quæ audita sunt , mentis oculi feruntur . Et quoniam hæc uel summa laus est uerbi transferendi, ut sensum feriat id, quod translatum sit , fugienda est omnis turpitudine earum rerum, ad quas eorum animos, qui audiunt, trahet similitudo. Nolo morte dici Africani castratam esse remp. nolo sterco curiæ dici Glauciam : quamuis sit simile, tamen est in utroque deformis cogitatio similitudinis. Nolo esse aut maius, quam res postulet, Tempestas comessationis: aut minus, comessatio tempestatis . Nolo esse uerbum angustius id quod translatum sit, quam illud proprium ac suum .

Quidnam est obsecro, quod te adiri abnutas?

Melius esset, uetas, prohibes, absterres : quoniam ille dixerat ,

Illico istic ,

Ne contagio mea bonis, umbra ue obsit .

Atque etiam si uereare , ne paulo durior translatio esse uideatur, mollienda est præposito sæpe uerbo : ut si olim M. Catone mortuo pupillum senatum quis relictum diceret , paulo durius : sin , ut ita dicam , pupillum : aliquanto mitius est. etenim uerecunda debet esse translatio, ut deducta esse in alienum locum, non irruisse ,



atque ut precario, non uiuenisse uideatur. Modus autem nullus est florentior in singulis uerbis, nec qui plus luminis afferat orationi. Nam illud, quod ex hoc genere profluit, non est in uno uerbo translato, sed ex pluribus continuatis connectitur, ut aliud dicatur, aliud intelligendum sit:

-Neque me patior iterum ad unum scopulum, & telum classem Achiuū offendere. Atque illud, Erras, erras: nam exultantem te, & praesidentem tibi Reprimunt ualidae legum habena, atque imperij insistent iugo:

Sūpta re simili, uerba eius rei propria deinceps in rem aliam, ut dixi, transferuntur. Est hoc magnum ornamētum orationis, in quo obscuritas fugienda est. Etenim ex hoc genere sunt ea, quae dicuntur aenigmata. nō est autem in uerbo modus hic, sed in oratione, id est in continuatione uerborum. Ne illa quidem traductio atque immutatio in uerbo quandam fabricationem habet, sed in oratione,

Africa terribili tremit horrida terra tumultu.

Pro Afris est sumpta Africa. neque factū uerbū est, ut, -Mare saxifragis undis: neque translatum, ut, Mollitur mare: sed ornandi causa propriū proprio commutatum;

Desine Roma tuos hostes,

Testes sunt, campi magni. -

Gravis est modus in ornatu orationis, & saepe sumendus, ex quo genere haec sunt, Martem belli esse communem, Cererem pro frugibus, Liberum appellare pro ui-

no, Neptunum pro mari, curiam pro senatu, campum pro comitijs, togam pro pace, arma ac tela pro bello. Quo item in genere & uirtutes, & uitia pro ipsis, in quibus illa sunt, appellantur, luxuries quam in domū irrupit, & quod auaritia penetravit, aut fides ualuit, iustitia confecit. Videtis profecto genus hoc totum, cum inflexo commutatoq; uerbo res eadem enunciat, ornatus: cui sunt finitima illa minus ornata, sed tamen non ignoranda, cum intelligi uolumus aliquid aut ex parte totum, ut pro aedificijs, cum parietes, aut tecta dicimus: aut ex toto partem, ut cum unam turmam, equitatum populi R. dicimus: aut ex uno plures, At Romanus homo, tamen, etsi res bene gesta est, Corde suo trepidat. -

aut cum ex pluribus intelligitur unum,

Nos sumus Romani, qui fuimus Rutuli.

aut quocunque modo non ut dictum est, in eo genere intelligitur, sed ut sensum est. Abutimur saepe etiam uerbo non tam eleganter, quam in transferendo, sed etiam si licentius, tamen interdum non impudenter: ut cum grandem orationem pro magna, minutum animum pro paruo dicimus. Verum illa uidetis ne esse nō uerbi, sed orationis, quæ ex pluribus, ut exposui, translationibus connexa sunt? hæc autem, quæ aut immutata esse dixi, aut aliter intelligenda ac dicerentur, sunt translata quodam modo. Ita fit, ut omnis singulorum uerborum uirtus atque laus tribus existat ex rebus, si aut uetustum uerbum sit, quod tamen cōsuetudo ferre possit: aut factum uel coniunctione, uel nouitate, in quo item est auribus consuetudiniq; parcendum: aut

translatum, quod maxime tanquam stellis quibusdam notat & illuminat orationem. Sequitur continuatio uerborum, quæ duas res maxime, collocationē primū, deinde modum quandam formamq; desiderat. Collocationis est componere & struere uerba sic, ut ne'ue asper eorum cōcursus, ne'ue hiulus sit, sed quodā modo coagmentatus & leuis. In quo lepide soceri mei persona lusit is, qui elegātissime id facere potuit, Lucilius, Quā Lepide lexeis compostæ, ut tesserulæ omnes.

Arte pauimento, atque emblemate uermiculato.

Quæ cum dixisset in Albutium illudens, ne à me quidem abstinuit,

Crassum habeo generum, ne rhetoricotero' tu sis.

Quid ergo iste Crassus, quoniam eius abuteris nomine, quid efficit? idem illud scilicet, ut ille uoluit, & ego uellem, melius aliquanto, quā Albutius: uerum in me quidem lusit ille, ut solet. Sed est tamen collocatio conseruanda uerborum, de qua loquor, quæ iunctam orationem efficit, quæ coherētem, quæ lenem, quæ æquabiliter fluētē: id assequemini, si uerba extrema cum consequētibus primis ita iungetis, ut ne'ue aspere concurrant, ne'ue uastius diducantur. Hanc diligentiam subsequitur modus etiam, & forma uerborum, quod iam uereor ne huic Catulo uideatur esse puerile. Versus. n. ueteres illi in hac soluta oratione propemodum, hoc est numeros quosdam nobis esse adhibendos putauerunt: interspirationis enim, non defatigationis nostræ, neque librariorum notis, sed uerborum & sententiarum modo interpūctas clausulas in orationibus esse uoluerunt: idq; princeps Isocrates instituisse fer-

tur, ut inconditam antiquorum dicendi cōsuetudinem  
 delectationis atque aurium causa (quæ admodum scri-  
 bit discipulus eius Naucrates) numeris astringeret.  
 Nanque hæc duo musici, qui erant quondam iidem  
 poeta, machinati ad uoluptatem sunt, uersum atque  
 cantum, ut & uerborum numero, & uocum modo  
 delectatione uincerent aurium satietatem. Hæc igitur  
 duo, uocis dico moderationem & uerborum conclusio-  
 nem, quoad orationis seueritas pati possit, à poetica ad  
 eloquentiam traducenda duxerunt. In quo illud est  
 uel maximum, quòd uersus in oratione si efficitur con-  
 iunctione uerborum, uitium est: & tamen eam con-  
 iunctionem, sicuti uersum, numerose cadere & quadra-  
 re et perfici uolumus. neque est ex multis res una, quæ  
 magis oratorem ab imperito dicendi ignaroq; distin-  
 guat, quàm quòd ille rudis incōdite fundit, quantum  
 potest, & id, quod dicit, spiritu, non arte determinat:  
 orator autem sic illigat sententiam uerbis, ut eam nu-  
 mero quodam complectatur, & ascripto, & soluto.  
 nam cum uinxit modis, & forma, relaxat, & liberat  
 immutatione ordinis: ut uerba neque alligata sint,  
 quasi certa aliqua lege uersus, neque ita soluta, ut ua-  
 gentur. Quoniam igitur modo tantum munus insiste-  
 mus, ut arbitremur nos hanc uim numerose dicendi  
 consequi posse? Non est res tã difficilis, quàm necessa-  
 ria: nihil est. n. tam tenerum, neque tã flexibile, neque  
 quod tam facile sequatur, quocunque ducas, q̃ oratio.  
 ex hac uersus, ex eadem dispares numeri conficiuntur:  
 ex hac hæc etiã soluta uarijs modis, multorumq; gene-  
 rum oratio. non. n. sunt alia sermonis, alia contentionis

uerba : neque ex alio genere ad usum quotidianum ,  
 alio ad scenam pompamq; sumuntur : sed ea nos cum  
 iacentia sustulimus e medio, sicut molliissimam ceram  
 ad nostrum arbitrium formamus & fingimus. itaque  
 tum graues sumus, tum subtiles, tum medium quiddā  
 tenemus : sic institutum nostram sententiam sequitur  
 orationis genus, idq; ad omnem rationem, & aurium  
 uoluptatem, & animorum motum mutatur & uerti  
 tur. Sed ut in plerisque rebus incredibiliter hoc natura  
 est ipsa fabricata, sic in oratione, ut ea, quæ maximam  
 utilitatem in se continerent, eadem haberent plurimū  
 uel dignitatis, uel sepe etiā uenustatis. Incolumitatis  
 ac salutis omnium causa uidemus hūc statum esse hu-  
 ius totius mūdi atque naturæ, rotundum ut cœlū, ter-  
 raq; ut media sit, eaq; sua ui nutuq; teneatur : sol ut  
 circumferatur, ut accedat ad brumale signum, & inde  
 sensim ascendat in diuersam partem : ut luna accessu  
 & recessu suo solis lumen accipiat : ut eadem spatia  
 quinque stellæ dispares, motu cursuq; conficiant . hæc  
 tantā habent uim , ut paulum immutata coherere nō  
 possint ; tantā pulchritudinem, ut nulla species ne ex-  
 cogitari quidem possit ornatior . Referte nunc animū  
 ad hominum uel etiam ceterarū animantium for-  
 mam & figuram : nullam partem corporis sine ali-  
 qua necessitate afflictam, totāq; formam quasi per-  
 fectam reperietis arte, non casu. Quid in arboribus, in  
 quibus non truncus, non rami, non folia sunt denique,  
 nisi ad suam retinendam conseruandamq; naturam?  
 nusquam tamen est ulla pars, nisi uenusta . Linqua-  
 mus naturam, artesq; uideamus. quid tam in nauigio  
 necessarium,

necessarium, quàm latera, quàm carinae, quàm prora,  
 quàm puppis, quàm antemnae, quàm uela, quàm mali;  
 quàm reliqua? quæ tamen hanc habent in specie ue-  
 nustatem, ut non solum salutis, sed etiam uoluptatis  
 causa inuenta esse uideantur. Columnæ & templæ &  
 porticus sustinēt, tamen habēt nō plus utilitatis, quàm  
 dignitatis. Capitolij fastigium illud, & cæterarum  
 ædium, non uenustas, sed necessitas ipsa fabricata est.  
 Nam cum esset habitatio, quemadmodum ex uirga  
 que parte tecti aqua delaberetur, utilitatē templi, fas-  
 tigij dignitas consecuta est: ut etiam si in cælo Capiz  
 colium statueretur, ubi imber esse non posset, nulla si-  
 ne fastigio dignitatem habiturū fuisse uideatur. Hoc  
 in omnibus item partibus orationis euenit, ut utilitatē  
 ac propè necessitatē suauitas quædam & lepos con-  
 sequatur. Clausulas enim atque interpuncta uerbo-  
 rum, animæ interclusio atque angustia spiritus attulē-  
 runt. Id inuentum est ita suauē, ut si cui sit infinitus  
 spiritus datus, tamen cum perpetuare uerba nolumus:  
 id enim auribus nostris gratum est inuentum, quod ho-  
 minum lateribus non tolerabile solum, sed etiam faci-  
 le esse possit. Longissima est igitur complexio uerbo-  
 rum, quæ uolui uno spiritu potest. sed hic naturæ mo-  
 dus est, artis alius: nam cum sint numeri plures, tamē-  
 bum & trochæum frequentē segregat ab oratore Ar-  
 ristoteles Catule uester, qui natura tamen incurrunt  
 ipsi in orationem sermonemq; nostrum, sed sunt insi-  
 gnes percussiones eorum numerorum & minuti pe-  
 des. Quare primum ad heroum nos dactyli & anapa-  
 esti & spondei pedem inuitat, in quo impune pro-

gredi licet duos duntaxat pedes, aut paulo plus, ne plane in uersum, aut similitudinem uersuum incidamus. Aliae sunt geminae, quibus hi tres heroi pedes in principia continuandorum uerborum satis decore cadunt. Probatur autem ab eodem illo maxime pæan, qui est duplex. Nam aut à longa oritur, quam tres breues consequuntur, ut hæc uerba, desinite, incipite, comprimite: aut à breuibus deinceps tribus extrema producta atque longa: sicut illa sunt, domuerant, sonipedes. Atque illi philosopho ordiri placet à superiore pæane, posteriore finire. est autem pæan hic posterior non syllabarum numero, sed aurium mensura, quod est acrius iudicium & certius, par fere cretico, qui est ex longa & breui & longa: ut,

Quid petam præsidi, aut exequar? quo ue nunc.

À quo numero exorsus est Fannius, si Quirites minas illius. Hunc ille clausulis aptiorem putat, quas uult longa plerunque syllaba terminari. Neque uero hæc tam acrem curam diligetiamque desiderant, quam est illa poetarum, quos necessitas cogit, & ipsi numeri ac modi, sic uerba uersu includere, ut nihil sit ne spiritu quidem minimo breuius aut longius, quam necesse est. Liberior est oratio, & plane, ut dicitur, sic & est uere soluta, non ut fugiat tamen aut erret, sed ut sine uinculis sibi ipsa moderetur. Namque ego illud assentior Theophrasto, qui putat orationem, quæ quidem sit polita, atque facta quodam modo, non astrictæ, sed remissius numerosam esse oportere. Etenim sicut ille suspicatur ex illis modis, quibus hic usitatus uersus efficitur, post anapestus procerior quidam numerus efflo-



ruit, inde ille licentior et diuitior fluxit dithyrambus, cuius membra & pedes, ut ait idem, sunt in omni locupletati oratione diffusa. Et si numerosum est id in omnibus sonis atque uocibus, quod habet quasdam impressiones, & quod metiri possumus interuallis equalibus: recte genus hoc numerorum, dummodo ne continuum sit, in orationis laude ponetur. nam si rudis & indocta putanda est illa sine interuallis loquacitas perennis & profluens: quid est aliud cause cur repudietur, nisi quod hominum aures uocem natura modulantur ipsa? quod fieri, nisi inest numerus in uoce, non potest. Numerus autem in continuatione nullus est: distinctio & equalium & saepe uariorum interuallorum percussio numerum conficit: quem in cadentibus guttis, quod interuallis distinguuntur, notare possumus, in amni precipitante non possumus. Quod si continuatio uerborum hac soluta multo est aptior atque iucundior, si est articulis membrisque distincta, quam si continuata ac producta: uerba illa modificata esse debebunt: quae si in extremo breuiores sunt, infringitur ille quasi uerborum ambitus: sic enim has orationis conuersiones Graeci nominant. Quare aut paria esse debent posteriora superioribus, extrema primis, aut, quod etiam est melius & iucundius, longiora. Atque haec quidem ab ijs philosophis, quos tu maxime diligis Catule, dicta sunt: quod eo saepius testificor, ut auctoribus laudandis ineptiarum crimen effugiam. Quam tandem, inquit Catulus? aut quid disputatione ista afferri potest elegatius, aut omnino di-

ci subtilius? At enim uereor, inquit Crassus, ne hæc aut difficiliora istis ad persequendum esse uideantur, aut, quia non traduntur in uulgari ista disciplina, nos ea maiora ac difficiliora uideri uelle uideamur. Tum Catulus, Erras, inquit, Crasse, si aut me, aut horum quenquam putas à te hæc opera quotidiana & perua gata expectare: ista, quæ dicis, dici uolumus, neque tam dici, quàm isto dici modo: neque tibi hoc pro me solum, sed pro his omnibus sine ulla dubitatione respon deo. Ego uero, inquit Antonius, inueni tandem quem negare in eo, quem scripsi, libello me inuenisse eloquẽ tem: sed eo te ne laudandi quidem causa interpellauĩ, ne quid de hoc tam exiguo sermonis tui tẽpore uerbo uno meo diminueretur. Hanc igitur, Crassus inquit, ad legem cum exercitatione, tum stylo, qui & alia & hoc maxime ornat ac limat, formãda uobis oratio est. Neque tamen hoc tanti laboris est, quanti uidetur, nec sunt hæc rhythmicorum ac musicorum acerrima nor ma dirigenda: & efficiendum est illud modo uobis, ne fluat oratio, ne uagetur, ne insistat interius, ne ex currat longius, ut membris distinguatur, ut conuer siones habeat absolutas. Neque semper utendum est perpetuitate, et quasi conuersione uerborum, sed sepe capienda membris minutioribus oratio est, quæ tamen ipsa membra sunt numeris uinciẽda. Neque uos pãĩ, aut herous ille cõturbet. ipsi occurrẽt orationi, ipsi ina quam se offerent & respondebunt nõ uocati: consue tudo modo illa sit scribendi atque dicendi, ut senten tiæ uerbis finiantur, eorumq; uerborum iunctio nas scatur à proceris numeris ac liberis, maxime heroo &

pæane priore aut cretico, sed uarie distinteq; cõfidat.  
 Notatur enim maxime similitudo in conquiescendõ: et  
 si primi & postremi illi pedes sunt hac ratione seruati,  
 medij possunt latere, modo ne circuitus ipse uerborum  
 sit aut breuior, quàm aures expectet; aut longior, quàm  
 uires atque anima patiatur. Clausulas autem diligen-  
 tius etiã seruandas esse arbitror, quàm superiora, quòd  
 in his maxime perfectio, atque absolutio iudicatur. nã  
 uersus aequè prima, & media, & extrema pars atten-  
 ditur; qui debilitatur, in quacunque sit parte titubant;  
 in oratione autem prima pauci cernunt, postrema ple-  
 rique, quæ quoniam apparent & intelliguntur, uariã  
 da sunt, ne aut animorum iudicijs repudientur, aut au-  
 rium satietate. Duo enim aut tres sunt ferè extremi  
 seruandi & notandi pedes, si modo non breuiora &  
 præcisa erunt superiora, quos aut chorios, aut heroos,  
 aut alternos esse oportebit, aut in pæane illo posteriore,  
 quem Aristoteles probat, aut ei pari cretico. Horum  
 uicissitudines efficient, ut neque ij satiètur, qui audièt;  
 fastidio similitudinis, nec nos id, quod faciemus, operã  
 dedita facere uideamur. Quòd si Antipater ille Sidor-  
 nius, ille quẽ tu probe Catule meministi, solitus est uer-  
 sus hexametros aliosq; uarijs modis atque numericis fun-  
 dere ex tempore; tantumq; hominis ingeniosi ac me-  
 moris ualuit exercitatio, ut cum se mente ac uoluntate  
 coniecisset in uerbum, uerba sequerentur: quanto id fa-  
 cilius in oratione, exercitatione, & consuetudine adhi-  
 bita consequemur? Illud autem ne quis admiretur;  
 quonam modo. hæc uulgus imperitorum in audien-  
 do. notet: cum in omni genere, tum in hoc ipso

magna quædam est uis, incredibilisq; natura. Omnes enim tacito quodam sensu sine ulla arte, aut ratione, quæ sint in artibus, ac rationibus recta ac praua, diiudicant: idq; cum faciunt in picturis & in signis & in alijs operibus, ad quorum intelligentiam à natura minus habent instrumenti, tum multo ostendunt magis in uerborum, numerorum, uocumq; iudicio, quod ea sunt in communibus infixæ sensibus, neque earum rerum quenquam funditus natura uoluit esse expertem. Itaque non solum uerbis arte positis mouentur omnes, uerum etiam numeris ac uocibus. Quotus enim quisque est, qui teneat artem numerorum ac modorum? At in his si paulum modo offensum est, ut aut contractione breuius fieret, aut productione longius, theatra tota re clamant. Quid, hoc non idem sit in uocibus? ut à multitudine & populo non modo cateruæ atque conuentus, sed etiam ipsi sibi singuli discrepantes eiiciantur? Mirabile est, cum plurimum in faciendo intersit inter doctum & rudem, quam non multum differat in indicando. Ars enim, cum à natura profecta sit, nisi naturam moueat ac delectet, nihil sanè egisse uideatur. Nihil est autem tam cognatum mentibus nostris, quam numeri atque uoces, quibus & excitamur & incēdimur & lenimur & languescimus, & ad hilaritatem & ad tristitiam sæpe deducimur: quorum illa summa uis carminibus est aptior & cantibus, non neglecta, ut mihi uidetur, à Numa rege doctissimo, maioribusq; nostris, ut epularum solenniū fides ac tibie, saliorumq; uersus indicant; maxime autem à Græcia uetere celebrata: quibus utinam, similibusq; de rebus

disputari, quàm de puerilibus his uerborum translationibus maluissetis. Verum ut in uersu uulgus, si est peccatum, uidet: sic, si quid in nostra oratione claudicat, sentit: sed poetæ non ignoscit, nobis concedit, tacite tamen omnes non esse illud, quod diximus, aptum perfectumq; cernunt. Itaque illi ueteres, sicut hodie etiam nonnullos uidemus, cū circuitum & quasi orbem uerborum conficere non possent, (nam id quidem nuper uel posse uel audere cœpimus) terna, aut bina, aut nōnulli singula etiam uerba dicebant: qui in illa infantia naturali illud, quod aures hominum flagitabant, tenebant tamen, ut & illa essent paria, quæ dicerent, & æqualibus interpirationibus uterentur. Exposui ferè, ut potui, quæ maxime ad ornatum orationis pertinere arbitrabar: dixi enim de singulorum laude uerborum, dixi de coniunctione eorum, dixi de numero atque forma. Sed si habitum etiam orationis, & quasi colorem aliquem requiritis, est plena quadam & tamen teres & tenuis, & non sine neruis ac uiribus, & ea quæ particeps utriusque generis quadam mediocritate laudatur. His tribus figuris insidere quidam uenustatis non fuco illitus, sed sanguine diffusus debet color. Tum denique nobis hic orator ita conformandus est & uerbis & sententijs, ut, quemadmodum qui utuntur armis aut palæstra, non solum sibi uitandi aut feriendi rationem esse habendam putant, sed etiam ut cum uenustate moueantur: sic uerbis quidem ad aptam compositionem & condecentiā, sententijs uero ad gravitatem orationis utatur, ut ij, qui in armorū tractatione uersantur. Formantur autē

et uerba. et sententiæ penè innumerabiles, quod satis scio notum esse uobis; sed inter conformationem uerborum et sententiarum hoc interest, quòd uerborum tollitur, si uerba mutaris; sententiarum permanet, quibuscunque uerbis uti uelis. Quod quidem uos, etsi facitis, tamen admonendos puto, ne quid esse aliud oratoris putetis, quod quidem sit egregiū atque mirabile, nisi in singulis uerbis illa tria tenere, ut translatis utamur frequenter, interdumq; factis, raro autem etiam peruetustis: in perpetua autem oratione, cum et coniunctionis lenitatem, et numerorum, quam dixi, rationem tenuerimus, tum est quasi luminibus distinguenda et frequentanda omnis oratio sententiarum atque uerborum. Nam et commoratio una in re permultum mouet, et illustris explanatio: rerumq;, quasi gerantur, sub aspectū penè subiectio, quæ et in exponenda re plurimum ualet, et ad illustrandum id, quod exponitur, et ad amplificandū, ut ijs, qui audiēt, illud, quod augebimus, quantū efficere oratio poterit, tantum esse uideatur: et huic contraria sæpe præcisio est, et plus ad intelligendum, quàm dixeris, significatio, et distincte concisa breuitas, et extenuatio; et huic adiuncta illusio à præceptis Cæsaris non abhorrens, et ab re non longa digressio: in qua cum fuerit delectatio, tum redditus ad rem aptus et concinnus esse debet: propositioq; quid sis dicturus, et ab eo, quod est dictum, seiunctio, et redditus ad propositum, et iteratio, et rationis apta conclusio: tū augendi minuendiue causa ueritatis superlatio atque traiectio et rogatio, atque huic finitima quasi percunctatio expositioq; sententiæ suæ, tū illa

illa quæ maxime quasi irrepit in hominum mentes, alia dicentis ac significantis dissimulatio, quæ est periuenda, cum in oratione non contentione, sed sermone tractatur: deinde dubitatio, tum distributio, tum correctio, uel ante, uel postquam dixeris, uel cum aliquid à te ipso reijcias: præmunio est etiam ad id, quod aggreddi, & reiectio in alium: communicatio, quæ est quasi cum ijs ipsis, apud quos dicas, deliberatio, morum, ac uitæ imitatio uel in personis, uel sine illis, magnum quoddam ornamentum orationis, & aptum ad animos conciliandos uel maxime, sæpe autem etiam ad commouendos. Personarum ficta inductio, uel grauisimum lumen augendi, descriptio, erroris inductio, & in hilaritatem impulsio, ante occupatio: tum duo illa, quæ maxime mouent, similitudo & exemplum, digestio, interpellatio, contentio, reticentia, commendatio, uox quædam libera atque etiam effrenatior augendi causa, iracundia, obiurgatio, promissio, deprecatio, obsecratio, declinatio breuis à proposito, nõ ut superior illa digressio, purgatio, conciliatio, latio, optatio, atque execratio. His ferè luminibus illustrant orationem sententie. Orationis autem ipsius tanquam armorum est uel ad usum comminatio & quasi petitio, uel ad uenustatem ipsa tractatio. nam & geminatio uerborum habet interdum uim, leporem aliàs, & paulum immutatum uerbum atque deflexum: & eiusdem uerbi crebra tum à primo repetitio, tum in extremum cõuersio, & in eadem uerba impetus, & concursio, & adiunctio, & progressio, & eiusdem uerbi crebrius positi quædam distinctio, & reuocatio uerbi, & illa quæ



similiter desinunt, aut quæ cadunt similiter, aut quæ paribus paria referuntur, aut quæ sunt inter se similia. Est etiam gradatio quedam, et conuersio, et uerborum concinna transgressio, et contrarium, et dissolutum, et declinatio, et reprehensio, et exclamatio, et imminutio, et quod in multis casibus ponitur, et quod de singulis rebus propositis ductum refertur ad singula, et ad propositum subiecta ratio, et item in distributis supposita ratio et permissio, et rursum alia dubitatio, et improuisum quiddam, et dinumeratio, et alia correctio, et disputatio, et quod continuatum, et interruptum, et imago, et sibi ipsi responsio, et immutatio, et disiunctio, et ordo, et relatio, et digressio, et circumscriptio. Hæc enim sunt ferè, atque horum similia uel plura etiam esse possunt, quæ sententijs orationem, uerborumq; conformationibus illuminent.

Quæ quidem te Crasse uideo, inquit Cotta, quòd nota esse nobis putes, sine definitionibus et sine exemplis efudisse. Ego uero, inquit Crassus, ne illa quidem, quæ supra dixi, noua uobis esse arbitrabar, sed uoluntati uestrum omnium parui. His autem de rebus sol me ille admonuit ut breuior essem, qui ipse iam præcipitans, me quoque hæc præcipientem penè euoluere coegit. Sed tamen huius generis demonstratio est, et doctrina ipsa uulgaris, usus autem grauissimus, et in hoc toto dicendi studio difficillimus. Quamobrem quoniam de ornatu omni orationis, si non sunt omnes patefacti, at certe commonstrati loci, nunc, quid aptum sit, hoc est, quod maxime deceat in oratione, uideamus: quanquam id quidem perspicuum est, non omni

*causæ, nec auditori, neque personæ, neque temporicon-*  
*gruere orationis unum genus. Nam & causæ capitū*  
*aliū quendam uerborum sonum requirūt, aliū re-*  
*rum priuatarum atque paruarum: & aliud dicendū*  
*genus deliberationes, aliud laudationes, aliud iudicia,*  
*aliud sermones, aliud consolatio, aliud obiurgatio, aliud*  
*disputatio, aliud historia desiderat. Refert etiam quī*  
*audiant, senatus, an populus, an iudices: frequentes,*  
*an pauci, an singuli: & quales ipsi quoque oratores,*  
*quæ sint ætate, honore, auctoritate, debet uideri: tem-*  
*pus pacis an belli, festinationis an otij. Itaque hoc lo-*  
*co nihil sanè est quod præcipi posse uideatur, nisi ut fi-*  
*guram orationis plenioris, & tenuioris, & item illius*  
*mediocris ad id, quod agimus, accommodatam deliga-*  
*mus: ornamentis ijsdem uti ferè licebit, aliàs conten-*  
*tius, aliàs summissius: omniq; in re posse quod deceat*  
*facere, artis & naturæ est: scire quid, quandoq; de-*  
*ceat, prudentiæ. Sed hæc ipsa omnia perinde sunt,*  
*ut aguntur. Actio inquam in dicendo una domina-*  
*tur: sine hac summus orator esse in numero nullo po-*  
*test, mediocris hac instructus summos sæpe superare.*  
*Huic primas dedisse Demosthenes dicitur, cum rogare-*  
*tur quid in dicendo esset primum, huic secundas, huic*  
*tertias. Quo mihi melius etiam illud ab Aeschine di-*  
*ctum uideri solet, qui cum propter ignominiam iudicij*  
*cessisset Athenis, & se Rhodium contulisset, rogatus à*

edita : quam cum suauissima & maxima uoce legis-  
set, admirantibus omnibus, Quanto, inquit, magis ad-  
miraremini, si audissetis ipsum? Ex quo satis signifi-  
cavit, quantum esset in actione, qui orationem eadem  
aliā esse putaret auctore mutato. Quid fuit in  
Graccho, quem tu Catule melius meministi, quod me  
puero tantopere ferretur? Quo me miser conferam?  
quo uertam? in Capitolium ne? at fratris sanguine  
redundat. an domum? matrem ne ut miseram la-  
mentantemq; uideam & abiectam? Quæ sic ab illo  
acta esse constabat, oculis, uoce, gestu, inimici ut lacry-  
mas tenere non possent. Hæc eo dico pluribus, quod  
genus hoc totum oratores, qui sunt ueritatis ipsius acto-  
res, reliquerunt, imitatores autem ueritatis histriones  
occupauerunt. At sine dubio in omni re uincit imi-  
tationem ueritas: sed ea si satis in actione efficeret  
ipsa per sese, arte profecto non egeremus: uerum quia  
animi permotio, quæ maxime aut declaranda, aut imi-  
tanda est actione, perturbata sæpe ita est, ut obscure-  
tur atque penè obruatur, discutienda sunt ea quæ  
obscurant, & ea quæ sunt eminentia & prompta su-  
menda. Omnis enim motus animi suum quendam  
à natura habet uultum & sonum et gestum: totumq;  
corpus hominis, & eius omnis uultus, omnesq; uoces, ut  
nerui in fidibus ita sonant, ut à motu animi quoque  
sunt pulsæ. nam uoces, ut chordæ, sunt intentæ, quæ  
ad quenque tactum respondeant, acuta, grauis, cita,  
tarda, magna, parua: quas tamen inter omnes est suo  
quoque in genere mediocris. Atq; etiā illa sunt ab his  
delapsa plura genera, lene, asperum, contractum, diffusum,  
continenti

continenti spiritu, intermisso, fractum, scissum, flexo  
sono, attenuatum, inflatum. Nullum est enim horum  
similium generum, quod non arte ac moderatione tra-  
ctetur. hi sunt aëtori, ut pictori expositi ad uariandū  
colores. Aliud enim uocis genus iracundia sibi sumiat,  
acutum, incitatum, crebro incidens.

Impius hortatur me frater, ut meos malis miser  
Manderem natos. - Et ea quæ tu dudum Antoni pro-  
tulisti, Segregare abs te ausus. Et  
Ecquis hoc animaduertit? uincite. - Et Atreus ferè to-  
tus. Aliud misratio ac moeror, flexibile, plenum, inter-  
ruptum, flebili uoce,

Quò nunc me uertam? quod iter incipiam ingredi?  
Domū paternam ne? an ne ad Pelie filias? Et illa,  
O pater, o patria, o Priami domus. Et quæ sequuntur,  
Hec omnia uidi inflammari,  
Priamo uì uitam euitari.

Aliud metus, demissum, et hæsitans, et abiectum,  
Multi modis sum circumuentus, morbo, exilio, atque  
inopia,

Tum pauor sapientiam mihi omnem ex animo expe-  
torat.

Alter terribilem minitatur uitæ cruciatum et necem,  
Quæ nemo est tam firmo ingenio et tanta cōfidetia,  
Quin refugiat timido sanguine, atque exalbescat metu,  
Aliud uis, contentum, uehemens, imminens, quadam in-  
citatione orauitatis.

Qui illius acerbum cor contundam & comprimam.  
Aliud uoluptas, effusum, lene, tenerum, hilaratum ac  
remissum,

Sed mihi cum tetulit coronam ob collocandas nuptias,  
Tibi ferebat, cum simulabat sese alteri dare,  
Tum ad te ludibunda docte & delicate detulit,  
Aliud molestia, sine commiseratione graue quiddam,  
& uno pressu ac sono obductum,

Qua tempestate Paris Helenā innuptis iunxit nuptiis,  
Ego tum grauida expletis iam fere ad pariedum men=  
sibus,

Per idem tempus Polydorum Hecuba partu postremo  
parit.

Omnes autem hos motus subsequi debet gestus, nō hic  
uerba exprimens scenicus, sed uniuersam rem & sen=  
tentiam non demonstratione, sed significatione decla=  
rans, laterum inflexione, hac forti ac uirili, non ab sce=  
na et histrionibus, sed ab armis, aut etiam à palæstra.  
Manus autem minus arguta, digitis subsequens uerba,  
non exprimens: brachium procerius, proiectum quasi  
quoddam telum orationis: supplotio pedis in cōtentio=  
nibus aut incipiendis aut finiendis. Sed in ore sunt o=  
mnia. In eo autem ipso dominatus est omnis oculorū,  
quo melius nostri illi senes, qui personatum ne Rosciū  
quidem magnopere laudabant. Animi est enim omnis  
aētio, & imago animi uultus est, indices oculi. nam  
hæc est una pars corporis, quæ, quot animi motus sunt,  
tot significationes & commutationes possit efficere:  
neque uero est quisquam, qui eadem contuens efficiat.  
Theophrastus quidem Tauriscum quendam dixit aēto.

rem auersum solitum esse dicere, qui in agendo con-  
uens aliquid pronuntiaret. Quare oculorū est magna  
moderatio: nā oris nō est nimiū mutāda species, ne aut  
ad ineptias, aut ad prauitatem aliquā deferamur. O-  
culi, sunt quorum tum intentione, tum remissione, tū  
cōiectu, tum hilaritate motus animorum significemus  
apte cum genere ipso orationis: est enim actio quasi ser-  
mo corporis, quo magis menti congruens esse debet.

Oculos autem natura nobis, ut equo & leoni setas,  
caudam, aures, ad motus animorum declarandos de-  
dit. Quare in hac nostra actione secundum uocē uul-  
tus ualeat, is autem oculis gubernatur. Atque in ijs o-  
mnibus, quæ sunt actionis, inest quædam uis à natu-  
ra data, quare etiam hac imperiti, hac uulgi, hac de-  
nique barbari maxime commouentur: uerba enim  
neminem mouent, nisi eum qui eiusdem linguæ socie-  
tate coniunctus est, sententiæ sæpe acutæ non acu-  
torum hominum sensus præteruolant, actio, quæ præ-  
se motum animi fert, omnes mouet: ijsdem enim o-  
mnium animi motibus concitantur, & eos ijsdem no-  
tis & in alijs agnoscunt, & in se ipsi iudicant. Ad  
actionis autē usum atque laudem maximam sine du-  
bio partem uox obtinet, quæ primum est optanda no-  
bis: deinde, quæcunque erit, ea tuenda: de quo illud iā  
nihil ad hoc præcipiendi genus, quemadmodū uoci ser-  
uiatur, equidem magnopere cenſeo ſeruiendū. Sed illud



utilius, quàm crebra mutatio: nihil perniciosius, quàm  
 effusa sine intermissione contentio. Quid? ad aures  
 nostras, & actionis suauitatem, quid est uicissitudine,  
 & uarietate, & commutatione aptius? Itaque idem  
 Gracchus, quod potes audire Catule ex Licinio cliente  
 tuo literato homine, quem seruū sibi ille habuit ad ma-  
 num, cum eburneola solitus est habere fistula, qui staret  
 occulte post ipsum cum concionaretur, peritum homi-  
 nem, qui instaret celeriter eum sonum, quo illum aut  
 remissum excitaret, aut à contentione reuocaret. Au-  
 diui mehercule, inquit Catulus, & saepe sum admiratus  
 hominis cum diligentiam, tum etiam doctrinam &  
 scientiam. Ego uero, inquit Crassus, ac doleo quidem  
 illos uiros in eam fraudem in republica esse delapsos.  
 quanquam ea tela textitur, & ea in ciuitate ratio ui-  
 uendi, ac posteritatis ostenditur, ut eorum ciuium,  
 quos nostri patres non tulerunt, iam similes habere cu-  
 piamus. Mitte obsecro inquit Crasse Iulius sermonem  
 istum, & te ad Gracchi fistulam refer, cuius ego non-  
 dum planè rationem intelligo. In omni uoce, inquit  
 Crassus, est quiddam medium, sed suum cuique uoci.  
 huc gradatim ascendere uocem, utile & suauē est. nā  
 à principio clamare, agreste quiddā est: & illud idem  
 ad firmandum est uocem salutare. Deinde est quiddā  
 contentionis extremum, quod tamē inferius est, quàm  
 acutissimus clamor, quò te fistula progredi nō sinet, &  
 tamen ab ipsa contentione reuocabit. Est item contra  
 quiddam in remissione grauiissimum, quò tanquam  
 sonorum gradibus descenditur. Hæc uarietas, & hic  
 per omnes sonos uocis cursus & se tuebitur, & actioni



afferet suauitatem, sed fistulatorem domi relinquetis, sensum huius consuetudinis uobiscum ad forum deferetis. Edidi quæ potui, non ut uolui, sed ut me temporis angustia coegerunt. scitum est enim, causam conferre in tempus, cum afferre plura, si cupias, non queas. Tu uero, inquit Catulus, collegisti omnia, quatum ego possum iudicare, ita diuinitus, ut non à Græcis didicisse, sed eos ipsos hæc docere posse uideare. Me quidem istius sermonis participem factum esse gaudeo: ac uel le ut meus gener sodalis tuus Hortensius affuisset, quæ quidem ego cōfido omnibus istis laudibus, quas tu oratione complexus es, excellentem fore. Et Crassus, Fore dicis, inquit? ego uero esse iam iudico, & tum iudicauim, cum me Cōsule in senatu causam defendit Africa, nuperq; etiam magis cum pro Bithyniæ rege dixit. Quam ob rem recte uides Catule: nihil enim isti adolescenti neque à natura, neque à doctrina deesse sentio. Quo magis est tibi Cotta, & tibi Sulpiti uigilandum, ac laborandum: non enim ille mediocris orator uestræ quasi succrescit ætati, sed & ingenio peracri, et studio flagranti, & doctrina eximia, & memoria singulari. cui quanquam faueo, tamen illum ætati suæ præstare cupio: uobis uero illum tanto minorem præcurrere uix honestum est. Sed iam surgamus, inquit, nosq; curemus, & aliquando ab hac cō-

**SERIES LITERARVM.**

**ABCDEFGHIKLMNOPQ R.**

*Omnes sunt quaterniones, præter R quinternionem.*

**APVD ALDI FILIOS.**

**VENETIIS, M D L.**

